





北京大學《儒藏》編纂與研究中心

圖書在版編目(CIP)數據

儒藏. 精華編. ——三/北京大學《儒藏》編纂與研究中心編. —北京:北京大學出版社,2014.5

ISBN 978-7-301-11831-3

I.①儒··· Ⅱ.①北··· Ⅲ.①儒家 Ⅳ.①B222

中國版本圖書館 CIP 數據核字(2014)第 063476 號

書 名: 儒藏(精華編一一三)

著作責任者:北京大學《儒藏》編纂與研究中心編

責任編輯:沈瑩瑩

標 準 書 號: ISBN 978-7-301-11831-3/B • 0517

出版發行:北京大學出版社

地 址:北京市海淀區成府路 205 號 100871

網 址: http://www.pup.cn 新浪官方微博: @北京大學出版社

電子信箱: dianjiwenhua@163.com

電 話: 郵購部 62752015 發行部 62750672 編輯部 62756694 出版部 62754962

印 刷 者:北京中科印刷有限公司

經 銷 者:新華書店

787 毫米×1092 毫米 16 開本 35 印張 490 千字 2014 年 5 月第 1 版 2014 年 5 月第 1 次印刷

定 價:500.00元

未經許可,不得以任何方式複製或抄襲本書之部分或全部内容。

版權所有,侵權必究

舉報電話: 010-62752024 電子信箱: fd@pup. pku. edu. cn

教育部哲學社會科學研究重大課題攻關項目

北京 大學「九八五工程」重點項目國家 社會科學基金重大項目 一十一五」國家重點圖書出版規劃項目・重大工程出版規劃

《儒藏》精華編第一一三册

首席總編纂 季羡林

項目首席專家 湯一介

湯一介

總

編

纂

龐

朴

孫欽善

安平秋 (按年齡排序)

靜 李存山

本

册

主

編

陳

儒藏》精華編凡例

爲儒 則的典籍的叢編。 家經典和反映儒家思想、體現儒家經世 、中國傳統文化以儒家思想爲中心。 收書時限自先秦至清代結束 《儒 做 人原 藏

《儒藏 》精 華 編 爲《儒藏 》的 部分,選收《儒

藏 $\check{+}$ 的精要書

寫者一 互見。 漢文寫作的儒學著作,編爲海外文獻部類 已收入入選的個人叢書或全集者,僅存目録,並注明 分類法分類,大類、小類基本參照《中國叢書綜録 土文獻。 《中國古籍善本書目》,於個別處略作調整。 三、《儒藏》精華編所收書籍,包括傳世文獻和 律收其釋文文本。 出土文獻單列爲 傳世文獻按《四庫全書總目》經史子集四 韓國、日本、越南儒 個部類,原件以古文字書 凡單 學者用 》和 書 部 出

> 四、所 收書籍 的篇目卷次,一 仍底本原 然貌,不

選

編,不改編,保持原書的完整性和 獨 立 性

校爲主,

爲主,酌校異同。 勘價值的版本爲校本。 確定内容完足、精確率高的版本爲底本,精選有 五、對人選書籍進行簡 校記力求規範、精煉 出校堅持少而精,以 要校勘。 以對 校正 誤 校

例, 進行規範化標點。 六、根據現行標點符號用法,結合古籍標點 專名號除書名號用 角 號 通

外,其他一律省略。

落。 正文原已分段者,不作改動。 七、對較長的篇章,根據文字内容,適當 千字以内的 劃 短文 分段

般不分段。

及其他方 及整理 出 介紹作者生平、該書成書背景、主要内容及影 現順序 八、各書卷端由整理者撰寫《校點説明》, 有關情況。 時所確定的底本、校本(舉全稱後括注 前詳後略 重複出現的作者,其生平事蹟按 簡 響,以 簡要 稱

九、本書用繁體漢字豎排,小注 律排爲單行。

四書總義之屬

經

部

四書類

四書纂疏〔南宋〕趙順孫 …………………

先進第十一

朱子集註 後學趙順孫纂疏

其稱賢者蓋三倍於否,亦足以見賢之衆矣。 勸 此篇多評弟子賢否。 ,評其否,則不能者勉,無非教也。 愚謂: 評其賢,則能 然此篇所及, 凡 者

言行者四, 二十五章。 而其 胡氏 一直 曰:「此篇記閔子 稱閔子,疑閔氏 騫

門人所記也。」

子曰:「先進於禮樂,野人也,後進於禮樂,

君子也。

先進後進,猶言前輩後輩。 野人,謂郊外

論語卷第六

限不好底聲音,只是繁碎耳。」 實行許多威儀,後人便忒好看。 只是一箇禮樂,用得自不同。 爲野人。 進於禮樂,文質得宜,今反謂之質朴,而以 人彈琴,便雍容平淡,自是好聽。● 人便近於巧言令色。 曰:「問:「先進、後進、禮樂文質何以不同?」曰:「禮 之彬彬,而以爲君子。蓋周末文勝,故時 之民。君子,謂賢士大夫也。 人之言如此,不自知其過於文也。」《語録 後進於禮樂,文過其質,今反 如古樂雖不可 如升降揖遜,古人只是誠 古人只是正容謹 若弄手弄脚, 得而見,只如誠實底 程子曰:「先 撰 節,後 出 謂 樂

如用之,則吾從先進。」

非夫子之言? 蓋欲損過以就中 樂也。]孔子既述時人之言,又自言其如 用之,謂用禮樂。 從先進,安知非損文從質邪? 也。黄氏曰:「野人、君子,安知 輔氏曰:「言若當職任 而 日: 用夫禮 此,

0 聽」,原誤作「惡」,今據四庫本改。

中之用,則有不可易者。」 轉移風俗者,其過化存神之妙,雖未易窺測,至於損 俗易得逐流而徇末,聖人常欲損過以就中。 主於質,後輩於禮樂,又安能皆得中邪?」○輔氏曰: 爲貴,不應捨君 用禮樂,當以 中爲尚,不得已而 子而 從野 人也。 遵時 況前 王之制 輩 於 禮樂,亦 ,則當以 聖人之所以 過就 未嘗 從周 「時

△子曰:「從我於陳、蔡者,皆不及門也。從,

於患難之中也。時皆不在門。故孔子思之,蓋不忘其相從明子嘗厄於陳、蔡之間,弟子多從之者,此

游,子夏。」行,去聲。宰我,子貢。政事:冉有,季路。文學:子宰我,子貢。政事:冉有,季路。文學:子德行:顏淵,閔子騫,冉伯牛,仲弓。言語:

并目其所長,分爲四科。孔子教人各因其辭,稱字者,弟子自相謂之辭,亦或弟子門人之辭。」而人所記?」曰:「凡稱名者,夫子之辭,弟子師前相謂之弟子因孔子之言,記此十人,或問:「何以知門

門,不敢止此十人也。」 也? 爲證,而斷十哲 七十人,則豈獨此十人可名爲哲哉? 氏曰:「夫子之門,如此十人者固高矣,然受業身通 子傳道而不與焉,故知十哲世俗 于陳、蔡者爾,門人之賢者固 所學從人之路也。□○程子曰 目,蓋亦因其所得而稱之,舉其最優者而爲言也,非言其 廢耳,非捨夫切己務內而專事夫言語 之法,當先使之切己務内,而 此,非若三者爲一事之長而已也。]○黄氏曰: 行爲先。 者,學於《詩》、《書》、《禮》、《樂》之文,而能言其意者也。 善爲辭令者也。 「教人各因其材」、《或問》云「教人各因所長以人」。 蓋夫子教人,使各因其所長以入於道,然其序 心體道,默契於中,篤志力行,不言而信者也。 材,於此 曰: 誠以躬行實造,具體聖人,學之所貴,尤 聖門問答之間,或及言語 可見。 爲世俗 政事者,達於爲國治民之事者也。 或問: 之論 「四科之目。」曰: 所以 今乃因 教學者使求於聖人之 ,或及政事,皆 四 一言語 故 、政事 不 科 程子引曾子以 政 乃 止 論 也 德 事 從 則 此 也 言語 偂 「《註》云 行 四 在所不 必 夫子)。」輔 入,何 者,潛 教人 者凡 |科之 以 曾

〇子曰:「回也非助我者也,於吾言無所不

説。」説,音悦。

不待問 以深贊顔氏 П 受而略無豪髮之疑矣。」○胡 之意,謂其無所不說,則凡精凡粗若鉅若細,莫不懽然領 深喜之。 稟高明,功夫深熟,一聞夫子之言,默識心融,觸處洞 通 起子,則亦不能無也。」顏子於聖人之言,默識心 者之助哉! 後有所知,亦不以人之不問而遂有所昧,顧豈有待於學 也。 助 一,豈 無 我,若子夏之起予,因疑問 輔氏曰:「聖人之心,義理昭 辨 真 所疑問。 而 以 曉 胡氏曰:「以非 然疑 助 然如見。」其辭若 一云一爾。」輔氏曰:「胡氏説是矣。 我望之。 耐 故夫子云然,胡氏曰:「顏子資 問 ,問而益得以發其精微,若子夏之 助 我而言,似有不足於顏子 蓋聖人之謙德,又 氏曰:「夫子之於 有 融, 憾 固 而有以 馬,其 不 因 人之問 實 相長 然亦 然 乃 而

〇子曰:「孝哉閔子騫! 人不間於其父母昆

非都無事實而但爲是辭也,此又不可不知。」

· 弟之言。」間,去聲。

知也。 母。 其家,外則有以孚於人,自内及外,無有異詞也。」 胡氏曰:「案《韓詩外傳》,閔子父再娶生三子,繼母獨以 其孝友者,固有之矣,然或溺於愛,蔽於私,則 母去三子單。』母得免逐。 蘆花衣子騫,父覺之,欲逐其妻子。 於外,故夫子歎而美之。」輔氏曰:「父母昆弟 異詞者,蓋其孝友之實,有以積 胡氏曰:「父母兄弟稱其孝友,人皆信之無 今誦其言,藹然惻怛之意溢於詞表。 至於人皆信之,無有間言,則 其母聞之,待之均平,遂成 騫曰: 『母在一子寒 誠著 故 而德 於中 内則 章 誠否未 有 矣。」〇 而 著 可

妻,並去聲。 〇南容三復白圭,孔子以其兄之子妻之。三、

欲謹言也。」○黄氏曰:「三復,謂每誦至此,必再三反復復此言,事見《家語》,蓋深有意於謹言也。磨也,斯言之玷,不可爲也。」南容一日三磨也,斯言之玷,不可爲也。」南容一日三

謹於人之所易,則於人之所不敢忽者,必能謹之矣。 身而其失易爲人所指擿,故人之忽於行者差少。 言出於口而又未遽有實,故人之易其言者常多。 以兄子妻之。 以識之,非謂一次三復,亦非謂一日三次誦之也。」此 曰:「言行表裹之符也,固未有易其言而能謹於行者。 容欲謹其言如此,則必能 者言之實,未有易其言而 有道所以不廢,邦無道 ○范氏 日 所 能謹於行者。 「言者行之表,行 謹 以免禍,故孔子 其行矣。」輔氏 行履於 南 容能 南 邦 但

亡。」好,去聲。 今也則「有顔回者好學,不幸短命死矣! 今也則(一季康子問:「弟子孰爲好學?」孔子對曰:

康子問 范氏 不可亂者。」 能 臣之告君,不可不盡 問乃告之,此教誨之道也。」輔氏曰:「哀公、 日: 同 而對 「哀公、康子問 有詳略,聖人一言之間,輕重等則 若康子者,必待其 同 而 對 有詳 , 有 略 截然 者

顔淵死, 顔路請子之車以爲之椁。

始教而受學焉。椁,外棺也。請爲椁,欲顔路,淵之父,名無繇。少孔子六歲,孔子

賣車

以買椁也

夫之後,不可徒行也。」棺而無椁。吾不徒行以爲之椁。以吾從大字曰:「才不才,亦各言其子也。鯉也死,有

宜也。 鬻諸 請,何 喪,當 以 言後,謙辭。 皆子也。 鯉,孔子之子伯魚也,先夫子卒。 「《禮記 求,大夫不可以徒行,命車 才雖不及顏淵,然己與顏路以父 副 市也。 其 然貧不能具,則椁亦可 》言大夫賜命車。」〇輔氏曰: 脱鰺 邪? 意 孔子時已致仕,尚從大夫之列, 贵 且. 以 葬可 ○胡氏曰:「孔子遇舊館人之 賻之矣。 誠 爲 所 心 以無 識 與 直 窮乏者得我,而 廢。 椁, 驂 今乃不 道 車之制 哉 ? ·不可 「葬之禮,椁周 可 許 , 驂參於服, 宜 以 以 視之,則 言鯉 語 與 脱 顔 録 人 路 勉强 而 於棺 日 之 之 而 復

爲己之喪也。」

道。 誠心與直道 窮乏而欲得 與人使鬻諸 也。 此豈安於仁者之事哉? 然欲輟 也。 市,此 於我,我故勉强而與之以副其 而 用 川則 出於勉强,則非誠心, 義理之必不可者也。 **驂**或可 脱。 義之所可,則 若大夫而 副人之意,則非 若爲所識我者之 意,如 徒 脱 行,命車 驂 以 此 膊 則 舊 直 非 而

「蘇氏於常人之情,每得之,至義理之正大,則多所不及。視義之可否,豈獨視有無而已哉?」輔氏曰:行禮,視吾之有無而已。夫君子之用財,爲椁之請,此可見聖人處事之權衡。」或者以爲君子爲椁之請,此可見聖人處事之權衡。

非小失也。」非有以辨之,則學者將惑於其説,局於事而不究其理,此

予!」喪,去聲。 〇顔淵死。子曰:「噫! 天喪予!

夫子雖存道既無傳,終亦必亡而已矣,故以顏子之死而曰:「顏子在,則夫子雖死而不亡,以道存也。顏子死,則噫,傷痛聲。 悼道無傳,若天喪己也。黄氏

○顔淵死,子哭之慟。從者曰:「子慟矣。」

從,去聲。

慟,哀過也。胡氏曰:「過不可有,然此非過也。

哭

至於慟,發而中節矣。

曰:「有慟乎?

哀傷之至,不自知也。

館之喪而不吝,義所不可,則雖於顔子之厚而不從其父

其可,皆情性之正也。」他人之比也。○胡氏曰:「痛惜之至,施當夫人,謂顔淵。言其死可惜,哭之宜慟,非非夫人之爲慟而誰爲!」夫,音扶。爲,去聲。

天

喪

門人厚葬之。

子止門人之厚葬,蔽以理也, 顏路從而聽之,牽於私也。顏路請車爲椁,溺於愛也, 夫子不遂許之,裁以義也。夫蓋,顏路聽之。輔氏曰:「此與請車弗從事異而理同。

聖 庸之所以 分,天理人欲之間而已。」

子曰 回 也視予 猶父也,予不得視猶子 也

非 我 日: 歎 也 不 「門人違夫子之言而厚葬,尊賢敬友之情 . 得 ,夫二三子 如 葬 鯉之得 也 宜,以 責 門人

虔反。 鬼?」敢問 季 ,路問 事 死。 鬼 神。 日 : 子曰: 未 知 生,焉 未 能 知 事 人, 死? 焉 馬,於 能 事

息

也。」

不

以

情

勝

理

故

以

此

責

之,

所

謂

愛

人

以

德

而

不

以

姑

厚

也

夫子

也

黄

氏

之乎? 所難 傷於剛 義,此 問 爲變亦大矣。 人之所必 祭祀之意,非 事 知之病。」 固學者之所當講 鬼神、蓋 勇 此 故 格物之大者 於道 有,不 醉生夢死者固 然 精 義 求 非 有 不足以 可 强 所 誠 探 子 求也。」○又曰 不 以 敬 力取 路 知 奉祭祀之意。 究其説,非 足 之問 不知求,學者其可 ,皆切 以 略 可 其所 事 謂 問 人, 易 切 體 有 矣 道 也 知 則 生 不 而 必 足以 必 不 遽 然 輔 而 有 欲 求以 亦 不 氏曰: 死 死 未 致 求 能 者 其 其 其 免 知 其

> 始終, 躐 序,若未能事人而遽求事神,未知 生死雖有始終之辨,然其理 故夫子告之如此。 故生,則必不能反要於後,而知 曰:「死生者,氣之聚散耳。 知所以 不足以事人,則 外 事 兩盡 等,故夫子之告子路者如此。」 〇程子 神 ; 矣。 初 輔 生,則 無 氏 此事人事 日: 幽 必不 一理,但 而 誠 鬼 神之大務 則 神其 能 有物,敬 輔氏 反終 學之有序,不 八何能 」則 儻不能 曰:「人鬼雖 也。 未 氣散 則 事之乎?」非 其 而 嘗 有禮 生 使在 推 有 故 知 原於 而 死 所 遽 我之誠 有 也。」 也。 欲 有 前 以 物 可 知 幽 死。 有 學 蓋 而 原 死 明之分 躐 敬 者 禮 知 畫 幺 始 則 當 明 輔 氣 則 夜 明 而 是 猶 有 聚 氏 内

二者,人鬼死生 死生之道也。 夜者,氣之明晦 盡 是氣,有是氣則有是理,氣則二,理則 者,死生之道也。 而二,二而一者也。」《語 事人之道,則 明 也 一雖是一 則 死生者,氣之聚散也 有 晦 盡 理, 知生之道,則 聚 事鬼之道。 而 則 有 有 幽 散 明 録》 始終之不同。 理之自 一。」〇輔氏 Ĕ 死 知死之道; 故畫 有 1然也 生人鬼, 夜之道 是 日 理 則 一書 而 即 而 有

者,雖有 出 明始終之不同 「死生人鬼雖幽明之事,了不相關,然天地 而 其 理則未嘗有二也。」〇

則一 鬼。 間不過聚散、陰陽、屈伸。 永嘉陳氏曰: ,非微眇不可信之事也。」○蔡氏曰:「人鬼死生, 有聚必有散,有伸必有屈,理一而分則殊,分殊而 聚則生,散則死,伸爲人,屈 爲 雖 理

者明而易行易知。 二而一,不過一氣之屈伸 苟 能 盡理以事人,及其至也,不可 但屈 者幽 而 不可見, 度 伸

至也,不可得而知者,亦可從而識之矣。 者,亦可 得 而格之矣。 苟 能窮察乎其生之所以然,及其 夫子教人,以可

見者致其不可見者,非聖人孰能如是乎!」〇又曰:「事

而二。然雖是二,又是一理,故曰二而一。」或言夫子 人事鬼,以心言,知生知死,以理言。然人鬼生死之理雖 ,但既是人,便與鬼不同,既是生,便與死不同,故曰

不告子路,不知此 乃所以 深告之也。

行,胡浪反。樂,音洛 有、子貢、侃 ○閔子侍側, 誾誾 侃 如 也。 如 也; 子樂。誾、侃,音義見前 子路,行行如也; 篇 冉

粗底。」子樂者,**●**樂得英材而教育之。 行行,剛强之貌。《語録》曰:「行行是大,故發露得

> 「若由 也,不得其死

知。 尹氏 也。 因 雖有意味,然反不若子曰之爲協於文勢也。」 難。」蔡氏曰:「子路侍夫子之側,行行如此,於他人可 曰:「《漢書》引此句,上有曰字。」或云 「上文樂字,即日字之誤。」輔氏曰:「子樂之説 以 子路終不能變,果死於孔悝之難,惜哉 故夫子謂其不得其死,庶幾子路知之而 が戒之。 曰:「子路剛强,有不 其後子路卒死 得其死之理,故 於 衛 能 !洪氏 孔 變其 悝之 :

○魯人爲長府。

閔子騫曰:「仍舊貫,如之何? 傷財。 仍,因也。貫,事也。 長府,藏名。藏貨財曰府。爲,蓋改作之。 氏,名安石,臨川人。○輔氏曰: 在於得已,則 不如仍舊貫之善。」王 王氏 「古人改作,必不得已者 曰:「改作,勞民 何必改作?」

0 子」,原脱,今據四庫本補。

諷之。」 也。改作府藏,意必有可已而不已者,故子騫以是

去聲。 子曰:「夫人不言,言必有中。」夫,音扶。中,

〇子曰:「由之瑟奚爲於丘之門?」言不妄發,發必當理,唯有德者能之。

語》云:「子路鼓瑟,有北鄙殺伐之聲。」蓋程子曰:「言其聲之不和與己不同也。」《家

凡物皆然,顧人弗之察耳。聖人明睿所照,物無遁情,又者如此。輔氏曰:「形氣聲音之相符,自然之理也。其氣質剛勇,而不足於中和,故其發於聲

烏有不知者哉!

學,已造乎正大高明之域,特未深入精微之。升堂入室,喻入道之次第。言子路之門人以夫子之言,遂不敬子路,故夫子釋

愈

海 猶勝

也

而 之類,是未能深入精微之奥也。」未 之域可知。 而死,與程子謂其有『堯舜氣象』,則其能造於高 除,故於道之精微深奧處,則未能 明,其於道之高明正大處,固已造之矣,然其麤率之意未 堂以喻夫正大高明之域,室以喻夫精微之奥。 之奥耳。 遽忽之也。 至於以正名爲迂,而不知『食輙之食爲非義 輔氏曰:「升堂入室,乃入道次第 有所入耳。 可以 一事之失 觀 之譬 子 問明正 其 結 路 喻 大 纓 剛

過,商也不及。」○子貢問:「師與商也孰賢?」子曰:「師也

日 故篤信 相 子夏篤信謹守,而規模狹隘 子張才高意廣,而 及,皆生乎氣稟之偏 氏曰:「子張才高而矯亢,子夏才短而篤實,二子質 反。 然則 才高故意 古 守 師 而 愈與?」與,平聲 規 廣而好爲荷難,此所以常過乎中。 模 狹 ,而中 险,此 則 好 指義理 所 爲苟 以 常 之當然處言也。」 難,故 故 不 及 常常 乎. 中。 不及。 常 過 過 性 才 中 輔 不 短 Œ

子曰:「過猶不及。」

至矣乎 親炙之也。」 之遠矣。 不知所以自 繆以千里。 均爲未至也。」○尹 肖之不及,然其失中則一也。 道 或抑或揚, 與不及也。 及,歸於中道而已。」輔氏曰:「差之豪氂,即 不肖之不及,以義理論之,則過與不及皆爲失中,而於道 者,以義理言也。 「然則師愈與」者,以才質言也。 以 其初蓋甚微也,過而不知所以自反,則愈過,不及 中 聖人之心,渾然天理,不偏不倚而中 庸 豪氂過乎中,則爲過; 勉,則愈不及。 進一 爲至。 夫過 故聖人之教,抑其過,引其不 退,無不使之歸於中。 以才質論之,則賢智之過雖 氏 與不及,均 賢智之過,雖若勝於愚不 曰 積 中 而反之,則相去不啻千 豪氂不及乎中,則爲不 夫子所謂「過猶不及」 也。 庸之爲德也,其 輔氏曰:「子貢所 此 差之豪氂, 古人所以貴 若勝於愚 持衡 謂 5.焉。 里 而 调

○季氏富於周公,而求也爲之聚斂而附益

以小貞之吉也。」 矣。 仕季氏而責之也?」曰: 常職,是以漸靡 粟倍他日」言之,蓋不自知其學之未至,而以從仕爲 愈强,而公室愈不振也。 公室,則庶乎小貞之吉矣。 其非與? 其下則尺地 則已失之矣。蓋當是時之達官重任,皆爲公族之世 耶?」曰:「冉求之失,不待於聚斂而後見,自其仕於季氏 宰,又爲之急賦 其 周 有不仕於大夫者也。 冉求亦豈習於衰世之風,而 夫子,於門弟子中亦可謂明達者,今乃爲季氏聚 君、刻剥 公以王室至親,有大功,位冢宰,其富 季氏 然使其仕於季氏 一民,皆非國君之有,士唯不仕則已,仕 以 其民 而 諸 至於此耳。」曰:「然則夫子曷爲不於其 侯之卿,而 税以益其富。 一, 何 「聖人以不仕爲無義,而 故 以得 ,而能 孟子以『無能改於其 今乃反爲之聚斂,是 此? 勸之黜 富過之, 或問: 其强 冉有 僭 「冉求學於 非 爲 而 猶望之 使 不 斂, 季 攘 士之 權 自 則 而 忠 官 氏 宜 奪 臣 知 何

非吾徒,絶之也。小子鳴鼓而攻之,使門子曰:「非吾徒也。小子鳴鼓而攻之,可也。」

從季氏。 身,而以 善至於如 日 之當絕者,又不但已,此仁之至、義之盡也。」 〇 范 已,天地之心也,雖絶之而猶不忘乎愛,雖不忘乎愛而事 使門人正之,又見其愛人之無已也。 民 人 到這 :「冉有以 也 聲 師道 如此。 其 殿所在都不自知。」又曰:「他只緣以仕爲急,故 見他 罪 公仕爲 尊嚴而朋友親暱, 此 以 所 然 責 爲如此,又拔不出 政事之才,施於季氏,故 急故 由其心術 師 之也。 嚴 也。」《語録》曰: 而 理 友親,故己絶之 聖人之惡 古 不明,不能 然也。 向從其惡。」 聖人愛人終 「惟是 黨 反 惡 心 求 爲 而 而 術不 輔 氏 諸 不 猶 害 氏 無

嘗見 不 不曾見得道理。」《家 知不足而厚 柴,孔子弟子,姓高,字子羔。 殺 齒」。 7,方長 不折。 避難 有 餘。 而 語》記其「足不 執親之喪,泣 行,不徑不實。 《語録》曰 衛人。 履影 血. 箇謹厚底 三年,未 可以 。, 啓 愚者, 人 見 蟄

柴也愚

遜於顔 知。 服。 時節。 其爲 處。」〇輔氏日 也是守得定,若更學到變通 大盜賊,也 所以爲愚。 然恐或不免於由 觀這意如此,只守不徑不實之說不得。 人矣。 若當有寇 閔哉! 須 聖人『微 走 **《語** 避 賊 觀 録》日 那 患 服 家 之而 時 難, 而 語 如何要不 過 如 不知者,若 如如 所 宋」, 何 處, 載之事 專 不徑 儘好,止 微服 守此 由 不實,只説 小徑 以 知 則 是 與 殘 緣 去得。 著那 其 行 其 他學 質 途中 俱 軀, 安平 性 下 到 之厚 有 然子 賤 萬 此 人衣 則 未 無 岢 口 遇 盡 事

參也魯, 理 魯,鈍 説 樣敏底見得容易,又不能堅守; 透,直是捱得到 透徹了方住。 須用工夫乃透。」程子 《語録》曰:「曾子魯鈍難曉,只是他不肯放,直是捱 自得 會,終要洞達而後已。 道 理 便 止此 也。 宜 了 更 不似别人,只略綽見得 輔氏 盡處,所以竟得之。」〇又曰: 不深求。 蓋 他以 日 日 遲鈍之故,見得 若理會不得,便放下了 鈍 惟 曾子不肯 謂 參也 遲 鈍底捱得到略曉得 鈍。 此 竟 放 凡 小了便休。 舍 未透,只 以 事 不 ,若這 魯得 「只曾子 能 便 得 事 處,便 明了 何 看 得到 且 未

其誠 造反深 才質魯,於道初若難人,而其求之也不敢有易心,故内 自謂人其奥者多矣。 曰:「大抵聰明才辯者,所見雖快,所造則淺,方涉其藩 學者,聰明才辯,不爲不多,而 專一。」又曰:「曾子之學,誠篤而已。 乃質魯之人爾。 能 通 透? 守其心專 而無始終之異,外盡其力而無作輟之殊,此所以其 地。」尹 則 (是終於魯而已。」○又曰:「只是魯鈍之人,却 氏日 明達者每事要入一分,半上落下,多不 :「曾子之才魯,故其學也 惟 故學以誠實爲貴也。」輔氏 誠則有物、惟篤則有力、曾子之 卒傳 聖門 其 道 盡 而

師也辟,辟,婢亦反。

確

所

以

能深造

乎道也。」

曰:「子張務外,留意於容儀。」辟,便辟也。謂習於容止,少誠實也。輔氏

由也喭。喭,五旦反。

之偏,語之使知自勵 「子路麤鄙,夫子嘗以爲野。」() /,粗 俗 也。 傳稱 %者, 也。」輔氏曰: 謂 楊 俗 氏 論 日 也。 「愚者知不明 几 輔氏 者 EI: 性

> 爲一章固可,但其語勢若有不同。」 之首,而通爲 脱「子曰」二字。」或 ○愚謂:四者皆指其所偏,惟曾子能於偏處用工,故後來 子所以言之者,蓋欲使之自覺以治其偏,而 誠實不足,略乎外則文飾不脩。 魯者才不敏,便辟 一貫之唯,至鈍反成至敏。 一章。 則 遺乎 内,粗 疑下章子曰,當在此章 輔氏曰: 吴氏曰:「此章之首 此四子性質之偏 俗 則略 畢 乎外。 竟前説 歸 爲勝。 遺 于中耳。」 乎 也 内 通 夫 則

〇子曰: 貧,而安貧所以樂道也。』曰: 也。 此本何晏祖述老莊之言。」言其近道, 文以子貢貨殖爲言,正對 窶動 心 人平日之言無若此者。 曰:「屢空只是空乏之空,古人有簞瓢屢空之語是也。 謂「其殆庶幾」同。」屢空,數至空匱也。 庶,近也,言近道 《文集》曰 П 愐 求富,故 也其 問: 庶乎 又字 也。 且. 此相反而言。 屢至於空匱 數數 屢空。 輔氏曰:「此與《易大傳 似 一世 而 作 間 空,亦不勝其間 兩 亦有 截。 若曰心空,則聖 質 蓋 又能 也。《文 美 樂 而 道 不以 能 故 安貧 斷 安 能 矣。 貧 影所 貧 下 安

賜 者,皆以爲知道 可 乎?」

不受命, 此 子曰:「子貢之貨殖 於億中,則亦決不徇貨殖。 不專爲貨殖,然使其不貨殖,則決不止於億中, 空,億中則不如其庶也。 ○黄氏曰:「夫子之論回 者,固以其才,至於不受命而貨殖者,以其才爲之累耳。」 能 不如顏子之安貧樂道,然其才識 解之,其實則是生殖貨財也。」億, 也。」貨殖,貨財 命,謂天命。 與天道 貧,則亦決不能其庶,不能其庶,則決不能屢空。 言其處貧富之有異。 料 心未忘耳。 事 而多中也。 則 而貨殖焉,億則 不 輔 爲 然此亦子貢少 生殖 氏曰:「此 蓋舉 此 矣。」輔 輔氏曰:「子貢於事億度而 、賜、一則言其得道之不同、二則 其庶固不專爲屢空,使不 也。 中兩事 ,非若後 天理人欲 反覆言之,貨殖則不 輔氏 言天所 屢中。」中、去聲、 氏 意 日 日 度 ,相爲勝負也。」程 賦 時 人之豐財 子 也。 此 貧富貴賤之命 事,至聞 貢 之明, 蓋 言子 順其 後 使其不止 億中 來 ′′;但 屢中 如屢 所 能 言 亦 責 性 見 固 安 而

> 心與理 哉 ? 以貨殖爲心,是將以 其中者矣。 子於此猶屢 言而中,是使賜多言也」,聖人之不貴言也 已,非窮 不能安受天命矣。其言而 矣。l〇范氏曰 識之明,亦幸而已。 殖,非樂天也 是有命焉,但人由之而不察耳。」〇又曰:「不受命而 富人往往得之於自然,非必其才能智術,真 不改其樂也。 如是。」輔氏曰:「簞食瓢飲,蓋人生之決不可闕者,顔 貧富在天,而子貢 ,自然發言中理,不待億 理樂 貧與富,天之命也,安而受之可也,而 絶而不改其樂,則 ,億則屢中,非 天者也。 天下 其曰屢中,則其不中者固多矣。」 「屢空者, 智 力求富,不能安受天命 之物, 豈 窮理 凡 夫子嘗 以 也。 在外之物,信 簞 度。 貨殖 有 食 多中者, 人能樂天安命,則 億 瓢 可 日 而 爲 後中, 有以致之也 動 飲 二賜 心, 其 屢 無 也 雖其 子貢 有 億 則 中 不 絶 口 幸 是 而 而 オ 貨 之 73 動

於室。」 ○子張問善人之道。 子曰: 「不踐迹,亦不入

煞高,所造

煞遠,至於聞性與天道:

則併與

其初心忘之

善人,質美而未學者也。輔氏曰:

「質不美,則不

乎?」與,如字。

如言循 以 口 循 謂之善人。 至,又不止 途守轍。 然質美而 爲 善 人而已 善人雖不必踐 好學,則進 也。」程 進不已,雖大與 子 日 舊 迹 踐 而 八聖,可 迹, 自

耳。」○張子曰:「善人欲仁而未志於學者知未致,則局於見在之量,故無自而能入於聖人之室也。如未致,則局於見在之量,故無自而能入於聖人之室也。如未致,則局於見在之量,故無自而能入於聖人之室也。」《文集》不爲惡,然亦不能入聖人之室也。」《文集》

本子,亦未入於室。須是要學,方人聖賢之域。」○輔氏也。《語録》曰:「此只説善人是一箇好底資質,不踐元也。欲仁,故雖不踐成法,亦不蹈於惡,有也。欲仁,故雖不踐成法,亦不蹈於惡,有耳。」○張子曰:「善人欲仁而未志於學者

〇子曰:「論篤是與,君子者乎? 色莊者不蹈於惡者也。」

諸己,則又進於信矣,亦未有不自信

而能不踐成法、而自

曰:「欲仁,則質美可知,未有資質不美而欲仁者也。

有

必無異,與之可也。若夫人之爲色莊,則言行未必 也,然其言雖一,而人品不同。 以言取人,下文又言不可以貌取也。」曰: 取 子者乎? 着貌字。」〇輔氏曰:「惟夫人言論篤實之是與,疑若 言但以其言論篤實而與之,則未知其爲 人也。 《文集》曰:「問:『論篤是與,恐只是 爲色莊 者乎? 若夫人之爲君子,則言行 言不可 『色莊,便是 以言貌 説 相 不 君 兼 口 叮

所可及,其退正相反也。」張 勇 兼人,謂勝人也。 爲,然有父兄在, 胡氏曰:「言其勇於行,非 則 敬 有 关曰: 不 可 得 聞 而 義 專者 常人之 固 當

遽與之,則傷吾之明矣。

專 則所行必審。行之不勇者,不專勉其行,則 巡畏 而 不及之患也。」胡氏曰: 退之,所以 弱,不患其不稟命也; 所當稟命者 患其不能爲矣,特患爲之之意或過,而 聞,未之能 若不稟命 勉其行 不待於教之耳。」 以縮,而 非可以 而 約 爲 行, 有 行, 之於義 之不 闕 惟 不稟於父兄也,蓋稟 則 恐 耳。 勇 有 反 耳。 理之中,而 「勇於行者,使之有所稟命! 聞 傷於義矣。 若冉求之資稟失 患其於所當爲者 聖人一進之, 則 於所 命 愈流於退 使之無 自 當 子 其所 爲 路 必 縮 之 過 逡 不 於 有 能

矣。」曰:「子在 死爲赴 後,謂 死 子畏於匡,顏 矣,以爲何敢 也。 相失 愚謂: mj 死 死 在 後爲相失者,因夫子以 則 一**,** 回 後。 大 淵 不以死爲 顔 何 後。 子 何 敢 言 敢 死?」女,音汝 子 重, 何 死,謂 敢 曰 : 而 死 以 而 輕 一吾以 顔淵 知 於死爲重 不 也。 赴 爲 死 死 鬭 女 而 也。 生 爲 而 知 亦 也 必 死 當 大

道 乃可。 求生; 「「師弟子」云者多矣, 致死焉,乃人道之宜。 子之辭。 生於三,事之如一,惟其所在 死,此與不許友以死之意别。 死,則必上告天子、下告 愛其死,以犯匡人之鋒乎?」《語 讎,不但已也。 必捐生以赴之矣。 爲師弟子者而已。 況顔淵之於孔子, 生於三,事之如 於死生猶然,他可知已。 問答之時,爲師 「顔路在,顔子 辨疑、解惑者,亦自有深淺輕重之不同。 爲弟子者亦不以死爲難,但 如 三謂父生之,師教之,君食之也 此處已遇 許 者知弟子 人以 難,却 夫子 非 死,何 一或有闕,則非人道 惟 如此 即 恩義 胡氏曰:「先王之制 必能 捐生 百工 惟 而 也? ,則致死焉」,此 孔子不幸 説不得。こ〇 不許以 赴義 其 在 兼 技藝皆 所 日 方 以赴之,幸 盡 以 而 則 在,則 死,在 伯 一,又非 已,不 死 有之。 П 事 而 · 請 而)輔氏 也。」〇又曰: 偶 唯 録 合於義爲 何 未處 唯 疑 **晉** 至 遇 其 致 Ĭ 雖 討 顔 爲 他 其 日 一此,只 語 所 難 死 淵 所 重 而 以 人之 在,則 而 問 之於 二民 謂 以 民 死 不 難 復 不 口 共 傳 前 得 以

顔

`閔爲慊,然其德望才業固非常人比。

季氏之家,其必

恩於師? 也。 義矣。 恐其悮也; 今孔子既免而 已者,故胡 也,然亦不必皆死,幸而得生者有矣。然義之所在,不但 子不幸而遇難,回必捐 恩深則義重 宜 孔子,蒙博約之教而得聖道之傳,真所謂受罔極之思者。 間,至此等處,則 ,則顔淵 ,顏子固 其言若相反,而其意則相承。 故其既來,而孔子迎謂之曰[吾以女爲死矣]者, 胡氏謂 有致 氏又推 .優爲之也。」○又曰:「「捐生以赴難」,死焉宜 而 ,信非他 顔淵遽復之曰 「子在,回何敢死」者,道 顔 死之義,孔子免焉,則顏淵無致死之理 淵 極其義以教學者。」〇又曰: 「顔淵之於孔子,恩義兼盡」者,恐誤 発相與爲一矣。」○愚謂: 相失在後,脱有不知 可 人爲師弟子之比也。」〇又曰:「『孔 生以赴之。」此致死之義,人道之 也 顏淵於孔子雖曰未達 而 遂 弟子何緣 死馬 「孔子遇 ,則非 其 有 實

所謂大臣者:以道事君,不可則

岸

○季子然問:「仲由、冉求可謂大臣與?」與,

當作「孔子之於顏淵

平聲。

問之。 子然,季氏子弟。 輔氏曰:「二子以聖門高 自多其家得臣二子,故 弟而 仕於季氏, 雖 視

知所尊敬矣,故子然以此自多而致問。」

子

然也。 子又不足以盡大臣之道,故特輕二子以抑之。」 曰:「吾以子爲異之問 言色之間必有矜大之意。 異,非常也。 輔氏曰: 曾,猶乃 「季然自多其家得臣二子而 且大臣既非家臣之可 也。 曾由 輕 與 二子以 求之問 致問 當,而 抑 則 季 其

霸。 君 句,斷盡大臣之道,不然,則終不足以大有爲於世。 則止,在我而已,故不可 利,明其道不計其功,豈肯從君之欲哉?❶ 以道事君者,不從君之欲。 大臣之事 必行己之志。 淫則淫,君 乃功利之徒所爲,孟子所謂妾婦之道者,豈足與 哉! 奢則奢; 輔氏曰:「以道事君 説以帝不人,則王,説以王不 則止 者,必行己之志 不可 則正 可 其誼 則 則行,不可 也。 止 不謀其 人,則 若夫 者, 此

今由與求也,可 謂 具臣矣。」

0 豈」上,原衍「顯」字,今據四庫本删

 f_{1} Ŧi.

具 臣 謂 備 臣 數 耐 른 輔氏 日 : 「是不以 道 事其

君,直備數而已。」

曰:「然則從之者與?」與,平聲

子曰:「弑父與君,亦不從也。」 意二子既非大臣,則從季氏之所爲而已。

氏强僭之心,脱由、求不得其死之禍。 其有人臣之節。 其失大臣之道。 矣。」胡氏曰:「方子然欲假由、求以誇人,故夫子極言 也,可謂具臣矣。是時季氏已有無君之 子仕其家而不能正也,知其不可而不能 子以死難不可奪之節,而又以陰折季氏 心,故自多其得人。意其可使從己也,故 臣之心也。 聞之熟矣,弑逆大故必不從之。蓋深許二 言二子雖不足於大臣之道,然君臣之義則 弑父與君亦不從也,其庶乎二子可 ○尹氏曰:「季氏專權僭竊,二 及其欲資由、求以助己,故夫子又極 應答之頃 一可以 存宗國衰微之緒 一抑揚之間,其效 沮 免 止 不 季 言

> 子路使子羔爲費宰。 如此,所以爲聖人之言也。」

子路爲季氏宰而舉之也。

子曰:「賊夫子之子。」夫,音扶,下同

乃所以賊害之。」 足,人惟學然後雖愚必明,若愚而 此又以爲質美而未學者,蓋質美則厚有餘,未學則知不 適以害之。輔氏曰:「前章註謂其知不足而厚有餘 賊,害也。言子羔質美而未學,遽使治民 未明, 遽使之爲宰,是

子路曰:「有民人焉,有社稷焉。 何必讀書,

然後爲學?」

子曰:「是故惡夫佞者。」惡,去聲 言治民事神,皆所以爲學。

可仕以 輔氏曰: 以爲學,其不至 治民事神,固學者事,然必學之已成,然後 行其學。 「神非可以嘗試事,民非可以苟且治也,故必學 於慢神 若初未嘗學,而使之即仕 而 虐民 者幾希矣。

旧 即仕以爲學乎? 違,用與 之已成 治民,則 理 屈 ,然後可仕 必 體 詞 乖, 「有虐之之實矣。」子路之言,非其 窮 而 或有失其 而 是將使之事神而先有慢之之意,及其 以 行 取 其所學。 辨 宜者,況乎 於 П 若是者,猶 以禦 初未當學 入耳。 恐夫 耐 本意 動 故 遽 使之 與 夫 静

理 其欲舉子羔也,遽以何必讀書復於夫子,蓋其勇率之資, 夫子之言 夫子即就其 夫子之久,耳 子不斥 屈 詞 窮,不能 而 其 自 (病處箴之曰 『是故惡夫佞者』)。 非 聞目見,豈不知爲學之不可以 知 反就 ,而特惡其 其 、取辨 義 理,故取 於口之失,所以不復有言 佞 辨 也。 於口以禦人耳。 輔氏曰: 子路剛明,因 不讀 書? 「子路從 若其 是以 而

讀 在 而 於脩 而 後人政。 知之,然後 身,而 未聞 後 及 能 以 於治 行。 政學者也。 何 人,其説 可 以 不 具於方 蓋道之本 讀 書 也? 册

以前言爲實,則必有辯論矣。」○范氏

曰:「古者學

其 序 子 矣。 路 也。」《文集 乃欲使子羔以 不知其 | | | 過 二 上 而 政 以 古 口 爲學,失先後 未有文字之時,學者固 給禦人,故夫子惡 本末之 無

> 人乎? 學也。 有作 自解耳 書 岢 則 讀,而中 ,故夫子以爲佞而惡之。」 捨是不求而欲以政學,失之矣,況又責之中 然子路本意未必及此,但因 道之載於經 人以 E 者詳 固 有 矣,雖 不待讀書 孔子之聖,不 而 夫子之言 自 得 者。 能 而 但 離 託 自 是 材 以 聖 此 爲 賢

○子路、曾皙、冉有、公西華侍坐。坐,才卧

反

子曰:「以吾一日長乎爾,毋吾以 言。 言我 德,於此 之下濟也。」 之,使之盡言以觀其 尊,易得有所隱覆而不敢 蓋誘之盡言以 雖年少長於女, 亦可 見矣。 念。 盡其情。 聖人之和 觀 輔氏曰: 其 然女勿 志 故夫子先爲謙 氣謙 以 而 以 德 聖 少侍長, 也。 我 即 長,上 所 長 和 謂 以 辭 而 氣 天道 以 卑 難 侍 謙

以哉?」居則曰: 『不吾知也!』如或知爾,則何

女,則女將何以爲用也?言女平居,則言人不知我。如或有人知

去聲。 間 子 及三年, 以 商鞅之使秦民怯於私鬭,勇 作亂者有之。 路 上、死其長也。 之所謂向,則義也。 親其上,死其長矣。 日 人 間而爲大國 之態。」攝,管束也。 率 刑賞耳,固 加 饉。 、爲旅。 率 爾,輕遽之貌。 饑,音機。 之以 爾 可 方,向 而 使 師 所 因,仍 勇而 非 對 旅 饉,音僅。 有 攝制也。二一千 子路之能使民 有 也,謂 曰 : ";
因 勇且知方也。」夫子哂之。 乘, 以 向義,則是義理之勇,夫然後能 有勇而不向 也。 教之,而使民知其 之以 「千乘 輔氏曰:「子路剛勇,故常有輕率 輔氏曰:「管束,謂介乎兩國之 比,必二反,下同。 向義也。 輔氏曰:「方只訓 於公戰,似 穀 饑饉; 如此,蓋必有教化 不熟 之 Ŧi. 義,則是血氣之勇,犯 國,攝 百 亦 人 日 民 由 必 可 饑,菜 爲 向義,則 也爲之,比 矣,然特 乎 不可不 哂,詩忍反。 師 向, 大國之 然子 不 五. 存焉。 劫之 如 親 能 熟 百 此 路 其 H 去聲。

十,求也爲之,比及三年,可使足民。 如其禮「求! 爾何如?」對曰:「方六七十,如五六

也

一哂,微

笑

也

樂,以俟君子。」

益遜 能。 又小矣。足,富足也。 十里,小國也。 求,爾何如」, 冉有謙 退,又以子路見哂, 孔子 如,猶 問 或 也,下放此。 俟君子,言非 也。 五六十里, 故其 方六 Ë 詞 所 則 七

宗廟之事,如會同,端章甫,願爲小相焉。」相,「赤! 爾何如?」對曰:「非曰能之,願學焉。

伯》:「 也 才之效如此。」宗廟之事,謂 時此意,始有虞朝相遜之氣象,聖人一 輔氏曰:「求、赤之遜,大抵是因子路被 將言己志 公西華志於禮樂之事 \Box ,類即見也。 會,衆 「時見 日 頫 會 而 日 鄭氏謂: 先爲遜詞,言未 殷見 同。 日 輔 同。」又曰 「朝宗覲遇、皆有常期、若時見 氏 嫌 _□ 祭祀。 以君子自 周 「殷 能 禮 嚬 類 짽 而 日 而 諸侯 春 笑 然。 願 官 偂 居。 學 ・大宗 深 殷 成 時 即衆 德達 也。 味 見 故 此

焉。 编。上端,元 廵 則 分字,則 無常 覲,王爲壇 所命之政 期。 六服 諸 於國,外 盡 端 如 朝 有 Ŧ 服 朝 廵守,殷見四 不 禮既 合諸 順 輔 服 氏 畢 者, 侯 ⊟ : 而 王亦爲壇, \pm 命 || 禮 將 方,四 事焉。 有 象》云: 征 時 討 合諸 十二歲 分來, 之事, 有 侯 終 王 以 則 元 端 歲 如 命 既 則 不 耐 政 已 雩,音于。

貌。 端之服,古者君臣皆得服之。」章甫 IE. 委貌,若「晏平仲端委立于虎門」是已。 而 祭』是已; 冕,若《玉藻》 『天子龍衮以祭,元端朝日』、 『諸侯 章 章甫 。」謂士之衣袂皆二尺二寸,而屬幅 甫 後代轉以巧意改新 緇 ,如公西赤 布冠 有 元端 也。 而冠 『端章甫、願爲小相焉」是已; 禮: ,若朝元端、夕深衣是已; 而易其名耳。 夏日 母母 追, 禮冠。 廣袤等也 商日 其制 鄭云: 章 相比, 甫 有 輔 端 皆以 然 周 有 元端以 氏 元 日 則 取 端 元 \Box 漆 其 委 元 而

者。言小,亦謙辭。

布爲之、蓋三代常服、行道之冠也。」相

贊君之禮

對日 亦各言其志也。」曰:「莫春者,春服既成。 點 「異 爾 何 (乎三子者之撰。]子曰: 如 ? 鼓瑟希 鏗 爾、舍瑟 何 傷乎 偂 作 ? 冠

> 耕反。 者五 詠 而 六人,童子六七人,浴 歸。」夫子喟 舍,上 聲。 撰,士免反。 然嘆 日: 莫、冠,並去聲。 吾 乎 與 沂 點 風 也 沂, 乎 魚 舞 鏗,苦 依

也。 問: 涼 南 禮 上。」而蔡邕引此 除。」曰:「《漢志》:『三月上巳,祓除,官 也。 希, 四子 「具,猶言所具陳者。」春服,單給之衣。 孔子四十六歲,而皙,參之父也,則其齒或亞於子路矣。」 鼓瑟,故孔 也 而改浴爲沿,蓋 「何以知以齒爲序?」曰: 間 地 曾點之學,蓋有 今上巳祓 侍 歇 志 舞 坐 以 也。 雩, 爲 以 子 爲 祭天 作,起 有 씷 先 不察乎此爾。」沂 除是 證 温 問 爲 是 泉 禱 也。 序, 求、 也。 也。 焉, 以 雨 韓、 「子路少孔子九歲,曾參少 則點 赤 之處 見夫人欲盡 理或 或問:「浴之爲 撰, 李疑 而 水名 當 具 有壇 後 夫裸身 然 次 也 及 民 也 對。 潔 浴, 點 在 川 墠 於 輔 虚,天 風 也 浴 東 盤 氏 樹 魯 盥 以 之非 流 濯 \exists 木 乘 城 濯 方 祓 水 或

之際 得不疑 見天理之流行,人之所以爲學者,亦不過 也 樂之日 之所答者,吾身日用之常,天理 快於心也 而 當然哉 性 也 則皆天理之所當好樂 言 苟無人欲以 五行之氣以生,則莫不均 莫非天理,在在處處,莫非可樂。○○黄氏曰: 看得那幾箇説 上皆是天理 理 語 不思,天理也; 可 ,率性之謂道,未發則爲中, 流 無非 何 從 行 也; 而 往 耐 發,天理也。 ,則不得不作 而 天 樂、天理 曾皙之學有見乎此,故問 容 童子冠者之相 隨 理 間之,則流行不息,隨 流 非 天理? 也; 底功 行,良 處 如 其及之也,則當思而 此。 充滿 也 名事業都不見了,他 辰美景,與 舉 也; 夫子之所問者,吾心所存之志 而對,天理也; 語 亦 動 曾皙之心舉, '具仁義禮智之性。 從 何 則 無 録 處 趨 浴 舉 ĕ ⊟ : 少欠闕。 既 而 向,則皆天理之所 幾 沂 也 動 發則 有 處充滿。 無非 箇 風 未及之也 欠 詠 好朋 春之莫,服之成,可 曾 無 爲 闕 之得所 其 後思,天理 天理 點 和,孰 看見 (異於人也 哉 存此心之天 友行樂去。 見 塵之爲累,但 故 蓋 也; 得 日用之間 此理之妙, 「人稟陰陽 ,則不當思 非 其 ,可樂之事 天 事 言語 當趨 天 命 事 也 好 動 ,則不 之謂 理 物 樂, 則 静 他 理 吾 其 之 白 物

也, 以見夫」四字於其首,便自斷 於此有見焉耳 不 天理流行,其氣象功效自如此耳。」〇輔 子,見事 之治,亦不過日 更有他念哉? 耳 故 0 之時,心平氣和 與 兼備,不待勉强,自 力,自無纖豪欠闕 理既遂其 盡 而 而 夫子之志」之説相)胡氏曰 後 Ë 兩立,才有 人欲既盡 人欲,全無透漏 況其區區者乎 其 面 爲私欲 今吾心之天理 實窮固 程子所謂 而不見 八流行 「天理所在,未嘗不流行於日用 ,則天理自若。」○又曰:「人患爲私 所 未嘗不足,達亦未嘗有餘 古 ,則隨事隨處,自然充足優裕,不待勉 蔽 豪人欲 理, 堯、舜以道 照顧 仁 ! 一曾 應。 未能 處。 則 , 到 義行 則雖 然而然。 點狂 至其與天地 此地 流 得 壅 然唯 曾皙之學唯 如聖 則 到 而 行, 遏 有 者,未必能 心精 遂 位,然後天理 天理便 己 蓋世 ൬ 發用 聖 人之爲也。 置得曾皙所學之分量分曉 若曾皙,則以 不通,然非天理之本體 能 贵 人心與理一, 一之傳 無前之事業,且 於 萬 如 復 沮 物 動 此 有見乎此,故 有 爲聖 遏 静 同 他 而 此 , 發 氏 自 流 ,不假它求 之際從 故 道 人之事,而 不 志之外 日 1然流行· 行而爲 之間。 哉? 《集註 天資之高 得 各 然後 行,須 「天理 得 垂拱 容 其 不足 欲 其 能 П 又 其 着 如 也 也 所 侍坐 所 此。 人欲 無爲 贵 在 體 是 强 能 也 道 有 , 亦 蔽 天 克 故 而 復 人 知 用 着

又形容得

意,不

只

此

兩

句

居之位

其

等事

而

外之間哉

己爲人之意」一句 妙,隱然自見於言語之外,是則曾 六人,童子六七人,長少 (胸次悠然自 物暢茂之時 居之位 「何以言其與天地萬物各得其所?」曰: |而言,其樂若止於 充滿,無少欠闕。」而 萬物之心,聖 過與 各得 則 浴 既浴 點之樂處 而其胸次悠然,直與天地 諸 無出 沂 便 」○輔氏日 樂 適 朋 詠 又 而風,又詠 也 其 友倘 位 歸 見 之思; 所之妙 直 數 人對 其 ,説得點之事實 得曾 春 分曉。 與 徉 語 服 日 : 自適。 天 時 既 哲 有序而 亦 樂其 「曾皙所居之地,不過只 身,然以其心論之,則 耐 用之常, 地 育 其 成人 不 其 歸 ,隱然自見於言外 萬 物之事 集註 願 言志 伞 八日用 物 樂 初 乎 和 時 體 而得 上 不見其有三子之志 其 也, 沂上舞雩, 魯國之 》於 胸 點之所樂也,「初無 之常,則 H 和 下 也,夫又安 外 次悠然,而下 用 初 此一 則 適之候也; 同 其 無 之常 所 無 又 流,各得 人 也。 段,凡三次 無作 舍 而 萬 不 「莫春之日、 夫即 不自得 有 夫以 物 己 過 固 意之爲 以其所之 做 冠 物 藹 -數句, E 爲 即 然天 其 得 我 所 者 而 下 人 其 或 改 舍 之 所 此 内 居 Ŧi. 人欲淨 人所 者。 息而 於事 其用 事,與 柄 爲 人不我 則 地 爲 所 削 居之位 與 同 也 及。 流 則 矣。

之位

勝

處

也;

生 問

同

流

所

隨

處

地

4

底大。」〇輔氏曰:「不言其德之有異,而言其氣象之不侔 實不離乎事物之中,是 夫三子之言志,固皆實事,使各極其才力而爲之,亦非常 之談,故可以 壩,據着源頭,諸子則從支流 底功業,此所謂大本,所謂忠,所謂 ,然後得如 曾皙之學,但有以知之而已,固 、萬物各得其所。 (其朋儕游泳自得,乃其分之所宜爲 爲之末者,其 深許之。 知,則 盡,天理 初無舍己爲人之意者, 在我者輕,在人者重,人必知我,則 但以曾皙見處觀之,終是有所待於外而樂於見 ,樂其 達 將 由其言 此 而 加無所用 流 日 平實,學者當 在 《語録》曰: 行, 用之常者 上, 而 以 動静之間 於世矣,此皙之所以 箇 觀 窮 皙之所對,雖未及此, 氣 其所存也。」視三子 無 耐 事 象 在 莫春融和之時 深味之。」〇 「曾點雖超然事物之外,而 如必 無 下, 不 上做功夫,諸子 爲 無 無 侔 未能 底 往 得 所 非 道 矣, 或 者 不 此 理 而 有以得之故 胡 在 而 是 故 , 則 異 治之,然後 方有以 氏 沂 無無 却 也 目 (於三子 \exists 夫子 之規 上下 做 前 水祓 而 時 底小,他 點 有 非 之所 自見 不 即 操 事 倉 與 除 也 歎 規 也 得 猝 天 有 其 口

子所以歎息而深許之。」而門人記其本末獨加詳之志,則大以成大,小以成小,隨物賦形,無所不利,此夫其能。又其才各有所偏,能於此者或不能於彼,若曾哲

何 ?

赤也爲之小,孰能爲之大?」

曰:「夫子何哂由也?」何如?」子曰:「亦各言其志也已矣。」夫,音扶。三子者出,曾皙後。曾皙曰:「夫三子者之言三,蓋亦有以識此矣。

請其説。輔氏曰:「子路才能非不足於此,今乃見哂點以子路之志,乃所優爲,而夫子哂之,故

夫子蓋許其能,特哂其不遜。曰:「爲國以禮,其言不讓,是故哂之。」

於夫子,故請其說。」

十而非邦也者?」與,平聲,下同。「唯求則非邦也與?」「安見方六七十如五六

唯赤則非邦也與?」「宗廟會同,非諸侯而之。而夫子之答無貶詞,蓋亦許之。 曾點以冉求亦欲爲國而不見哂,故微問

道

理,是以哂之。若達,却便是這氣象

子路等所見者小,子路只爲不達爲國

以禮

事。 者之撰,特行有不掩焉爾,此 之志同,便是『堯、舜氣象』也。 者得失最爲的當。」又曰:「孔子與點,蓋 則無急迫之意,故不至於凌躐,厭飫則有飽足之心,故不 在此,則全是虚夸妄想者之所爲。 至於虚妄。其於進學先後之序,皆身親經歷之,必盈科 千里之外,然自身却只在此。」輔氏曰:「優柔 路、冉有、公西赤言志如此,夫子許之。 而後進,成章而後達,自然步步着實,無有虚夸妄想之 以此自是實事。 「古之學者,優柔厭飫,有先後之序。如子 無能出其右者,亦許之之詞。○程子曰: 此亦曾皙問而夫子答也。 若後之學者,好高如人游 後之學者好高,如人游 心千里之外,然自 孰能爲之大,言 此數語,斷得古今學 所謂 誠異三子 與聖人 狂 身却 也。 亦 心

又 曰 :

「且看莫春時物

態舒暢

如

此,曾點情思又如

似,便

合懷便懷之,惟曾點見得到這裏,聖人做得到這裏。」○

似、聖人見老者合安便安之,朋友合信便信之,少

是各遂其性處。

堯舜之心,亦只是要萬物皆如此爾。」〇

思相

虧無欠,是天生去矣。○《語録

自然如此,與聖人安老懷

少信朋

友

底

者

處到

是聖人所

與,

然亦

不害其

八爲狂

也,處。

過

此

流

行,莊、

老 志

¥

「曾點與聖人志同。

蓋道體

流人

意 無

面 所

見處耳。

倚

門而

歌,亦略見其狂

只此舍瑟言

也。」《文集》曰

一行

有

不掩

非

言

行

背

馳之謂

但

行

不

去得 理。 之,則 事 比 氣力生受。」問: 理 則 可爲矣,蓋言其所志者大而不可量也,然使點遂行其 向上 又 曰 : 爲之末,何故子路 得 恐未能掩其言 時 莫春者,春服既成,何嘗不是事爲來?」問::「三子皆 這 · 事 更進不得。 ,雖粗暴些,纔理會這 將無所不 「三子所 笛?」曰 事都見得 志雖皆是實,然未免局於 能。 「子路就使達得,却只是事爲之末,如 若曾點所見,乃是大根大本,使推而行 ,故以爲狂。」〇又曰:「子路若達爲國道 是自然底 理 達得 雖其功 會 得 便 道 這 是 (用之大,如堯舜之治天下亦 天理。 理 道 這氣象?」曰: ,便就這箇「比及三年,可 理 雖 既 事爲之末,亦 是天理,無許 一君 「子路才氣 國之小 是道 多 志 書 何

<u>Б</u>.

却 這箇,其中隊伍 雕 意思,於細密處未必便理會得,如千兵萬馬,他只是 確實。」 開 已, 見大意。」《語録 未必知。」〇又曰 **≫**⊟: 「曾點見雖高 「他只是見得這 漆 大綱 雕 見 開 得

顔淵第十二

凡二十四章。

己復禮,天下歸仁焉。爲仁由己,而由人己復禮,天下歸仁焉。爲仁由己,而由人顏淵問仁。子曰:「克己復禮爲仁。一日克

又曰: 티 : 曰:「以其心之全得乎天者也。」克,勝也。 仁者,本心之全德。 也是治,勝便是打疊殺了他。一己,謂身之私欲也。 之德,而仁實包義禮智信四 如仁義禮智者,皆仁也。」〇輔氏曰: 「聖人下箇克字,譬 「克訓治,緩了。 且 如 如 相 黄氏曰: 証得 者,故曰心之全德。」〇蔡氏 殺 相似,定要克勝得 分也是治, 睚得二分 「謂 「仁義禮智信 此心所具之理, 《語 他。」〇 皆 録 心

尸之時,不係人欲 欲。 底,都把做人欲斷定。」○黄氏曰:「心之全德,莫非天理 欲,克去跛倚而未能如 屬天理又不屬人欲底。 也。 曰:「人只有天理人欲兩途,不是天理,即是人欲,即 事皆天理,而本心之德復全於我矣。 以依據也。」爲仁者,所以全其心之德也。 理 也。 莫非天理,而理之有節有文者,即禮也。」○胡氏曰: 氏曰:「耳目口體之欲,皆因己而有,故謂之私。」復,反 欲有公私之不同,此所謂己,則指身之私欲者 氏曰:「人有身,故有欲,如飢欲食,渴欲飲,皆是也。 心之全德,莫非天理,而 者,天理之節文也。 語録》曰:「己有兩義,物我亦是己,私欲亦是己。」○輔 ,即全德也。 不曰理而曰禮者,理虚而禮實,以其有 故爲仁者必有以 輔氏曰: 節者,其限制等 「反,猶歸 也 尸,即 須與立箇界限,將 且如坐如尸,是天理,跛倚,是人 也,如行者之反歸於家也。」禮 黄氏曰: 是克得未盡,却不是未能 勝私欲而復於禮 級 亦不能不壞於人 也。 一謂 文者,其儀 此 那未 心所具之理 品節文章 能 也。」〇胡 語 章脉 復 禮 無不 則 一天 録 蓋 時 如 可 但 理

與

也

又言

體

復全於我

者也。 文,則

學者

天理之節

仁即 不壞

之意,玩簡『復』字,便須求天理復還之實,蓋仁即禮之全 , 禮乃仁之子目, 克己復禮 夫私欲而不使之滋萌於念慮之間。 欲之累,視聽言動一 無向外馳鶩之意, 蓋皆以天理爲言 本心之德始 也。」〇蔡氏曰: ,乃天理之反 德之全也。 八中,事 行者之得反於家,委蛇自 事皆合乎 日克己復禮 夫如 此 於人欲之私。 事皆天理者,以 玩 復全 而 皆 箇「克」字, 是, 天理 存,所謂 禮者,天理之著而心德之則 則 「人既 然退 於 則應事接物之際,無 而 天理矣。」〇 仁 即 有非禮,則本心全德存 我 心德之蔽 而 即 矣。 而無家可 心 所 有是軀 便須 事 禮,禮即 以 惟 德復全,則 皆天理 視聽言動之屬乎 則天下之人皆 克己 克 爲仁也。」歸, 水勇)輔氏 去非 也。 復禮者,動 殼 適而 歸、久則 仁,安 而 其 而本 猛 日: 禮 不 克己者, 力戦 言 耳 無 復 -心之德 「仁者, 以 非 有 禮 目 有 禮 復 必 天 決 鼻 絲 静 復 而 猶 勝 平 者 至 則 理 豪 周 有 禮 仁 П 盡 而 實在於我矣。 着。」〇輔氏曰: 無 由己 下之人都湊得着, 所予之仁,若我真 也。」〇輔氏曰: 仁與之。若今日 復禮,天下人來點檢他 與 曰:「克己復禮 做 無 天 難 其仁,極 難 也 而 也。 理 非 流 **《語** 日 他 行,而 言 録》日 人所 日 如 所 能 此 以

於横

出

鮮

矣,所

謂

不能

不

能

無私 人潰四 人雖 之流

行,而

頃 旋 以

刻

違叛之迹

也。

循 勝

規超

矩,如

譬

如

也。

身之私欲

天理之會而

心

也 而 在 則 八言仁

復歸 亡

於禮

則 其日

非 其

也

哉?

中。

而

禮在

其

其效之甚速而 至大也。 語 録

,則事事皆是,天下之人聞之見之,莫不皆

他一日内都是仁底事,則天下都以仁與之,一月能 與其爲仁也。」〇又曰:「今一日克己復禮,天下人來點 克 檢

明 月内都無不仁 H 不 如 此,便不會 以 仁與

底

事

則

月

以

之

言

其效之至大也。」〇蔡氏曰:「天下之大,人人皆稟受得 「一日,極言其效之甚速也。 天下,極

天下皆以仁稱之。」又言 日克己復禮爲仁,即 此仁 一便與 ... 天 天

能 「這 預,又見其機之在 裏都 是自用 着 力,使他人不 我 IIII

爲之則是,何難之有?」〇又曰 「爲仁由己,而 非 他 人 所 能 與 則 極言其 其 機 要

效而深發其機,其效之甚速而至大者,實 克之,不 以 爲 難 由 則 其 機之在 私 欲淨 我

到私欲淨盡,天理流行,便是仁。」○輔氏 仁不可勝 用 矣。 日: 《語 日 録》日 日 克

氏 之未克 天理界限之分,次説又明克復之功非 人,亦不害其爲天下歸仁。」○胡氏 克己復禮了, 仁。」《語録 須 禮 兩般。」曰 録 非 至大也。」○胡 之,不以 「於這事 \Box 行,而仁不可 (其仁),後 是克 曰:「克己須從性偏 處 ě 若 H 有 便 而 计做得 克己復禮 至 , 則 爲難,此言克己之能 Ŀ 是 天理 「爲 處 面却 私 也。 雖 勝 恁地,於那事 己私,皆歸 做得 Ĕ 私 氏 其事 無 欲 用 必 載程 日 : 私 問: 意 因是 盡 不是,必 ,則又言克己復禮之爲仁,其 欲淨 事,亦不害其爲事事皆仁; 事皆仁,所以 後, 日 子語天下歸 則 《集 而 既 便粹 盡 日 有壅遏者矣。」程 事 亦做得 天理 被人看破了。」〇又曰 克之,不以爲難者 是 於禮 註 果決 事 然 難 私 $\overset{\sim}{\preceq}$ 皆 是 克 恁地 流行者,蓋私 天下 也。 仁, 日 方始 「歸 天地 意 處 謂事 猶與 歸仁。こ〇 私 ,所以天下皆 克 程 如 端而 故 生物之心。」又 欲 子 是仁。」《語 子 將去。」《語 事皆仁, 也,謂 何 淨 \Box 初 已 所 日 盡 説 雖 天 得 欲 效 也。 天下皆 有 甚 所 不 又 天 謂 下 稱其 以 見 恰 日 理 速 謝 歸 非 H 明 豪 似 日 而 流

> 聽 胡 如 底 事 剛 録》日 裹 「人之氣稟有偏,所見亦往 難 矣。 氏 偏 固 必失之太柔。 處多,而 面小小不好 易,凡氣質之偏 於嚴,克 是要克也, 日 問 處事 謝 而就寬,那 此 氏 底 有 必失之太剛; 之説, 須先就氣稟偏處克治。」() 氣質 性是 不偏 處 皆須 而 氣質之性否?」曰 蓋欲 而 寬中又有多少不好 忘 事 往不同。 從 其 爲 使 難 頭 柔底人, 有 人 克 者,故 不 先勝 去。 穩 如 當底, 則 氣稟剛 云 謝氏 其 見 然。二〇 難, 「然。 柔 又曰: 也 恐 處要克。」○ 處 底 則 人只 當 多,而 人,則 易 克。 然 又 者 如 克得 日 亦 見 退 Д. 偏 無

禮 雖 顔 勿 淵 不 敏 聽 曰:「請問 清請 非 禮 事 斯 勿言 語 其目。」子曰: 矣。」 非 禮 勿動 非 顔 禮 淵 勿視, \Box 非 П

容易。 天理。 直 目 人欲之際,已判 請 (*, 其條目 聖人一 顔子早 件 也 是 爲指出 也。 有 顔 箇 然矣, 淵 物 這是天理,這 語録 包 聞 裹 夫子 故不復有 了, \Box 但 「聖人是 之言, 是 是 人欲 其 包 所 裹 則 他 筃 者 疑 便 於 赤 洞 骨 天 然都 剥 立 理 而 去 底

事

如

事

事

之

事

容 可

周 以

旋

無

不

復

於

禮,

有

爲

此

所

以

爲

隨

之;

手

足

痛

痒,

未 非

不 然

達

乎

心 物

也

有

私

欲

出

於

非

禮

則

天

足

氣

所

貫

初

截 有

爲

制

却

在

内。」〇

黄

氏

 \Box

面

理

又

自

知

其

力

爲己私矣。」勿者 意思 勝 盡 箇 《語 有 而 宰 主 輔 勝 己之私 能 放 私 便 退 中 氏 萌 È H 復禮 倒 以 請 録》曰 然 私 耐 幸。 克 復 用 作 禮 \exists 功 去, 勝 事 後 勝 禮 去; 之間 復 1,禁止 夫只 而 便 能 私 之 也 若 之, 斯 而 禮 仁矣。」〇又曰:「今人與 勿者,禁止之辭, 巾 提 機 復 纔 有 「《説文 莫 由 恁 起這 在 語 之 禮 日 所 地 克 也 他。 故 非 勿字 之辭 禁 之機 胡 去, 持 用 機 天 勿字, 直 顔 能 止 $\bar{\circ}$ 守 氏 理 便 上。)謂「勿」字 之 也 是 又曰 以 子 勝 而 勿令走 \Box 之流 能 間 其 不 釋 爲 默 復 纔 是 爲 三主 私 刀 私 禮 己 行 勿 是 見 莫 己 識 作,也 人 兩 字 矣。」 0 然 與 則 釋 非 似 勝 段 任 心 其 非 動 後 之 勿 在 禮 理 旌 意。」〇 言其 外, 子之健,又能 程 理之節文者亦爲之動 者。 也。 用?」曰: 中 禮之目 去,反説 養其中」,方是説 任 勿言,非 而 體 視 子 而 而 用 聽言動,身之用 不 (理之如 於 仁之與禮 應乎外」, 無 心 制 之相 問: 巡 疑 所 所 於 制 念慮 子子 疑畏 箴之序曰 也 「制於外,便是用。」〇問:「克己功夫從内 外 禮 於 「制於外 應, 此 外,如 遂 是推 也。」 耳 \Box ,本未發之體 如 所 勿 致其 則 輔 做 非 人心 非 以 動 手 氏 功 也,心 本 何?」曰 勿,故 足 \Box 由 所以 謂 **,** 而 養 夫處, 視 手

從

裹

面

做

功

夫

也

制

平.

外

所

以

養其中」,

此是

説仁之體

耐

不

及

全

是

自

外

耐

内

自

葉

流

根

聽

言

動

四

者,

皆

是

由

中

而

出

泛

其

中

也

語

録

日

二由

平.

己私

便可

去。

私

去

則

勿字上。

纔覺非

禮

顔子

只争箇勿字。」〇

字之義。

人心

所

以

爲

用

也。

必也

心爲之主

又曰

「只是勿,便

是

由

他

若

不收斂,

向

來,則

禁止之;

纔禁

止

天

理

之流

行

矣。

此

旗一

麾,三

軍

則

動

容

周

旋

無

不

之

所

以

爲

Ì,

而

程

子

Ē

顔

淵

問

克

己

復

不

復

再

問

而

直

以

事

斯

語

爲

己

顔

子

之明

既

能

默

識

其

理

顔

;

禮

勿

視

非

禮

勿

聽

非

禮

四

者

身

一之用

也

蔡

氏

E

則

其

體

也。

由

平.

中

而

應

平

對

非 非

禮

則

得

了。

非

禮

者,

五三七

乎

中

而

應乎

外

制

於外

所以

其

心之全德亦

不

得

以

自

全矣。

故

要視他 而 有 句未是不好。」○輔氏曰:「人心出入無時,莫知其鄉 雖 日 而 無所滯 覺 是理而已,然理亦未嘗有形狀也。」〇又曰: 説。」□○陳氏曰:「心之爲體 求夫仁,當自復禮始。]因 即 『《視箴》何以特説心?』曰 日 後之學聖人者,宜 中。」蓋謂 「心兮本虚者,體也; 禮乃仁之著,聖乃仁之極。 酬酢 爲則而已。 形迹可見? 感之本體也。」 事物、纔觸即動 此 "「心兮本虚,應物 「人之視聽言動,視最在先,是乃操心之準則。 處 萬變,而隨感隨應,更無留迹。 ,此其本然也。」○蔡氏曰:「人之一心,本自 ,便是 而 此 操存之,庶乎得其要,而 也。」 非禮 蓋人之視最在先,遇不當視者,才起 然操則存,舍則亡,而操之之要,則 操 顔 故當以 ,而應無蹤跡之可尋捉處。」○胡氏曰: 淵 之有 應物無迹者,用也。 事 服 一箴以 是爲操心之則。」○陳 斯 要,視爲之則。 『諺云開眼便錯,所以就心上 膺 欲爲聖人,當自求仁始,欲 ,其中洞然,本無 無 語 而 迹。 自警。 有 所 勿 《語 此 以 失 定之準。」〇葉氏 即無思無 體無所窒 進 也 録》曰: 其《視箴 「心虚 於聖人。 一物,只純 輔氏 氏 語 、爲、寂 虚靈, 靈,知 此兩 ,則用 以 問 日 日 何 録 念 視

氏曰: 録》日 以 行,而無非仁矣。」〇 夫真積力久,則私欲淨盡,徹表裏 此以全體言。」〇又曰: 無歉,而不復有作輟之弊矣。」○陳氏曰:「上以一節言 禮 無以侵撓吾内,而天理寧定矣。」〇胡氏曰: 引去,所以云以安其内。]○陳氏 之於外,以安其内。 日: 逐之而去矣。」〇胡氏曰: 心之體而言 也。」〇陳氏曰:「蔽,指物欲之私而言。」〇又曰: 方有非禮而視。」〇輔氏曰: 防,先以視爲準則。]○蔡氏 動 蔽交於前,其中 用力於此也。 , 則 心必隨, 日 : 心得其平矣。」克己復禮, 「常常克去己私以復於禮,久久不息,則其意誠 「如是功夫無間斷, 者, 心動目必注。 一身之昭鍳,五行精華之所聚,於心尤 即 天理之謂 久而誠矣者, 胡 則 氏 「誠者,真實無妄之理也。 遷。 曰:「克己復禮者,言上文乃 也。 因 心之虚靈,千變萬化, 《語録》 則久而自從容不勉矣。」〇 ⊟ : 「此則 有所見而心爲之動也。」 《語録 非禮勿視未是仁,真 物欲之蔽接於前 日 : 「則,猶法則準則之謂。」 **≫**⊟: 所謂物交物而失之者 於誠 久 「物欲克去於外, 日 「視,是將這 而 純,是天理之流 「至蔽交於前 誠 「禁其視之非 矣。』《語 則心 克復 「中,指 欲 切 裹 加 制 實 則 底 Ħ 檢

大 是

之感 不當 相 티 : 之欲 久, 自 有 誘於外,不能 日 有 日 生,其原 當 箴 復 心 有 則 忘 得 也。 緩 聽 所秉之常性乃得之於天,而 禮,有以用其力,久而 本也。 「人雖 題,而 「《樂記》云: 如 了好惡 所 而 急之異 亦 者 \Box 天理 然誠 言。 聞 物 猶 出於天之所賦 即 而 至 物至 有 俱 《視箴 而 不聽其所當 無 人 秉 實 物 隨 也。」 滅,而 是 節 來彝之性 無 則 反 ()則可 物以 欲至 一知知 性 彼 於 躬,天理 知 有 『人生而静,天之性也, 而 知 原 内,知 足 我之間 而 往也。」〇又曰: 無復存矣。」〇胡氏曰 ,然後好 以 秉 其 誘 爲知所誘,爲物所化,然後有聽 以 也。」〇 知 謂 聽者焉。」○陳氏 本 彝 覺萌,遂爲之引去矣。 知之而 誠 之仁 滅 誘於外」,方始不 物 然 而 也。」〇又曰: 則自 矣。』人莫不有知,知 也。 人受之以 化 悪 陳 本 也。」〇蔡氏 形焉。 乎 氏 聽其所當聽,不 有好惡,這 彼以 無所用其力矣。」其 遂 曰:「人均 夫 「不言聽 Ľ. 爲 心言, 好 性 其 性者也。」〇 正 日 惡無 感於物 好去。」〇 E 是 而言 知誘 正 此 輔 以 執 知,指 自 一始 節 以 氏 理 化 聽 此 者,所 然 於 知 物 而 性 日 言。 則與 其 常 而 者 化 如 内 語 動 言 其 輔 形 胡 道 所 克 聽 者 人 此 録 聽 至 之 氣 H 當 性 所 知 微 氏 ൬ 不 己 0 以

到

爲防閑 誠。 又 曰: 邪,皆 曰 : 寬,亦可 則自然非禮勿聽也。」〇蔡氏曰: 邪 人失其 徹,於日用 其實一也。」卓彼先覺 者 止之處,即 閑 悟 云『以安其内』,聽是 知之初,知者聽之後。 存 以其邪,使不爲吾舍之人,存其誠 此 每 視爲先,聽次之,所以 自外至者 理之全而體之者。」〇又曰 「聽得 誠, 本性 抵 移爲 聽則審 拒 應接,皆 理之當然者是也。 非 那 外 《視箴 唯 外物 禮 面 所 也。 先 當 底 勿 覺 用。 ,使不得侵近否?』

回 有 止 來,所 然只視聽言動 聽 者 定理,不 , 而 心。」《語 能 自外 因 殊不知 知 不爲 以 知 知 《視 止 而引入内 云閑 ൬ 能 止 録 於 物 爲 箴 「或疑 此心 視是自 之誘 \mathbb{H} 至 遷 有 邪 「事事 無非 説 ,使不雜於人欲之私 善 也。」〇 定。 存誠。」〇 爲之動 得 知 而 聽 而 禮 所以 尤 内 問 物 其 心 化 箴 ,便是閑。』 〇 力。」其《言 而 然 蔡 有 物 固 矣。」〇 故故 云 引 》之説 8,各 0 則 定 氏 開邪 輔 是。 一開邪 陳 出 以 日 向 氏 此 有 外,所 氏 知 似乎 凡 莫 胡 日 心 所 「常 日 言 存 閑 言 是 氏 明 當

行及「原缺」二字。 有 定 下 原 有 空 行, 標 原缺」二字,今據 四 庫 本 删

空

發於口 箴 》 曰 又 曰: 動 機 外不妄,則内專。 故專。」○陳氏曰:「疾而 闕,始得相應。」〇 \Box 欲言,大概不出此二者,皆人欲之所爲 日 不静專,自家這 言以宣布 由言以聲之,而後見於外。」〇胡氏曰:「心有所感, 順矣,然亦須就言上做工夫,始得内外表裹照管,無少 不得於言,須求之於心,就心上理 上四句是説身上最緊切處,須是不躁妄,方始 言有不順理、不自得處,即是心有不順理、不自得 又曰: 有 善惡 興戎出好、《文集》曰: 躁屬氣,妄屬欲。 門之闢闔,所繫在樞,弩之張弛,所繫在機,人心之 「静安專 則 「言非禮,則 也。 由 有二者之分。 人 言以 發禁躁妄, 一,皆天理之所存 心自做主不成,如何去接物?」〇 心之 宣之,)陳氏曰:「一念之動於中,或善或 此二 有躁妄而 動, 一句 不爲氣所動 而 動,日 利害之幾,可 後 爲 因 見於外 内斯 起争; 「好,善 躁。 篇之關要 言 也。 會也。 以 静專。 ,故静;不爲欲所分, 虚 是 言以 宣。 也。 外 也,故必禁之。」〇 而 畏 亦人之樞 亂, 人處。」 不 心氣 如 禮 戎,兵也。 躁 此。一〇 語 É 文集 則 和 矧 妄。 則 静專 録 無躁 機 則 内 處, 是 《惡,必 人之 · 必 輔 言 也 陳 静; ĕ 日 樞 妄 言 賴 空 氏 氏 纔 理 故

> 易則 **悖來違」,是當謹於接** 不專也。 則誕以下,謹於接物也。」〇蔡氏曰: 之病也。 己也。」〇蔡氏曰: 悖來違。 從身之旁而逆出者,❶乃煩中之失也。」○胡氏曰 至於妄誕。 口者甚微 句 而 「「己肆物忤」,則人與己非兩物, 「吉凶榮辱、惟其所召」、是就身上謹、 如 「易者,輕快之謂,躁則傷於易。 '却是説言底道理。」○胡氏曰: 生 《言箴 愛。 誕 吉 煩者,多數之謂 煩則支,由其躁 影説 傷 而召於 《語 煩則心不精 M 許 煩 「榮辱, 多,也 録 則支,輔氏曰: 彼者甚捷 一出好 Ĕ : 是人口 物間 〒 惟 7則吉則 一,故必至於支離。」〇陳 而不静 ,妄則傷於煩。 其 都 四 可不 句,却 Ł 所 説 祭 有 誕者,欺誑之謂,而 「出悖 「惟其所 召。 也。一己 得 畏 許 「易則心不管攝,故必 説四 興 周 「易則 哉, 「傷易 多 、
> 戎則 來違」, 備。 病 項 語 召以 可 肆 支,猶 痛 病。」〇又日 誕,由 不 録 M 0 則誕 物 則 Ŀ 謹 \Box 從 則 輔 件, 木之枝 哉。」 辱, 其 謹 |至「出 頭 感 氏 氏 「傷易 妄 發 於處 與 起 中 日 日 傷 於 應 至 四

●「逆」,原作「迸」,據《北溪大全文集》卷二十《言箴留

氏 了,便着 精粗 不静 所出 處 速,不可道有兩般 身。」〇又曰: 道 爲』者,及其形於事爲,早是見得遲了。 於爲,不可; 蓋思於内不可 於做出了方見得。」〇又曰: 幾,誠之於思,志 謂敬謹其出 而 非二事。」〇 非 E. 與物件 照管,不應這裏失了,後 ĕ ⊟ : 是兩般人。 者悖 ,故己肆 爲 哲人知幾,誠之於思,顏子無形顯之過是也。 哉 「哲人便於思量間便見得合做與不合做。 去事上看 處 而 矣,内何復静之云? 訓 動,思 陳氏 而無躁妄也。」其《動箴》曰 來亦違矣,内何復專之云?」○蔡氏曰: 專守於爲而 而物件; 不誠,爲於外不可 「思是動之微,爲是動之著,這箇是 辭 只是「誠之於思」底,却覺得速,「守之於 日 !』陳氏曰: 便舍彼取 ,却兩般做工夫去。」○又曰: 處 亦 「傷易而 内不專,故出悖而來違。」非 動。 士勵 不誠於思,亦不可。」〇又曰 面更不去照管。 「思是動之於心,爲是動之於 思是 此。 誕,則 法 傷煩 行,守之於爲。 不守。 須看如此,方得。」○輔 動 謂 無 於内,爲 而支,則不合正 先王之格言。 有 此却是覺得 專誠於思 成 :「哲人 覺得 法,在己者 是 「須 動於外。 志士便 思 ൬ 該 法不 動之 着 有 不 處 《語 欽 理, 知 内 志 守 失 隨 遲 肆

氏曰: 矣。 曰: 克念之誠。 티 : 間耳。」造次克念,戰兢 餒於中,故裕; 便危險。」〇又曰: 日: 之謂行,志士激厲,能勇於有行。 念」,不息之誠也; 志士其次也。」順 方知覺而守之不放,則事亦中理,而 而實之無妄,則天理之本然者,流行無壅矣。 理明,能燭之於先。 日 1: 哲 結上文。二者之動雖微顯不同,然循 : 勵 人志士,雖 常恐懼戒謹,守之於爲,則其操存之力篤矣。]○ 「哲人志士雖有 「知幾其神乎 「幾者,善惡欲 行,守之於爲,如顔 雖急遽苟且之時,亦必誠之於思 「造次克念,以誠於思,言凡學者動於心,不可不 戰兢自持,以守於爲,言凡學者動於身,不 則是 逐人欲之私,則易陷於小,故危。」〇 理 ! 動 此 「戰兢自持」,敬謹 有 間,然安危之機,只 於 則裕,從欲惟 哲人其 而未形之間,其 兩樣,大抵 一念微動 兩句,是生死路 子不善 自 上也,見幾 . 持。 未嘗 而未形之間 都 爲事動之已著也,至 是 無過舉矣。」〇蔡氏 復 兆 輔氏曰: 順 , 則 之體 天理之公,則 危 在乎天理 頭。一〇 甚 行 而作,不俟終日 理便 公微。 其 ; 是 也。 涵養之功 《語録》 也。」〇 便已 安 「造 見於所 陳氏 哲人心 裕, 0 人 知 陳 欲 蔡 從 陳氏 次 皆 H \exists 覺 可 行 氏 無 此 通

條目; 學,惟 日: 之中矣。 也。」〇愚謂: 不足以任此 聖人也,又豈可 以 天下 也。 己千之功,使 之説,必不能致其 故 非 愚 不 至於自然,則賢 獨以是告顏子,而他弟子有不與焉。 ,將有誤認 加 按: 唯 至 此 賢,習之也,謂志士。 歸仁」之説,必不能察夫爲仁之機要在此,而 自 輔氏曰: 行之爲貴也。」〇胡氏曰: 顔 明 非 持 兩句必於動上言之者, 非至健 顏子之至健,則雖告之以『爲仁由己』與 此章 子 不 之念。」 而 得聞之,而 天理爲人欲、人欲爲天理,而 雖愚必明 能 非至明,則不能察天理人欲 自 不加 「非顏子之至明,則雖告之以「克己復禮 (亦聖矣。]○蔡氏曰: 察 問答,乃傳授 棄哉。 則不能 角 習 勉焉? 其 決於此 與 , 雖 人幾,非 古 性 決天理人欲勝負所由分之勢, 柔必强 及其成功, 當發憤,以致人一己百、人十 凡學者亦不可以 成, 而 ,而遂以爲己 遂以 動則 至 「禁止之初,特爲仁之事 聖 以 健 心 爲智 該 賢 庶幾於聖人之事可 「聖,性之也,謂 不 法切要之言。 夫三者,而 一也,故曰同歸。」 然學者所以 司 不足以及此 任。 能 邪 不自覺於冥冥 歸。」 正 致 所 此 其 由 夫子 夫四 遂請 君子之 不 學爲 動之 決。 輔 勉 所 力 勿 其 哲 氏

承大祭。 ○仲弓問仁。子曰:「出門如見大賓, 則表裏如一,而私意無所容矣。」 守之法,以養其不可見 摑 玩。 之間矣。 將有玩天理而不肯進, 掌血者。」○又曰: 《文集》曰: 己所 程子之箴, 不欲 「四箴旨意精 戀 不可繫之心也。 「四箴之意,蓋欲學者循其可見易 發 勿 人欲 施 明 而不 密,真所 親 於 切, 忍 割,而 謂 學者 至於久而 在 棒 依 邦 尤宜 使民 違於二 條 無 痕, 不 怨 深 如

語矣。」在家無怨。」仲弓曰:「雍雖不敏,請事斯在家無怨。」仲弓曰:「雍雖不敏,請事斯

斷, 而仁之施也。 纔 敬 者,吾心之所以生, 柅仁之用。 此是持敬工夫。 德全矣。 不敬,便私欲 以 而 私欲 ·持己, 自無 敬 輔氏 主敬持己 以養之,恕以達之,則天理 恕以 可 萬端,害仁之體。 「己所不欲,勿施於人」,此是强 日 萌之時 而仁 及物, 二出門 之存 則私意無所萌 可 着 如見大賓,使民 也。 則 之處 私 恕 纔 矣。」〇 不恕, 者,吾心之所以 意 於内矣。 無 流 便 陳 所 如 行,不 徇 氏 容 承大祭』 己 恕工夫。 日 行恕及 遺 ൬ 至 心 敬 間

周 自 有

前

使民 恁地 於外。 何? 氏曰: 於人,而 明聖人之説,見 旋 住 至 時 則 此 乎 謹 氣 説 外 答他 中 不 時 非 敬 此 私 果能 獨 象, 無 禮 得。」〇 「蓋使之考其 曰 **:** 如 出 有計效之心也。」〇程子 内外皆 意 却 : 者 觀 也。」《語 怨 便 無 便 此 便 門 如見大賓、 敬 好 是仁者之氣象。 其 所 輔氏 是守之之法。」或 亦 可 須 如 此 與 無所憾也,猶天下 形 口 出 他説今 得 以 也 見 於 儼 心 日 録 知 門 前 效,以驗其實 其 外 大賓 若思 如 廣 ĕ ⊟: 面 矣。 使 矣。 未出 效言之,使 「程子 承大祭 Ĺ 有 體 民 「程子答或人之説 ()使民 就 内 時 非 胖, 之時 熟於仁 段 二説 出 外 門使 也, 因 門使 T. 則 無 歸仁之意,借是以 也。」〇胡氏 夫。 動 Ė 實 他 出 私 問 者 有 如 民 相 民 其 容 意, 未 以 門 ; 但 但 諸 時 承大祭。』看 「孔子言 通 出 之時 周 敬 出 是 使 自 前 做 説 門 中 當 仁 旋 考 民 如 此 心 使 固 E : , 若 而 門 初 在 氣 廣 民 是好 中 此 也 是 正 是 象 以 然 後 如 使 験 體 . 禮 出 驗其 矣。 不 胖, 前 Z 民 後 見 則 足 則 門 2 消 輔 守,如 做 道 未與 信 以 撥 **語** 事 氏 不

其

唯

物

内

愚案: 子『克己 也。 時,能 終之,可與 自『君子進 恕、是漸漸服 恕之本, 直内, 亂反 去,工夫較大。 理 EI: 須言仁 而 庸 録 持守 已之意 物 「敬 行之謹」、「閑邪存其 敬 顔、冉之學,其 Œ $\check{\exists}$ 接 義以 ,故專 程子 謹以 復禮」工 克己復禮,乾 以 將去。」○又曰 而 時 存 德脩業」,以 主敬 直 「克己復禮 1 方外」,只 藥, 專 即 義 以敬爲 守之,則與 此心未嘗不敬 内,義以方外」之類 自 也」,從 後 È 夫,却 消磨 行 可 仲 説 出 恕,如 知 || 弓不 所 言。 門 了這 知 至於「知至至之,可 是一 就 謂 是 使 物 然 解 持守 處 民二句 從 持 而 『儼若 誠」之類 高 接 乾 道 出 病。」〇又曰: 説 服 做 盈 謹 頭 時 門 道 應 來。 下 也 得 藥,打 做 處 守 獨 思 心事之時 奮 自 使 那 説 淺 起 成。」〇 愐 」之時 是 如《坤 民,是 發 是 然 語 言 前 來 主 漫了 也。 深 只 而 有 也 敬 是 説 專 所 有 則 此 截 也 又 駔 「克己復 觀 爲 先 坤 得 與幾 這 於 爲 如 以 氣象 **严**,只 行 日: 則 物 夫子 要 道 病。 學者發 是 發 未 此 如 但 恕 接 見 據 截 矣。」 静 不 與 也 也 「庸 是 時 可 主敬 告二子 見 得 退 仴 物 乾 禮 坤 説 言 在 如 也。 而 後 知 敬 此 0 接 獨 道 敬 持 底 却 顔 終 卦 如 行 又 胡 之 是

馬, 去。 明。 見大賓,使民如承大祭」時,也 勿施於 蓋如是把這 雖不曾着力去「克己復禮」,然却與「克己復禮」只一 矣。」然學者誠能從事於敬恕之間 歸仁,其應廣而 子底,便可天下 猶是人。 對,做得到 玩聖賢氣象,便會得。」〇 力,淘盡泥沙,方見清泉,故屬坤。 工夫索性,豁 氣象,各有所類。」〇又曰: 仲弓則 亦將無己之可克矣。 顔子之於仁,剛健果決, (人) 時 若又以應效言之,則又有大小淺深之不同 ,便純是天。 自斂藏嚴謹做將去。」〇永嘉 箇養來養去,那 開 ,也着私意不得。 ·歸仁,仲弓底,便只可邦家無怨。 速; 雲霧, 邦家無怨,其應狹 便見 持敬行恕、是己與人對、做得 蔡氏曰: 「仲弓資質温 青天,故 私 如 着私 意 天旋 《語 自是 「克己復禮 意不得, 己所不欲 此 地 録 屬 著不 處最 轉 ₩ El 乾。 而緩,氣象則侔 陳氏 粹, 顔子 雷 得。 難認,須 仲弓工 「持敬 動 是己 愐 風 出 行 資質剛 有 行 天下 」與天 「顔 門若 細 夫 做 般。 到 恕 得 顔 着 心 子 將

○司馬牛問仁。

子曰:「仁者其言也訒。」訒,音刃。司馬牛,孔子弟子,名犂,向魋之弟。宋人。

焉 告之。 躁,正 氣,動 之全德。 以 默皆合於理。 若有所忍而不易發。 《語録》曰:「仁者之人,言自然訒。 訒, 去得此病,則方好將息充養 方,不外是矣。《文集》曰:「這是司馬牛身上一病 發,故借以曉之。」夫子 語,是他此心不在,奔馳四出,如何有仁!」〇 言語中以操持此心。 言若有所忍 難者,欲發而 「言,心聲也,忍則心之用也,故 端耳。」〇胡氏曰: 則 此。 忍 於欲 所以爲仁之方固不外 所謂役於氣、 使牛因其言而 也 惟己私盡 使其於此 ,則爲心德之病, 難 不敢輕也。」仁者心存 其出言也,不待禁止 也。 而 動於欲者,故因 去,天理渾然,是 不 「仁者之人,常有所主於中 深思,以去其病 仁德固多端,而其言之訒, 胡氏曰: 且如 易發,蓋 而 以 ,而仁始 謹 耳。」〇輔 而今人愛胡亂說 牛 此,所謂 之,則 多言 心存 「忍者,禁止於將發之時 其問 虧 其 一,亦非 在學仁者,則當 而不放,則 曲 爲得之。 矣。 氏 德之一 而 而 於 能 所 愐 日 此 欲言而 有 躁 不放 即 司 以 誠 其 馬 「仁者,本心 話, 一或 爲 者 端 故 4 輔 病之反 其 端 故 是 不敢 則 輕 以 告之 動 言 氏 仁之 公役於 也。 自建 加 言 静 特 自 易 也 티 : 其 言 謹 處 邨 其 而 語 然

故必使之先致謹於此,去煩而簡,反躁 則彼之躁 以語之也,以牛多言而躁,若不以其病之所切者 [常定於中,然後人德次第皆可 陳氏曰: 必 「語 不 能 司 自覺,終身爲此心之累, 馬牛之説,又下於雍。 漸進, 而仁可求矣。 而 非祕其精義 静, 耐 則心無 無 由 而 語 可 所放 耐 達 之, 不

之難,言之得無訒乎?」曰:「其言也訒,斯謂之仁矣乎?」子曰:「爲

彊閉之而不出 道之大,不但 牛之意,則以訒其言爲彊閉而不出,故易視之,而以爲仁 動,言自然初 豈復知是非善惡。」○輔氏曰:「心存,則行自然難而 以難其出。 也。」故夫子又告之以 夸妄想,而不知反諸心以味其理之實,此最學者之大病 牛意仁道至大,不但如夫子之所言,輔氏日 不苟,事不苟,故其言自有不得 此牛多言而躁之證也。 不仁者已不識 如 而 不苟 此 而 也。《語録》曰:「仁者常存此心,所 發,此 已也。」楊氏曰:「觀此及下 蓋心麤氣暴,易視忽聽,惟知 痛痒,得説便説,如夢中讝 心德之自然, 豈易能 此。 蓋心常存,故事 而易者,非 哉 不苟 語 ൬ 虚

> 章 異 雖 躁之病既足以痼其中,而妄想横鶩之意又如無源之水, 所切,使之動心忍性,以求去其病,而後可以 言,亦止此爲是。」愚謂牛之爲人如此,若 於學者之身,而皆 聖人之言,雖 泛以爲仁之大概告之,則彼亦將泛然聽,驟 實病,而唯世之虚美是求。 曰:「人之躁者,多忽小而慕大,舍近而騖遠,不察在己之 而終無自以入德矣。 語之,則以彼之躁,必不能深思以 不告之以其病之所切 日 溝壑暴盈,其涸可立而 也。 苒 問 雖 讀者其致思焉 之語,牛之易其 爲 司馬牛多言故及此,然聖人之 有 高 爲 下大 待也,亦將何自而 故教之者,要當直指 入德之要,則 ?,而汎以爲仁之大概 故其告之如此。 小之不 言 可 知 同 然領,多言 人德哉。」蓋 人德。 去其 又初 然 其 程 其 不然 輔氏 病之 病 子 切

向魋作亂,牛常憂懼,故夫子告之以此。○司馬牛問君子。子曰:「君子不憂不懼。」

憂也。」○胡

氏

E

:

4

知

其

必

不

能

「不憂不懼,斯謂之君子矣乎?」子 曰

强所能 憂不懼 有疵病,則不免於憂懼矣。 無憂懼耳,蓋君子自然之德也。」〇又曰:「若於吾之德少 憂不懼者,疑若有之而强排遣之也。 爲 氏曰:「牛之再問,雖可見其易於言,然亦足以發聖人未 牛之再問,猶前章之意,故復告之以此。 不疾,何憂何懼? 得,非實有憂懼 未可遽以爲易而忽之也。 盡之藴,未可遂非也。」疾,病也。 無愧於心,故能内省不疚,而自無憂懼, 到,然在學者,則亦不可以不加勉强之功也。」 ¨**,** 由 子德· 與《孟子集義》生氣之意同。 而 全 强 而 憂是氣索,懼是氣歉,夫內省 排 無 疵。 遣之也 ○晁氏 故 言由其平日所 何憂何懼,則 。」輔氏曰: 無 人而 曰:「不 雖 不自 是自 非 示不 輔 勉

内省不疾,夫何憂何懼?」夫,音扶 : 保身,故言亡也。」 同惡,此牛之所以爲

子夏日 「商聞之矣:

蓋聞之夫子。 輔氏曰: 觀子夏之言, 有尊敬而不

敢

死生有命,富貴在天。 易言之意,是以知之。」

其實一而已。」 所賦於人者。 富貴之要訣。」○陳氏曰:「天者,命之所自 能必哉? 儻來之物,其所以遇之者,蓋莫知其所以 有定矣, 豈今之所能移哉? 命稟於有生之初,非今所能移,天莫之爲 「稟於有生之初,皆命也。 而爲,非我所能必,但當順 順謂不咈,受謂不拒,只此二字,便是處 故以 理言之,謂之天,自人言之,謂之命 有生必有死,是其生之所稟已 莫之爲而爲者,天也。 受而 然也, 豈 른 出,命 輔 則天之 我之所 氏日 死 富 4: 貴

皆兄弟也。 君子敬 而 無 君子何患乎 、失,與 人恭 無兄弟 而 有 禮。 也? 几 海 之内

牛

·有兄弟而云然者,憂其爲亂

而將死

也。

欲 或

·弑宋公而殺孔子,其惡著矣,而其弟子頎子車亦與之

問:

4

之無令兄弟,何

也?」曰:

「以傳考之,桓

一難嘗

既安於命,又當脩其在己者。

愚謂:

安於命

而

司

馬

·牛憂曰:「人皆有兄弟,我獨亡。」

心,故 不自 文,禮 但 道 之於司馬牛, 而 思 盡 也。 故 氏曰: 敬之,此所以如兄弟也。」蓋子夏欲以寬牛之憂, 節 不脩己,則 子 言苟能持己以敬 惻 其 其言未免有 ,以致人之愛敬若兄 至於傷生 爲 文 夏 八心以 怛之意 知 《集 輔氏 也。 是不得已之辭,讀者不 ,則天下之人皆愛敬之,如兄弟矣。 「持己以敬而更無間斷,仁也。 ,則其以爲憂,是人情之常也。 員 四 教 註 是有 日 仁者愛人,故人常愛之, 而 海 失己,則爲之朋友者以 而不能已,是又君子之當然也。 迪之,誠已至 既韶之以安命,又勉之以脩身,使之兩 :「有兄弟而爲惡 戒 語 皆兄弟之言,特 激 命 讀 滯 揚助長之病,或以啟 而 者 者也,唯 無義,聽乎天而不盡乎人矣。 不 弟然,則 而 可 一而彼 不 以 ·間斷,接 辭 方悍然不 怙 可 聖人則 害 終日 以 意。 義 有禮者敬 以 廣 接人以恭而各有節 理 善其身以化率之, 夫人輕視天倫之 以 其意,寬其憂矣。 廣 趨 開 我 人以恭 於死亡 無 聽, 辭 釋之,如 司 胡 若夫憂之過 此 人,故 馬 則 害 氏 病矣。 一之地 致 意 牛之 而 故 日 子夏 盡 其 人常 口 : 有 又 其 憂 而 輔 路

> 已 覺 於理,而 滯 出 昧於 事 者 無我,渾 合下箇『皆兄弟』字,便 親愛之,何患乎無兄弟? 謂在我者敬而無失,與 「意圓語滯,以其近於二本否?」曰:「子夏當初之意,只 且 丁,則 便 來。 知 則 着在那 子夏 愐 有過差。 循理 年之失乃移在子夏之身而不自 理 如子夏之言,不過 不 是義理,故口 不 偏處 知此 務朝夕兢惕以自點檢 是以 能 者也,心少 踐 意圓,謂説得自家意思却盡 ,此君子 其言。 而 不 以 能 有所 無擇言,言滿天下無口過。 所以 哭子喪 成 由 人恭而 踐其言 是 無差等了。」〇 此觀之, 倚 要去開 謹言 要廣 着 他哉 有禮, 則言語 明 語 司馬牛 爾 則 廣 也。 學 司 如 知,故爲蔽於愛, 則 者 以 馬牛之意。 此 之間便 之意耳 以 輔 語 其 則 至哭子喪 語 氏曰 録 蔽 四 可 滯,謂 ¥ 自 海 自 於愛而 不 之内 恃 若夫賢 有 明 聖 其 言 知 病 只 Ž 所 昧 語 不 痛 人 不 皆

恕,不 不 行 子 張 焉 行 問 焉 可 明。 謂 可 明 子 謂 也 Ħ 遠 已矣。 也已矣。」譖,莊 浸 潤之譖 浸 潤之譖,膚受之 ,膚受之愬 陸 反。

浸潤,如水之浸灌滋潤,漸漬而不驟也。

反。

將做 説教 説被人 暴矣。 人若以 之行,愬爲伸己之冤,若事本非實, 驟,則聽者不覺其人,而信之深矣。 足以爲難 者之相爲反對而互言之,見其事變之不同,而明無不照 膚」之言 者 也 切 謡 ·剥牀以膚」,而 他 急迫而 事,須 纔説 毁 也。二一者難察而能察之,則可 來不覺。 者汎然不 打; 愬,愬己之冤 膚受爲微淺之意: 或問: 人之行 則 得 矣。」〇 如《易》所 是説得 被人打 驟 凡言 切身, 恕, 便 切於身,則亦不足以感人 「何以言膚受爲切於身?」曰: 傳 膚者,皆 語 不 也。 緊切,要忽然間 是 》以切 便説 親切 能 類 則 謂 人 膚受, 爲切於身無疑 他 則 聽者不及致詳, 人要殺。 己 近釋之。 也。 剥 「譖,是譖 與浸 底 須 事。 牀以 是 毁 謂 潤 觸 閑言冷 且《傳 蓋 纔 何 人者 肌 動 而 膚,切近 他 説得 不 以 他 潛者 膚 矣。 如 異, 人,是不干 矣。 語 所 漸 此,不足以 緩慢,人便 亦有「揃爪及 如 見其心之 遽然極 蓋譖 而 受,利 掉 被人罵 故以 漬 而 其 放 「《易》曰 災 不 爲 愬 發之 而 那 ·己底 行 此 言 毁 便 裹 寃 者 不 害 觸 不 其 不 X

> 楊氏 能。 明,而 詳 子張因其言 故其 未必能察也。 毛意象,便自以爲有得,於人情之細 無深潛鎮密之功,是其平日之所謂明者,不過一 者也,然使之不行,則非文理密察、 人,亦宜不足於此。 曰:「即其詞之繁,意之複,固足以知之,然攷子 微,此所以爲遠。」此亦必 指明之遠而言,蓋不爲目前之言所惑, 而發之暴者,其必知有所不能免, 子張之爲人,務外好高,於事已有 曰 : 詞 不 繁 驟 蔽 而反之身, 而 故夫子因其問 於 不殺, 而 近矣。 夫浸潤膚受,皆以巧 語之,與利 則夫不覺其 以 因子 黄 明而 致 氏 丁 EI: 姑舉 、既明 寧之意 張之失而告之, 入而 害不切於身者 丽 密、 =此二 忽略自足之病 能 而深究乎人心之 集 且遠 事 信之深,不及 有 譎 註 理之精 條以告之, 所戒矣。」(丽 》所 者, 云。 行 觀其 謂 有 張 其 微, 遠 之爲 輔 所 相 使 則 氏 皮 不 而 愬 特

遠。 明』。」輔氏曰: 不行 譖、膚受之愬 遠 焉,有不 則 明 之至 「明,心之明也。 不行,然 待明 也。 者 後 能 書》 謂 之 遠,則明之至 之明 也 日 故 而 視 浸 也 又 潤之 遠 謂 知 惟 之 其

〇子貢問政。子曰:「足食。足兵。民信

言倉廩實 所 兵矣。有是二者,則民以信事其上,而 比其什伍、時其簡教、使民有 其賦斂,使民有常産而不失時, 於我,不離 謂民信之矣。 而 叛 武備脩,然後教化行,而民信 也 或問 此 勇 而 則 節 知 倉廩實 方 日: 無詐欺離叛之心 則 戎備 制 而足於食矣。 其 飭而足於 \mathbb{H} 里 演

曰:「去兵。」去,上聲,下同。 子貢曰:「必不得已而去,於斯三者何先?」

矣。 節。 言食足而信孚,則無 父兄, 手足之捍頭 故必不得已而去,則兵 曰:「食足而民信,則民親其上,死其長,如子弟之衞 目 可 使 八或可 制 兵 梃 而 無也。」 以 守固 撻秦、楚之堅甲 矣。 或問 利 此 兵

曰:「去食。自古皆有死,民無信不立。」子貢曰:「必不得已而去,於斯二者何先?」

此。 如此答。」愚謂 曰 : 之所固有,非 如 而言矣。」〇程子曰:「孔門弟子善問,直 尊君親上之心,則其政之所以得民 序言之,則食爲先,以理言之,則信爲 亦寧 民 者,當身率其 之信可以孚於民。 而必欲究其精微之蕴者,不能 能答也。」輔氏曰: 底,如此章者。 立乎天地之間。 人之所必不免者,若民無信 則 燭 雖 無食必死,然死者人之所 「安字極 照數計 問答必極其至者,非據理 死而 生而 無纖豪之疑者,不能 有味。」故寧 無以自立,不若死之爲安。 不失信於我 以 是以必有以使民寧 兵食 民 人情 非子貢不能 而 問必窮到底 所得 以 而言 以民德 死而不失信於民,使 死守之,不以 也。 則失其所以 之極 也。 而先也。 , 則 也。 或問此一節 而言, 故惟子貢,然後能 者,非 而於膠轕肯綮之際 心 一無食以 兵食 必不 問,非 故必聖人,然後能 而 重。 善民俗者 爲民 於理已有 蓋死 死 是 · 免。 則 足 者 ,而不失其 危 聖人不 以 信 而 生 曰: 《文集 而 爲 窮 本 後 無信 一 可 常 所見 無以 理 以 政 吾 民 而 到 如

五四九

之也。」 棄去耳。 以棄去也。 本,而尤不可後者,當身率其民以死守之,不以危 以自立於世,而上下相孚,然後足以爲國。 可 棄 也 惟 凡人於事之或有所棄者,是其心必以 知 輔 其 氏 不 可 信本民 得 而 棄 德之固 去, 庶 其寧 有,人若無信 死 是乃 而 終 爲 急 爲 不 可 政 而 則 棄 以 可 之 無

子貢曰:「惜乎! 夫子之説,君子也。駟不棘子成,衛大夫。疾時人文勝,故爲此言。○棘子成曰:「君子質而已矣,何以文爲?」

及舌。

則駟 言子成之言,乃君子之意。 『若作一 「問:『古註只作一句説、《集註 馬 不能 句説,則惜乎二字無着落。」 追之,又惜其 失言也。 》作 然言出 :兩句 説 如 《語録 於舌, 何?」

鞟。」尊,其郭反。 文猶質也,質猶文也。 虎豹之鞟猶犬羊之

若必盡去其文而獨存其質,則君子小人無轉,皮去毛者也。言文質等耳,不可相無。

之何?」

不同。 哀 畢竟兩人好 難如此,自非聖人,孰能 矯子成,又錯。 重緩急之差焉,則又矯子成之失而過中 成之説偏矣,而子貢於文質之間,又一視之而無本 胥失之矣。或問:「何以言子貢之言有病?」曰:「子 質耳,如 ○《語録》曰:「棘子成全説質,固 可辨矣。」夫棘子成矯當時之弊,固失之過; 之可明。 毛具在,然後虎豹犬羊之可辨,文質兼存,然後君子小人 無,如陰陽晝夜之相須也。 去。」〇輔氏曰:「有質斯有文,有文須有質,二者不 子小人? 而子貢矯子成之弊,又無本末輕重之差, 以辨矣。 公問 使一箇君子與屠販之人相對坐,並不以文處之, 是,則虎豹犬羊之貴賤、君子小人之賢否,皆不 若盡去其毛,獨存其皮,譬則盡去其文,獨存其 於 如 惡自别。 老、 語 有若 若虎皮、羊皮,雖除了毛,畢竟自别, 録 莊 Ĕ 之徒, 大率 日 無 固 無 絶滅禮法, 所偏 皮譬則質也、毛譬則文也、皮 不可 世 年 間 未盡善,子貢全説 無文,尤當以質爲本。」 倚 許 饑,用 而 多 常 禮 則 者 法 適 都 也。 不 其 打 如 中 箇 蓋立言之 足,如 何 也 没 辨 事體 文以 哉。」 末 可 理 得 相 會 君

稱 有 若 者 君 臣 之 詞 0 用 謂 或 用 公意

有若 1: 「盍 乎?

蓋

欲

加

賦

以

足

用

也

曰 : 欲 則 公取其一。」魯自宣公稅畝 率 與 徹 公節用 爲什而 良 同 對 「徹是八家皆通出力合作九百畝 通 得其 .溝 日 也 共 以 取 九 井之人通力合作,計 均 厚 二矣。 ,公取其一,故 也。 徹 民也。 周 故 制 有 若請 又逐畝 夫受 謂 田 但 之徹。 收 畝 田 專 什 則 均 行 取 計 百 收。 徹 語 畝 其 畝 均 法, 收 録 大 而

曰 : 故言此以示加 一,即 二,吾猶 所謂 什二也。 不 足,如之何其 賦之意 公以 有 徹 若不諭 也 ? 其旨,

孰 對 與足?」 曰:「百姓足, 君孰與不足? 百姓不足,君

富 民 富, 則君 若深言君 示 ·至獨 民 貧; 一體之意,以 民貧 則 君 止公之厚 不 能 獨

所謂 斂,爲 本之論爲迂,而圖末者有 也。」〇又曰: 者少,則所出者不敢多,故雖百 蓋不惟野人之井地均,而 夫、卿各有等差,以至於君,什卿禄之制,皆可以次第而舉 之不足邪?」曰:「徹法行,則自 猶 禄平,而 不爲迂乎?」或問: 無經,而 世不究其本 下之中正。 徹 政 不特君子穀禄之平,至於軍國之須,皆量是以爲出 一,不歸於公室,而歸於三家也。 不 必 而 「盍徹乎」,則反本之論 足 自經界始。 白 人上者 而 度舉矣,上下寧憂不 上下 軍國之須皆量是 教之徹,疑若迂矣。 「哀公欲加 多則 而唯末之圖,故征斂無藝,費 困 所 宜 矣。 桀,寡則 經界正, 「哀公之不足,非不足也,什取 深 君子之穀禄亦平矣。」○輔氏曰: 賦 以以足 又惡 旦之效; 也 念 1度具舉 也。 一夫百畝等 用 以 然則雖 貉,不可 知 私 以爲 唯 而 若以理 意 而 盍徹 末是圖 足乎 後 而 徹, 楊 上下無不足之患 出焉。 觀 然什 井 而上之,士、大 而 一而觀 氏 其 之當 改 者 ? 何補於哀公 地 目 H 也。 也。 於長久 均、 以 故 務 , 天 則 有 所人 出 後 穀 若 而 反 其

旨,此所謂似乎夫子者也。 則不知反,古今一律也。 而 則 經久之利也。 旦之效適所以重爲後日之憂,而反本之論實當務之急 大抵末流之弊,必愈求其末,不至於覆亡, 有若之言始末有序,而不失其本

崇德也)子張問崇德、辨惑。子曰:「主忠信, 徙義,

進處。 忠信也 輝光而 信 以立,徙義,則動無非理而 進去,則德自崇矣。]○陳氏曰: 進。」〇又曰:「主忠信,是劄脚處, 日 曰:「主忠信,則其徙義也有 主忠信, 積 ,則所徙者溥博 而 日 無基 益高也。」○《語 有 新。 用 則本 本,徙進不得; 而 此德所以日積 日 新。 淵 <u>V</u>. 泉而 一,徙 内 録》曰: 外本 時出; 義, 行以進。 有 而高 地 末,交相培 基本矣,不徙義, 「忠信是箇基本,徙義又是 「主忠信,則存無不誠 則 而 能徙義,則所主者篤實 自有不容已者。」 可 日 徙義,是進 又互而言之,能主忠 據; 新 養, 能 徙義 或問 此德 步處 亦 此 心之所以 則 漸漸 緣得 其主 而本 節

其死,是惑也。 愛之欲其生,惡之欲其 惡,去聲 死。 既欲其 生,又欲

愛惡,人之常情也。 然人之生死有命,非

善、主忠信之事。

補過,徙義之事。

不

蔽

於

私

辨

惑之

可 此 以隨己之所欲; 得 節。 既 而 欲其生,又欲 欲 曰 : 也 「溺於愛惡之私,而以彼之死生定分,爲 且又不能自定 以 愛 其死 惡 而 而 則 實 前 欲 無 其 所 惑之甚 生 損 生 益於彼也 死 死 交戰於 也。 則 惑 或 可

誠不以富,亦祗以異。』」 異也 死。 矣。 舊説而 中,虚用其力於所不能必之地 補過 公字而誤也。 景公有馬千駟之上。 夫子引之,以明欲其生死者不能 此《詩・小雅・我行其野》之詞也。 不 可 問 堂堂乎張 謂之惑乎?」 不蔽 如 姑 此詩 程子曰:「此錯簡,當在第 存 於私 之,非 也 所言,不足以 胡氏曰: 者,故 兩 難 説 與 並 並 告之如 存 「《集註》例以前説爲長 之比 因 爲 此 仁 致富 也。」〇 矣。 下文亦 此 而 輔 則 楊 + 適 氏 使之生 有 非 ·六篇 足 氏 舊説 日: 齊 以 誠 日 ,然以 「誠 善 景 齊 取 :

○齊景公問政於孔子。

齊景公,名杵臼。魯昭公末年,孔子適齊。

所以卒於亂也。」

孔子對曰:「君君,臣臣,父父,子子。」

多内嬖,而不立太子。其君臣父子之間,景公失政,而大夫陳氏厚施於國。景公又乃三綱之大者,故以爲人道之經,政事之根本。」是時此人道之大經,政事之根本也。輔氏曰:「此一文此人道之大經,政事之根本也。輔氏曰:「此

父,子不子,雖有粟,吾得而食諸?」公曰:「善哉! 信如君不君,臣不臣,父不

皆失其道,故夫子告之以此

之言,而不知反求其所以然,蓋悦而不繹子之所以子,是必有道矣。景公知善夫子「君之所以君,臣之所以臣,父之所以父,不定,啟陳氏弑君篡國之禍。○楊氏曰:不定,啟陳氏弑君篡國之禍。○楊氏曰:

子,則君臣之倫一日而正之有餘矣,惜乎其不能,此齊之子之言而繹之,則如之何?」曰:「舉齊國之政而授之夫者,齊之所以卒於亂也。」或問:「景公審能悦夫

○子曰:「片言可以折獄者,其由也與?」折,

以照乎外。 之際,言出而人信之。」〇愚謂: 門,涵養有素,則其於是四者固兼之矣,此其所以於折獄 獄之際無以盡 決,則於折獄之際無以致其斷; 忠信者,折獄之本; 也。 明決,故言出而人信服之,不待其辭之畢 其孰爲曲、孰爲直、判然兩塗、所謂折也。」子路忠信 也。治獄之道,兩辭具 片言,半言。或問:「片言之爲半言。」曰:「言未畢 人已信之也。」折,斷也。胡氏曰:「折者,析而二之 輔氏曰:「忠信,表裹之誠也,明決,智勇之用 忠信則人不忍欺,明決則人不能欺 其 (誠。 明決者,折獄之用。 子路之質篤 (備、曲· 直未分,混爲一區,及乎别 忠信所以立於中 徒明決而不忠信 實剛果,而 徒忠信 又 明 則 學 而 於聖 八於折 不 明

子 路 無 宿

路已諾 折 子 我,吾無盟 以取 者, \Box 人之信, 之信己在於未言之前 宿 乃宿戒之宿 諾 宿 · 獄者, 訓 路之一言,其 也。 , 留 辦於言也,所以養其言之所自發者,必 留 由 而 於人, 小 其養之有 ,則急於踐言,乃孚於人之端也。」記者因夫子 也, 則 輔 記 信 邾 是 氏曰: ,然徒有拒人之心而無取 則 猶 頰 此,以 矣。」 射 在 不留 舌之感 宿怨之宿。 以 言 「留人之諾,則 千乘之國,不信 於中。」〇 見信 句 素 前 也。 見子 也,其 也。 繹 不 人自信之故 於 奔 - 然徒 路之 能動 輔氏 胡 人 魯,曰:『使季 急於踐言,不 氏 有 可 致力於言語之間, E. 時而 EI: 於人乎?」〇 所 知 信 「片言 以 之實。 不克副之矣。 矣。 舊 其 也。 取 説 有其素, 盟 折 以 信 惟宿怨之 獄 宿 言 路 尹 不 於 留 而 非 非 訓 而 耐 人 留 信 氏 豫 而 要 其 子 求 人 可

○子曰:「聽訟,吾猶人也,必 諾 , 所以 全其 信 也 也使無訟乎!」

> 以 見聖 而仁義孚,非 貴。」胡氏曰: 未 路片言可 其本,清 范 見折獄之未足爲貴。」 能 氏 使民 人不 티 : 其 無訟 以 以 聽 源 日之所能 折 聽 無訟者,躬行於上 訟 者也 獄 則 訟 者 無 爲 而 至,故聖人以之爲難。 治 訟 難, 不 故 矣。」 其 知以 又記 末, 而 而 以 塞其 人自 禮遜 孔子之言, 楊氏 使 民 不争,教化 流 爲 日 無 也 或 楊 訟 氏 子 爲 則 正 大 治

○子張問政。子曰:「居之無倦,行之以忠。」 是要此 黄氏曰: \exists 以 無倦,在心上説;行之以忠,在事 發 也。」〇問: 居,謂存諸 0 : 忠者,是 於事。 謂 常常 心長 心 常 「居之無倦,則 裏 恁 事 行固 要 在 地 以 事要 做 提 如 心。 忠, 主 省 是 此 著 在 行 不可 者 則 實。 無 這 其 心常在事; 便 表 倦, 裏,若 所居,不 故 放倒 外 裹 集 則 面 如 有 註 便 也 始 知 Ŀ 頃 <u>₹</u> 事 如 耐 説。 居 0 終 刻 事 此 思 放 是 《 語 如 都 以 無 居 倒 居 事 應 不周 之無倦 録 箇 事 便 忠則 得 甚 靠 Ħ 不 去 ,行之以 行,謂 物 得 實 表 事? 者,便 去 裹 行 居 做 如 之 之

及物 不足,而無誠心愛民 盡 人不輕絕人以不仁,況子張乎? 者,正與曾子所謂『然而未仁』、『難與爲仁』之説同 日 忠,則事本於心,而用無不盡,二者爲政之大要。 心,故告之以此。」輔氏曰:「不曰不仁而曰少仁 者,當以 「子張少仁。 是 爲 法 也。 則, 無誠 既 雖不中,不遠矣。」〇程 無誠 心愛民 心 唯其少仁,故慘怛之意 愛民,則 ,則必倦 心必倦 有志於 而 而 不盡 子 不 聖

矣夫。」○子曰:「博學於文,約之以禮,亦可以弗畔

心矣。

盡心,則忠與無倦之本也。」

之濟其惡。」

重出。

反是。」, ○子曰:「君子成人之美,不成人之惡。小人

其 有 先,獎勸者,從與之於其後也。」君子小人,所存既 只是欲他如此底意思。」〇胡氏曰:「誘 成者,誘掖獎勸以成其事也。 用 厚 心 薄之殊,而其 不 同 如 此。 所好又有善惡之異。 輔氏曰: 「厚者冀人之善,薄者 《語録》曰: 掖者,開導之於其 「成字 故

> 惟恐人之不薄。君子之好在於善,故己有是善, 厚,而惟恐人之不厚。 「存,以心言。 之所以不同,則知所當 於所存,所好者著,所存者微。 幸人之惡,君子好善,小人好惡, 人之趨於善。 好,以情言。 小人之好在於惡,故己有是惡,而 小人存心本於薄,故待 勉與所當戒者矣。」〇胡 君子存心本於厚,故待人亦 學者能 所存根於所好 知君子小 人亦薄 , 所 人用心 亦 而 氏 欲 亦 好 日 前 人 欲 發

也 季康子問 孔子以是告之,欲康子以正 大夫,家臣效尤,據邑背叛,不正甚矣。 曰:「政之所以得名,以其能以 范氏曰 家之故。❶ 正,烏能正人哉?」〇胡氏曰:「魯自中 子帥 以 :「未有己不正而能 正 政 惜乎 於孔子。 ,孰敢不正?」 康子之溺 孔子對曰: 正己者 自克,而改三 正人者。」 於 正 利 人也。 -葉,政 欲 政 者,正 己不 而 輔 不 故 由 能 氏

■「改」,原誤作「政」,今據四庫本改。

能也。」

○季康子患盜,問於孔子。孔子對曰:「苟子

言子不貪欲,則雖賞民使之爲盜,民亦知

即 子男也,則以 氏曰:「案《春秋傳》: 『季孫有疾,命正常曰:「南孺子之 啓之,其旨深矣。」奪 古 胡氏曰:「季氏竊 雖賞之不竊者,乃假設之言,但以見夫必不肯爲耳。」〇 竊,而其心愧恥,自不肯爲之矣,尚何盜之患哉! 以是爲貴矣。民知以不貪欲爲貴,則雖賞以誘之使爲盜 私 恥而不竊。 位 也。 其 『夫子有遺言, 曰 既既 今生矣,男 (所也。 上者,下之倡。 康子 告而立之; 也,敢 輔 盍亦 在 氏曰: 朝。 南 告。」遂奔衛。 在上者不貪欲,則民之視之,亦 反其本邪? 柄、康子奪嫡、民之爲 氏生男 「欲有公私,貪欲云者,是欲之 南 女也則 氏 嫡事見《春秋傳 生 則以告於君, 男, 肥也可。」季孫卒,康子 康子請退,公使共劉 正常 孔子以不欲 載 與大夫而 以 如 朝, 所謂 盜 蔡 立 告 知

而深思之,則必當有所發矣。」

草,草上之風,必偃。」焉,於虔反。 道,何 子欲善,而民善矣。 季康子問政於孔子曰: 如?」孔子對 曰 : 君子之德風,小人之德 「子爲 「如殺: 政 無 了, 焉 道,以 用 殺 ? 就有

輔氏曰: 尹氏曰:「殺之爲言,豈爲人上之語哉? 趨於善者。」上,一作尚, 善矣。真氏曰: 以身教者從,以言教者訟,而況於殺乎?」 爲政者,民所視效,何以殺爲? 「尹氏言涵蓄,極有意味。 「民性本善,爲 加 也。 上者以善迪之、未有 爲人上者,有能 偃,仆也。 欲善則民 熟味 不

□:「如事親則得乎親,事君則得乎君之類。」 達者,德 孚 於 人 而 行 無 不 得 之 謂。《語録》○子張問:「士何如斯可謂之達矣?」

務外,不知當初如 子張 務外、語 録 何 Ĭ 地學,却 問: 如 「孔門學者 此。一曰: 一也 如 子張,全然 干 他學甚

子曰:「何哉,爾

所謂達者?

視之,則或殺之矣。」

事? 照 其 子 其 蓋 病 、於學者資品之高 他資質 已 而 知 藥之也。 其 是箇務外 發問之意。 輔氏曰: 底人,所以 下,所學之醇 「聖人明睿之極,物無 故反詰之,將以 終身只是 醨,所造之深 這 意思。二夫 淺, 發 無 遺

不洞 同,然其所以切於學者之身, 徹於心目之間,故其於答問之際,高下緩急雖 而皆爲入德之要,則 又 或 初 無 不

之。 異 聞 也。 譬如良醫之治疾,既察其脉,又驗其證 其 言,而便知其 子張之學,務外多於務內,爲名切於爲實,故夫子 (意之所在,遂 反詰之,以 - 必明 發其 知 病 其 而 疾 藥

皆去聲。

之所以 然,然後寒凉温熱之劑 可 得 而 施也。

言名譽著聞也

子

張對

日

在

邦必

聞

在家必

聞

子曰:「是聞 也,非 達 也

斂近裏 E 者却要做這 者 聞 不 與 「二者之始雖 可不 達 底 相 聞 模樣。」〇又曰: 審 似 者是 也。 而 若 做 不 相似, **《**語 作底 同 録》日 然所行通 戌 專 「達者是自家實 務 [: 「達 誠 求 僞 人知 達 者實有 之所 者,名譽自 而 己。 (去做, 以 而 不居,聞 分 0 而 然 輔 學 著 Æ 收

> 聞; 此誠偽之所以 以人之有無而作輟,不以事之始終而鋭怠,行 以爲之,名得而 且聞以名言,達以 名譽著聞者 分也。」故夫子既明辯之,下文又 其意怠矣; 一, 質言。 行 未必 務 通 名者 務 達 實者 也 荷 則 口 故 以 無 其 所 得 實 名 爲 則 吾意 恦 有 則 爲 不 無 而已。 也,不 同 不 者 矯

詳言之。

人。在邦必達,在家必達。夫,音扶,下同。 夫達也者,質直 而好義,察言 而 觀 色,慮 好、下 以下

録》曰: 所行合宜,好義也。 窒礙矣。 哉 也。 察言觀色,卑以自牧,慮以下 脩於己而人信之,則 自牧,皆自脩於内,不求 内主忠信。 内外交相養 然德脩於己而 「質與直,是兩件。」〇輔氏曰: 而所行合宜,審於接 而 厥 人自 此存乎中,以 德脩, 罔覺此, 豈求 信 所 之,則 -人也, 行 應乎外 人知之事。 行 自 此 於邦家 無 「主忠信,質直也 審 室 也。 人知 乎 外 物 礙 者 審 自 者 以 矣。 而 於接 之所 然 巽 然 卑 乎 無 物 德 以

爲

所

内

語

Б. Б. 七

必聞,在家必聞。」行,去聲。 夫聞也者,色取仁而行違,居之不疑。在邦

只此一 清濁不同,然其利 也。今之學者,大抵 本已失。 之力日 何 無所忌憚,此 而 以 顔 贵 其顏色而取 者,故虚 爲 善 學者須 害? 色而 中不安焉 爲是而 一肯從事於顏色之間而又生襲取之心哉? 是 其顔色以 句,便是 而 怠 欲襲取夫仁,則其行自然違背而不 惟其 無 無 故 是務實,不 譽 更學 仁,而 所忌憚,所謂『居之不疑』也 ,則務實之心猶未盡喪 無實 所以 虚 所 雖 譽 務 取 忌 隆 雖 而 見 名 行實 何 憚 隆 徒 於仁,而行實背之,又 其 而不務實者之實證。 而 有 再 事 背之,所謂『色取 心 而 實德則 虚 於務 要近名。 ? 實 爲 此不務 則 譽,則驕矜之意日生,而 《德日 名。 名。 爲名 一也。」輔氏 病 病 也。 夫名生 也。二〇程子曰 實 爲名與 矣。 而 有意 惟 而 學,則 仁 使其 其自以 一於實 相 真實爲 輔 專 而 區區從 近 副 氏曰: 行違 爲 色取 務 名,大 也 則 爲 是 自 利 求 仁者 程 又自 事於 山也。 名 行 進 是 「善 雖 僞 名 以 俗 子 亦 而 違

輔氏 實理 輟,鋭 而 聖人之教,而 事,充乎内而 病 爲之之意,則便是利心也。」尹 外近名之意,則失之矣。 理 名。 親; 焉以爲廉; 吾之有忠名也,故勉焉以爲忠, 踐履之功,淺深次序,如 齊家而治國。 意 務實務名之論可 人於聖賢之域矣。 |遂轉相授受,不惟誤己,又且誤人者。 也 也,故學正心 在乎不 務名 爲吾之未能 日 耐 於始而怠於終,終亦必 鶩外妄求也。 實理根於性,具於心,要在反求 世 而學, 欲吾之有信名也,故勉焉以 有 務實。 是之謂 則唯欲其名之有聞而已, 耳 而 事 謂 發 差 剽 欲吾之有孝名也 誠 長 切 乎外 目竊先生長者之言,未嘗窮究其旨 失 意 也,故 爲名雖若清 務 當 故 有 爲名而學 魚飲水,冷煖自知,忽不自 實。 爲吾之未能齊家治國 者也。 孔 如 學事 爲吾之未能 亡而已矣。 務 此 子告之,皆篤實之 氏 實而 長; 欲吾之有廉名也,故 者, 況後 爲 日 則 當時 ,故勉焉以 學,則 爲吾之未 利雖是 是 爲信。 而 「子張之學, 聞尹氏之説,其 所 僞者,謂 事親也 自 有人作 門人親受 謂大本,即 其 得。 濁 世 脩 是 爲 能 然一 爲之 也 乎? 之謂 而 故 其 孝; Œ 不 有 無 故學 知 心 學 誠 循 向 實 人 務 勉 其 誠 事

亦當知所懼哉。」

○樊遲從遊於舞雩之下,曰:「敢問崇德、脩

慝、辨惑。」慝,吐

一得反。

者。脩者,治而去之。」 胡氏曰:「慝之字從心從匿,蓋惡之匿於心

子曰:「善哉問!

惡 先 事後 善其 "脩 切於爲己。 得,非崇德 慝 與 ? 與? 朝 之忿,忘其 攻 其惡,無 (身,以 攻 及 人

其

之

親,非

:惑與?」與,平聲

事,便 何 所 티 : 先 不 緣 做底事都 事 謂 計 事 「但做自 不崇。」〇 ,然自學者言之,則 位望他 後 後得 其 其 功 所 功 壞 效,則 家合做 得 了。)輔氏 猶言: 則 而 不 德 而今一 ⊟ : 心 起 底 先 便 事,不 日 計 白惰 「先難, 兩岐 難 獲之心 積 向 後 耐 - 必望 7 做將去,不望他功效 而 勤 獲 謂 非惟 不 也。 自利 他 也。 先從事 自 功效。 夫爲所 是功效不見,連 知 而義,其機生, 爲 於其所 矣。 所當 今做 當 爲, 難。 爲 語 本 則 件 録 而 其 非 後 德 那 好

> 匿矣。 謀利 爲 惡 嚴,待己 徐,循 有其 勢矯 自知矣。」 陳氏曰: 何德之可崇哉? 爲利之心 ,則於己之惡便 懲其忿矣。 甚 也。 。 非 功,然方其 吾理 微,而禍 則 勉 輔氏曰: 專於治己 「先其事之所當爲,而 只管爲所當爲 恕,故 一,行吾 彊 萌, 則 則 爲事之始而 有 感常 養而 鹵莽 及 輔氏曰: 「常 故 其 所 必 大本已失,易 不 其 藏 르, 情 而 而 爲 能 匿 親 則德日 此 觀 蓋忿心之所發 不 不 所當爲 於 故 遽欲計 「人本無所惑 - 暇鋤 人則 所 爲 責 以 其 以 後其效之所得,是不計 甚 積; 爲 心。 治矣。」 明 人,則己之惡無 德 而 難 大 盈 其 日 不 不計效 自 也 又才有 易 功 積 計 觀則 則 涸 焉 知 耐 其 爲 易 惟 不 功 有 輕 則 其 得 心 暗 ,則德崇而 爲 自 得 是 事 去攻 則 突 忿 以 朝 知 輕 者 利 責 不亟 兀 所 也。」〇 之忿 辨 喜, 心 人人之 人則 而 蔽 固 惑 所 也 横 而 功 不 尚 不 必

故爲氣所使 告之以 親,此辨惑者所以當懲其 肆,苟不有以懲之於其始 不知利害之所在,故惑。 而 此 ,鄙故吝於改過 ,三者皆所 《忿也。 ,則其終或至於忘其身以 近 以 利故有 救其 樊 遲 失 計 廳 獲之心,三者之 也 鄙 近 愚 利 謂 及 故 其 麢

五五九

脩。 崇。 之始發,不可以不懲也。 便是利。 以 至於大惑,則忘其身以及其親 人欲天理,不能兩立也久矣。 能辨之於早,則不至於大惑矣。 親,惑之甚者也。 義 病,亦反覆相因 辨惑也。」輔氏曰:「爲所當爲,便是義,才計其 īfīi 感物 惟 下 人唯有利欲之心,故德不崇,此語 不自 利 而 也。 也。 易動者莫如忿,忘其身以 省 人惟 己 ○范氏 過 惑之甚者必起於細微, 能懲其忿,則惑自辨矣。」 而 有 起於細微,謂 也。 知 利欲之心,故德 曰:「先事後得,上 人之過,故 要當辨之於早,此忿 故懲忿所 最切要。 朝之忿也 及其 慝 **丸功** 不 不 蓋

子曰:「舉直錯諸枉

,能使枉者直

知人。」上知字,去聲,下同)樊遲問仁。 子曰:「愛人。」問知。 子 曰:

者 於愛,順而達之,則無不愛矣,故愛人則仁德之所施 愛人,仁之施。 無不知 也, 急先務之爲貴,故 知人,知之務。 知 人則 是 輔氏曰: 智者之先 仁主 務。 智

觀 此兩句,亦可 以識 仁智之用矣。」

樊遲未達。

曾氏 兩箇意思自相反了,故疑之。」 ○《語録 所擇,故疑二者之相悖爾。」曾氏,名幾 日: 日 》曰:「愛人,則無所不愛。 遲之意,蓋以愛欲其周,而 知 人,則 便 河河 有 南人。 知 分 有

《語録 知合 舉直 自 如 向 此,則二者不唯不 ĕ ⊟ : 處,仁裏面 路。 錯 枉 「毎常 惟 者,知 是『舉 有知, 説仁知, 直錯 也。 知裏面 諸 相悖 枉,能 箇是慈愛, 使 一有仁。」 枉者直 使 而 枉 反 者 一箇是辨別,各 直」,方見得 相 則 爲 用 仁 矣。 矣。

也?」鄉、去聲。 樊遲退,見子夏曰:「鄉 知,子曰:「舉 直錯 見,賢遍反。 諸 枉 也吾見於夫子 能 使枉 者直」, 何 ᅦ 問 謂

以能使枉者直之理。 遲以夫子之言,專爲 知 者之事。 又未達所

子夏日 :「富哉言乎!

歎其所包者廣,不止言知。 輔氏 日 「子夏 聞

隅。 言之明決精審,沛然無疑 功,其於仁知之體用,蓋已深 其 (説,便歎聖人之言所包者富,不 即 知人之中以 見愛人之實,推 ,而暗與聖人之言相發乎。」 體 而嘿識之矣。 堕 於 夫智之用以極 偏,不滯 不然,何 一夫仁之 於 其

戀反。陶,音遥。遠,如字。有天下,選於衆,舉伊尹,不仁者遠矣。」選,息舜有天下,選於衆,舉皋陶,不仁者遠矣。湯

所不 心中 化。 出 遺 觀 枉 伊 日 爲仁,不見有不仁者,若其遠去爾 而言矣。 〇程子曰:「聖人之語,因人而 於一 遠 於此章可見矣。 者直也。 尹 流 、,湯之相也。不仁者遠,言人皆化 雖若 語遠則 亦. 時之意見 學者之問也,不 出,雖其深淺小大因人而變化,然其包括自然,無 非 有淺 有 子夏蓋有以知夫子之兼 意 不知近也。」輔氏曰:「他人之言,皆 故 耐 近者,而其包含無所 偏狹固 爲之,固 非若 滯。 獨欲 非 他人之言,語 常人之所及也。」尹 聖人之言,皆由 聞 其説,又必欲 所 不 此 近則 仁 謂 廣大 盡 氏 變 知 使 而

> 不能也。」 師以啟其端,又辯諸友以究其義,非有意於踐脩之實者 於事哉? 其方而不爲其事,則其於善也,如 及退 其事,則力進以求其至也。 知夫善之可爲也。 當時學者之務實也 如 知 喻,則必將復問矣。 未達,故又問焉,而 樊遲之問仁知 其 (方;不 而問諸子夏,然後有以知之。 使樊遲 · 獨 而 知其方,則得其所以爲之之術 欲知其方,又必欲爲 未 喻 也,夫子告之盡矣。 猶未知 如是。」輔氏 則 既問 徒聞 必 將 其 復問 説 於師,又辯諸友, 説 其何以爲之也 河 而 無 如 不知其方, 書 疑 一餅,終 聞其説,則 使其未 其事 既問 亦何 樊遲 徒 知 爲

止,無自辱焉。」告,工 〇子貢問友。子曰:「忠告而善道之,不可 善始得。」然以義合者也,故不可 道之。《語録》曰:「告之之意,固是忠了,須又教道 友所以 輔仁、故盡 毒反。 其 心以告之,善其 道 ,去聲 則止。 若以 説 則 以 得

數

而

見

疏

,則自辱矣。

論語卷第六 ○曾子曰:「君子以文會友,以友輔仁。」 爲人由己,由人乎哉? 取善以輔仁、則德日進。 講學以會友,則道益明,輔氏曰:「知之事也。」 以善,攝以威儀,切切偲偲,忠告善道,皆輔仁之道。」 雖明友,但能輔助之而已。 輔氏曰:「行之事也。

相觀

後學 成德 校訂

論語卷第七

朱子集註 後學趙順孫纂疏

子路第十三

凡三十章。

子路問政。子曰:「先之,勞之。」勞,如字。

蘇氏曰:「凡民之行,以身先之,則不令而

此,則民皆視做,不待誥令而自知行之矣。」凡民之 行。《語録》曰:「先,是率他。」○輔氏曰:「凡民之行, 如孝弟忠信、仁義禮智、皆是也。 爲政者必以身先行乎

出 爲他勤勞。]○輔氏曰: 事,以身勞之,則雖勤不怨。」《語録》曰:「勞,是 戴星而入,星言夙駕,説于桑田,與夫以時循行阡陌 「以身勞民之事,如 古人戴星而

請益。 曰:「無倦。」無,古本作毋。

其勤苦

而不怨矣。」

躬行講武之類,爲政者於此不憚其勞,則民皆興起,雖極

此告之。」輔氏曰:「勇者必喜事,喜於有爲者,或不能 吴氏曰:「勇者喜於有爲而不能持久,故以

〇程子曰:「子路問政,孔子既告之矣。及

持久,故又以無倦告之。無倦,則終始如一,誠之事也。」

請益 姑使之深思也。」蔡氏曰:「夫子方答子路以「先之」 ,則曰『無 倦』而已。 未嘗復有所告

所謂深思,正此意也。」 之以『無倦』,所以救其勇躁之失也。 勞之」,而子路遽請益,則其勇躁之意可見。故夫子但告 吴氏所謂勇,程子

小過,舉賢才。」 ○仲弓爲季氏宰,問政。子曰:「先有司,赦

有司,衆職也。 宰兼衆職,輔氏曰:「宰,邑長家

臣之通號,故兼衆職。」然事必先之於彼,而後考

其成功,則己不勞而 凡 爲政,隨其小大,各自有有司,須先教 事畢舉矣。《語 他 理 録》曰 É

五六三

之,則 司 除其罪也。」賢,有德者。 偂 害,而無以警其 狹,須極其詳細,若人之誤無大小皆從寬宥,則於事 且 事 教 家方可要其成。 云『宥過無大』,而今曰『赦小過』,故《集註》發此『大者於 赦之,則刑不濫 也 有 **孙他自** 皆得其人而 人心悦矣。 或有所害,不得不懲」之説。 論其大體,故可 司固 大者於 逐一具 有 非 司皆得 職,而 此亦時中也。 政益脩矣。」 (來,自家方可考其虚實之成。」過,失誤 (怠忽,唯於小者赦之,則刑 事 且如錢穀之事,其出人盈 以 才德各 或 而 其人 **宥過無大。** 有所害,不 人心悦矣。 有所 而 且 才,有能者。 政 宥者寬之而已,亦未必 蓋舜爲天下,所治 宜 仲弓爲季氏宰,所 益 並 · 得 舉 俑 輔氏曰: 一而審 矣。 不 縮之數,須 不至於 懲 用 舉 輔 ; 之,則 「《虞書 氏 前 濫及, : 者廣 小 ,或有 治 日 者 用 有 盡 者 是

爾 日 所 不 焉 知,人其舍諸?」焉,於虔反。 知 賢 才 而 舉之?」 日 舍,上聲 舉 爾 所 知

以此。程子曰:「人各親其親,然後不獨親仲弓慮無以盡知一時之賢才,故孔子告之

乎?」輔氏曰: 矣。 范氏 ◎語 必自 其親。 小過,則下無全人矣,不舉賢 心量本自大,緣私故 以 早 矣,不患無以知天下之賢才也。 爾。」《文集》曰: 弓與聖人用心之大小。 興邦, 爾 知而後舉之,則 録》曰: 失此三者,不 曰:「不先有司, 所知,爾 仲弓 心 「仲弓只緣見識未極其開闊 日 「蓋經筵勸講之説,其所以感 「人各舉其 可 所不 『焉 小, 遺才多矣,未必不 以 可以爲季氏 蔽 知 知,人其舍諸」,便見 喪 古 則君 賢 己之極, 所知,則天下之賢 邦, 推此義,則 才 興 行 邦、 只 則 而 臣 在 可 才, 由 喪邦,蓋極言之, 舉 以 字、況 故如 職 此 公私 之, 喪邦矣。」〇 則 矣; 愐 切 喪 百 此 無不舉 邦 於君父 心 之間 天 不 子 職 人之 也。 下 赦 仲 廢 可 曰

孔子自楚反乎衛。○子路曰:「衛君待子而爲政,子將奚先?」者至矣。」

子曰:「必也正名乎!」

中

刑

罰

不

·中,則

民

無

所

措

手足。

中,去聲

;

方式了一个人,我们就是一个人的一个人, 故孔子以正名爲先。謝氏曰:「正名雖爲是時出公不父其父而禰其祖,名實紊矣,

衛君而言,然爲政之道,皆當以此爲先。」

迂,謂遠於事情,言非今日之急務也。子路曰:「有是哉,子之迂也! 奚其正?」

子曰:「野哉由也! 君子於其所不知,蓋闕

如

也

對 野 也 謂 鄙 俗。 責 其 不 能 闕 疑, 而 率 爾 妄

楊氏曰:「名不當其實,則言不順。言不名不正,則言不順,言不順,則事不成,

之賓。 順 、則無 有是實 以 考實 ,斯有是 而 名。 事 若其名不當其實,如 不成。」輔氏曰: 「名者,實 以 祖 爲

凡有所爲,皆苟 禰 則 其言乖牾 且 舛 逆而 虚偽而已 不 順 ,故事無由得 言既不順 成。」 則 無以 考 其 實

事不成,則禮樂不興,禮樂不興,則刑罰不

禮樂 是一 樂。 范氏 民無所措手足,亦必然之理 非 舛,又焉得有禮樂哉? 不中。」輔 私意,率皆倒 箇 事 不 日 和。 興 不 : 事 氏 成 事 成 日 則 行 則 得 而 逆 施 無 有 無 其 施 之政 序 序 序 無序 禮 事無禮 則禮 樂不 之謂 而 也。 事皆 而 不 樂自 不 興, 樂。 禮 和 和 失 則 興。 物物 禮只是 凡 其 故 所 施 不 (道,故 得 謂 禮 於政 然 刑 其 箇序 罰 則 和之謂 事 不 不 隳 刑 者, 樂只 中 · 興。 壞 而 無 乖

於其言,無所苟而已矣。」 故君子名之必可言也,言之必可行也。君子

程子 日 事既不成,則 父,以父爲賊,是多少不順 矣。」《語録》曰:「衛輒,子也, 程子曰:「名實相須。 : 所謂「一 衛 世子蒯聵 事 顛倒乖亂 荷 則 其餘 恥 禮 樂如 其 皆 ! 荷」, 母南子之淫亂 其 何 事 何 蒯聵,父也。 而 正 芍: 以 興 謂 爲 此 刑 國, 則 也。」 罰 其 何 如 子 何 以 餘 以兵拒 而 臨 欲殺 胡 皆苟 民? 中 氏

衛君 言順 則 爲 路 否?』日 曰:「問:『胡氏只是論孔子爲政正名,合當如此。 將 或 輒 以 體,但其間 知食焉 公子郢 公卒,夫人立之,又辭。 之,不果而 孔子決不爲之臣矣。」 非義 終不 據國 拒 具 也 輒用孔子,孔子既爲之臣 孔子須先與斷約 蒯 其事之本末,告諸天王,請于方伯,命 明 而 "『聖人必不肯北面無父之人。 【也。」《文集》曰:「胡氏之言,乃聖人大用之全 矣。 以 聵。 喻 不避其難之爲義,而不 事成矣。 而 曲折之微,聖人須更有隨宜 立之。 也 拒父,皆無父之人也,其不可 出奔。 夫子爲政,而以正名爲先。 夫蒯聵欲殺母,得罪於父, 故 夫子告之之詳如此,而子 事輒 則人倫正,天理得,名正 如 靈公欲立公子郢,郢 此 做方與他做。 不去,卒死 而爲政,則此 乃立蒯聵之子 若輒有意改過 裁處。」〇 知 若輒不能然, 其 食輒之食 説 難。 亦 《語 設若 可 輒 辭。 録 必 有 徒 而 遷 通

夫,音扶。

襁,居丈反。

焉,於虔反

種五穀曰稼,種蔬菜曰圃。」 圃,曰:「吾不如老圃。」

樊遲出。子曰:「小人哉,樊須也,

方之民襁負其子而至矣,焉用稼?」好,去聲,服,上好信,則民莫敢不用情。夫如是,則四上好禮,則民莫敢不敬,上好義,則民莫敢不小人,謂細民,孟子所謂小人之事者也。

之者至矣。 也? 也。 辭 織縷爲之,以約 之,謂正 情,誠實也。敬服 禮、義、信,大人之事也。 樊須遊聖人之門,而問 而 輔氏曰: 闢 蓋於其問 己而物正 之可 「在己者皆盡其道,在下者各以 須之學疑不及此,而 也。 者,非有大人之德,其孰能之?」襁 也 小兒於背者。 待 ,自謂農 用情,蓋各以 其 出 一稼圃,志 而 好義,則事 圃之不 後 言 ○楊氏 其 其 不 則 如 類 其 能 ,則拒 非 陋 合宜 所 而 曰 : 問。 矣, 類 何 應 雁

樊遲請學稼,子曰:「吾不如老農。」請學爲

失愈遠矣。故復言之,使知前所言者意有懼其終不喻也,求老農老圃而學焉,則其不能以三隅反矣,故不復。及其既出,則

去聲。
○子曰:「誦《詩》三百,授之以政,不達,使

在

也。

政 理莫不具載,故其情合於事物之正,則可以 人,故讀之者必能言而專對也。」〇胡 平,謂《詩》皆自平易之心發出。 風雅,或美或刺之類,故讀之者必達於政。 鳥獸草木之名。 言也。輔氏曰:「本人情,謂發乎情。 平,長於風 俗之盛衰,見政治之得失。其言 專,獨也。《詩》本人情,該物理,可以 治之得 有邪 有正,皆原於人情。 其情背於事物之正 諭。 驗風俗之盛衰,見政治之得失,謂 故誦之者,必達 及諷詠 ,則可以知風俗之衰,政治 長於風 氏 其 (所言, 諭 E : 該物理,謂 於政 知風俗之盛, 其言 謂 「《詩》之作 温厚 則事物之 能 温 感 験風 而 發於 多識 厚 IE. 能 和 和 變

> 熟之而不能思,思之而不能切歟? 薄; 專對也。」○程子曰:「窮經將以 大旨也。 也。」胡氏曰: 其所學者,章句之末耳,此學者之大患 之誦《詩》者,果能從政 之失,因是而通爲政之方也。《詩》之言温厚,則不至於 和平,則不至於訐; 然讀 《詩 「程子謂「窮經將以 》者每不能 能 諷 至此, 豈非 諭 而 則 致用」者,聖人立言之 專 可不戒哉! 人皆易 對乎? 致 誦之而 曉, 用 因 也 不 是 然 能 故 則 世

〇子曰:「其身正,不令而行,其身不正,雖

○子曰:「魯衛之政,兄弟也。」

令不從。」

美矣。』」 魯,周公之後。衛,康叔之後。本兄弟之 ○子謂衛公子荆,「善居室。始有,曰:『苟合 國,而是時衰亂,政亦相似,故孔子嘆之。 國,而是時衰亂,政亦相似,故孔子嘆之。

公子荆,衛大夫。苟,聊且粗略之意。合,

厭也。 行逆施,則家亦隨 直以爲苟而已,此亦以爲善居室也。 得其宜,在彼者成之有 君子之於事,無巨細,一於敬而已。 美,事之序也,所以使之得其序者,必有以也。 曰美,皆曰苟而已,然究觀荆之所爲,亦非不事事者。 物所累,得之則驕心生,失之則吝心生,是皆生於欲之無 公子荆皆曰苟而已,則不以外物爲心,其 氏 循 備 聚 欲易足故也。」輔氏曰:「居室而務爲全美,則是爲 序 也。 也。 而 公子荆其欲易足,故不以外物累心,曰合,曰全, 務爲 黄氏曰: 黄氏曰: 有節,不以欲速盡 全美,則累物 敗 謂裒而斂之,使事事皆聚集也。」完, 謂 而 補足其空闕,使無不備也。」言其 己 序。 豈 然公子荆 能 至於全與美乎?」 美累其心。 而 自合而全,自 若夫凡事忽略 未嘗以 驕吝之心生。 是累 在 我者 其 〇楊 全 心 蓋 倒 處 而 外

〇子適衛,冉有僕。

僕,御車

也

子曰:「庶矣哉!」

庶

, 衆也。

庶而不富,則民生不遂,故制田里,薄賦斂冉有曰:「既庶矣,又何加焉?」曰:「富之。」

曰:「既富矣,又何加焉?」曰:「教之。」以富之。

治之。 能然 宗,亦云庶且富矣,西京之教無聞焉,明帝 行於上,言行政事皆可 而 唐太宗大召名儒,增廣生員,教亦至矣,然 尊師重傅, 此職者,百無 司 禮義以教之。 富而不教,則 書所載備矣。」 未 牧,而寄以三 乎?」輔氏曰: 知所以教也。 司 牧之職 臨雍拜老,宗戚子弟莫不受學; 實兼是三者。 〇胡 近 事。 於禽獸。故必立學校,明 「寄以三事,謂父生之,師教之,君 三代之教,天子公卿躬 氏曰:「天生斯民,立之 漢之文、明,唐之太 然自三代之後,能 所謂三代之教 師法,彼二君者其 ,則《大學 舉

〇子曰:「苟有用我者。 朞月而已可也,三年

有成。」

記 子歎 春月 紀 》,此 布 當 也。 蓋 時 周一歲之月也。 爲 莫 有成,治功 衛靈公不能 能 用 己 也 成也。 一, 故 用 可者,僅辭,言 而 云然。」愚 〇 尹 氏 日 念案《史 一: 孔 緇

矣。誠哉是言也!」勝,平聲。去,上聲。○子曰:「善人爲邦百年,亦可以勝殘去殺

累到此 以不 年,其化亦不 已,善人之功 之矣。」〇尹氏 之人,使不爲惡 爲邦百年,言相 于文、景,黎民醇 ,而夫子稱之。 用刑 自是 殺 能 也。 使人興 止此。 如 也。 是。 語 繼 厚,幾 善, 程子曰:「 而 鼠録》曰: 若 勝 不 去殺,謂民化於善,可 久 陷於 夫 殘 致 也。 「是他做 聖人,則 去 刑 刑 辟。」 殺 措 漢 勝殘,化 自 不 蓋 百 庶 高、 年工 爲 不 乎 古 待 殘 惡 其 惠 有 一夫,積 百 近 是 暴 而 至

也。

此

非

積

久,何以

能致?」

〇子曰:「如有王者,必世而後仁。」

成而 之。」〇或問:「三年、必 티 : 仁,謂 浹於肌膚,淪 也?」程子曰:「三年有成,謂法度紀 體 成王,而 王 事之不然也。 也。 者謂聖人受命 「所謂仁者,以其天理 化 舉 教化浹也。 行 世 後禮樂 也。 而言 求之《詩》、《書》,惟成、康之世 於骨髓 固 漸 興,即 無 民 而 程子曰: 一人之不然,即一人而言,又 流行 興 以仁,摩民 ,而禮樂 也。 其 ,融液洞 世,遲 效 三十年爲一 周自文武 也。」 可 徹 速 以 興 而 不 或問 (),所 義, 無 一爲足 百 物 謂 使 綱 至于 此 Щ. 之不 以 有 何

政。」子 能 其 〇子曰:「苟正其身矣,於從政乎何有? 不 與 再 正 聞之。」朝,音潮。 有 其身,如 曰:「其事 退 朝。 正人何?」 子 曰:「何 也。 與 去聲 如 有 晏 政, 也 ? 雖 不吾以,吾 對 「有

冉有時爲季氏宰。朝,季氏之私朝也。輔氏

○定公問: 徴獻 聞。 若近乎此, ●但引以爲比 氏,而教冉有之意深矣。 是國 議 是 子爲不知者而言,此必季氏之家事耳。 用 有大小。 者,正也,所以正人之不正也。 之官職,所謂政 晏,晚也。 焉 曰 : 時季 於公朝 也 内朝子將庀季氏之家政焉。」内朝,即 「公父文 陵之對略 今既 政,我 禮 : 自己 氏 ,而獨 不 專 伯 政,國政。 事 嘗爲大夫,雖 大夫 聞 也; 魯,其 母 言 亦 謂 相 謂之事,故 季氏之家事,所謂事也。」〇愚謂 而 則是非國 與家臣謀於私室者。 季 雖 似。 ,康子 可 ,則言不必信 於 不 以 其所 或 治 日 : 事,家 興 政 事 家 故施於國者,謂之政 胡氏曰: 「外朝 事 邦,有諸 政 不 以正 猶 蓋 止 不可 也。 事。 見 子 得 可 有 「魏徵獻陵之對 用, 謂 將業 所 以常理言也。」 名分,抑 與 語 不 之事。 陳 謂 ?」孔子 聞 氏 猶 意 與 君 私 或 \Box 之官 朝 當 與 故 口 以, 也。 政 若 季 魏 與 夫 列 事 君 政 職 0

> 幾,期 乎之義同, 讀,❸亦不可從也。」 音機,此失音也。 間,未可 也。 ,❷與『若是其幾』之『幾』不協,微則 以 《詩》曰: 如 此 舊説或以爲近,或以 而 必 期 如 其效。 幾 如 式。」言一言之 爲微。 胡氏曰: 文義皆不 近與不幾 「《詩》幾

人之言曰:『爲君難,爲臣不易。』易,去聲。

當時有此言也。

如 不及臣 豈不 深履 大 知 此言 爲 可 君 薄 也。 而 之難 以 而知爲 必 無 也,不幾乎一言而 期 君之難, 於興邦乎? 事之敢 則必 忽。 爲定公言,故 戰 然 興邦乎? 則 戰兢兢,臨 此 言 也

可以若是其幾也。人之言曰: 『予無樂乎爲曰: 「一言而喪邦,有諸?」孔子對曰: 「言不

對

曰:「言不可以若是其幾

也

[「]近與不幾乎」,原作「似皆與幾「乎此」,四庫本作「於譎」,當從。

❸ 「讀」,原作「合」,據四庫本改。❷ 「近與不幾乎」,原作「似皆與幾乎」,據四庫本改

君,唯其言而莫予違也。』喪,去聲,下同。樂,音洛。

言他無所樂,惟樂此耳。

莫之違也,不幾乎一言而喪邦乎?」如其善而莫之違也,不亦善乎? 如不善而

氏曰: 此。 耳。 取之者,豈以 源分於此,非 范氏 謝 「謝氏説邦未必興喪之遽 然此 邦 惟其言 氏 君 曰:「言不善而莫之違,則忠言 未 日 \exists 非 驕 其 識 心 大旨有所發明歟? 微者不足以知之,則又似以幾訓 知 識微之君子,何足以 而 而莫予違,則讒 澽 臣 圃 爲君之難 日 喪 諂 也, 未 ,則幾訓 而 有 興 則 諂 不 近。 喪 必 面 喪 之源 知之?」胡 敬 諛之人至 邦 又曰 謹 者 示 微。 興喪之 分 以 也。 至 於 持 於 終

遠者來。」說,音悦。 ○葉公問政。音義並見第七篇。子曰:「近者説,

被 而 後 其 遠 澤 者 則 來 悦,聞 也 其 風 則 來。 然必 近 者 説

○子夏爲莒父宰,問政。子曰:「無欲速,無

成。」父,音甫。見小利。欲速則不達,見小利,則大

事

不

羊,而子證之。」語 ○葉公語孔子曰 也。 之。」黄氏曰: 也。 第; 未仁之證也。 而大事不成也。」〇 仁,子夏之病常在近小,故各以 曰 心焉,可 而 莒父,魯邑名。 而 : 所失者大矣。 反 事之小大,有自然之分量。 聖人之教人,如良醫之治疾,藥雖不同 『居之 非 『無欲速,無見小利。』子張常過 不達。 正理 也。 ,則心可私也 欲速、見小利,此近於所見之小而不及之證 無 「居之而易得倦,行之而不盡 有欲 見 倦,行之以 ,去聲 小者之爲利, 欲事 速見利之心,則 程 黄氏曰:「事之久速,有自然之次 吾黨 子曰 事 一之速 贵 有 得 忠。一子 循其 : 成 而 直躬者,其父攘 「子張 强 則 自然之理 是私心 則 爲 哉? 切己之事 ,夏問 效 所 急 心 問 則 就 遽 此過 宜 而 高 而 政,子 政 也。 者 無 非 其 無 而 不達 高 所 IE. 序, 未 理

直躬,直身而行者。有因而盜曰攘。

爲父隱,直在其中矣。」爲,去聲。孔子曰:「吾黨之直者異於是。父爲子隱,子

時, 瞍殺 直不直者,愛親之心勝,而區區細行不足論也。 不足尚,於正理一 爲高,夫子則合全體大用 順 子主恩,委曲以全其恩,雖不得 與不直處,其曉人以理,可 哉?」輔氏曰:「「於理 而自得之。 父不爲子隱,子不爲父隱,於理 直,而直在其中。 父子相隱,天理人情之至也。 理而. 愛親之心 人,舜竊負 行,不失其爲直也。 又引舜事以推極人子之情,直到不暇 一有所虧, 勝,其 而 而觀之也。 順邪」説得極好,所以 逃,遵 ○謝氏曰:「 ,尚何言哉? 謂 葉公徒知 於直 明且切矣。」〇胡氏 正謂之直,然理所當 海 夫一偏 不直 濵 謝 偏一曲之異乎人者 氏所謂 而 順 順 故 處 一曲之高 理 何 邪 不求 使 不 日: ? 爲 暇計 人反 計 暇 當 其直 直 父 然 計 是 瞽 爲 求 其 非

忠。 樊遲問仁。 恭 雖 主容, 之夷狄,不 敬 主事。 子曰 可 棄 恭 也 居處 見於外, 恭 執執 敬主 事 敬 乎 與 中。 人

《語 《語録 或遺。 强、自 딩 : 篤恭而天下平,此仁聖之極功 而 也,充之則 者。」之夷狄不可棄, 外者,敬只是恭之存於中者。 密,恭氣象闊大。 知。」〇陳氏 者豈不大如主於中者? 似主於中 是主事。 誠身而言 「身體嚴 「敬是主事,然專言,則又如脩己以 天下平矣。」輔 録》曰:「上三句 未有内無敬 然之異耳。 此數語者,自 E 此 整,容貌端莊,此是恭底意。 恭是容貌上説。」〇又曰: 者較大,蓋 ,則恭較緊,自行事而言。 是 「有事 **□** 睟 徹 而外 則着 充之則有醉面 恭 敬意思 面 上 散着 就貌上 必充積盛滿,而 始 氏曰: 盎 徹 能 心做,不易其心 學 背 下 恭者,亦 至 下 卑. 然主 勉 一説,敬 成 屈 「聖人之言,貫徹 也。 語 德 敬與恭不是二物, 其 推 句 恭 於中者却是本,不 盎背之驗 皆 未 觀聖人以 就 方 古 體貌 敬、敬是直内 ,則敬爲切。」〇又曰 而 聖 有外 後 「凡言發於外 不過 櫦得 但 心 達之, 守 發 而爲之,是 人 尊 上 恭只是敬 於外,則 緊。」 能 説。 如 而 嚴。」〇 推 初 是爲仁, 恭 此 勿 愐 上下,無 則 無 敬 而 達之,則 失 八發於外 但 **一只偏言** 内 如 之見於 Ι. 敬 篤 程 又 者,比 可 則 夫 也。 形 有 無 日 恭 語 V 細 不 自 勉 有 敬 影

氏曰:「樊遲問仁者三:此最先,先難次之,| 弟何嘗只要識其名義而已哉? 唯躬行實踐之爲貴耳。]胡 | 曰

愛人其最後乎?」《語録》曰:「胡氏説雖無明證,看

而發也。樊遲問仁而所答各異者,因其所學之至而發也。矣。」○蔡氏曰:「諸子問仁而所答各異者,因其所稟之資者,將何從下手乎? 至於愛人,則又以其發於外者言之得來是如此。若未嘗告之以恭、敬、忠之説,則所謂先難

矣。」使,去聲。 〔行己有恥,使於四方,不辱君命,可謂士〔分己有恥,使於四方,不辱君命,可謂士

耕反。

一人教人,猶化工之妙,物各付物,於此見之。」

爲 足以有爲也。」子貢能 君命,則是其才足以 故常人之志,患在於無所不爲,而其才,則 輔氏曰:「志存於隱,而才見於顯,且志易肆,而 此其志有 (使之難,不獨貴於能言而已。 行己有恥,則是其志有 所不爲,而其材足以有爲者也 有 爲 言,故以 也 所不爲也。使於四方,不辱 唯 其志 使事告之。 有 所 患在於無所 不爲,然後才 才難彊 蓋 能

一弟焉。」弟,去聲。 | 书焉。」弟,去聲。 「宗族稱孝焉,鄉黨

稱

貴也。」

士之至行者,僅能使其身無過,而無益於人之國,不足深士之至行者,僅能使其身無過,而無益於人之國,不足深「宗族鄉黨皆稱孝弟,豈不是第一等人? 然聖人未以爲此本 立 而 材 不 足 者,故 爲 其 次。《語録》曰:

然小人哉! 抑亦可以爲次矣。」行,去聲。徑,苦曰:「敢問其次。」曰:「言必信,行必果,硜硜

問:「硜硜小人,而亦可爲士,何也?」曰:「彼其識 果,必行也。硜,小石之堅確者。小人,言 人,不復可爲士矣。 夫誕謾苟賤之人,則不可 淺,而非惡也,至其所守,則 其識量之淺狹也。 亦不害其爲自守也,故聖人猶 同年語矣。」下此則市井之 此其本末皆無足 雖規規於信果之小節,然與 有 取 觀、然 馬,或 量 雖

之人,何足算也。」筲,所交反。算,亦作筹,悉亂反。曰:「今之從政者何如?」子曰:「噫! 斗筲

平聲。 要放平 者何如」, 稱弟」,他亦未敢自信,故又問其次。 於四方」,不是些小事,故又問其次。 意思,然這一章却是大段平實了。 曰:「問:「子貢欲爲皎皎之行。」曰:「子貢平 曰:「子貢之意,蓋欲爲 子貢之問每下,故夫子以是警之。 〇程子 今之從 一升。斗筲之人,言鄙 斷了。一 夫子告之,皆篤實 實處做功夫,故每問皆 却是 斗,量 政 者, 問 錯 名,容 蓋 了。 如魯三家之屬。 聖人便云「何足第也」,乃是爲他 十升。 下。 自得之事。」《語録 皎皎之行 細 蓋渠見「行己有 到下 也。 筲,竹器,容斗 至「宗族 凡此節次,皆 面問 算, 噫, 稱孝, 「今之從政 聞 日 數也。 雖 於人 心 恥 是 鄉 有 使 不 他 黨 此

狂者進 行,道 子 有 餘。 取 極 《文集 也 狷 不不 高 者 胡 得 而 \mathbb{R} 氏 有 中行 行 曰: 「狂者志高,可 所不爲 不 而 掩 道 與之,必 猶 也。」 路 狷 也, 者, 以 狷,音 故 有 知 也 爲 行 未 亦 狂 狷者志 道 及 狷 也 而 乎 潔, 守 狂

取於狂 已也。 弗 故孔子於不得中道而教之之際,與其得謹厚之人,柔 0 持不逮之資,而悠悠以 難 之意,而所爲又精密; 也。 徒得 及。 選,夫子猶嘆中行之難得,思狂 得之人。」〇黄氏曰 本欲 而 則未至。」〇愚謂: 其行則不揜。 者行之過。」○輔氏曰: 有所不爲,而 彊 | 輔氏曰:「 如此,狂 激 知未及,狷者之不及,守有餘 , 悠悠歲月, 厲 故 謹厚之人, 得中道之人 狷。 《語録》曰: 裁抑之以 不若得此 狷 然狂狷者又各墮於 狂者之志 雖 可 狷者 不 以 故不若得夫狂狷 同 有 志極高,狂者之過,行不掩,狂者之不 守 「謹厚者雖是好,又無益 守。」〇《語 「孔子之門 而 有餘 有狷者之節,又不至過激, 進 狂 則未必能 ,狷者之節 求進於學,是皆夫子之所棄也。」 而教之,然既 「狂者志極 其 於道,非 狷之人,猶 力 故 量皆 能 狷 録 ,從游之士 不爲 偏。 ,狷者之過。 足 者 ,皆有進道之資者也 高, 之士,因 Ĕ: 自 與其 以 而 其 中 直欲 與之。 進 振 可 道之人,有 所 狂 於道 不 皆 拔 不爲, 終於 其 探取乎道,然 者 因 可得 於事 志 蓋進 知 極 而 者 其 蓋 之過 而 天下之 此 然 也 有 故 此 志 道 極 狂 其 爲 節 而 而 抑 之 難 者 有 狷 知

而善之,其所以警於人者深矣。

俯而就乎中也。○孟子曰:「孔子豈不欲中道及而激厲之,使之跂而及乎中也,於其過而裁抑之,使之乎中行之事,非與其終於狂狷而已也。」○愚謂:於其不之,使勉其所行,因其節以激厲之,使進其所知,則庶幾之,使

潔之士而與之,是狷也,是又其次也。」然,曰:『古之人! 古之人!』夷考其行而然,曰:『古之人! 古之人!』夷考其行而然,曰:『古之人! 古之人!』夷考其行而然。 不可必得,故思其次也。如琴張、曾哉? 不可必得,故思其次也。如琴張、曾

作巫醫。』善夫!」恒,胡登反。夫,音扶。〇子曰:「南人有言曰:『人而無恒,不可以

鬼神。 之享; 賤役,然必有常,乃可爲之。 不可以無常,孔子稱其言而善之。 南 無常之人,則在我者 人,南國之人。恒,常久也。 治疾病而無常,則 醫,所以寄死 無定守矣,何所 人何敢寄以死 生。 蓋交鬼 故 神 雖 用 生哉 而 無常 而可? 賤役,而 巫, 所 則 輔氏曰: 孔 子稱其 鬼神不 巫 以 醫 尤 交 雖

「不恒其德,或承之羞。」

此《易・恒卦》九三爻辭。承,進也。《語録

子曰:「不占而已矣。」

曰:「承,如人送與之也。」

增玩字,故《集註》猶以爲未詳。」
矣。」意亦略通。胡氏曰:「不占二字,如楊氏説須之取羞矣。其爲無常也,蓋亦不占而已之取羞矣。其爲無常也,蓋亦不占而已之取羞矣。其爲無常也,蓋亦不占而已得所字,故《集註》猶以爲《易》文也,其義未詳。

○子曰:「君子和而不同,小人同而不和。」 説,是推原其所以 和 不同不和 意則固同 欲合於義,故常和,然義有可否,故有不同,小人徇 義利二字説不同不和之意,然細推之,則君子之於事,唯 尚利,安得 ○尹氏曰:「君子尚義,故有不同。 者,無乖戾之心。 .矣,然利起争奪,安得而和?」○愚謂: 而 和?」輔氏曰: 不 同 不和之故自義利 同者,有 「尹氏本意,雖只是以 上來,非 团 比之意。 尹 小人 以 氏之 利之 此

之。」好、惡,並去聲。 一可也。不如鄉人之善者好之,其不善者惡「未可也。」「鄉人皆惡之,何如?」子曰:「未〇子貢問曰:「鄉人皆好之,何如?」子曰:

説

也

説之雖

不以道,説也;

及其使人也,求

備焉。」易,去聲。說,音悦

無苟合之行矣,則其人之善也爲可必矣。 己而好之,則有可好之實矣,其不善者以異乎己而惡之,則 是詭世戾俗之人,故皆以爲未可。 氏曰: 惡者不必如己之徇欲者也,此其所以爲賢也。 善者循理,故所好者如己之循理者也,不善者徇欲 惡而定其人之賢,必取決於善者之好,不善者之惡。 則 必 而惡者不惡,惡者惡而善者不好,則又推而言之耳。]○輔 自爲好惡也。 必其 其有苟合之行。 惡者惡之而善者不好, 鄉之人,宜有公論矣,然其間 「鄉人皆好之、恐是同流合汙之人、鄉人皆惡之、恐 無可好之實。 故善者好之而惡者不惡,則 黄氏曰:「不以鄉人皆好皆 至於鄉人之善者以同乎 亦各以 至於善者好 故所 類 蓋

不説也,及其使人也,器之。小人難事而易○子曰:「君子易事而難説也:説之不以道,

反而已矣。」 己之道甚嚴,而待人之心甚恕,小人治己之方甚寬,而 如己意也,故求備責全,而卒至於無可用之人。 人。小人輕視人材,不求在我用之之道,而 責人之皆可用,故隨其材器而使之,而天下 説人之順己。 每相反而已矣。輔氏曰:「君子説人之順理,小人 器之,謂隨其材器而使之也。君子之心公 人之意甚刻。 而恕,小人之心 君子貴重人材,務盡在我用之之道,而 惟公故恕,惟私故刻,天理人欲之間 私 而 刻。 天理人欲之間 唯欲人之皆 無不可 君 每 子持 用 之 不

〇子曰:「君子泰而不驕,小人驕 循,富貴貧賤安於所遇,無入而不自得,故常舒泰。 胖。小人鶩於氣,逞於欲,故言夸而行肆。」〇 君子 故反是。 循理者,泰之本也。 循理,故 輔氏曰: 安舒 逞欲 「君子安處善,樂循 而 者,驕 不 矜 之根 肆。 也 而不泰。」 理,故心廣 小人逞欲 君 子 胡 惟理是 Æ 小人 而體 \mathbf{H}

矜。循理則惟恐欲心之肆,而卒至於無欲。逞欲則不知惟欲是逞,貪求苟取,意得志滿,常欲以之自夸,故常驕

〇子曰:「剛毅、木訥,近仁。」

是理之正,而常至於背理。二者常相反。

仁爲近,由學者言之,必庶幾其全體可也。」 明 其不至於外馳,固木訥矣,然威儀文辭,未嘗不粲然而 於物欲,固剛毅矣,然待人接物,未嘗不温然而 存。 IĘ. 質之近乎仁者也。」楊氏 智之資氣命於理,自然合於中 於仁矣,未可以爲仁也。 然非論其問學功夫,即其 有堅彊不已之意,木訥則無巧令外飾之資,故於仁爲近。 於物欲,木訥則不至於外馳,故近仁。」輔氏 也。 子曰:「木者,質樸。 「有剛毅之質,則必不屈於物欲,不屈於物欲,則 心正則常存 有木訥之質,則必不至於外馳,不至於外馳 若資質之美,則拘於一 ,此所以近乎仁也。」○胡氏曰: 蓋仁雖出於天性之本,然惟上 資稟而 和而不墮於一偏。 訥者, 偏 曰 : 「 言也。 耐 른 遲鈍。 剛毅 資稟之近,若合 大約言之,固 則不屈 和順 剛 ,則心常 四者, 其不屈 也; 毅 心 於 宣 則 常

○子路問曰:「何如斯可謂之士矣?」子曰:

切、偲偲,兄弟怡怡。」

切

切、偲偲、怡怡如

也,

可謂

士矣。

朋

友

切

其過。 然 或問: 胡氏 切切偲偲,兄弟則怡怡。 切切、怡怡。 又恐子路一向和悦去了,又告之以朋 之。」《語録》曰: 賊恩之禍,朋 足,故告之。又恐其混於所施,則 之誠,而無勁訐之害。」○《語録》曰: 方有相親之意。」恰恰,和悦也。 向如此而無浸灌之意,又不可。 偲偲者, 勸勉詳 「切切偲偲之義。」曰: 曰:「切切, 「聖人見子路有麤暴底氣象,故告之以 友 有 盡, 懇 聖人之言是恁地密。」 善柔之損 到 而不强其從。二者皆有 「切切 也。 者,教告懇惻 「懇到,有苦切之意。 偲 故 須 皆 偲, 詳 細相 子 又 詳 别 路 兄 勉 勉 弟 而 所 而 忠愛 如 不揚 友 也 有 不 則 此

以即戎。」○程子曰:「七年云者,聖人度其也。戎,兵也。民知親其上,死其長,故可法。《語録》曰:「古人政事,大率本末兼具。」即,就教民者,教之孝悌忠信之行,務農講武之分日:「善人教民七年,亦可以即戎矣。」

之極 用 曰 : 或 何乃有益。」輔氏曰:「聖人度其時可矣,蓋致知格 時 則 Ŧī. 可 「聖人作爲必 功,不 有九年之食,恐當以 年、 矣。 啻 小國七年之類,皆當思 如 如 云朞月、三年、 燭 須有分明界限,如古 照 而 數 此 計, 推之。 非臆度之謂 百 人謂三十年 年、一世、大 其作爲 也。 0 制 蔡 如 國 氏 物

〇子曰:「以不教民戰,是謂棄之。」

其民也。」

其民也。

言用不教之民以戰,必有敗亡以,用也。言用不教之民以戰,必有敗亡以,用也。言用不教之民以戰,必有敗亡以,用也。言用不教之民以戰,必有敗亡

憲問第十四

也。 篇日 胡 氏 憲問 他章夫子稱弟子則名之,曾子、有子、冉子門 曰:「此篇疑 恥 不不 書姓 而 原 直 憲 書名,其爲自記 所記。」愚謂: 之證 首

> 下章問「克伐怨欲不行」,不别 之宰,亦以字稱。 自記之證三也。 人之所記,則以子 凡四十七章。 稱 耐 此 非 書名,其爲 其師 者 起端 皆 自 稱字,如 ൬ 聯書之,其爲 記之證 原 二也 穀 思爲

道 其問 邦 而 介,其於邦無道穀之可恥,固知之矣;至於 道無道,只會食禄,略無建明,豈不深可恥。] 憲之狷 邦無道不能獨善,而但 憲,原思名。 語 進 有道穀之可 ●其志卓然,❷能有不爲者也。 録》曰:「穀之一字,要人玩 於 而并言之,以 有 爲 也。 穀,禄也。 恥,則未 或 廣 問 其 此 味。 必 志,使知 知食禄,皆可 邦有道不能 章。 知 其 穀有食禄之義,言有 也。 티 : 爲 此 所以 「原 問 故夫子因 憲 固 自勉, 甘 恥 有 知 貧守 邦 爲, 也 無

● 「甘」,原誤作「者」,今據四庫本改。

❷ 「其志卓然」,原誤作「其卓然然」,今據四庫本改。

循自 可以充此心本然之限量也。」〇愚謂: 守常有餘 并告之,使因其所已知而推之,以及其所未知者,庶乎其 介者有分辨之意 有以廣其業而益 有道之時 子深知其 道 而 守猶爲一己之私行,必推而足以 枉 道 然,而 雖 得禄之爲恥矣,特欲質諸夫子以言其 而見於事爲常不足。 無枉 亦知其學之未足以有爲 充其所爲爾。]〇胡氏曰: 道之羞,而未免於素餐之愧,故以是 蓋以心之全體言之,循 狷者有執守之意. 治國平天下,然後 也,則恐其或 「狷介之人,自 (志耳。 而 當 夫

子

○「克、伐、怨、欲不行焉,可以爲仁矣?」

事。 之私也。」〇 外,恨藏於中,内恨外忿,則爲怨。 伐是也。 恨。 問,皆是以其所已能者而質之於聖人,故夫子之答,皆進 之爲勝敵、勝己是也。 之以其所未能。」克,好勝。 伐,自矜。 怨,忿 對舉 欲,貪欲。 前 伐者,傷殘之意,自矜乃所以 互言之,則克伐者 胡 氏 日:「克、伐、怨、 輔氏曰:「克,只訓 然單言之,則爲好勝,如忮克、克 ,因己之所有而生氣盈 欲,分而言之, 欲有公私,貪欲 勝,如克敵、克己 自 殘 也。 則 忿 見於 爲 則 也 欲 四 兩

> > 有

不能 **《語** 之意,乃日鬭進於胸中,則夫所謂仁者,亦且 不給矣。 開示之深,惜乎憲之不能再問也。」或問"「 有是 焉,不去其根,則萌蘖之生,自不能已,制而不行,日 不行於外爾,若其本則固著之於心而 測之? 然以程子之意而言,則四者之不行,亦制 憲而再問,夫子告之奈何?」曰:「聖人未發之旨,夫孰 行,斯亦難能也。 言之也。 欲,惟仁者能之。 則天理渾然,自無四者之累,不行不足以 曰:「可以爲難矣,仁則吾不知也。」 己 而生也。」 録 以自 × E 四者 且. 存 "「這箇也是他去做功夫,只是用功淺 矣。 一雖或 〇程子曰:「人而無克、伐、怨、 而 能 必也 能制之,終身不見於外,而 制之,使不得行 絶其 謂之仁則未 有之而 萌芽, 蹩 其根 能 不能 制 本,不 也。 · ', 可 去也。 其 一殫殘 其 謂 (鬱屈 使 情 此聖人 在。一仁 難 譬 其 少 蔽 使不 害 有 力亦 之木 末 不 使 而

髪留

於心念之間

,則於仁也,其庶幾乎!」〇《語録

之謂 乎禮 心,使其全體大用軒豁呈露,而四 不容其潛藏隱伏於胸中 怒,畢竟胸中有怒在,所以未得爲仁。 \Box 者在家中,只是不放出 克、伐、怨、欲,而 若 之事 復有 病根在這裏。」〇又曰 不行 求仁之功,益 而 克己者,一似 這 一:「克是抉去病根。 容 旧 便 所 憲之所以僅 哉? ず,求仁 是他失問 則私 固 其 制 潛 而 则 不 藏 不 亦以 欲不 學者察於二者之間,則其 .之方乎?」曰:「克去己私以復 得爲仁矣。 就 行,則 隱伏於 惟 家中 能 親 也 狷 禁制之,使不發 ·留,而 其 是 切 介之守 不行是捺 捉 他從 去外 難 如如 者,亦在乎 是 固 而 出 胸 來自 面 頭作過,畢 箇 無 未 痼之也。」 以 天理之本然者得矣。 賊 中 然亦豈非 前 其 滲 有拔 在這 有 見做好了 狷 者之根株蹷拔,自 也。 打殺 漏 格 出來,猶 介有守,而至 裏,且 事 所謂 物、 矣。」《語 或 去病根之意, 一竟是 1 豈克己求仁 相 便 致 曰: 如 一教莫 拔 觸 所謂克己 知 窩 關 没 従此。」〇 去病 雖 藏。 閉 事 誠 出 録 能 於不 所 所以 四 意、 根 $\stackrel{>}{\exists}$ 不容 然這 〇又 若 謂 遏 輔 者 而 īF. 其 賊 有 能 氏

> 勃然而 若相 於内也 不許其仁, 乎天理不行者。 用力於初分之際者易,用 待其既發而以力制之,使不得行, 渾然至理 之擾,非所謂篤志求仁之道也。」○胡氏曰: 若然,則 著,且制之不行,待他 拔 在 或 去, 耳。 萌於其間 似而實不同。 出 若果知 ,是豈可謂之仁哉? 舉 恐病根轉深,不可得而 ,初無四者之累。 士: 其 予淨盡 而 也。」〇陳氏 亦許其 難 而 ,却合下便當下克己工 也 禁制 然後爲快,豈 懷居,不足以 有 四勿者,分辨於天理 時 難 時工 於人欲已發之後,而不 而 也。 日 不可恃矣。」 力於已發之後者 夫稍熟後,乃漸次以 今不思所以治之,病根常 苟 制其 惟 志 有放緩 拔。 患 不 情 爲 則 不 勝 胸 愐 其 夫 士: 能 第 氣 不行 中 病 人欲之間 自 矣。」 對 根 則 知 難 著,且 起 境 未嘗 藏 與 己 「人之一心 - 徇乎 此 直 伏 伏 顔 之病 拔之邪。 截 於 子 放 所 而 不 人欲 ,轉爲 ,與之 藏 第二 以 内 四 根 循 勿 伏 所

〇子曰: 居,謂 處,便是利 者,戀戀 意 而 不 心。 所 能 便 爲 忘 安處 士者, 則 於義 Œ 也。 之所 義 而 輔 當 不 氏 爲 謀 ☐ : 利 者 懷吾 必 若 於 不 能 意 意

所

便

安

矣。

内

則

損

德,

外

則

廢業,是

尚

足以

爲

士哉?」〇

胡所便

氏從安

知 所

安,則 爲意所便 士乎? 之斷其不可 \Box 「居,以爲居室可也,然居室一事所該者狹,聖人既 趨 利 安 而 へ處 爲,士則不止乎思念其居室之安 背義, 皆 是 也。 以 私 蓋不徇乎理之安,而徇 而 滅 公公, 往往有之,安 而 E 得 乎 謂 情 故 之 之 以 以

言孫。」行、孫,並去聲。 〇子曰:「邦有道,危言危行,邦無道,危行

之理。 時 也 氏曰:「危言危行,君子之常也,然行以持身,則終 險不平正之謂。」 危,高峻也。 可 口 變 知 然則 也,至於言則有 言之應物,則或有當遜之時,使士孫言以辟 ,非阿諛之謂。」尹 也 爲國者使士言孫,豈不殆哉?」輔 謂 孫,卑 永嘉陳氏曰: 之孫 者, 順 氏 卑 時 也。 티 : ·順而 「高峻者,廉角之稱, 而 胡 不敢盡,以 르 君子之持 氏 日: 亦 非 「卑順 違 道 無可變 身 避 禍 者, 以 非 则 则 禍 不 徇 加 詭

仁者必有勇,勇者不必有仁。」
○子曰:「有德者必有言,有言者不必有德

物

也。」

爲。 德也。 而觀人者,必察其本。」 形諸外,事其末者,未必有其本。 徒能勇者未必有 言,徒能言者未 之,所以見其不必也。」〇尹氏 於彼可知。 便佞 有 給,無德之言也。 德者 勇者,或血 П 英華,言也。 「, 和 給 不必,則有此而於彼未可 而 順 른 血氣之强,不仁之勇也 積 氣之强 無私,仁也。 中,英華發外。 必 仁也。」輔氏 仁者,心 有德 脯 也。 曰 **:** 己。 故自脩者,當務其 無 必爲,勇 日: 私 「有德者必有 知 胡 也。 「有諸内者,必 者志必勇 累,見義 能 氏 必,則 也 日: 言者, 以或字 「和 有 便 此 佞 順 必 或 而 П

○南宫适問於孔子曰:「羿善射,奡盪舟,俱 一南宫适出。子曰:「君子哉若人! 尚德 答,南宫适出。子曰:「君子哉若人! 尚德 答,南宫适出。子曰:「君子哉若人! 尚德

滅 南 夏后 宫适,即 相 而 南 篡 容也。 其 位 羿,有 其 臣 寒 窮之君 浞 又 殺羿而 善射

愚謂: 稷比 意蓋 矣,不可以不與。故俟其出而贊美之。 之言如 家子孫,有此見識,尤所難得。 能陸 代之。奡、《春秋傳》作「澆」,浞之子也,力 夫子·其所以憫世悼俗、尊尚聖人之意,備見於言外。」〇 有天下,稷之後至周武王亦有天下。 土暨稷 孔子也。 地 權力二字,正指三家而言。 以羿、奡比當世之有權力者,而 播 此,可謂君子之人,而有尚德之心 行舟,後爲 種,身親 輔氏曰: 夏后 稼穡之事。 「适素號能謹言,而以 故孔子不答。 少康 适是孟懿子之弟,亦三 所誅。 禹受舜禪 禹平水 以 适之 然适 此 輔氏 禹、 質於 而

仁者也。」夫,音扶。○子曰:「君子而不仁者有矣夫,未有小人而」

曰:「於此可見聖人處事之密而取善之周。」

天理,無所間斷,所謂中心安仁者也。君子則志於仁矣,不在焉,則未免爲不仁也。」輔氏曰:「聖人渾然謝氏曰:「君子志於仁矣,然豪忽之間,心

海乎?」○子曰:「愛之,能勿勞乎? 忠焉,能勿體段是人欲,初不知有所謂仁者,尚何望其能仁哉?」然叛須之間,心不在焉,則未免爲不仁。若夫小人,則通然斯須之間,心不在焉,則未免爲不仁。若夫小人,則通

蘇氏曰:「愛而勿勞,禽犢之愛也,忠而勿蘇氏曰:「愛而勿勞,禽犢之愛也,忠焉則自不能不為以成之,忠焉則自不能不為以益之,此天理人情之至,莫之爲而爲者也。觀慈父之以益之,此天理人情之至,莫之爲而爲者也。觀慈父之以益之,此天理人情之至,莫之爲而爲者也。觀慈父之以益之,此天理人情之至,莫之爲而爲者也。觀慈父之以益之,此天理人情之至,莫之爲而爲者也。觀慈父之以益之,此天理人情之至,莫之爲而爲者也。觀慈父之以益之,此天理人情之至,莫之爲而爲者也。觀慈父之以益之,此天理人情之至,真之爲而爲者之爲,為情之爲,為情之爲。

反。谌,時林反。 行人子羽脩飾之,東里子産潤色之。」裨,婢之,子曰:「爲命:裨諶草創之,世叔討論之,

秋傳》作子太叔。討,尋究也;論,講議也。造也。謂造爲草藁也。世叔,游吉也、春神諶以下四人,皆鄭大夫。草,略也,創,

色,謂 賢之手 之脩飾。 應 飾 創。 謂 行 後, 對 增 人,掌使之官。 世 却 諸 損之。 叔熟於典 加以 來 子産當國,不 而 侯 潤 成 色之。 文采 鮮 東里 詳 (故,故 有 也 審 鄭 敗 自 使之討 地 子 精 國之爲 用己見,直待三人草創討 事。 愚謂 名, 羽、公孫 密 論 子 各盡 孔子言 辭 子 裨 産 諶 羽 命, 揮 所 所 善 能 也。 於應 謀, 長。 居 必 此, 故使 更 也。 對 脩 蓋 是 此 之草 論脩 故 飾 以 潤 善 四 使

或問子産。 言 爲 子 也。 主。 産之政,不專 故 孔子以 子 日 於 : 「惠 爲 寬,然 惠人,蓋 人 也。 其 心 則 舉 其 以 重 愛

人

而

之也

問子 號 紀 子 其 西。 西,楚公子申,能 政,亦賢大夫也。 昭 王 日 欲 用 彼哉 孔子,又沮 遜楚國,立 彼哉 然不能革 止之。 昭 其後 其 王 僭 卒 王 而 召 之 改

> 者,外之之詞。 白公以致禍亂,則其爲人可知矣。彼

> > 哉

食,没齒無怨言。」問管仲。曰:「人也。奪伯氏駢邑三百,飯疏

之道 質言 勝其 功, 科,而仲之才當與伊吕並駕矣。」○陳氏曰: 也。」輔氏曰: 此 曰 : 以 邑,地名。 人」、《莊子》所謂『之人』也。」伯 人也,猶言 與之書社 與管仲 事 循 也 故 「管仲之德,不 德。 也。 放其 序而 窮 約 然於聖人之學, 事業 漸 齒,年 三百 伯 此 進 「管仲德不勝才,子産才不 以)或問 人也。 亦各隨其資以 成 氏 終 三 以 一, 而 自 身 也。 管管 勝 知 而 成物,則子産 三語 富 己 其 無 蓋 人莫之敢拒」者 録》曰: 罪 爲之。 才。 仲、 怨言。 桓 則 氏, 公 而 概 子 子産之才,不 之德 使 奪 齊 乎其未有 心 猶 産 其 勝德者,以資 荀 二子皆無大 伯 服 大 詩 當 知 孰優?」 聖賢 卿 與 管 氏 夫。 》所 顔 之 所 仲 謂 閔 大 聞 即 謂 之 伊 邑 駢

人也。」學規模,乃爲王佐才,而伊、傅、周、召其學規模,須是大學規模,乃爲王佐才,而伊、傅、周、召其

子曰 而易者不足言,故 易。 餘 嘗不足者,非無所愧怍而真有所得,則不能,故難。 不足之心, 富之境順, 而多有餘之意。 難,而不可忽其易也。胡氏曰:「貧之境逆,而多 處貧難,處富易,人之常情。 而心未嘗 聖人因人情事勢而別其難易如此,非謂但當勉其]:「貧 有餘者,苟 而 無怨難,富 《集註 自知收 》又申明其不可忽之意也。」 而 斂,矜夸不萌者能 無驕易。」易,去聲。 然處不足而 然人當勉其 之,故 處有 心未 難

滕、薛大夫。」 〇子曰:「孟公綽爲趙、魏老則優,不可以爲

可知。 長者,苟能正己,則居其位有餘矣。」滕、薛,二國名。 望尊,而無官守之責。 臣之長。 公綽,魯大夫。 趙、魏 晉卿 雖晉卿,孟子言『附之以韓魏之家』,則其家之大 執國之政,而家大如此,故勢尊。 大家勢重,而 趙、 魏,晉卿之家。 優,有餘也。 無諸侯之事 爲家臣之 胡 ; 老,家 氏曰: 家老

> 也。言此,則孔子之用人可知矣。」 用之,則爲棄人矣。 德備者也。」〇楊氏曰:「知之弗豫,枉其才而 然律以成人,又須文以禮樂方可,否則 綽之爲人,以下章言其「不欲」觀之,故知其廉靜寡 已,大夫當國,非 高責 綽蓋廉静寡慾,而短於才者 短,將五十里」,則其國之小可 大夫,任國 重。 胡氏曰: [政者。 才智過人,則不足以勝其任。」然則公 滕、 滕、 此君子所以患不 薛 薛國 雖諸 知。 征 侯,孟子言『滕絶長 小 也。 伐朝聘之事 有 政 所 繁,大夫位 偏,而 胡氏 ☐ : 所不 非才全 知 欲 公公 也

樂,亦可以爲成人矣。」知,去聲 之不欲,卞莊子之勇,冉求之藝,文之以禮 ○子路問成人。子曰:「若臧武仲之知,公綽 子。」曰:「莊子養母,戰而三北。 成人,猶言全人。輔氏 夫,名紇。 盡得人之道,則其爲人方 莊子,魯 卞邑大 可謂之成 曰:「謂全盡 及母死,齊伐魯,莊子 也。」武 夫。 或問 得人之道。 仲, 卞 大 赴 全

用

之,此 德成 應,而 事 去其 鬭,三 德 皆 孔子言 不欲者又或不能於小國之大夫也,亦難以爲成人矣。 死。 之,故知者至於要君 也?」曰: 駁雜之蔽,而其爲人也亦成矣。 内,而文見乎外。 窮 也。 也 備 至 子之長,而又必文之以 善成名之迹; 理 於於 理 所 則 事 其 一獲甲 廉 短,而 内 必 見 無 至 所 所以渾 又節之以禮,和之以樂, ※偏倚 闕 兼 此 寓 「四子各有所長,而不 《新 `則和之以樂之事也; 文見乎外,則節之以禮之 首 足以養心,勇足以 此 不 則 後 序 而 以 之蔽 四 然也 内外 獻, 見 可以爲成人也。」○輔氏曰: 日用 》。」言兼 人之能而又文之以 則 日 善 兼全而 之不可 二此 勇 中 中 中 成名之迹,則 者 則材全德備, 塞三 正 Œ Ė 此 至於輕 禮 矣; 者,禮之則 禮樂純備矣。 闕者,通 四子 和 北。 樂,然後可 無駁雜之蔽 樂,粹然 能 死,藝者至於聚斂 之長 力行 相兼,又無禮樂以文 遂 人不 禮 此則 也; 赴 樂 齊師,殺十人而 得 則 · 藝足 以 才全則不 應 或問: 渾 和樂者,樂之 使 「藝,謂 無 則 以 爲 集其 則 務 德 然 復 成 知 有餘 和樂矣 德 八所長! 成 以 一必 不 六藝 人,何 偏 足 而 偏 矣 見 於 倚 沪 以 名 故 兼 而

> 所以中 言, 氏曰 於僅也。」蓋就子路之所 其偏倚邪辟者去矣"樂以和之,則其乖戾矯激者消矣,此 資,猶未足以合乎道,又必須文之以禮 論其至,則非聖人之盡 「聖人天理渾全,不待如此逐項説矣。」」 語録》曰: 其 (所以 非其至者,胡氏曰: 正和樂渾然粹然而至於成人矣。」然「亦」之爲 四子之長,各 粹然也 「問:『若聖人之盡 渾 1有所 .然粹 偏 然 「可者,僅 則 故 可 人道,則何以 人道,不足以語 必 其 及 兼四 爲 而 人 一解。 樂。 也 子之長 語 亦成 禮以節之,則 之也 亦可,則未至 加此?」曰 矣。」〇 四 此 者 若 胡 相

此

命,久要不忘平生之言,亦可以 曰:「今之成人者何必然? 思義 遂忘其義以 授命之爲忠,久要不忘平生之言之爲信,宜 平生,平日也。 不愛其生,持以 復加「曰」字者,既答而復言也。 亦可以爲忠,何也? 不思 則 非 有是忠信之實,輔氏 與人也。 所以 義本吾心之固 盡吾 心 也。」 久要,舊約 爲成 則 有 雖 荷 也。 授命,言 曰:「見危 其 因見 而 才知 利 見 也 而 利

見利思義,見危授

此。 也。 也。 也; 協于中正 也 固亦達德之所發也。」又曰:「臧武仲之知,非正 德,人之所以爲人,以此而已。 則又其次者也。」輔氏曰:「知仁勇三者,天下之達 人孰能之? 可以爲成人矣。然而論其大成,則不止於 孔子所謂成人,亦不出此三者。武仲, 之明,信之篤,行之果,天下之達德也。 之。'亦可以爲成人之次也。 禮樂有所未備,輔氏曰:「才生於氣,四子之能 「程子蓋指要君之事言之,然亦舉武仲此一事以例其餘 出於氣稟,然武仲之知,又不可專以才言,故兼 人之資稟雖 若今之成人,有忠信而不及於禮 公綽,仁也,卞莊子,勇也, 若文之以禮樂,則無不正矣。」輔 須是合此四人之能,文之以禮樂,亦 而無疵 也。」又曰: 善,然亦不能無偏,須是學以成之,然後 「語成人之名,非聖 四子之能雖未盡人道,然 ○程子曰:「 冉求, 知 氏日 樂, 雖皆 以言 若 藝 知 知

○子問公叔文子於公明賈曰:「信乎夫子不 之言。 者又皆子路之所能 説,也未可知。」〇愚謂: 「若如此,夫子安得無言以繼之?」曰:「却又恐是他退後 其所能而自言,故胡氏以爲『有終身誦之之固』也。」問 句,自是子路已了得底事,亦不應只恁地説。 只説向下去,且『見利思義』至『久要不忘平生之言』三 之之固矣。未詳是否?」《語録》曰:『聖人不應 猶或歉也。」胡氏曰:「今之成人以下,乃子 形。]如此方可以稱成人之名。」輔氏曰: 性則具是形,須是踐得這形,方始全得是性,此惟 雖合是四子之長而文之以禮樂,至於踐形之事,則 蓋不復聞斯行之之勇,而有終身誦 ,故胡氏疑其爲子路之言 「何必然」三字似以前説爲疑,三 蓋子路以 聖人能 有 路 是

言、不笑、不取乎?」

名,亦衛人。文子爲人,其詳不 廉静之士,故當時以三者稱之。 公叔文子,衛大夫公孫枝也。公明姓,賈 可知 然必

公明賈對曰:「以告者過也。 夫子時然後言:

孟子曰:"惟聖人然後可以踐

然乎?」 後 取 不 厭 人不 其 言 厭 樂 其 然後笑,人不 取。」子曰: 「其 厭 其笑; 然, 豈 義 其 然

輔氏 過 然,豈其然乎」,蓋疑之也。 子與人爲善,不欲正 行之,聖人之事也。」文子雖賢, 也 厭 不 者,苦其 非 曰:「此乃内外合一,自然而然,不待勉强,所謂安 而 厭, 禮 以 義 爲 而 充 多 不言、不笑、 不 溢 而 覺 於 惡之之辭。 其 中,得時 有是 言其 不取 矣。 非 疑 措之宜 也。 事 未 是 也 及 適 以 故 此 者 其 然 稱 曰 不 可 此 之 但 能 其 言 或 君 則 而

君,吾不信也。」要,平聲。 ||〇子曰:「臧武仲以防求爲後於魯,雖曰不要|

是 也。 防, 而 要君 避 地名, 武仲 邑。 也。 以 得 武 ○范氏 罪 示 仲 若 奔 所 不 邾 封 曰:「要君者 得 邑也。 自 請 邾 則 如 要, 防, 將 無上 據 使 有 邑 請 挾 一,罪之 以 V. 而 叛 後 求

> 以請 言 説爲主。 其 智而不好學之故也。」楊 大者 亦《春秋》誅意之法也。」黄氏曰: 己,如見其肺 病皆有之,且 溺於智 奔,則立 而請 跡 非 曲 也。 後, 而 其以防也,必未嘗 不知 要君者,而 則要君明矣,不待夫子之辯也。」 其 後 武 意萌 肝 好智 學,不鑿以爲 在 然。 仲之邑,受之 於中,迹著於外,雖 君 武 而 ,非己所 仲之智而 而 氏 不好學 意 私 不正,齊桓 有據防之言 日 實 則 、要之。 不 得 也 必 武 足 於 蕩 專 以 欲 仲 而 君。 欺 也 「此章當以楊氏 知 輔 使 夫子之言, 卑. 失 公 人,而 此 氏 其 IĘ. 辭 日 正 果 得 則 而 請 以 武 亦 人之視 而 罪 凡 據 仲二 防 後 以 不 邑 出 好 爲 人

潏。」譎,古穴反。 〇子曰:「晉文公譎而不正,齊桓公正而不

楚,仗義 也。 也。二公皆諸侯盟主 晉文公,名重耳。 雖 其 執 以 言,不 力 假 仁,心皆 由 齊桓: 詭 道 攘 公,名小白。 ~,猶 夷 不 狄以 正 爲 姚 然 彼 尊 善 桓 周 於此 譎, 公伐 室者 詭

甚矣。 他 擕 表裏無疵、 中 道 事,進次而不遂戰,既服而與之盟,是仗義執言,不 文公則伐衛以致楚,而陰謀以 論桓、 也。 事 國之交,是伐衛以致楚,而 亦多類此,故夫子言此以 文公始則伐曹、衛以致楚師之救,終則復曹、 文之事,則文譎而不正,桓 輔氏曰: 、粹然 出於正者,固不可 「桓公責楚以包茅不貢 陰謀以取勝 Œ 同年 而不譎。 發其隱 而語矣。」二一君 取 及昭王 也。 、勝,其 若較之王者 就霸者之 不 衛以 復二 由 譎 詭

《秦水專》,齊襄公無道,包双牙奉公子不死。」曰:「未仁乎?」糾,居黝反。召,音邵。〇子路曰:「桓公殺公子糾,召忽死之,管仲

得爲仁也。 相。 忽死之,管仲請 奉公子糾奔魯。 小白奔莒。 案《春秋傳》,齊襄公無道,鮑 人,是爲桓公。 子路疑管 《語録》曰: 及無 仲忘 使魯殺子糾而請管、召,召 囚 魯人納之,未克,而 知弑 君 鮑 「傷其惻隱之心,便是忍心。 事 襄公,管夷吾、 叔牙言於桓公以 讎,忍心 叔牙奉 害理,不 小 ·公子 召 白 忽 爲

然。忘君事讎,即忍心害理之事也。」

就言爲,而忍之使不爲。害理,謂理所當然,而咈之使不用,謂不顧子糾之死。事讎,謂爲桓公之相。忍心,謂心君,謂不顧子糾之死。事讎,謂爲桓公之相。忍心,謂心如所謂無求生以害仁,害仁便是忍心也。」○輔氏曰:「忘如所謂無求生以害仁,害仁便是忍心也。」○輔氏曰:「忘

子曰:「桓公九合諸侯,不以兵車,管仲之力 也。 爲九會諸侯,至數桓公之會,不止於九,則又因『不以 糾合宗族之類,若此者亦甚衆。 問"「九之爲糾。」曰"「《春秋傳》展喜犒師之詞 也。」自《公》、《穀》以來,皆爲是説,亦可謂鑿之甚矣。」不 車」之文而爲之説曰:『衣裳之會九耳, 九 《春秋傳 如其仁! 》作「糾」,督也,古字通 如其仁!」 説者不考其 其餘則兵車之會 然, 云爾, 用 乃 直 丘 或 而

多功,故云誰如得 上面説得大了,下面豈 其仁者,又再言以深許之。 爲仁人,而其利 以兵車,言不假威力也。 語録》曰: 「問:"如其仁,何以言深許管仲?」曰:"看 他 底仁。 澤及人,則有 是輕 輕 終不 説 過? 成 如 蓋管仲雖未得 便 其仁,言 與 聖 仁 許 人當 顔 之功矣。 子 時 底 舉 誰 意 他 如 相 許

者之臣却能之。 此。 似。 \Box 故夫子以 及人,是亦仁者之功效矣。 糾合諸 管仲之於德,其 :「仁有粗 .者安仁,蓋天理渾然, 子貢、冉 管仲莫説要他「三月不違」, 若要他三 侯,攘夷狄尊周 是 廣其意 細 求 説 違闕者多 諸 蓋管仲乃仁者之功,功 細處,孔門弟子多有未能 人, 豈不强似 使 室,不假威 推 無 矣, 而達之於用也。」〇 蓋子路之論 顧 息之不存,無 何 管仲哉 力,無 足以 語 1.10 仁,舉 雖 所 此。 H, 可 殺 稱 傷, 説 體 物之不體 永 然使 也不 輔 道 粗 而 則 嘉 氏 處,霸 遺 過 陳氏 利澤 桓 會 日 用 自 公 如

糾 〇子貢曰:「管仲非 子貢意不死猶 ,不能死,又相之。」與,平聲。 未仁。子貢,知者也 「子路、勇者也、故有取 可,相之則 ,故以管仲之不死 於召忽之死 仁者與? 已甚矣。 ,而以管仲之不 相 爲猶 一去聲 桓公殺公子 可 而以 輔 氏 其 死 \exists 爲

不可掩。」

皮寄反。衽,而審反。于今受其賜。微管仲,吾其被髮左衽矣。被,子曰:「管仲相桓公,霸諸侯,一匡天下,民到

桓

爲已甚而非仁。」

衿也。 夷 霸 狄 與 ,皆所以正天下也。 角同 被髮左衽,夷狄之俗。 長 也。 匡, 微, 也。 也 無 尊 也 周 衽,衣 室 攘

知也。」 豈若匹夫匹婦之爲諒也,自經於溝瀆而莫之

諒, 同 免 於所 程子 之亂乎? 人之言,無乃 正 稱 與之同 雖 也 過,而 桓 以 世之讎也。 其 小信也。 《後 功。 圖 事,輔之以争國,非義也。 Ħ 奪 ,死,可 後功,亦可 "「桓公,兄也。 其國 糾 漢書》引此 若 之死 如 使 唐之王珪、魏徵、不死 害義之甚,啓 而 也 若計 經, 桓 殺之,則管仲 實 ; 弟 也。 縊也。 當。 知 其後 文,莫字上有 而 輔 故 糾兄,管仲 仲 之 子糾,弟也 功 聖人不 莫之知 争 始 而 萬 爲 與 與 之與 世 不義 之同 其 桓公殺 反 責 人字。 事 桓 覆 所 人不 其 建成之 不不 將 謀, 桓, 不 輔 仲 死 忠 聖 口 者 遂 之 自 私 知 而

不以相 人獨稱其功。 何足贖哉?」愚謂管仲有功 難 ,而從太宗,可謂 掩可也 王、魏先有罪 害於義矣。 而後 而 無 後 有 罪 雖 -,故聖 功, 有 功, 則

○公叔文子之臣大夫僎,與文子同升諸公。

公朝之臣也。 | 一臣,家臣。公,公朝。謂薦之與己同進爲 |

て計,質型可な五、引。 なまで 三百子聞之曰:「可以爲文矣。」

公叔文子、孔文子之文,則取一事而言。 臣之賤而引之使與己並,有三善焉:知 之義,主於順理 成章也。 薦之爲大夫,順理也。 民爵位曰文者。胡氏曰:「其才德足以爲大夫,而 文者,順理而成章之謂。 也,忘己,二也,事君,三也。」輔氏曰: 彼錫民爵位,特其迹耳。]〇洪氏 而 成章。 以 家臣之賤 文王之文,則指 諡法亦有所謂 而 與 八爲同 雖聖人與人爲 其 全 曰 列 體 無 而 慊 「家 文 言 焉 錫

> 矣。安得不謂之文哉?」 君,忠也,具是三者,則 善之意,然亦非無 事實 者。 於此一 知 人,智 事 理 順 也; 章 成而 忘己,公也 粲 然可 觀 事

奚而不喪?」夫,音扶。喪,去聲。○子言衛靈公之無道也,康子曰:「夫如是,

喪,失位也。

孔子曰:「仲叔圉治賓客,祝鮀治宗廟,王孫 賈治軍旅。 曰:『無競維人,四方其訓之。』」 有道之君,能 喪也,而能用此三人,猶足以 以盡其所長耳。□○尹氏曰:「衛靈公之無道宜 才。 仲叔 善佞,治世之罪人也,然事神治軍,各有一長,而用人得 鮀,則以 必賢,而其才可用。靈公用之,又各當其 胡氏曰:「圉,即敏學好 圉,即孔文子也。 佞而免於今之世者。 夫如 用天下之賢 是,奚其喪?」 如圉幾 問者。 三人皆衛臣, 才者乎? 矣,賈之竊權、 保其國 賈,則問奥 而況 竈 雖 詩 鮀之 未

猶請哀公討之。

〇子曰:「其言之不怍,則爲之也難。」

大言不慙,則無必爲之志,而不自度其能

否矣。欲踐其言,豈不難哉?

○陳成子弑簡公。

成子,齊大夫,名恒。簡公,齊君,名壬。

孔子沐浴而朝,告於哀公曰:「陳恒弑其君,事在《春秋》哀公十四年。

請討之。」朝,音朝

弑其君,人倫之大變,天理所不容,人人得 下之事可以次第而舉,是豈可不以 事一正,亂臣賊子無所容迹,三綱可整,九法可序,而天 其事 而 浴,則齋戒可知。 是時孔子致仕居魯,沐浴齋戒以告君,重 孔子因陳恒之事 誅之, 況鄰國乎? 而不敢忽也。 而 古人臨大事必致敬如此。」〇又曰 正討賊之舉,此天下之大義也。 輔氏曰:「齋戒必沐浴,此言沐 故夫子雖已告老,而 爲重而忽之乎?」臣 斯

公曰:「告夫三子。」夫,音扶,下「告夫」同

專,故使孔子告之。 三子,三家也。時政在三家,哀公不得自

曰『告夫三子』者。」孔子曰:「以吾從大夫之後,不敢不告也。

君

命三子,而使我告之邪?必討。大夫謀國,義所當告。君乃不能自孔子出而自言如此。意謂弑君之賊,法所

之三子告,不可。孔子曰:「以吾從大夫之

後,不敢不告也。」

三子而以大義韶之耳,理明義正,雖或不欲,而孰敢違之夫子復以此應之,其所以警之者深矣。或夫子復以此應之,其所以警之者深矣。或夫子復以此應之,其所以警之者深矣。或夫子復以此應之,其所以警之者深矣。或以君命往告,而三子魯之彊臣,素有無君以君命往告,而三子魯之彊臣,素有無君以君命往告,而三子魯之彊臣,素有無君以君命往告,而三子魯之彊臣,素有無君

成哉? 其萬一之或從也。 哉 ? 矣,因是足以正之,周室其復興乎? 計魯人之衆寡 罪,上告天子,下告方伯,而率 克也。」此 日 恒以警三子耳。聖人之心術,不如此枉曲。」 〇程子 源,知聖人之言可以警三子無君之心,非是聖人托討 明從違 不欲討之必矣,是則不唯名義之不正 決於三子,而不決於公也。 民之不予者半。 而 力不以義也」。 「若孔子之志,必將正名其 夫子初告時,真箇是欲討陳恒,未有此意。 「不敢以已,其所以警夫三子者亦深矣。」○《語録》曰 :「左氏記孔子之言曰: 至於所以 今無成 在彼,雖不敢必,而君臣大倫所繫之重,雖欲不告 然夫子以君命之重也,故不得已而 非孔子之言。」誠若此言,是「以 命,而 而三子果以爲不可 反使孔子往 勝齊者,孔子之餘事 哉?」當是時,天下之亂 以魯之衆,加齊之半,可 況魯之三家,即 而告之,則 陳 而 ,則復正言之,以 事 恒 與 是可 齊之陳氏,其 亦豈 後人自 弑 往焉,尚 或 也, 豈 其 否之權 可得 魯之 以 君, 流派 討 極 陳 冀 而

問: 浪戰也。 當世本無此法而言爾。 告王濬,以爲弑 弑君者,人人得討之,如漢所謂天下共擊之者。 何邪?」曰:「考之《春秋》,先王之時,疑 氏門人記其師説,又不能盡其意之曲折,所以啓讀 記,蓋當世傳 子,下告方伯,而舉天下之兵以誅之也。 君臣 得而討之。 疑耳。」胡氏曰:「《 齊、魯之强弱,而以天下之義,爲一國之私 天下之賊,彼雖衆强,亦將奚以爲哉? 而 之疆弱,而獨以大義驅之邪?」曰: 義,以見弑逆之大惡,天下所不容,人人得誅,況 矣,然其所謂「必有處置,謀而後行」者,則亦非不量 左氏所記爲非夫子之言,然則夫子之戰,將不復 何可以不討之? 「程子以爲必告之天子,而胡氏乃有先發後 ,終不從之,可 但 其意以 聞之謬,以衆人之腹爲聖人之心者。 君 孔子此舉,先發後 之賊 爲夫子之告魯君,又當明 而意其爲計,則必 春秋》之法,弑君之賊,人 ,爲惡尤大,當不拘常制 然事非一 勝 惜 哉 概,告與不告,又在 「程子之言,固 一請其 固不當區 必 以天下之兵,計 聞 或 自有 問 也。 君 可 君 以 也。」或 聞之説 此 晉李毅 左 臣 較 上 品 在 程 法,凡 則以 者之 一之大 氏 其 而 子 鄰 力 所 或 程 天 力 以 是

罪,使 則 使其 至乎 時 力又足以制之, 也 義之如. 任 , 則 地之相 迫 其事者,亦 **と彼得** 告之而 遽 何。 以 而 去也 植 俟 得 使 命以 無以免乎《春秋》之責矣。」 其 而乃區區 以 遠,其 其 根 告 地近於天子,而 行,甚則或不俟 固 也,其力之不 事 其 馬徇 機 黨 之來 或或 請 遂奔逸 也 命之小節,忘逆賊之大 ·足以 不可 可 命 以 而 敵, 告也,其事之未 而 以 遂 不可 少 而 行,皆 /緩,而 不得 以 復得 可 不 吾 也 之 告

諍

犯,謂 子路問 言 勝 矣。」〇又曰: 禍 不可行,若行必有大禍。 欺 以 子 犯,如三諫不聽之類,諫便是犯。]○范氏 於說得太逼 ,恐未免於欺也。」○黄氏曰: ,則近於欺矣。 君者?」曰: 路之所 先 隱 勿欺 謂 犯 事 之犯。 顔 一,則 Ž 難 而 諫 以 近乎欺 『子路性勇,凡言於人君, 後 也 要之,其實雖不失爲愛君,而 争。 欺與犯,正 使門人爲臣 前 犯 子 也 日 君。 《語 以 夫 驪 一。」《語録 "「勿欺也,而犯之。」 不 録》曰: 唐 相反。」〇輔氏 欺 Ш 人諫敬宗遊 一事觀之,子路之好 「僞言不直,謂之欺 固 爲 $\stackrel{>}{\exists}$ 是 「犯只是有犯無隱 難 不可 「問:「子路豈 便要他聽,或 行,以 驪 曰:「犯 EI: 故夫子 Ш 其 犯 謂 爲 言 顔 勇 則 有 驪 教 非 諫 直 必 欺 大 是 之 Ш 至

> 敢知。」 之非 得已 主。 曰『吾當養吾之誠意以潛化而嘿移之』,是又子路之所不 諛從順 義之氣不勝乎權勢之威,天理 犯,此如醫之治病,因 者猶有未加意者焉 喪於己。 也所以爲私,其直也反所以爲曲 譽惡其聲之意未能 也。 固 使吾 而不思正之,從君於昬,陷君於惡 而犯之,則庶其 非異懦阿 若夫職有言之責,平日之學問 ,回互隱伏,見其爲政之失而不思救之,知其用 子路之剛 心 於忠敬,常 諛者之所能 使之盡 蓋 故 能 其證之有不足,而 不難 大 感動。 恐其 | 其問 絶, 於犯 也,然 之微反 事 而 若 君 也, 忠敬 君 乃 有 非 事君之義,要以 特 以 纖 而 而 不加,性情 屈乎 犯 有 豪之失,或 反己 無益 而 教 投之以 所未 顔 以 方 利 於君 自盡之道 爲 先 且立言於人 至, 事, 欲之熾 勿 所 不治, ,納交要 忠敬 欺 至於 當 耐 則 用 而 其 徒 。 四 道 意 公 不 之 後 有 爲

劑

)子曰:「君子上達,小人下達。」 欲 君子循天理, 做日進乎高 ,故日究乎汙下。 《文集》曰 明, 凡 百事 小 人徇 上皆有達

0 循 原誤 作「反」,今據四 庫本改 愈崇,究則沈而愈卑。」 者,耳目口鼻之好是也。 處,惟 貪濁之地,則汙矣,益流於苟賤之域,則下矣。 自累,則高矣,不以一豪私意自蔽,則明矣。 義禮智之常也。 具,人欲或得以奪之,故有待於反之也。 達下達之效也。 其失,少間救得過失越大,無不是如此。」○胡氏曰: 錯 初間只是差些子,少間究竟將去,越見差得多。 淪似一日。J〇又曰: 天理,❶徇人欲,上達下達之原也。 道理。」○《語録》曰:「君子一日長進似一日,小人一日沉 一件事,説錯 君子就 中得 一句話,不肯當下覺悟便改,却只管去救 能全乎仁義禮智之常,而不以一豪私欲 天道流行,付與萬物,人之生也,萬理皆 箇 「究者,究竟之義,言究竟至於極也 高明底道理,小人就中得箇汙 惟徇乎耳目口鼻之好,益趨於 進高明,究汙下,上 所謂天理者,仁 所謂 進則升而 今人做 人欲 下底 「循

〇子曰:「古之學者爲己,今之學者爲人。」

爲,去聲

釐之間。唯欲得之於己,則不必見知於人,纔欲見知於見知於人也。」輔氏曰:「爲己爲人之學,其差只在豪程子曰:「爲己,欲得之於己也。爲人,欲

自身己事。」 言之切而要者。 道自家也曾理會來。 箇 别箇路頭,要緊是爲己爲人之際。 乎其不昧於所從矣。《語録》曰:「今學者且 者用心得失之際,其説多矣,然未有 爲那人不得,末後連己也喪了。」愚案:聖賢 真箇要爲人,然不曾先去自家身己上做得 是好底爲人。前爲人只是欲見知於人而已,後爲人却 喪口。《語録》曰:「程子兩段,前段是低底爲人,後段 其終至於成物。 人者,輕浮淺露。] 〇程子曰:「古之學者爲己, 人,則不必得之於己。 物事,欲自家理會得,不是且恁地理會做好 這假饒理會得十分是當,也都 今之學者爲人,其終至於 欲得於己者,收斂篤實,欲 於此明 辨而 爲己者直拔要理 日省之,則 功失,非 看,教 見知於 論 如 不關 會 要 學 庶 此 分 這 是

蘧伯玉,衛大夫,名瑗。孔子居衛,嘗主於〕蘧伯玉使人於孔子。使,去聲,下同。

其家。既而反魯,故伯玉使人來也。

曰:「使乎! 使乎!」曰:「夫子欲寡其過而未能也。」使者出。子孔子與之坐而問焉,曰:「夫子何爲?」對

年六 五十 外者言,而於伯玉之心克治於内者告,且曰欲而 玉也。 I. 之意,亦可謂知德而能言矣。」案莊周稱「伯玉行年 獨其言謙抑卑下,而又深有得於聖賢爲己之學常如不及 乎以重美之。 子之心,而善於詞令者矣。 自卑約,而 克己,常若不及之意可見矣。使者之言愈 與之坐,敬其主 夫,莊子之說自有過當處。」蓋其進德之功,老而 滯。」〇又曰: 十而六 而 言其但欲寡過 知 四 其主之賢益彰,亦可謂 十化。」《語録》曰"「化只是消 十九年之非」。 「此句亦説得不切實,伯玉却是箇向裏做 輔氏曰:「使者不以伯玉之德著見於 以 及其使也。 而 猶未能 又曰:「伯玉行 故夫子再 n, 則其 夫子,指伯 深 未能,不 融了 言使 八省身 知 君 無

者知之,而夫子亦信之矣。不倦。是以踐履篤實,光輝宣著,不唯使

〇子曰:「不在其位,不謀其政。」

重出。

○曾子曰:「君子思不

出其位。」

○子曰:「君子恥其言而過其行。」行,去聲 其位,而君臣、上下、大小,皆得其職 其所,而天下之理得矣。 爲可證前說,故併記于此。」 ○ 范氏曰:「物各 位」,則泛言物所當止之處耳。 不謀其政』,專指仕 因上章之語而類記之也。輔氏曰: 『不在其位 此《艮卦》之象辭 者職位而言,若艮象所謂 也。 曾子蓋嘗稱之,記者 曾子蓋嘗稱之,而記者以 故君子所思不 『思不出 也。 出 止 其

故以辭言之,諸説皆以爲一事,謂恥其言之過於行也,於之義,不可謂之不敢盡,但其意如是過之義,則爲有餘。恥者,不敢盡之意。。過者,欲有餘之辭。恥者,不敢盡之意。過者,欲有餘之辭。

義固通,但須易「而」爲「之」字,乃可循言求義。 必如《集

註》釋爲兩事,斯得夫子立言之意。」

憂,知者不惑,勇者不懼。」知,去聲。 〇子曰:「君子道者三,我無能焉:仁者不

自責以勉人也。胡氏曰:「聖人自以爲無能,則學

者當知於此致謹也。」

子貢曰:「夫子自道也。」

之心也。」〇尹氏曰:「成德以仁爲先,進學以自言,則如此,由他人觀之,則不然,蓋聖人未嘗有自足道,言也。 自道,猶云謙辭。胡氏曰:「在夫子

此。」胡氏曰:「爲學之序,以知爲先,若德之成,則仁又知爲先。故夫子之言,其序有不同者以

爲百行之首。」

不暇。」夫,音扶。 ○子貢方人。子曰:「賜也賢乎哉? 夫我則

短長,雖亦窮理之事,然專務爲此,則心馳方,比也。乎哉,疑辭。比方人物而較其

○子曰:「不患人之不己知,患其不能也。」 故不一 矣。 多同。 欲其反而求取知之實也,此 凡章指同而文不異者,一言而重出 其丁寧之意亦可見矣。 文皆有異。 小異者,屢言而各出 人,辭不迫切 於外,而所 人發處渾涵詳密,自然如此,蓋非有意爲之也。」 詞,復自貶以 蓋失於務外,爲學之通患,聖人每欲其反己以自力, 《學而》篇則欲其反而知人之賢否也,《里仁》 言而已也。」 以 則聖人於 而 深抑之。 自治者疎矣。 意已獨至如此。」輔 章與 也。 此 ○謝 胡氏曰: 《衛靈公》篇同 此章 事,蓋 氏曰: 故襃之而 「此章與前後篇 凡 四見,而 「聖人責 屢言之, 氏 而 也。 E : 文則 疑 》篇 文 其 則

是賢乎!」 《子曰:「不逆詐,不億不信。抑亦先覺者

詐,謂人欺己。不信,謂人疑己。胡氏曰:逆,未至而迎之也。億,未見而意之也。

蓋推 逆 與 而 介順 爲 對 蓋 溯 而 Ŀ 之,故以 爲 未 至。 億 以 意 爲 至 文,

疑 而 也。」 逆遡 抑, 其欺 度之,故以 也。 反 語 億、不信,雖人之疑我者未見,而 爲未見。 辭。 《語 逆、 録》曰:「略 詐, 雖人之欺 反上文之意。」 我 者未 億度其

乃爲 言 雖 賢 不 逆不 也 語 億 録 而 Ĕ: 於 人之情 「雖是「不逆許,不億不信」, 僞 自 然 先 覺

度之。 此 自 裏便要先覺。 家却 章固 須要先覺 在 先覺,却是他詐 是 要 一這裏做什麽? 人 方是賢。 不得 若是 在 先 自 蓋逆許,億不信,是 去 與 家 一逆度,亦是要人自著 理 八不信 面 一會甚 前 底 詐與 事? 情 態已 不信 便是 露見 纔見那 却 唇 昧 都 此 了,自家 一精采 底相 不 人便 覺 看 時 似 這 逆

有 方 得。」 誠 而 不 楊 明 氏 者。 日 故雖 君子 不 逆詐、不億不信 於誠 而 已,然未

所 而 图 常 焉 先 斯 覺 也。 亦 不 若 ·足觀 夫 不逆 也 己。」《語 不 億 録 而 $\stackrel{>}{\exists}$ 卒 爲 「楊氏誠 小人

爲 覺也後矣。 蓋此章於日用間 便要如此

則

明矣之説大了,與本文自

不相干。

如

説

待

誠

而

明

其

微 生 畝 謂 孔 子曰:「丘 何爲是栖 栖 者 與?

> 無 :乃爲! 佞乎 ?」與,平 聲

謂: 微 倨 生 如 蓋 鳥之栖 姓 有 娲 木 畝, 德 耐 不去。 而 名 隱 也 爲 者 佞,言其 畝 栖 名呼夫 栖 務 依 子 爲 依 而 口 巾 給 爵辛 以 甚 愚

悦 人也

孔子曰:「非 決。」〇 高 過。 氏曰: 疾,惡 達尊,禮恭 者 聖人只在中道上行。 惑 「爲佞以説人者,失之不及。 胡 而 也。 氏 難 티 : 故 敢爲佞也,疾固 而 古 微生之言 「不恭則 言直 執 如 然以大視小者明而易,自 失 此 而 雖 長 倨 其 不 幼之序,不直 而 通 也。 疑, 夫子 警之亦深矣。 執 也。 而 不通者,失之 聖人之於 之言 則 失 雖

〇子曰: 驥不稱 其力,稱 其 德 也

> 義 恭

玾 而

之正。」

之, 無其力,任 驥,善 者,習熟而 故馬 之有 馬之名。 易 重 控馭 致 力者 遠 也。 非 非 示 德, 足 力 良者 不 言 可 謂 必 然 順 調 言 服 説 其 良 而 銜 調 也。 不 泛駕 良 踶 也。」 齧 胡 亦 也 氏 自 E 其 驥 尹 力 未 氏 爲 嘗 調

Ti. 九七

下

闚

才,而 德, 之,而惟理是 言哉? 主也。」 然不循繩檢,逸出於規矩之外者,亦才也。 固不若根于理者之爲粹也。]○胡氏曰: 然,才出 日 則 驥 所以見於人不可無才,凡建功立業,皆才爲之, 「於氣,德根於理,二者雖不可 亦奚足尚 言 雖 其 循,則才皆德之用。 德。 有 力, 人亦 哉?」輔氏曰: 其 不 稱 可 在 徒恃其才, 德 故觀 闕 「才與德皆本於天 人有 人者,不 一,然出於氣者 「聖人豈徒以馬 而 苟有德以將 當 才 以 當 而 德 言 爲 無 其

○或曰:「以德報怨,何如?」

或人所稱,今見《老子》書。

德,謂恩惠也。

子曰:「何以報德?

於我者,又將何以報之乎? 言於其所怨,既以德報之矣,則人之有德

以直報怨,以德報德。」

所 而不以 於其所怨者 一豪之私參焉,是之謂直。」於其所德者 也。 輔氏曰 ,愛憎取 「循理爲直 舍,一 以 ,愛憎取舍 至 公而 順乎 無 私 理 則

也,是豈不反逆人情、悖天理之甚也哉?」〇永嘉陳氏曰: 以 但 若等而上之,每欲 德,是則誠若忠 怨爲薄,而 不報者,而伸夫忠臣孝子之心耳。 人忘怨而没其報復之名者,亦以容夫君父之讎, \Box 直之不同,故聖人之教,使人『以直報怨,以 之不能已也。 哉?」曰: 問:「以德報怨,亦 必 止,一視夫理之當然,而 直云者,不以私害公,不以曲勝直,當 有德,人情之所不能忘, 謂厚矣。 有意之私,而怨德之報,皆不得其平也。 三如所 報怨,而豈害其爲公平而忠厚哉 報怨者 以 德報之,不 以 報怨者而已,則是所以 反 「是亦私意之所爲,而非天理之正也。 必 然以聖人之言觀之,則見其出 厚 矯 顧德無大小,皆所當報,而怨則有公私 於德 且 焉以 益 厚 可 致其厚, 避其 矣,而於所德,又將 可忘也。 且. 謂忠且厚矣,而夫子不之許, 不以己之私 而所以報之,各有所當, 雖 名,故於其 君 則以 父之 報德者,僅適其平,而 德 讎 若或人之言,則 或人之言, 之上 意 所怨 報則 亦 然而聖人終不 加 將 何 無 焉 報,不當報 德報 以報 而 有 復 爾。 反 時 可 德」。 報 夫有 而 之邪? 有 亦 是 加 之以 忘之 以 則 不 天 於 或 口 若 得 使 雖 則 以 理 何

報 義行於上,而私恩伸於下,於德亦未嘗失其報 賢 肖 中 約 未嘗汲汲以 有 直 知 者之報各得 以 以 (邪,吾 邪 報,德 罪 旨 當廢則 私 前 ,則又未嘗 德報 德報怨之言,死定偏滯在 心。 75,則 邪 意, 而 惟理之當然,而 其指 却 総之。 則以 固 隨 怨,是爲嫌 以 反覆 薦之以爲報,若不肖邪,吾 其 廢 妙 圖 直 霏 德 却 無 意 報怨,初 報 無窮。 設 之如何 報,二者各得其平, 其 是公心。」必 也。 窮 曲 若 不 所。 故 不肖者,後復 ,學者所宜 折 厚 吾無容私焉. 如 饒 而公斷之。 且如此人,舊於吾有怨,今適 無怨惡心,只 反復。 此 也。 他 然怨有不 人舊於吾有德,今 如 着 邊。 此章之言, 夫 7,不是 果賢邪,亦薦之, 如造化之簡易 是之謂 能 詳 極是明 若聖人之言,怨則 子之言, 看 改而 道 則 玩 循 讎 懽 理 理 也。 直。 賢, 白簡 其 如 而 IE. 輕 適 也 大意思 何, 則吾 明 而於 德 陳氏 然 重 相 約, 當舉 白 無 後 值 使 果不 又薦 相 怨 而 \Box 易 簡 不 公 果 值 以 則 却 古 其

子曰:「莫我 夫子自嘆,以 知 發子貢之問 也夫!」夫,音扶 也。

子貢 天,不尤人。下學而上達。 理 己。 以惑人之耳目而以爲能 德性命之理 關耳。」〇黄 與天爲一 天獨 及知 又何怨尤之有? 於天人也。 常人之情,不得所 於人而不駭 知 自 但 不得於天而 窮 也。 脩 知下學 其下學人事也,則又不求之遠而求之近。 知之?」曰: 通榮辱,用舍予奪,皆理之所不能無者,順而受之, ,循序漸 而天獨知 焉,則又有非人之所及知 然深 何 也。 下學者 氏 於俗矣,人亦 而 爲 曰 : 味 常人之情,置事於淺近,索理於渺茫,足 不怨 自 其 人事之中,便是天理,又何必捨人事而 欲 「其不怨不尤 進 之之妙。 其 , 窮 然 則 莫 爾 語 學 怨 通 上達。 天,不 知子 ,此所以人知之也。 天而 榮辱 意 日 何 無 用 自 以 則 常行之事 尤人,蓋揚己之善 天 或問: 愐 也?」子曰 合於人而不尤人, 也, 知我者其天乎 此 甚 知之邪? 見 也。 者,而 則 旧 異 其 「何以人莫之知而 不責之人而 用 自言 於 中 也。 舍予 獨 自 人 及 於天理 聖人渾 上 其反 奪,人 其 此 有 而 達 E. 而 古 人不 不 致 者 :然天 歸 爲 無與 責 達 其 己 也 恕 道 之 過 相 而

:

求之於渺 ,而聖 人與之 冥 哉 無間 如 是 如 則 此 泊 所以 然若 不見 人不 儿其所長 知 而 天知 者 也。」 然 天 蓋 理

流

行

者既 只知 在 將 便自住了。 日; 以 在 這 發之。 理 孔 盡 般 「子貢若有以達之,必須 得箇頭 當 門, 話 ,則天人無 如 與子貢説 唯 耳。1〇程子曰: 聖門自顏、曾以下,惟子貢儘曉得,聖 惜乎 此。」輔氏曰: 子 責 有不應者。 其 之智 他若未曉,聖人豈肯説與他, 猶 有 不有説。 幾 「己與天人只是 聖 所 足 「不怨天,不尤人 一人與 未 以 惜乎見夫子 達 理 及 爲 也 此 ! 理,在 自 故 如 土人多是 然 此 語 特 無 但 説 録 語 所 己 他

怨尤。」又曰: 「下學上達, 意在言表。」《語録

日: 言表了。」又曰:「學者須守下學上達之語 不得。」〇又曰: 如下學只是下學,如何便會上達? 「此亦無可 説,説那下學上達,便是 自是言 語 意在 戎 形 容

市

然習 爲下學人事 學而上達者,言始也 而 不 察 蓋 便 ~,則 是 凡 上 下 達 下學,而 亦 學 天 不 理 人 能 卒之上達云爾。 何 事 以 邪? 便 上達 是 日 矣。 上 學 達 或問: 今程 者學夫人 天 子 理 F 以

> 中見得 者也。 非子細省察,則所謂理者,何從而見之?」 學、上達,只要於事物上見 馬,非 盡 知之之謂神」。 理 之事,形 兩件,理 所謂學耳。 在事中,事 達 箇理 學 一會得 天理 而下者 ,是事 ,便是上達,如『大而化之之謂聖, 不在 透,厮 而 果能學,安有不 而 然亦不離乎人倫日用之中 何哉?」○《語 也, 通 理外。 其 合只是 而 理 其 即 事 理,使 之理, 夫形 物之中,皆 件。 録 能 邪 而下 則 $\stackrel{>}{\exists}$ 上達 下 正是非 固天之理 學 者 「下學、 者。」〇又曰: 具 是 而 事, 各有 得 ,但 理 其 也,形 Ŀ 恐 聖 其 形 達 人 就 而 而 是 不 雖是 不 那 上 而 理 能 可 物 者 E

日 公伯 : 朝。」朝,音潮 夫子固 寮 愬 「有惑志於公伯寮,吾 子 路 於 季 孫。 子服 力 景 猶 伯 能 以 肆 告, 諸

後於魯矣。」杜註 爲「子服何忌」。 景 弟子,胡氏嘗辨之。 之,則胡氏之説然矣。 公伯寮, 諡 , 伯字, 魯人。 《左傳 魯 云 : 大 愚 今觀夫子『如 何 案: 夫 故 》載吴將囚 景伯名。」 子 集 註 註 服 疏 但 景 何 命何』之語 則景伯單 云魯人。 伯 史 也 記 景 》皆 伯 愚 -名何。 日 案: 以 子 以 公伯 服 孔 常人待 何 氏 而 也 註 寮 以 爲

註云「何忌」,誤矣。夫子,指季孫。言其有疑 | #

於寮之言也。肆,陳尸也。胡氏曰:「大夫以上

於朝,士以下於市。」言欲誅寮。

與? 命也。公伯寮其如命何?」與,平聲。子曰:「道之將行也與? 命也。道之將廢也

寮耳。」
 富田市之何如。今其所以言命者,直以曉景伯,警伯不問命之何如。今其所以言命者,直以曉景伯,等所當如之何。」愚謂:言此以曉景伯,安子路,而如之何。」愚謂:言此以曉景伯,安子路,而如之何。」愚謂:言此以曉景伯,安子路,而如之何。」愚謂:言此以曉景伯,安子路,而如之何。」愚謂:言此以曉景伯,安子路,而如之何如。今其所以言命者,直以曉景伯,警兵。

天下無道而隱,若伯夷、太公是也。○子曰:「賢者辟世,辟,去聲,下同。

其次辟地,

去亂國,適治邦。胡氏曰:「若夫子周游列國,不合

則去是也。」

其次辟色,

禮貌衰而去。胡氏曰:「若夫子因衛靈公目視蜚鴈

而去是也。」

其次辟言。」

乎? 蜚鴈,則辟色矣。 然非有優劣也,所遇不同 也。」〇程子曰:「四者雖以大小次第言之, 作,乃至發見於顏色而後辟之邪? 固非有優劣,然賢者之處世,豈不能超然高舉,見幾 有違言而後去也。胡氏曰:「若夫子因問陳而行是 端,隨其所居之位,而量其所處之宜可也。 此所以不可以優劣言也。」 問 陳,則辟言 矣。 爾。」黄氏曰: 티 : 豈夫子於此 出處之義,自 衛靈 「四者 公顧 爲

〇子曰:「作者七人矣。」

與?」與,平聲 自 宿 孔 於 氏。 石 門。 Е 是 晨 門 知 曰 : 其 不 奚自?」子 可 而 爲 之者 路

譏 胡 無所不可 其才力有限 之時也。」輔氏曰: 抱 石 孔子。 關 氏 門,地名。 者也。 日 也。」 也。 然不知聖人之視天下,無不可 晨門知世之不可而不爲 聖人之視天下,則無不可爲之時 自, 晨門,掌晨啟門,蓋賢人隱於 從 「賢者之視天下,則有不可爲之時 也, 問 其 何 所 從 ,故以 來 其道 也 爲 是

曰:「有 子 擊磬於 心哉 衛 擊 有 , 磬 乎 荷 費 ! 」荷,去聲 而 過 孔氏 之門 者

曰: 徹,不爲事物所汩亂,可謂賢於人一等矣。」 者,亦隱 磬,樂器。 聞其 「荷費聞 磬聲 士也。 磬 荷,擔也。 音 而 愐 能 知之,則亦 聖人之心未嘗忘天下, 知夫子之心,其存養 蕢,草器也。 非 常 人矣。 純 此荷 古 精 輔氏 神 普 此 昭

而 既 己,音紀,餘音以。 已矣。 而 日 : 深 鄙 則 哉 揭,起例反 厲 淺 硜 硜 則 乎 揭 ! 硜,苦耕反。 莫己 知 也 莫己之 斯

深淺而必欲渡也。 葉》之詩也。 攝 此兩句,以譏夫子人不知己而不止。」 能適淺深之宜。 硜硜,石聲,亦 衣 涉 水日 揭。 譏 《匏有苦葉》之詩意 專 蔡氏曰:「深則厲, 孔子人不知己而 確之意。 此 兩 句,《 以 衛 正 衣 風 淺則揭, 如 涉 此 不止,不 水 故 匏有苦 曰 言不問 荷 厲 費

子曰:「果哉! 末之難矣。」

忘世。 果 所難 之知不知而爲作輟哉? 雖未嘗比之以爲 能 心 一日忘也。 同天地,視天下猶 哉, 歎其果 矣。 且言人之出處,若但如此, 輔氏曰 私 於忘世 故聞荷蕢之言,而歎 然 「聖人之於天下,猶天地之於 亦不能忘之以爲公也,夫豈以 且果於忘世決去不反者能之,何 也。 家,中 末, 或 無 猶 也 則 其果於 萬物 亦 無

與哉。 之心終不 難之有? 能 若夫聖人之出 濟 世 之用 處因 其 時卷舒,與 出 無 窮, 此 道 消 贵 息, 荷 費 而憂 所 能 世

言。』何謂也?」
〇子張曰:「《書》云:『高宗諒陰,三年不

高宗,商王武丁也。諒陰,天子居喪之名如此,其 意作梁闈,言居倚廬。大抵古者天子居喪之名如此,其 信或謂信任冢宰,或謂信能默而不言,爲説不同。或又 信或謂信任冢宰,或謂信能默而不言,爲説不同。或又 言或謂信任冢宰,或問:「諒陰。」曰:「諒,信也。陰,默也。 (

總己以聽於冢宰三年。」 一子曰:「何必高宗,古之人皆然。君薨,百官

於父母無以異者。 年不言,則臣下無 於庶人。● 子張 三年不言也。 冢宰,大宰也。 言君薨,則諸侯亦然。總己,謂總攝己職。 〇胡 非 百官聽於冢宰,故君 疑 所 故 氏 此也, 殆以 稟令,禍 曰:「位有貴賤,而 三年之喪,自天子達 亂 或 爲 由 人君 得 以 以 起 生

也。孔子告以聽於冢宰,則禍亂非所

斯而已乎?」曰:「脩己以安人。」曰:「如 姓,堯舜其猶病諸!」 而已乎?」曰:「脩己以安百姓。 ○子曰:「上好禮,則民易使也。」好、易,皆 ○子路問君子。子曰:「脩己以敬。」曰:「如 觀感於下者,亦皆安己之分,聽上之命而易使。 謝氏曰:「禮達 「達,謂達於下也。 上好禮,則 而分定,故民易使。」 品 節 分 明 脩己以安百 而誠 意退 輔 氏 逐,故 去聲。 日 斯

雖至約,而所以齊家、治國、平天下之本,舉積諸此。子之,故再以其充積之盛,自然及物者告之,故再以其充積之盛,自然及物者告之,故再以其充積之盛,自然及物者告之,

■ 「於庶人」,原脱,今據四庫本補。

❷ 「人」,原脱,今據四庫本補。

於虚遠 老老幼 子 若 不 雖 己以 路不喻 子 脩己以敬之外,又 功效之自 自然 日 充積之盛者 由 若四端之善,始 得其安也,是皆 加 格 ,則是充積之盛在其中矣。 得 曰 日 極 於 「此又指聖人之心,無有窮已處,以警子路 物 敬 ,各當其理 吾治 :「君子脩 其 治 此 幼 致 而極 而 而 知,以 「然及物者爲然耳。」○黄氏曰: 所 由 然豈 不求之切 少其言,於是 其 而 已足, 哉? 己及物 以 至,則心平 言之也。」 然始 至於正身及物,有待夫節 本於脩己以敬之一言。 ,是以其 抑 能 有 子 而 充積 達 近 則 己以 故 必 路, 而 也。 非 待夫舉 治之所及 告以 堯 知 堯 - 氣和 可 之功 擴 所 安百 舜 舜 蓋 使 四 安人安百 静 特言其功效之遠 以 也。 由 斯 猶 聖 海 反 猶 敬而安 心 爲 (者,群 虚 姓,篤 以 之 人之心 求 病,言不 脩 以 動 聖人矣。 安 内 己 加 諸 直 姓 「充積之盛 以 節推之也; 人安百姓 然 黎 諸彼 百 . ; 之説 近 而 敬, 所謂 百姓 恭 無窮 姓 所 也,亦 也 ,使毋 而 可 無 而 施 爲 敬者,非 , 莫不各 則 可 蓋 爲 以 天下 〇程 徒鶩 輔 指夫 爲 非 謂 非若 非 無 病 言 物 世 有 氏 謂 其 若 君 不 脩

宜 ? 理,達 體信是 非 티 : 體信 饗帝 聰 便昬塞了。 平。 於心,心既 君 推之天下而 所。二〇又曰: 開明。」〇又曰: 以感發而興起之。」〇又曰:「信只是實 自 達順之道,聰明 聰 容易道 看之,此心纔不專静 明 育 「敬則自是聰 達 所以 亂 10」《語 睿 順即自 唯 順。 致中底意思,達順是致 知 色諛悦之容交蔽而莫辨,何 氣無不 得 上下 皆 此 無 無所不 敬則虚静,自然通達。」〇又曰 聰明睿知 ,是他曾因此 録 由 心常要肅然虚明 主 此發出。 體 是 $\stackrel{>}{\mathbb{H}}$ 「體信是真實無妄,達 則 明, 出 信 和, 通 於 應 是實體此道 人之所以 是 睿 也。」〇又曰: 皆 惟 事 則 體 恭 而 自 由此 知皆 接 出些 信達 上下一於恭敬,這 姦聲佞辭 誠 敬 几 物 耐 一聰明 ,然後物不能蔽。」〇 出者,言能 之間 和底 不聰 順,即是主忠行 靈 明 由 則 於身,達 意 畢 睿知來。」○愚 不明 意思,言 天 是出,以 「體信 其 以 雜 思。」〇又曰 至 順是 進 爲 地 何 理 矣。 恭 順是 明? 止 而 以 只 自 使 順 却是上之人有 敬,自 一線身心 不 能 「且以一 思 (萬物 盡 察,何 恭 位 只 發 睿智 恕。」 慮 此 此 這 是 敬 而 然心 謂 偂 各 至 此 又 事 體 惰慢 中 和 萬 皆 國之 則 得 以 日 誠 得 節 氣 天 信 天 物 語 其 又 道 出 爲 其 便 能

地位,萬物育,與安百姓,只是 事,若陰陽不和 ,五穀不

熟,百姓何由而安?

焉 ,老而不死,是爲賊 原壤夷俟。 子曰:「幼而不孫弟,長而無述 !以以 杖叩 其 脛。 孫、弟,

並去聲。長,上聲。 叩,音口。脛,其定反。

敗常 愚謂: 孔子既責之,而 也。 也。 自幼至長,無 氏之流,自放於禮法之外者。 原壤,孔子之故人。魯人。母死而歌,蓋老 俟,待也。 亂俗 述,猶 鴟鳥始蹲,故或謂之蹲鴟。 '「, 則 稱 也。 一善狀,而久生於世,徒足以 是賊 言見孔子來而蹲踞以待之 因以 賊者,害人之名。以其 而 所曳之杖,微擊其脛, 已矣。 又或謂之鴟夷,夷即 脛,足骨也 夷,蹲踞也。 蹲

若使勿蹲踞然。

闕 黨 童 子 將命。 或問之曰:「益者與?」

與,平聲。

闕 黨、黨名。 童子,未冠者之稱。將命,謂

> 傳賓主之言。 孔子使之傳命以寵異之也。 或人疑此 童子學有進益 故故

也。 子曰:「吾見其居於位 非求益者也,欲速成者也。」 也,見其與先生並行

也。 之,非寵而異之也 觀長少之序,習揖遜之容。 行爲先,而又以躐等爲戒。」故使之給使令之役, 此禮。非能求益,但欲速成爾。 禮,童子當隅坐隨 益則浸長而不知 隨行,不敢並也。」孔子言吾見此童子,不循 ,欲速則亟進而 行。 胡氏曰: 無序。 蓋所以抑而教 聖門之教雖以 「隅坐,無位可 輔氏曰:「求 居

論語卷第七

後學 成德 校訂

論語卷第八

朱子集註 後學趙順孫纂疏

衛靈公第十五

凡四十一章。

則嘗聞之矣,軍旅之事,未之學也。」明日遂衛靈公問陳於孔子。孔子對曰:「俎豆之事,

行。

陳,去聲

宜問也。 之事,故答以未學而去之。」或問: 夫子遽行,何也?」曰: 陳,謂軍 衛靈公,無道之君也,復有 況靈公無道,夫子固知之矣,特以其禮際之善, 師 行伍之列。 「爲國以禮,戰陳之事,非人君 俎 豆,禮器。 志於戰 「靈公問 尹氏 陳 伐 所 而

> 意也。 陳絕糧,從者病,莫能興。 行,而靈公卒,衛國大亂,俎豆之對,其旨遠哉 行,又以禮際之不善而決,不專於問陳 見蜚鴈,仰視之,色不在孔子,孔子遂行。」則是夫子之 行,孰謂其不可留哉? 焉,則其志可 者,亦已詳矣。 庶 而已,猶以俎豆之事告之,則夫子之去蓋亦未有必 **然幾可** 使靈公於此有以發 與言者,是以 知矣,故對以未學而 乃於夫子之言,一無所人,至是 往來於衛,爲日最久,而 故《史記》又云: 悟 於心而 從,去聲 去之。 改事 『明日與孔子語 然不 事 焉,則夫子之 也。 所 徒 而 以 夫子既 啓告 \Box 猶 然之 未 問 陳 之

孔子去衛適陳。興,起也。在陳絶糧,從者病,莫能興。從,其

子固窮,小人窮斯濫矣。」見,賢遍反。 子路愠見曰:「君子亦有窮乎?」子曰:「君

曰 : 何氏 人一時答問之辭,未遽及此。 古 若小人窮則放溢爲非。」程子曰 守其窮。」亦通。 「固守其窮,古人多如此説。 曰: 「濫,溢也。 《語 言君子 録 蓋子路 ĕ ∃ : 但 以 問 方問 上文觀之, 古 有 固 君子 窮 古 窮二義。」 時,不 亦 窮者, 則 有 恐

《集註》以爲皆通,而必以何氏之説爲先也。○愚謂:則何氏之説爲長。就子路言之,則程子之説爲切。故以固字答上面有字,文勢乃相應。』○愚謂:泛言其理,乎,聖人答之曰君子固是有窮時,但不如小人窮則溢爾。

可見也。 所怨 處困而亨,身雖窮而道則 悔,義之安也。 聖人當行而行,無所顧 當行而行,惟理是視者,無所顧慮,不計其後之有無也 "「當行而行,無所顧慮,義之勇也。 悔。 學者一身之進退,能於是而取則焉,則不爲利 於 此聖人之事,學者固宜深味。」〇胡氏 此 可 見,學者宜 通也。 慮。 無所怨悔 處困 處困而亨,無所 深 味之。 ,觀固窮之語 而亨, 輔 E 無 氏

與?」女,音汝。識,音志。與,平聲,下同。〇子曰:「賜也,女以予爲多學而識之者

害所奪、窮達所移矣。」

人屬中之事可見。夫子每有以抑之,無非使之反求其本也,故問以發之。輔氏曰:「子貢以通達之資,聞一七,故問以發之。輔氏曰:「子貢以通達之資,聞一子貢之學,多而能識矣。 夫子欲其知所本

爲疑辭以發之,俟其言以觀其志,然後告之。」者。子貢至此,則真積力久,亦將有得矣。故夫子先

對曰:「然,非與?」

方信而忽疑,蓋其積學功至,而亦將有

得也。

曰:「非也,予一以貫之。」

得。 形, 也。 源頭 也。 不 平日於事上都積累,做得來已周密,皆精察力行過了,只 説 之。』『德輶如毛,毛猶有倫。 語脈是如此。」○謝氏曰:「聖人之道大矣,人 是未透,夫子纔點化,便透。 告子貢,初頭説多學而識之,便是就 能 見第四篇。 聖人多愛與他説話,所以亦告之。」〇又曰:「看上下 匪物物刻 上面流下來,子貢是就下面推上去。」〇又曰: 《語録》曰:「曾子發出忠恕,是就行事上説。 然 編觀 聖人豈 而 盡 而 識,宜 然彼以行言,而 務 雕之也。故曰:『予一以貫 博 者 其 子貢却是資質明敏,能 哉? 以爲『多學而 知上説。 上天之載,無 如天之於衆 此 曾子 以 識之』 知 孔子

淺深 此? 貢終亦 有箇結殺頭,亦見他符驗處。 其 以結前 化,發育萬物,亦是一元之氣流行貫徹,初無二理,末以 所主是忠,發出去無非是恕。」○陳氏曰: 從大本中流 聰,色自然温 則可說; 聲 而識之者,然又自有 亦非不是。 然此須是去涵泳,只恁説過 只是贊其理之密否?』曰: 『唯』。若子貢則先發其疑 (中庸 氣流行,萬物自生自長、自形自色,豈是逐一粧點得 問問 無 聖人只是一箇大本大原裏發出 》語證,乃形容天理自然流行之妙,無雕刻形 **,於此可見。**」《語 臭。」至矣 而 意爾。」尹氏 不能 到一以貫之,則不可説矣。」〇又曰:「天則是 直 出,便 故子貢先曰「然」,又曰 一,貌自然恭,在父子則爲仁,在君臣則爲義。 告之以此,曾子復 如曾子之唯 区成許多 ! | 《語 曰:「孔子之於曾 箇 道理。 一貫底道理。 固是。 録 録 ,亦不濟 ĕ ∃ : 》 日 子貢多是説過 只是這 也。 「曾子與門人之言,便 加 「非與」。 事。 到此 問: ,視自然明,聽自 後告之,而 二子 箇 但 則 「謝氏譬天之造 引 深 多學而 一,便貫 多學而 無可得 學固 子,不 諭 此詩 曉得了 所學之 有當學 識之」, 之 (將去。 識之 説記了。 迹 者,莫 · 待 子 日 即 便 然 如

〇子曰:「由! 見君子。」此與由、賜之見異矣。 間,子路則愠見,子貢則勸夫子少貶,唯顏子 己。」〇自第 也。 由 之道至大,故天下莫能容。 章蓋爲愠見 得於己者。 己百,人十己千之功,未可妄議其涯涘也。」 得而輕自大,非於博學、審問 學之淺深,又可見矣。輔氏曰:「是道之傳,蓋 没收殺。」或曰: 憾焉,則其餘諸子,又可知矣。 其人。聖門諸弟子,唯顏、曾得之,雖子貢之敏 之,而他人不與焉。 曰"「然。」愚案: 夫子之於子貢, 休,更没收殺。 呼 輔氏曰: 子路之名而告之也。 「聖門之學,不以徒知爲尚, 非己有之,不能 大率子貢緣曉得,聖人多與他説 發 「他言性與天道處,却是他 章 至 知德者鮮矣。」鮮,上聲 也 一此,疑 蔡氏曰:「案: 雖然,不容何害? 則 、謹思 學者不可承虚接響,少有 顏、曾以下諸 故夫子既告子路以『固 皆 、明辨、 知其意 德, 夫子阨於陳蔡之 時 之言。 篤 婁 有得 謂 要在實有 則曰「夫子 行, 不容然後 味之實 有 義 處否? 話 子所 理之 以 猶 但 此 發 有 難 都

之,舜之爲治,朝

覲

、巡狩、

封

响

濬川、舉

元凱、誅

四

凶

信,不怒而威,有

不知其

八所以

然者也。」曰:

以

《書》傳

考而

已

爾。」「其爲無爲之道,何

也?

티 :

「若是者,不

言

容。」曰:「純

敬不已,無事

操脩

自外觀之,見其恭己

而

之所見

如

此

而

己。

或問:

「恭

己

爲聖人敬

徳之

者,各隨 理 釋其少貶之疑。 予求爲多學以識之歟? 窮」之説,而 ·其愠見之惑。 有得於己,則死生、禍福、得喪,自不能亂其所守,所以 其 (所蔽 言未竟,復呼子貢 而開 夫子當造 又呼子路告以 發,無以 我只有箇一,自然多貫了,所以 次顛 異 告以二一貫」之説,謂 沛之中,所 「知德者鮮矣」之説 於 洙 泗雍 以教門人弟子 容 講論之素 謂 女以 義

吁

此

其所

以

爲聖人也歟

哉? 恭己正 子曰: 所作爲 無 恭己者,聖人敬德之容。 以任衆職? 爲 而 也。 治者,聖人德盛 無 南 爲 獨 面 而 稱舜者,紹 而 治者,其舜 故尤不 已矣。」與,平聲。夫,音扶 見其 而 既 堯 民 也 無 有 之 化,不待其 與? 後,而 所 爲 之迹也。 爲,則人 夫何 又得 有 爲

> 宴安鴆 後無他事也。 考之,則舜之所以爲治之迹 非 也。J〇胡氏日 君,當無事之時,而 恭己以臨之,是以其 恭己之效也,奈何?」曰: 時之無事 其踐天子位,則《書》之所載,不過命九官十二牧而已,其 無事也 毒, 也。」曰: 此 而 其 其 雖 \Box 所 謂之敬德之容者 《書》之所記,簡古稀闊 無 「若是則 謂 不 爲 治 無 知聖人恭己之道,則 益以 而 事 治者 「因其 者, 其治也,乃 ,皆在攝政二十八載之間,及 久長 乃 ,何邪?」曰: 時 所 耐 由 事之適然也,而 以 不 外 時 爲 替 而 事之適 然亦 禍 也。 知 必 亂 其内也。」 即 怠惰 多 若 足以 然, 事之媒 後 ~書 放肆 世 舜 而 見 又 而

○子張問行。

猶問達之意也

行不之行,去聲。貊,亡百反。 言不忠信,行不篤敬,雖州里行乎哉? 行篤子曰:「言忠信,行篤敬,雖蠻貊之邦行矣!

録》日 之,猶答干 子張意在 「篤 有 得行 重厚 禄 問 深沈之意。」 蠻, 於外,故 達之意 也。 夫子反於 篤,厚 南 蠻 身 也 而 語 北 言

狄。二千五百家爲州。

也。夫然後行。」參、七南反。夫、音扶。立、則見其參於前也,在興、則見其倚於衡

頃 持之於悠久之際而自彊不息,體之於心目之間而未嘗或 勉之於暫而不能常,有人作,而無人輟,則又不可,故必 事,人能如此 不 得理如此,不成是有 見、《文集》曰:「此謂言必欲其忠信,行必欲其篤敬,念 焉之參,言與 念不忘,而有以形於心目之間耳。」〇《語録》曰: 於忠信篤敬念念不忘,隨 其者,指忠信篤 「言忠信,則言有物。 , 夫然後蠻貊可 離 刻離之而不可 於忠 信 則心存而 篤 行 我 敬 一塊物事,光輝 行篤敬,則行有常。 敬 得。 相 不放,何 而 參也。 而 蠻 言。 然後一言一行,自然 貊 往而 參,讀 可 其 衡, 軶 輝 不可 行 地在那裏。」雖 所在,常 也。 皆誠實自 行哉? 如 也 輔 毋 「只是 氏 若 言 往 然或 I脩之 日 : 欲 有 參 其 見

子張書諸紳。

紳,大帶之垂者。書之,欲其不忘也。○

精英。 릲 是學。 不善未嘗不知」,不善處是查滓。 常敬 則一 天地 緣查滓未去,所以 莊敬持養,未能與己合。」〇又曰:「天地同 敬以持養之者也。」〇又曰: 明了,更無查滓。 程子 『克己復禮爲仁』,己是 只争箇做得徹與不徹耳。」〇又曰:「明得盡者,一見便都 始得。」○又曰:「辟如驅辟一般。」○又曰:「只此是學, 做工夫、恰似一隻船,覆在水中,須勇猛著力翻將轉 大抵是要鞭督向裏去。 則見其參於前,在輿 而篤 所謂持養,亦非是作意去穿鑿以求其明,但 ,則久自明 也。」《語録》曰:「鞭辟是洛 可 志 曰:「學要 查滓是私意人欲之未消者。 切問 體 質美者明得盡,查滓便渾 矣。 其次惟 而 其 有 (鞭辟 顔子 次惟 近思; 間 查滓,復禮 隔。 今人皆不是鞕督向 則 是 莊 近 則見其倚 明 莊敬 是 若無查 敬 裏,著己 明 言忠信,行 得 以 得 持養,以 便是 顏子『三月不違仁』,既 盡時,查滓自己化了, 中語,一處說作鞭約 持養之,及其 盡 人與天地本一體,只 淬, 者 天 便與天地 地 於衡; 而 也 消 體處是義理之 裏,皆就 司 仲 去其 篤 른 化, 三号則 敬 處。 只 查 只此 却 可 博 此 外面 是 滓 來 體 至 與 立 學 莊 心 而

物欲間 擦去教 清明 那查滓 未能 有限 心,内外交致,其力必常常操守以涵養之,然後可以致 能行之,而 力之地也。 到後,其至一也。」〇胡氏 莊敬持養之。 滓便渾化却, 而不信 此外 信 隔唇 上處都 ·盡。」○輔氏曰:「自家本自與天地同體 」,皆是有些查滓處。 誠 私 而不習」,是曾子查滓處。 便 明 盡 實做出 蔽,故不能與之爲一。質美,謂氣質之純 未可 與天地 意 得 莊以貌言,敬以心言,内外之符也。 化了。 無 盡 知。 所 查 ,到得那其知既致,其欲不萌處,則 同 容也 | 滓便渾化却者,天資高,則知 若未到此,須當莊敬持 如曾子『爲 體。 E 其 莊敬持養者,莊 只是質美者,也見得 一只 次資質稍下者,則當 此是學,言 人謀 漆雕 而 不 開言『吾 忠 正學者 主 養、旋 與期 唯爲氣 容 透 之即 敬 當用 功夫 且 旋 斯 友 徹 私 主 厚 稟 以 查 磨 之 交

道,如矢。 ││○子曰:「直哉史魚! 邦有道,如矢,邦無│

意之消釋。此專爲學者言,不主乎釋經也。」

尸諫,故夫子稱其直。事見《家語》。或問:也。史魚自以不能進賢退不肖,既死猶以史,官名。魚,衛大夫,名鰌。如矢,言直

無以 伯玉退子瑕。」 以父言告,公曰: 『是寡人之過也。』遂命殯於客位,而 子瑕,史魚諫不從,將卒,命其子曰:『吾生不能 「尸諫之説。」曰 成禮,宜置尸牖下。」其子從之。靈公弔而問之,子 「案《家語》: 衛靈公不用 遽 伯 玉 正 而 君,死 任 彌

可卷而懷之。」
君子哉蘧伯玉! 邦有道,則仕,邦無道,則

「史魚之直、未盡君子之道。 伯玉出處,合於聖人之道,故曰君子。 者,德之一端。 後可免於亂世。若史魚之如矢,則雖欲 之謀,不對 收也。懷,藏 而懷之,有不可得也。」《語録》曰: 向直,便是偏,豈得如蘧伯玉之君子。」○胡氏曰: 而 君子,則成德之名。」 也。 出, 亦其 如於孫林父、甯殖 事也。 若蘧伯玉 「直固是好,然 楊 氏 放弑 直 然

○子曰:「可與言而不與之言,失人,亦不失言。」知,去聲。

以成仁。」○子曰:「志士仁人,無求生以害仁,有殺身

於吾仁矣。 順 惡傷所好之體,義士不以 也?」曰: 矣。 心與理 孟 者,有以義決者。 夫孰得 身雖可 不合於理,則心不能安,而害其德矣。 其 志 理當死而 志 實 適 子 心 士,有志之士。仁人, 士於此 謂「欲 理得之於心自别。 而 或問此章。 之德 無傷 殺,而 一,理 而 亡之哉?」曰:「其謂殺身成仁 二者,勉之者也。 有甚於生,惡有甚於死」是也。 心之德,即所謂仁也 ,則吾之仁亦全而 當死 求生,則 也 此心之全,此理之正,浩然充 體 以仁決者,此章之言是也, 而求生,則咈於天理,忍於吾 曰:「仁者心之德,而萬理具焉。 當死 而 用 於其心 所賤易所貴之宜。」○輔氏曰 殊,故君子之於事,有以 而 仁人於此二者,安之者矣。 實理者,實見得是, 無闕矣。」〇程子曰: 死, 理 則成德之人也 有不安矣,是害 則 當 死 順 心安 而死,則吾 此理而不 蓋仁人不以所 . 而 塞天地 不日 以義決者 而 1心而 養,何 德 之間 違 傷害 仁決 之心 则 则 全 有

成就得 日: 主。 日: 管甚名譽邪。」 順 死 日 : 實見 三者體一 非者,知也; 意。」〇輔氏曰: 所謂實見得 有那實理,人須是實見 見得恁地確定,便是實見,若不實見得,又都閑了。」〇又 不同。今合説,必記録有誤。 只是成就一箇是而已。」《語録 義,生不安於死也。 見得,惡能 死 而 安無悔 「是如此。」○董氏曰: 「見字上必有漏落。 「既謂之成仁 所謂 死 得 惟 箇是矣。」〇胡氏曰:「所見者實,私意不存,當 而 菲 理是視,所謂 憾處 箇 用殊。 是, 生不重於義者,義也; 也 是,只是理之所 如 「程子之説,有知、有義、有仁,實見得 實見得非 則 此? 當 古人 但 必如 此 論學則以 境界 得。」或曰: 只成 理自是理,見自是見。 是而後天理人倫無虧欠處,生 有 須是 者, 「所謂 故有殺身以 ,但見義理, 就 捐 若有那實理,人須是見得 當 指 爲。 知爲先,成 實 軀 見 箇 實 生不安於死者,仁 見得 耐 理 隕 是也。」〇 理 心 》曰:「實理 言 者,指 命 安 在 而不見己身 也。 者,若 物,見 而 生不 德則 成仁者, 德 理)永嘉 此 全, 而 以 蓋 有 在 與實見 重於 言 不 我。」 物 則 陳 兩 更 也 實 氏 物 能 是 節

其器。居是邦也,事其大夫之賢者,友其士│○子貢問爲仁。子曰:「工欲善其事,必先利│

之仁者。」 故孔子告之以爲仁之資而 觀以善,而在我者有敬 其士之仁者,則有所切 脩身者也。」夫子嘗謂子貢悦不若己者,故以 賢以事言,仁以德言。 力矣。○ 程子曰:「子貢問 輔氏曰:「事大夫之賢者,則有所觀法而起嚴憚之心。 是告之。欲其有所嚴憚切磋以 夫言賢者,見於有爲者也。 、畏而 磋 而生勉勵之意。 仁以德言,以士言仁者,見於 無怠惰焉,則其所以 黄氏曰:「賢以事言,以大 已。 爲仁,非問仁也, 成其德也 相 示以禮,相 爲 友

○顔淵問爲邦。

夏時,謂以斗柄初昬建寅之月爲歲首子曰:「行夏之時,

也。

取 時 Ē, 實。 月自當以 地、人之始、故三代建以 始有地,而未有人, 天開 正」, 至丑始有地,故曰『地正』, 子爲天正也。《語録》曰:「至子始有天,故曰「天 用之,夏以寅爲人正 建此三辰之月,皆可以爲歲首。 有天,方有地,有天地交感,方始生物出來。」故 及天開些子後,便有 於寅上方始註 又一萬八百年而地始成,又一萬八百年而人始生。 「此是邵子《皇極經世 元,一萬八百年爲一會。 焉」, 其時之正 今山形自高而下,便如水漾沙之勢,以此 邵康節言到子上方始有天,而 於子,地 而説 人 一「開物」字。 爲紀。 與其令之善,或問:「夏時之得 者 闢 以 到寅上方始有人。子、丑、寅 一塊查滓在其中,初則溶軟,後漸 於丑,人生於寅、語 学中 爲謂《夏小正》之屬。蓋 爲 説、《經 故孔子嘗曰、「吾得 正。」然時 , 商 初間 蓋初間 以丑爲 世書》以元統十二會爲 至寅始有 萬八百年而天始 未 未有物,只是氣 以 有 地; 作 地正,周 而三代 人,故曰『人 事, 到丑 知必 録 、皆天、 則 斗 **₩** 邵子 上方 夏 歲 迭 塞 以 柄 其 先

子也 明; 考三王之制,而必行夏之時也。」○《語録》曰:「夫子以 朔,定爲一 其所由始 爲生物之始,改歲之端,蓋以人之所共見者言之,未有 中, Œ, Œ 以言乎天,則生物之功未著, 於是叶風乃至,盛德在木,而春氣應焉。 月 耐 而 人 日 未有以見其生物之功也。 凡四 可 陽 也。 代之制,以新天下之耳 施 [時五 氣雖始於黄鍾,而 功, 至商、周,始以征伐有天下,於是更其正 行之序,皆不得其中 故 從 其 時。」 以言乎地、則改歲之義不 其月爲建子,然猶潛 而 歷丑轉 自,而 於 此 Ė 有三統之説 寅,而三陽 古之聖人,以 ,此孔 又以 子 ,所以 始 於 顔 備 然 論 知 是 地

乘殷之輅,輅,音路,亦作路。

稱物; 爲用 問: 木爲車 制 商 器 也 輅 也賤 「周輅爲過侈。」曰: 而 木 勞而華飾之,則易壞; 百 Ī 周 而 輅 聚 人飾 已,至商 焉 運 也。 行振 則 以 爲 輅者 動, 金 費 「輅者、身之所乘、足之所履、其 而 任重致遠,其爲物也勞矣。 也 玉,則過 有輅之名,蓋 ,大車之名。 廣 費廣 矣。 而又增費之,則傷財。 賤 用 侈 베 ൬ 貴 飾 易敗,或 並始異 古者 之 則不 其 以 且.

> 此周 之爲用也費廣,故商之木車質 而等威 輅之所以爲 已辨 爲質 過侈 與。」不 而 得 而得其 若 其 商 中 輅之朴 也 胡 氏曰: 素 渾 堅 車

服周之冕,

亦以爲、 上,故 有旒。 寡,故周之五冕,文而得其中。」○永嘉陳氏 制 則等辨而分明,此周 周 文爲貴者,冕也。 周冕之不爲侈。 至周始備。 雖 冕有五,祭服之冠也。 不可考,然意其 雖 文而 黄帝以來,蓋已有 華 而 得 티 : 然其爲物小, 不 有 其 以質爲貴者 冕所以雖 · 爲 「加之首, (必有 中 靡, 也 未備 雖 則 文 胡氏 者矣。」 費 而 車 體嚴 之, 冠 也。 不爲過也。 而 而 上 夫子取之,蓋 而 而 不 加 「冕之爲用 用 有 制 及 於 日 : 約 奢。 度 覆,前後 衆 夏、 詳 儀等, 禮 體之 其 商之 或 有 也 制 問 以

樂則《韶》舞。

取其盡善盡美。

| 放鄭聲,遠佞人。鄭聲淫,佞人殆。」遠,去聲。

可大。 依傚此 邦之道 所 遠之。」輔氏曰:「治道成於樂,鄭聲樂之淫者,能 謹 才之賊 如此。」又曰:「法立而能守,則 也 餘皆可考也。」《語録》曰:「 多矣,惟顔淵告之以此。 人之性情,以壞其成 行之道,發此 大 放,謂禁絶之。 守,故屏遠之。」尹氏 一則 不作,故 辨給之人。 損 放鄭聲,遠佞人,法外意也。 利口 而 盡 法壞 鄭聲佞人,能使人喪其所守,故 於此四者,略説四 益,及其久也,不能 推行之耳。」張子曰:「禮樂,治之法 辨給 矣。 孔 子斟 能 以爲之兆 殆,危也。 ,故放絶之。 鄭聲,鄭國之音。 虞夏君 變亂是 酌 日 件 先王之禮,立萬世 非,以移奪人之心志 事,做 一此 臣更 兆,猶言準則 爾。 治道保於人才,佞人人 ○程子曰:「問 蓋三代之制, 無弊。 所謂百王不易 相 箇 由是求之, 準 飭 德 則 也。 戒,意 周衰, 可 佞 一日不 餘 久,業 人, 非謂爲 事 ,喪其 摇 皆可 皆 放 蓋 則 常 聖 卑 政 蕩 ○子曰:「人無遠慮,必有近憂。」

觀,則其爲治之法可以見矣。」 氏曰:「《春秋》大義數十,皆夫子斟酌三代之禮,而 世常行不易之大法,孔、顔雖不得行之於當時,然即 復作,故告以四代禮樂,只是集百王不易之大法。 得而見矣。」《語録》曰:「三代制作極備,孔子更 孔、顔雖不得行之於時,然其爲治之法,可 之大法。 〈春秋》,善者則取之,惡者則誅之,意亦只是如此。」○ 孔子之作《春 秋 》,蓋 此 意 其 此 爲 不 也。 輔 作 而 萬

遠近以 度,若不爲長遠之慮,則目 外,則患在几席之下矣。」蔡氏日 蘇 用之地,而 氏 曰:「人之所履者,容足之外,皆 地言。 若遠近以時 不可 廢 也。 前即有近憂矣。 言、恐亦 故慮不在 可 通。 :「案蘇氏之説 如 國家立一 千里 爲 之 無 法

也。」好,去聲 〇子曰:「已矣乎 1 吾未見好德 如 好 ?色者

終不獲見,所以警人,使知自勉也。」 已矣乎,歎其終不得而 見也。 輔氏曰: 「自恐其

六一六

〇子曰 臧文仲其竊位者與? 知柳下惠之

賢,而不 與立也。」者與之與,平聲

티 : 據之,則蔽賢抑能,悖天行私 德者之所宜居 陰據之也。 竊位,言不 所當得者矣,言有愧於心,則有陰私取之者矣。」柳下 「竊者、非所當得 也,豈 輔氏曰:「爵位,天之所以待人才,有 稱其位而有愧於心,如盜得 而陰私取之也,言不稱其位,則 己可 得 而不自知其非矣。」〇胡 而 私 有哉? 如 盗 得 而 而 有 才 氏 陰

惠,魯大夫展獲,字禽,食邑柳下,諡 日 惠。

非

爲 與立,謂與之並立於朝。范氏曰:「臧文仲 政於魯,若不知賢,是不明 也 ; 知 而 不

故孔子以爲不仁,又以爲竊位。」 舉,是蔽賢也。 不明之罪小 ,蔽賢之罪大。

遠,去聲 ○子曰:「躬自厚而薄責於人,則遠怨矣。」

責了又責,積而不已之意。」 責人薄,故人易從。 責己厚,故 分量: 脩。《語録》曰: 「厚是自責得重

所以人不得而怨之。

〇子曰 "「不曰『如之何如之何』者,吾末如之

何也已矣。」

奈何。」 曰 : 如是而妄行,雖聖人亦無如之何矣。 如之何如之何者,熟思而審處之辭也。 一只 是要再三反覆思 量, 若率意妄行, 雖 聖 人亦 語 不 無

矣哉!」好,去聲。 〇子曰: 「群居終日,言不及義,好行小慧 難

之機 進德業也。 有 之不同。 計 固明智之稱也。 小慧,私智也。 放辟邪侈之心滋。好行小慧,則行險僥倖 較利欲之私也。」○愚謂: 患 熟。 害 也。 私智,則智之行於私者也。 今終日之間,言不及義,則放辟邪侈之心滋 難矣哉者,言其無 或問此章。 特所謂 或問: 小慧者,則不本於義 「慧之爲智。」曰: 日: 智本 一君 一,而發於用 子群 以 言不及義,則 居 入人德, ,將以 「慧之爲言 理, 則 講道 有 而 而 發於 將

實

《語

録

₩ El

「信

是朴實

頭

無信,則

義

禮 孫皆

是

慧,故將有患害。」 之深憂哉? 造道 之微辭也。」〇胡氏曰: 好行小慧,則行險僥倖之機熟,皆非所以存養善心,而 入德之資也。 難矣哉者,憂其不人於道德,而將罹於患 其自暴自棄,至於如 「言不及義,故無以入德。 此、聖人得 好行小 不 害 爲 爲

之,信以成之。君子哉 〇子曰:「君子義以 爲質,禮以行之,孫以出 ! 」孫,去聲

時,辭 之,則亦不可。 是從此發出。」〇又曰: 以 地行。」○又曰:「其間節文次第,須要皆具。」出之必 文、《語録》曰:「行是大綱行時。」〇又曰:「行是安排恁 義所當爲 義主事而言,故以制事釋之。君子之於事,必裁之以義, 就事上説。」〇又曰:「是制事先決其當否了。」〇愚謂 義者制事之本,故以爲質幹。《語録》曰: 退逐《語録》曰: 氣或 而後爲,所以謂之質榦也。 不 能 且如人知尊卑之分,須當遜也,然遜之之 婉 順 o 「出則始自此出去。」〇又曰:「出 「徒 便 是不能 知盡 做, 其 孫。」成之必 節文,而 而行之必有節 不能 孫 在 「義是 以 誠 出

> 之。 内,義以方外」,是從内説 無「敬以直内」,也不知義之所在。」〇輔氏曰:「「敬以直 每事皆當如此,一有闕焉,則首尾不全矣。」又曰:「敬 總歸 行之,孫以出之,信以成之。」《語録》曰: 以直内,則義以方外。義以 然,禮行此,孫出此,信成此。此四句只是 之道也。○程子曰:「義以爲質,如 出 區處須中節文,無過不及,是『禮以行之』。 否,此在先,是『義以爲質』。 之之後,方信以成之也。」〇 僞。」〇又曰:「是終始誠實,以成 箇義。「義以爲質」,便是自「義以方外」處說起來,若 辭氣須孫順 事,以義爲本。」輔氏曰:「此四句只是 須誠 四者皆一套事,只於日用問驗之自見。」乃君子 實, 則 而無峻厲,方不忤人,是「孫以出之」。 此事之成,無欠缺可 出 陳氏曰 外。 可否既定,或從或違,所以 『義以爲質,禮以行之: 此一 「事到 爲質,則 事,却非 悔處,是「信以 於其區處,或 面 前 事 是孫以出 便 禮以 質 「只是 者,謂 斷 榦 其 成

0 順 原 誤作「須」,據四 庫本改。

六一七

〇子曰:「君子病無能焉,不病人之不己

知也。」

)子曰:「君子求諸己,小人求諸人。」 此 謝 反諸 也。 雖 \君子小人所以分也。」○楊氏曰:「君子 不 氏 ·病人之不己知,然亦疾没世而名不 曰:「君子無不反求諸己,小人反是。 己 雖 疾 而 没世 己。 而 小 人求諸 名 不稱,然 人,故違道干譽, 所 以 求者 「, 亦 稱

雖非夫子立言之旨,或記者取而相足也。」無所不至。 三者文不相蒙,而義實相足,而記言者之意。」或問:「楊氏之説不太巧乎?」無所不至。 三者文不相蒙,而義實相足,無所不至。 三者文不相蒙,而義實相足,

)子曰:「君子矜而 莊以 和 子言君子如此,所以使學者於持己處衆之際戒謹恐 阿比之意起,而與人黨。 心生,而與人争。 輔氏曰:「莊以持己,理也。 務盡其理,而防私意之或萌也。」 以 處 持己日 衆日 群。 矜。 和以處衆,理 然 然 不争,群而 天理存亡,只在一 無 無 然用意或過,則便至乖戾之 阿 乖戾之心,故不 也。 比之意,故不黨。 然用意或過,則便至 不黨。」 息之間。 · 争。

○子曰:「推己及物,即『己所不欲,勿施於人』之恕也,非有 一子頁:「其恕乎! 己所不欲,勿施於人。」 子曰:「其恕乎! 己所不欲,勿施於人。」 子曰:「其恕乎! 己所不欲,勿施於人。」

此。 警於學者,蓋聖學以仁爲先,而恕則求仁之本也 之,豈不爲宜? 方 子 此 己及物,終則爲聖人之無我,不出乎 資於人,在 蓋指 也。 ·貢之問 終身行之,不亦宜乎?」輔氏曰:「始則 其用 推 我 而言之。二〇 可 而 施之而 極 此又極其效而言之。 謂 之,雖聖人之無 知 已,烏 要矣。 尹氏 有 窮盡? 日 孔子告以求 : 「學貴於知 故 恕字而 知要之説,尤爲 可以 我,不出 終身行之。 已,終 仁 身行 要。 之 平 有 推

譽者,其有所試矣。 子曰:「吾之於人也,誰 譽,平聲 毁 誰 譽? 如有 所

者 稱 所 善 毀者,稱 則已緩矣。 之也 毁 善善之速, ,則必嘗有 而 也。 過其實。 毁 者, 人之惡而 或問: 是以 惡 以 未 而 夫子 著 毀譽之説。」曰 無 試之,而知其 雖 而 所 損 遽詆之也。 有 ,無是 其真。 苟 以 如 前 也。 此 知 「譽者,善 試 譽者, 其 然 將然矣。 云者,亦 若其 惡 或 一,而 揚 有 未 惡 顯 驗 所 人之 終 其 惡, 而 聖 譽 無 將 呕

不可 平施 善速 無毁 已進 者。 然而 便是毁。 録》曰: 老、 以是爲有倚, 常、元包四德之發見證驗 惡短」; 經」,「罪疑惟輕,功疑惟重」; 之善,而 毁,蓋非若後世所謂恥言人過 決知其不善,而卒 未有十分善 物本全,自家打破了,便是毁。 好惡,然此 佛荒唐之説 謂之毀。 而譽之矣。 然以欲人之善也,故但 未見其已然之辭 、惡惡 ,則聖人之心爲有所倚矣。」曰:「有譽無 ,無豪髮之差,故 「毀者,那人本未有十分惡,自家將做十分説 孔子樂道人之善,惡稱人之惡之意。 無預詆之惡,是則聖人之心耳。」曰 若是只據他之惡而稱之,則不可謂之毀。 緩之意,正《書 而以 意則 譽 自 ,而下 不欲 亦是稱獎得來過 家却 未嘗 夫恝然無情 未嘗遽 者流 也。 人之惡也,故惡之未著者 人之善 遂 不 也。 知 存,是乃 於中、 詆之也。 蓋聖人之心,光明 》所謂 有 得 《春秋傳》所謂『善善長、 聖人之心,雖至公至平, 而全 .悪, 者爲 試 他 而 商 當。 一與 將 若是那 稱之未當少 天地生物之心也。 無黑 知其賢 至 來 慘酷之科矣。」○《語 此 其 如 其 所 則恐其高者 白者 殺 此 有 物元來破 以 不 , 則 所試矣,那人 言譽 辜, 若毁人,則 若 正大, 毁,是乃善 善雖 有 愐 但 仁 寧 非 而 過 有 見 了,則 未顯 譬如 失不 入於 稱 包 譽 先 不 有 其 他 惡 若 無 Ŧi. 而 褒 及 以 實 物

私

雖

善善惡惡之正者也。」是也。譽云過其實者,孟子所謂聲聞過情是也。皆失其不可如此也。」○胡氏曰:「毀云損其真者,叔孫武叔之毀

斯民也,三代之所以直道而行也。」

之。今亡已夫!」夫,音扶

也。 也,豈有意於毀譽之哉? 其所以譽之者, 迂曲而枉其是非之實。○尹氏曰:「孔子之於人 私曲之民。故我今亦不得 民,即三代之時所以善其善、惡其惡而 私曲也。言吾之所以無所毀譽者,蓋以 何晏失之也歟?」三代,夏、商、周 化之意,亦爲粗得其文意者。 又何疑哉? 道 而上推三代以實之之詞也。 而言。 斯民者,今此之人也。 「此民乃是三代時直道而行之民,我今若有所毀譽,亦不得 曰:「以他文推之,如伊尹所謂此民是民,皆指當日之民 一而行,則所謂斯民者,乃三代之時所嘗行其直道之民 《語録》曰:「所以字本虚,然意味乃在此。」〇又曰: 況今先言斯民,而後言三代,則是正指今日之民 班固《漢書贊》引此文,以明秦、漢不易民而 且以斯民對三代之所以直 或問: 豈西漢諸 而枉其是非之實 「斯民爲今日之民。」 也。 儒當有是説 直道 無所 無 而 此

一子曰:「吾猶及史之闕文也,有馬者借人乘道而行,豈得容私於其間哉?」蓋試而知其美故也。斯民也,三代所以直

○子曰:「巧言亂德,小不忍則亂 精粗,實不相並,故又取胡氏之説于後,亦闕疑之意也。 爲是言歟? 猶有此事,晚年歸魯,政在三桓,風 故楊氏以爲二事豈夫子初年居魯,魯俗習於文學之化, 車馬,與朋友共敝」之類也。二者公心之見於事爲者也 謂:此必有爲而言。蓋雖細故,而時 及見之。今亡已夫,悼時之益 楊氏曰:「史闕文、馬借人,此二事孔子猶 五郭公之類也。 强解。」愚謂:史闕文,傳記不備,不敢參以己意,如夏 大者可知矣。 亦借是以明時變之不如 馬借人,己偶有餘,不吝以自私,如『願 〇胡氏曰:「此章義疑,不可 俗日異,偶有所感而 古 也。 大謀。 偷 然二事大小 也。」 變之 愚

不忍,如婦人之仁、匹夫之勇皆是。或問:

巧言,變亂是非,聽之使人喪其

所守。小

皆足以亂大謀。 仁,失於不斷,匹夫之勇,失於輕決。二者之失不同 其爱也, 匹夫之勇,不能忍其暴也。」○輔氏曰:「婦人之 曰:「忍之爲義,有所禁而不發云爾。 婦人之仁、匹夫之勇、强弱不同,而皆爲不忍,何 蓋大謀須斷 ,而輕決則又失之。」 婦人之仁,不能忍 也? 前

焉。」好、惡,並去聲 子 曰:「衆惡之,必察焉,衆好之,必察

楊氏 辭,非謂衆之好惡爲皆非也,特恐其或蔽於私,故加以詳 不察,則或蔽 曰:「惟仁者能好惡人。 孟子於匡章、陳仲子是也 於私 矣。」胡氏曰:「察者,詳審之 衆好惡之而

)子曰:「人能弘道,非道弘人。」 可以 之所在,道即所以爲人之理,不可殊觀。 弘, 廓而大之也。人外無道, 道外無人。 道,道不能大其人也。 然人心有覺,而道 `□○輔氏曰:「人外無道,道外無人,此合而言之,論 大其所有之理。 道無方 體 無 體 或問 則 爲 此章。 贵 能 故人能大其 但人有知思,則 大其 曰:「人即 所 託之人

道

同。 心是知至之事。」如何?』曰 却謂「盡其心者,必其能知性者也。 弘人也。」《語録》曰: 能盡性,人能弘道也,性不知檢其心,非道 爲,故人能大其道,道不能大其人。」 ○張子曰:「心 其極致則然也。 所謂知,便是心了。」」 然析而 問: 言之,則人心有 :「心與性只一般,知與 『張子如此説、《孟子集註 知性是: 知 覺 物格之事,盡 道 體 無 作

○子曰:「過而不改,是謂 過 而能改,則復於無過。 過 唯不改則其過 遂

成,而將不及改矣。

句。 ○子曰:「吾嘗終日不食,終夜不寢,以思, 做。 軟着心,貼就他去做。」○又曰: 底。 如 此爲思而不學者言之。 着,寬廣以求之,不忒恁地迫窄,便 無益,句。不如學也。」 遜志 學,是依這本子去做,便要小着 而今人都是硬去做,要必得,所以更做不成 而 自得也。《語録》曰:「思,是硬要自 蓋勞心以必求,不 「遜志,是卑遜其志,放退 心, 要 隨 思 順 而必 箇 事 得。」 須是 去做 理

人爾。」 李氏曰:「夫子非思而不學者,特垂語以教

飯,如罪反。矣,學也,禄在其中矣。君子憂道不憂貧。」○子曰:「君子謀道不謀食。耕也,餒在其中

르, 在外者爲憂樂哉?」 耕所以 丽 尹 禄 氏日 非爲 在 其 謀食,而未必得食。學所以謀 :「君子治其本而 憂 中。 貧之故,而 然其 學也,憂不得 欲 爲 不卹其 是以 得 末,豈以 乎道 禄 道, 也 而

殄瘁 苟 體,無 於身矣。 知足以 無私欲以間之,則全體是仁,安而行之,不待强勉 而 時不然,元無 不得 知 輔氏曰:「仁是本心之德,天理之全,無物不 接 此 續,雖 理,而 虧 日 闕 知足以知之,而 間 私 斷。 欲間 唯 是私 之,則 寶不 欲横 能 生 無 有諸 則 以 便 有之 己 遏 矣。 而 絶

> 知及之,仁能守之。 涖,臨 其所知· 善 外者,是以民不見其可畏而 間 莊嚴底意思,闔闔翣翣底,自不足以使 曰:「今自有此心純粹,更不走失,而於接物應事 莊者,蓋 處。一下句放此。 之,則 知自然在 也。 氣 所 知 謂 習之偏 我,而不失此,所以必於仁而言守 者 臨 在 民 不莊 也。 我 或或 而 有 以涖之,則民不敬 知此 不 厚 失 於内 慢易之。 矣。 理 人敬 而 他,此 而 然 無 不 猶 私 也 時,少此 《語 便是 嚴 有 欲以 録 於 不

未善也。」 知及之,仁能守之,莊以涖之。 莊,動之不以禮,乃其氣稟學問之小疵,然 於仁,則善 民身上。」禮,謂 使民去做這件事,亦 《語録》曰:「這動字不是感動之動,是 動 之, 動 民 1有 也。 義理之節文。 諸己 有禮,是使之以 猶 \Box 而大本 鼓 舞 而 立矣。 禮,下 使民底意思。 作 動之不以禮 愚 興 ·稍禮 謂 之云 涖 字,歸 之不 學至 謂 爾 在 如

備 也。 不可專 亦非 以 德 偏 莊 也。 而 愈 , 動 或問 其 盡 全 不以禮,學問之闕也。」故 主氣質,蓋亦有學底。] 〇輔氏曰: 民不以禮,亦其支節之小失耳,然亦不可不自警 要以仁爲重。 則 善之道 此 章。 責 愈 曰:「太抵發明内外本末之序,極爲完 也 人情,不 仁能守之,則大本已立,雖臨 0 《語 可以 録》 Ĭ : 夫子 爲 固 歷言之,使 小 有 「不莊,氣質之 節 生 成底,然 而 忽之 民 知 不 亦

不可大受,而可小知也。」
〇子曰:「君子不可小知,而可大受也,小人

省,以求

盡善而全其德也。」

仁之語。」下章放此

受也。 長 故 可 以 此 公可小 亦可 任重 取。《文集》曰:「一事 言觀人之法。 器而使,但不可以 知。任天下重 蓋君子於細事未 小人 雖 器量 知 而 任大事耳。」 我 不 一之能 懼 淺 ,故可大受。 否,不足以 狹,而 知之也。 必 可觀 未 盡君子之藴 必 而 小人一才之 受, 無 材 彼 一長 德 足 所

見蹈而死者矣,未見蹈仁而死者也。」 〇子曰:「民之於仁也,甚於水火。水火,吾

何 況 是仁有 水火,不過害人之身,而不 於仁也亦然。 民之於水火,所 憚 水 火 而 不爲哉? 或 甚 有 於 時 水 但水火 火 而 賴 , 而 李氏曰: 殺 以 人,仁 生,不 尤 八外物, 不 則 可 可 而 此夫子勉人爲 仁 未 以 仁 則 嘗 在 日 失其 殺 日 無。 人 無 了; 亦 ۱Ļ, 也。 無 其

〇子曰:「當仁不讓於師 善名在外, 仁者己之所有 也,德之善也。 有?□○程子曰 於以仁爲己任,則 遜之説。」曰: 爲之,非有争也。 當勇往而必爲也。 當仁,以仁爲己任 「弟子之於師,每事必遜 則 凡自外來者,固 耐 不可 自 當自勉而勇爲之,不 爲 爲之,非 何遜之有? 或問: 不遜。」輔氏 也。 蓋仁者,人所自 仁在 奪 不可 雖 諸 己, 彼 師 不遜 無 而 耐 亦 可 先 不 所 , 如 無 以 之也 敢 「遜乃禮 與 先者 有 善 所 有 遜 遜 1名是 「當仁不 遜 何 也。 也。 而 之實 遜 也 若 自 之 至 蓋

六二四

至於爲仁在己,則何所遜哉? 蓋非不遜也,乃無所與

遜也。」

〇子曰:「君子貞而不諒。」

信者,此 弗去是也。 ○蔡氏曰:「諒有二訓: 謂「貞固足以幹事」。 也。不擇邪正,惟知必信而不易者,諒也。」〇《語録》曰: 或問:「貞諒之别。」曰:「處義既精,不期固而自固者,貞 貞,正而固也。 貞者、見得道理是如此、便須只恁地做、所謂知斯二者、 諒 爲「正」字説不盡,故更加「固」字,如《易》所 是 也。 諒 諒,則不擇是非 若諒者,是不擇是非,必要如此。」 似 有止訓信者,友諒是也。 乎 貞而 實非, 故夫子 而必於信。 特 有爲必 别 而

〇子曰:「事君,敬其事而後其食。」

言之。」

皆天理之當然,而在人所當爲者也。豈可有一豪僥求覬也。輔氏曰:「有官守者,脩其職,有言責者,盡其忠,也,有官守者脩其職,有言責者盡其忠。也,有官守者脩其職,有言責者盡其忠。

者所當深辨也。」

者所當深辨也。」
一有僥求覬幸之意於其先,則其爲幸之意於其先哉?
一有僥求覬幸之意於其先,則其爲幸之意於其先哉?
一有僥求覬幸之意於其先,則其爲幸之意於其先哉?
一有僥求覬幸之意於其先,則其爲幸之意於其先哉?
一有僥求覬幸之意於其先,則其爲幸之意於其先哉?

〇子曰:「有教無類。」

染也。 如耳。 正之異。 其始生也,已有氣稟清濁之分,及其少長也,又有習染邪 乎一理而已。 而不當復論其類之惡矣。 人性皆善,而其類有善惡之殊者,氣習之 故君子有教化之妙,則人皆可以復於善, 故君子有教,則人皆可以復於善, 苟欲合其異而反於同,則在乎脩道以 然其品類則有善惡之異者,何哉? 輔氏曰:「人之性,同 爲 而 教 蓋 自 者 於 無 何

不同,如善惡邪正之異。○子曰:「道不同,不相爲謀。」爲,去聲

爲惡之人,豈可復論其類之惡哉?」

)子曰:「辭達而已矣。」

也。富者欲其贍也,麗者欲其華也,皆徒言之弊也。」能不言者,亦惟假之以通其意耳,出乎意之外,非贅則誣言也。達,通也。而已矣,止乎是之謂也。有是意,必假是言也。達,通也。而已矣,止乎是之謂也。有是意,必假是辭,取達意而止,不以富麗爲工。胡氏曰:「辭,

見,賢遍反。 〔席也。〕皆坐,子告之曰:「某在斯,某在斯。」 〔師冕見,及階,子曰:「階也。」及席,子曰:

斯 師名。 \exists 師 樂師 如《春秋傳》所記 磬、鍾、笙、鎛、韎、 舉在坐之人以 瞽者。 胡氏曰: 師 筏、 紹之。 籥,皆曰 師慧之類。」再言某在 「《周禮 師。」冕,名。 》,樂師、大師 胡 皆以 氏

省察如此。 聖門學者,於夫子之一言一動,無不存心

子曰:「然。固相師之道也。」相,去聲。

天下 與焉。 求聖人之心,於斯亦可見矣。」范氏曰:「聖 是屑屑然矣。」〇尹氏 相,助 人不侮鰥寡,不虐無 心一致,無不盡 見,適無相者,坐必作,過必趨。 子所謂 聖 心,至此自不能 己。」輔氏曰:「夫子相師之際,盡夫誠,行夫道,而己不 人於此, -, 無 此亦聖人之庸行也。」〇胡氏曰:「瞽必有相者,荀 『猶瞽無相』、《春秋傳》云『其相 也。 物不得其所矣。」 古者瞽必有 已也,故代相者告之,使其有相,不 非 作 其誠故也。 意 曰:「聖人處己爲人,其 而 告,可見於此。 爲之, 相, 哀矜之念,乃聖人之素 其 有志於學者, \Box 但 道 朝 盡 也 如 其 此。 推之 冕之來 道 必 而 蓋

季氏第十六

曰:「洪氏疑此篇爲《齊論》,以其皆稱孔子,且篇洪氏曰:「此篇或以爲《齊論》。」胡氏

内十四章皆條列而詳備,與上下篇不同,然亦無他

左驗也。」凡十四章。

季氏將伐顓臾。顓,音專。臾,音俞。

縣 顓 司太皞與有濟之祀。 東北 臾,國名。 魯 附 愚案: 庸 也 杜註 《春秋傳》云: 顓臾,風姓也。 愚 Z 記謂: 伏羲之後,在泰山 附 庸者,以國 事 南、武 附於大 陽 實

央。」見,賢遍反。 冉有、季路見於孔子曰:「季氏將有事於顓

國、未能以其名通

也

必是此年復之衛,次年死於孔悝之難 要我,吾 孔子自楚反乎衛。 仕 孔子反魯,當在此時。 此云爾者,疑子 案《左傳》、《史記》,二子仕季氏不同 季氏,不久而 無盟矣。」使子路,子路辭。 + 復之衛 路嘗從孔 一年,魯以幣召之,乃歸。 + 四年,小 也。 邾射來奔, 日 子自 愚案: 則 子 衛 路 魯哀公十年, 尚 反 在 使 魯 子 魯 季路 路 , 再 時。 也 從

孔子曰:「求! 冉 求爲季氏 聚 無 乃爾 斂 是過 尤 用 與? 事。 與,平 故 夫子 聲 獨

不仁。

不必伐而伐之,則不智。

非當伐而伐之,

則悖

禮

則非

季氏所當伐

也。

輔氏

曰:「不可伐

而伐之,則

伐;

在

邦域之中,

則

不必

伐;

是社

稷之臣

自益

故孔

子言

顓

奥乃先

 \pm

封

或

則

不

口

責之。

中矣,是社稷之臣也。 夫顓臾, 昔者先王以爲東蒙主, 且在邦域之 里。 四 在其中? 里,無此間 地?』日 録》曰: 州費縣也。 之下,使主其祭,在魯地 東蒙,山 0 分魯國,季氏取其二,孟 然此 獨附 「問:「從孟子百里之説,則 處亦難考究。」社稷,猶 「如《左傳》也 所謂 名。 顓 庸之國尚爲公臣,季氏 縣 曳在蒙山 地大,如何做得 「錫之山 愚案: 有 川上 蒙山在 下。 何以伐爲?」夫,音扶 同 先 田 院候國? 之說。 泰山郡蒙陰縣西南,今沂 附庸 七百 王 孫 封 云公家。 魯 每 其 如 里 叔 顓 安得 疑 勢必 何又容得 又 孫 此 之 臾 處 各 七 欲 不 中。 於 若 百 止 取 有 是 此 於百 里 顓 是 ^ 以 其 時 山 之 臾 百 語

知 犯 有又從而爲之辭,此聖人所以不得而默也。」此 舉 而 不仁不智 無 禮 無 義 如 此,而 季 氏懵然不 事

露,而 歸,達明睿之照,則其遇事也,雖 如 理之至當,不易之定體,而一 此,非聖人不能 所隱 遁。 故其發而爲言 也。 輔氏 其曲 自 日 : 然明 折 言盡 「聖人會 肯綮,皆 切 周 其 盡 義理 軒 八曲折 如 部呈 此 之

冉 有曰:「夫子欲之,吾二臣者皆不欲也。」

是豈從事於言語者所能及哉?」

未至於窮理盡性、物我並觀者,當此之際,未有不歸咎於 故歸咎於季氏。輔氏曰: 人以自解釋也,然亦安能逃於聖人之照哉?」 夫子,指季孫。 冉有實與謀,以孔子非之, 「此亦常情之通病。 蓋學

矣 ? 者止。』危而不持,顛 孔子曰:「求周任 任,平聲。 焉,於虔反。 有言曰:『陳力就 而 相、去聲、下同 不 扶,則將焉 列,不 用彼 相 能

周 相瞽者之義。 相,瞽者之相也。 任,古之良史。 相夫子亦是瞽相之義,瞽者之相 《語録》曰: 陳,布 「看扶持兩字,恐只是 也。列, 位 亦是 也。 如

> 去也。 此。」言二子不欲則當諫, 諫而不聽, 則當

且. 與,平聲。 是誰之過與?」兇,徐履反。 爾言過矣。 虎兕出於柙,龜 柙,户 甲 玉毀於櫝 反。 櫝 · 音 中,

獨

可制鎧。 兕,野牛也。 《交州記》謂:「角長三尺餘,形如馬鞭 愚謂: 兕似牛,一角,青毛,其皮堅厚, 柄。一柙,

也。 檻 也。 言在 愚謂: 柙 檻,櫳 而 逸,在 也。 — 曰 櫝 而 卷 以以 毁 典 藏 虎 守 兕。 者不 櫝, 匱 得

辭其 不得不任其責也。 過。」明二子居其位 守者事。 過。 今在柙中走了,在櫝中毁了,便是典守者 **《**語 録》曰:「虎在山 而不去,則季氏之惡,己 輔氏曰:「此可見聖人之言,委 上,龜玉在他處,不干典 之

曲詳盡。 蓋使之以類相況而自得之耳。」

後世 必爲子孫憂。」夫,音扶

冉

有曰:「今夫顓

臾,

固

而近於費。

今不取,

古 ,謂城郭完固。費,季氏之私邑。 此則

之辭。夫,音扶。舍,上聲 孔子曰:「求! 冉 求之飾 辭 亦可 君子疾夫舍曰欲之,而必爲 見其實與季氏之謀矣。

貧 丘 而 也 欲之,謂貪其利。 聞 患不安。 有國有家者,不 蓋均無貧,和無 患 寡 而 寡,安無傾 患不均,不 患

辭以告之。」

安矣。 寡 此 患 分。安,謂上下相安。季氏之欲取顓 民,則不均矣。 而安,安則不相疑忌,而 寡與貧耳。 節。 謂民少。 티 : 均則不患於貧而和 「是時 貧,謂財乏。 然是時季氏據國,而魯 君弱臣 季氏據魯國之半,而公室無尺 强,互生嫌 無傾覆之患。 和則 均,謂各得其 不患 隙,則不 於寡 公無 或問 臾, 地

> 安而不至於傾 以復於諸侯千乘、 保其祭祀,而無 臣輯 睦 則 和 矣。 而不患於寡矣; 傾 大夫百乘之制,則均 危之患,其可 此在當時,蓋 子孫長久,世 得哉? 有難顯言者,故夫子微 而 必 不患於貧矣: 也 一守職 痛 自 業,則 貶 損

君

夫如是,故遠人不服, 來之,則安之。夫,音扶 則 脩 文德以 來之。 既

來之,亦不當勤兵於遠 内治脩,然後遠人服。 有不服,則脩德以

邦分崩離析 今由與求也,相夫子,遠人不服 而不能守也。 而不能來也

子路 崩 得 爲 離 析,謂 無 雖 不 罪,故併責之。 與謀,而素不能輔之以義,亦不 四分公室,家臣 遠 屢 人, 謂顓 叛。 臾。

臾,而在蕭牆之内也。」 而謀動干戈於邦内。 吾恐季孫之憂,不在

顓

干,楯也。戈,戟也。 蕭 牆,屏也。 言不均

疑之,而至於不安矣。

以臣亢君而不安至此,則

雖欲長

臣

益

疑,而

常

懼

於衆少矣;

憂

寡

而求衆愈甚

則

君

益

憂寡而求富不已,則君

疑

其臣,而至於不和

矣。

不和,則

民之勢,不均甚矣。

不均,則臣疑其君,而以貧爲憂矣;

氏

E

「聖人見理

一而

不見

事。

且言

理

則勢在其中,此

亦

告於夫子。 責冉求之意。 子之言而止 多矣。伐顓臾之事,不見於經傳,其以 所以深罪之,爲其瘠魯以 公室弱,冉求又欲伐顓 不 曰: 二子仕於季 而 和 去季氏。 ,内變將 洪氏則又得夫子在當時雖 則因夫子之言 也與?」輔氏曰"「謝氏得夫子所以深 作。 謝 氏 氏,凡季氏 其 後 曰 : 東以 哀 「當是時 公果 肥三家也。」洪氏 而 附益之。 救 所 欲 不得 欲 止 ,三家强 以 者,宜 爲 位,而 越伐 必必 夫子 餘 夫 亦 以 魯 福

出; 侯出 失矣, 陪臣執國命, 三世希不失矣。 臣 先 孔子曰:「天下有道 天下無道,則禮樂征 王之制,諸 ,家臣也 ,蓋十世希不失矣, 自大夫出,五 逆 侯 理 不 愈甚,則其失之愈速。 . 得 變禮樂,專 則 伐 禮 自 樂 諸 征 侯 征 伐 出 世希不 自 伐。 天子 自 陪 諸 輔

亦

有以及人之事。」

尊德 所謂大約縱有遲速,所争亦不多 此。 性 輔氏曰: 而畏天命 「聖人渾是 之一 端 也。」大 義 理,故 也。」 約 理 上 世 看 數 得 精 不 切 過 如 此 如

天下有道,則政不在大夫。

專征伐,則大夫亦豈得而專政哉?」征伐自諸侯出」而言之也。天下有道,諸侯既不變禮樂言不得專政。輔氏曰:「此因上面「天下無道,禮樂

天下有道,則庶人不議。」

言也。 不相蒙,故曰通論天下之勢。」 必至於庶人自然不議 論天下之勢。 上 一人竊議焉,則 無失政,則 輔氏曰:「此其有道之極致大驗也。 八 其 道 下無 胡氏曰:「此章三舉天下有道言之,文 猶 ,然後爲有道之極。」 〇 或 私 慊,而 議。 人君 非 不可不反求之身也 箝 其口 此 使不 使天下有 章 通 敢

魯自文公薨,公子遂殺子赤,立宣公,而君夫,四世矣,故夫三桓之子孫,微矣。」夫,音扶。○孔子曰:「禄之去公室,五世矣,政逮於大

神 故皆 子 今諸 者,以 征 着 何 政 伐 公時 當 皆 凡 也 失 孔子 處非 之事,非 伐之事 逮 自 然 其 如此章之説 也 桓 Щ 百二三 が前章 不 侯 ? 於大夫,宜大夫之强 諸 語 也。 世 自 政。 公之後 常 *,然征 久 好。 大夫皆 侯出 季 諸 通 强 而 字 圃 武 歷 輔 侯所宜 論 生於 蓋 而析爲二章 爲 伐 氏 失之也。」輔氏日 此 ,亦其 天下之勢, 子 成 緣 宜 亦不 E 家 章 此 他 陵 始專國 出 : 諸 襄、昭、定, 安, 臣 看 專 以 無。 其 則 也。」〇 此二章,想只是一 侯 得 陽 論 魯亦豈得爲無僭 前 上 一爾。」蘇 之强 安 後 文勢出 案 虎 魯 章 章 政 陳氏日 生 春 則 之説 所 事 專 也 也 於 秋 無 `, 疑 執。 歷 論 凡 氏 又 影可 上下 魯 悼、平、 有 蘇氏解文字, 以 而 五公。 而 推 日 見 事, 與前章 魯 筆 三桓 之, 者邪 魯 : 時之言 凡 雖 力 故 之分 其 桓 以 無 發 征 禮 於 而 桓 下 失 桓子, 逮,及 以 其 得 伐 三家 樂 皆 知 説得 分 定。 皆 來 文 矣 微 政 中 征 定 其 車 天 精 章 加

損 諒 進。 也。 明 易。 乎?」曰: ,友多聞 胡 焉,皆有興起慕效之益 三者之於人,皆有薰陶漸漬之益 聞 矣。」便,平聲。 孔子曰 友 氏 也 直, 」便,習熟也。 日 : 多 蓋 則 諒 言 聞 進 則 「直者、責善 者 與 聞 「是亦釋其文之正意 於 多 過 聞 有 益矣。 益者三友,損者三友。 明。 聞 則 所參 其 辟,婢 未 真 過 足 訂 或問: 有 而 胡 以 耐 友便 所 馬,不 亦反。 無 氏 進 友諒 聞 不 所 日 膠 \equiv 於 П 但 辟,友善柔 偏 誠 言 護。 云爾。 友 如 便 明 見。 焉 進 則 盡於 彼 於 諒 順 而 之所 皆 進 故 誠 者, 若 適 誠 有 可 集 明 於 也。 推 明 言 嚴憚 古 聞 註 而 誠 可 則 過 執 而 》之説 字 友 言之, 友 猶 畏 由 而 而 己 書 便 直 是 也。 謹之益 有 進 無 友 \bar{z} 佞 而 待 則 友 於 所 而 多 安 於 誠 更 是 E

則 正 謂 不 無責 習 直 相 於 反 善之誠 善 也 П 柔 語 矣, 或 問 善 謂 而 柔 無 Ι. 則 損 聞 於 無 者 古 媚 見 之相反,奈何?」 守之節 之實。 説 而 矣, 不 便 諒 佞 者 日 則 損 便 無 便辟 貫 佞, 益 通

也。

順

適且安,故云習熟

也。」便辟

謂

習於

威

儀

而

則 之意矣。」〇 至於庶人,未有不須友以 取 儀 辨 ,則謬爲恭敬; 於頰舌,故損 胡 氏日 Í. 、益相 「便辟、《書 一於媚 反。二〇尹 説 ,則巧 談註 、成者。 以爲足恭是 相 氏 順從; 曰 : 而 自 習於 其 也 損 天 П 習 語 益 子 於

岳。 樂,樂道人之善 樂佚遊,樂宴樂,損矣。」樂,五教反。 孔 驕樂、宴樂之樂,音洛 子曰: 益 者三樂,損 ,樂多賢友,益矣。 者三樂。 禮樂之樂,音 樂 樂 驕 節 樂 禮

有

如是者,可不謹哉?」

問: 集。 夫道 敬 存 淫 知 自 節 和樂之實,守之正,則外有以善其威儀節奏之文。 之熟,是非不謬則守之正。 然之節,因其節 溺 節 「三者之爲益。」曰: (人善,而悦慕勉强之意新,多賢友,而直諒多聞之士 樂是三 謂辨 而 狎 佚 其 一者而不已焉,雖欲不收其放心以進於善,亦 遊 小 制 人。 則 度聲容之節。 而分别之也。」驕樂,則 惰 三者損 「君子之於禮樂也,講明不置 慢 而 存之熟 惡 益 聞 一, 亦 胡 則 善。 氏曰:「禮樂皆 相 内 後肆 有以 宴 反 樂, 也 養其 而 則 不 與 莊 則 或 有

> 善矣; 蹈矩 多賢 所以相反也。」〇尹氏曰:「君子之於好樂, 則不復循規蹈矩矣, 佚遊者, 怠惰 則憚 不可 疎遠君子。』」○黄氏曰:「三者損益相反、《集註 驕樂只是放恣侈靡,最 向懶惰,無向善之心。 害。』問: 是佚遊,則是放蕩閑過了日子。 之善相反?』曰:「樂道人之善,則心常汲汲於好善。 曰 : 不 友者 同。 「驕樂,則不敬不和矣; 佚遊,則忌人之善矣; 親勝己矣。」〇《語録》曰: 而不敢縱肆 得矣,其爲益豈不大哉。」曰: 宴樂者,多欲以求安,則不復望人之規正矣。 ,樂於取友以微 愚嘗拾其遺意 「樂道人之善,則 也; 道 害 此所以見其相反。』曰: 人善者,志於爲善以 而釋之日 規 事 有勉思 Œ 到得 也。 「問:「佚遊如 雖所 企及之意。 而自適,則不復志於爲 「損者之相 驕樂者,恃 宴樂,便須狎 節禮 損 稍輕 樂者、欲 成 何與樂道 氣以 反,奈何?」 佚 ,亦非是 三者,如 其 》、《或問 遊,則 近小人 八身也 其 陵物 宴樂 此其 循 口 若 規 小 人

自

不 謹 哉?」

言謂 而言謂之瞽。」 孔 之躁,言及之而不言謂之隱,未見顔 子 Ė: 侍於君子有三愆: 言未 及之而 色

瞽,無目,不能察言觀色。○尹氏曰:「時 以德言也。 言,只是戒人言語以時,不可妄發。」 然後言,則無三者之過矣。」《文集》曰 君子,有 德位之通 「君子學道則愛人」,以位言也。」**愆,過** 稱 胡氏 日 『不亦君子乎?』 :「聖人此 也。

鬭,及其老也,血氣既衰,戒之在得。」 定,戒之在色,及其壯也,血)孔子曰:「君子有三戒:少之時, 則 之爲也;而精又氣血之精者也。 其體而分之,則有氣有血焉。 氏曰: 」陰陽之氣,塞乎兩間,而人所資以爲體者也。 血 者也。」得,貪得也。 不爲 氣,形之所待以生者,血陰而氣陽 血 氣 所使 也 隨時 輔氏 氣者,陽之爲也;血者,陰 陰陽氣血,一而二,二而 日 知 氣方剛,戒之在 戒,以理勝之, 「知者,心之用也。 血 也。 氣 未 就 輔

> 覺。 子終身之務也。」 之變也。 流; 斂而多貪,則 强弱,然而志氣則無時 氣所 極,也不由他。」〇輔氏曰:「人之血氣未定,則常 曰:「到老而不屈者,是志氣。」〇又曰:「人之血氣,固 得者,志氣 老而衰者,血 衰,志氣則 覺者爲主,而使無知者不得肆焉,此聖賢之學,而 方剛,則勇鋭而 動,是 常動而易流,則戒色; 戒得, 也。 無 以 氣 時 年 此志氣之常也。 好勝; 也。 而 君子養其志氣,故不 彌 而 衰 衰。 高 既衰,則 戒 也。 而 苟常持得 於色、戒於鬭 勇鋭而好勝 德 少未定、 收斂而多貪, 彌 變者無知,常 邵 這志、縱 也。」《語 ,則戒鬭; 壯 此 動 血 而 爲 戒 者 血 而 氣 剛 血 於 衰 有 君 常 收 氣

畏聖人之言。 〇孔子曰:「君子有三 畏:畏天命,畏大人,

曰:「畏天命三字好。 能 理 畏者,嚴憚之意也。 已者。 也。 知 其 而付畀之重,可以 可 , 畏,則 自理會得道理,便謹去做,不敢違 天命者,天所賦之正 其 戒 謹 不失矣。 恐 懼 自 **《**語 有 不

是亦一

本而已矣。」〇范氏曰:

「聖人同

於

者

血

氣

也,異於人者志

氣

也。

血氣

有

時

而

之,不爲血

氣

所使 也。

性與

質

其

分焉 理勝

理者,性之藴

血氣者,形之資也。 則心爲之宰,而

隨

時知戒,以 各得

載,是天命之所發 者,是指有位、有齒、有德者,皆謂之大人。」〇愚謂: 不畏。一大人、聖言,皆天命所當畏。 由 須是知得天命即是天理,若不先知這道理,自是懵然,何 是於大人、聖言皆畏之。」問:「固是當畏天命,但要緊又 問:「三畏要緊都在畏天命上?」曰:「然。纔畏天命,自 所以畏天命 便是畏之也。 人,有德位者之稱,是天命之所存。聖人之言,謂方册所 命,則不得不畏之矣。《語録》曰:「大人不止有位 [知其可畏?]曰:「要緊全在知上。 也 如 然亦 非禮勿視、聽、言、動,與夫戒謹恐懼 須理 會 得天命是 纔知得,便自不容 恁 地,方得。」〇 知畏天 皆 大

每,我元也。下和天命,女下我衰里,可共之言。」

誠當然也。小人不務脩身誠己,則何畏所忌憚如此。○尹氏曰:「三畏者,脩己之所。懺如此。不知天命,故不識義理,而無

〇孔子曰:「生而知之者,上也,學而知之

民斯爲下矣。」者,次也,困而學之,又其次也,困而不

學,雖 則下民而已矣。」〇楊氏曰:「生知學知以至 不通,而懵然莫覺,以爲當然,終不知學以求其通 至於昬濁偏駁之甚,而無復少有清明純 後知學,其學又未必無不通也,所謂困 偏駁之多,而不能 也,則亦無不通矣,所謂學而知之,大賢也。 達,其礙易通,故於其所未 粹而不能無少查滓者,則雖未免乎小有間隔,而 明、清濁、正偏、純駁之多少勝負爲差。 胸中者,所謂生而知之,聖人也。 地之性,無所間隔,而凡義理之當然,有不待學而 曰:「人之生也,氣質之稟,清明純粹,絕無查滓,則於天 不同,大約 作,有所窒塞而不得 困,謂有所不通。輔氏曰:「凡心思、智慮、行止、動 其質不同,然及其知之一也。故 有此 無少清明 四 通,則困 . 等。 通者,必 純粹者, 之謂也。」言人之氣 或問:「氣質四等之説。」 其不及此者,則 知學以 則必其窒塞不通 而學之,衆人也 其或得 粹之氣,則 通之,而 或得於昬濁 於清 其 了 也,此 雖 其 間 明 以 君 木 質 有 然 學 易 純 晷 於

子 知 明,偏駁者可使純粹。 本善故耳。 氏曰:「人之氣質不同,然及其知之則 有學焉,此則所謂下愚之民也。」 ,惟學之爲貴。 是以君子唯學之爲貴,學 惟其昬濁之甚,自暴自棄 木 而 不 學, 然 則層 一者,蓋以人性之 後 濁 爲下。」 者 而 可 不自 使 清 輔

○親子曰:「君子有九思:視思明,聽思聰,○孔子曰:「君子有九思:視思明,聽思聰,

思義 曰: 思問 焉,則亦泛然而 件。」〇黄氏曰:「九思固 姦人所欺爲聰。」色,見於面者。 無 視無所蔽,則 。」《語録》曰:「不是雜 不聞。《語録》曰:「視不爲惡色所蔽爲明, 如 列則); 則 一朝之忿,亡其身以及其親,此不思難之故也。」 得不苟。 疑 不蓄。 無 統 明無不見。 矣。 ○程子曰:「九思各 思難 各專其一,然隨其所當 苟 然而思。 能以 則 敬義爲主 聽 當這一件上,思這 忿必懲。 貌,舉 無 所壅,則聰 一,戒懼 身而言。 《語録 謹獨 ,聽不爲 思 專其 而 而 思

> 道也。」 雖有不存焉者寡 「九者之則,義理 未至於從 容中 一曉然。 矣,此 道 纔思,則不差矣,故 無 之 時 謂 而 思 不 誠 自 省 省 察則 胡氏 察 能 也 \Box 中

見其人矣,吾聞其語矣。探,吐南反。 ○孔子曰:「見善如不及,見不善如探湯。 皆惡,而無一念之不惡,不患其或爲之矣。 真知善惡而 誠者能之,故顔、曾、 蓋能之矣。 念之不好,不患其不爲之矣。 輔氏曰:「見善如不及,則表裏皆好,而 誠好惡之,顏、曾、閔、冉之徒, 閔、冉之徒,足以當之也。」語 見不善如探湯 此 唯 知 則 至 表 吾 意 裏

矣,未見其人也。」

隱居以求其志,行義以達其道。

吾聞其

語

古語·

也

足。 所求之志 求其志,守其所達之道 行義,是得時得位而行其所當爲。 也。 **《語** 録》曰: 隱 也。 居以 達 求之,使 臣之事君,行 其道 一, 行 其道 其 其 充

無頃刻之失,然後爲能隨其所當思而思矣。」謝氏曰:

問 : 正以事言,非論其德之淺深也。然語意之間誠有如所論 乎此」,下語輕重抑揚處,疑若於顏子少貶者。」曰: 所當 堯舜之君,使是民爲堯舜之民,是「行義以達其道」。」○ 堯舜之道,是『隱居以求其志』。 及幡 夫子言然。《語録》曰:「如伊尹耕於有莘之野,而 庶乎此。 尹 、太公之流,可以當之。 「顏子所造所得,伊尹、太公恐無以過之,而云『亦庶 爲 而已。 然隱 行 所當爲,以 耐 未見,又不幸而蚤死,故 達 其 所 當時若顔子, 求 然而起,使是君爲 之志。」蓋 「當時 惟 亦 伊 樂

伯夷、叔齊餓于首陽之下,民到于今稱之。 ○齊景公有馬千駟,死之日,民無德而 首陽,山名。 駟,四馬 也。 胡氏曰:「首陽山 胡氏曰:「駟,一車之用兩服兩驂也。」 ,在河東蒲坂縣。」 稱焉。

者,更俟詳之。」

其斯之謂 胡 富,亦祗以異」,當在 氏曰:「程子以爲第十二篇錯簡 與? 與,平聲 此章之首。 『誠 今詳

不

以

文

,似當在此句之上。言人之所稱,不在

此説近是,而章首當有孔子曰字,蓋 於富 言餓于首陽。 而 在 古人引詩斷章,不必用詩之本指 於異 也。」愚謂: 富是言 有馬 干 駟 闕 愚 **異** 謂 是

耳。 大抵此書後十篇多闕 誤。

音剛。 ()陳 亢問 於伯魚曰:「子亦有異聞 乎?」亢

對曰:「未也。 學詩乎?」對 亢以私意窺聖人,疑必陰厚其子。 曰: 『未也。』 『不學 嘗 獨 Ì, 鯉 趨 而 過 詩, 庭。 無 \Box 以

言。』鯉退而學詩

學禮。 對 曰: 他日又獨立,鯉 塞之患,心氣和平,則無躁急之失。 使人不絞不託,故學之者心氣和平。 本人情 事理通達,而心氣和平,故能言。 『未也。』『不學禮,無以 ,該物理,故學之者事理通達。 趨 而 過 庭。 曰 : 此其所以 事理 其爲教温 立。」鯉 『學禮乎?』 通達,則 輔氏曰: 能 柔敦 退 無唇 「詩 而 厚

輔 氏

日

禮

此類者,不知

何謂。

或

古有之,或夫子

定。 明。 著見者也 義言; 物莫之揺,此其所以能立。」○愚謂: 品 有三千三百之目,其序截然而不可亂,故學之者品 節 品節詳 其爲教恭儉莊敬,使人不淫不懾,故學之者德 詳 和平堅定,以學詩禮者之效言, 明,而 明,則義精而事莫之惑,德性堅定,則 德性堅定,故能 通達詳明,以 立。 興與立,又其效之 詩禮之 守固 性 節 而 堅 詳

聞 斯二者。」

當獨立之時,所 聞 不 過 如 此, 其 無 異 聞

可

知。

君子之遠其子也。」遠,去聲。 陳亢退而喜曰:「 問 得三,聞詩, 聞禮,又聞

尹氏 曰:「孔子之教其子,無異於門人,故

君; 童 ; 邦 陳亢以爲遠其子。」 異邦人稱之亦曰君夫人。 邦人稱之曰君夫人,稱諸異 君之妻,君稱之曰夫人,夫人 邦 自 \Box 稱 寡 曰 小 小

寡 ,寡德,謙辭。 吴氏曰:「凡語 中 所 載 如

> 論 語卷第八

不審,故孔子正言其禮

言之,不可攷也。」愚謂

當

時諸

侯嫡妾不正

後 學

成德 校訂

朱子集註 後學趙順 孫纂疏

陽貨第十七

凡二十六章。

時其 陽貨欲見孔子,孔子不見,歸孔子豚。 亡也,而往拜之,遇諸 塗。 歸,如字,一 作饋。 孔子

國政。欲令孔子來見己,而孔子不往。 陽貨,季氏家臣,名虎。 嘗 囚 季 ,桓子 而 貨 專

子 拜其門。 來 拜 而見之也。 故矙孔子之亡而歸之豚,欲令孔

以

禮,大夫有賜於士,不得受於其家,

則往

謂孔 子曰:「來! 予與爾言。」曰:「懷其寶

論

語

卷第九

好、亟、知、並去聲。 矣、歲不我與。」孔子曰:「諾。吾將仕矣。」 而 而 迷 亟失時 其 邦, 可謂 可謂 知乎?」曰: 仁乎?」曰 : 示 「不可。」「日月逝 可。」「好從

事

速仕。 與夫子言,亦未嘗悖 非不欲仕,直不可仕於貨之意也。 理而答之」也。『不復與辯』者,不與 亟失時,則惜之矣。 輔氏曰:「君子未嘗不欲仕,曰『吾將仕矣』,此所謂『據 故直據理答之,不復與辯,若不諭 如 我而爲我少緩乎? 老,可以有爲之日月已過矣,歲 且. 懷 集註 亟,數也。 此,而 然而 寶迷邦,謂 》所謂「諷使速仕」,亦謂是也。其語意蓋謂 黄氏曰:「『日月逝矣,歲不我與』,此陽貨之言 未必之辭。 亦非不欲仕也,但不仕於貨耳 失時,謂不及事幾之會。 懷藏道德,不救國之迷亂。 是亦諷使速仕也。」孔子固未嘗 曰仁、曰知,則 違 乎 理 貨 也。 語皆譏孔子 運 \Box 而 亦嘗 蓋陽 懷 辯己固未嘗如 往其去甚速,豈 寶 聞其説,而 虎 則 雖暴戾,然其 貴之矣。 其 而 將者, 意 夫子既 誳 此,亦 者。 復與 非 使 懵 日

653

六三七

禮也。 理合當如此。 也。 之直 塗而 古 也,必時其亡而 亦 亦鷳亡而往 爲亂也。」故孔子不見者,義也。 不見,及見孔子而諷使速仕之説,則知其不過欲 然全不曉矣。 有敬愛聖人之心,則知其爲善意。 欲使助己爲亂耳。 也。」〇陽貨之欲見孔子,雖其善意,然不 不可執其 稱,但孔子不幸遇諸塗耳。』〇輔氏曰:「禮無不答, 據直理答之。若夫聖人之心事,則非虎之可知而 《語録》曰:「問:「陽貨之矙亡,此不足責,如 也。 不避者,不終絶 必時其亡而往者,欲其稱也。 雖 貨雖假禮,夫子自行禮以答之也 節 對 ,則不幾於不誠乎?」曰: 「非不誠 縦 彼以矙亡來,我以矙亡往,一 此固 横 往焉,則又時措之求其稱也。」〇又曰: 而不 而論也,必周 曲 聖人盛德之容儀,有以感之, 折 辯者、言之孫 ,千條 輔氏曰:「觀其懷實失時之説 也。 萬緒 旋反覆而觀之,然後爲盡。 隨問 然 觀其欲見孔子而孔子 無非 而 其 而 往一 義 亦無 對 往 理之當 欲其 也, 來,禮甚 者 拜 ,故夫子 遇諸 使 所 (往拜 孔 者, 據 助己 可 然 理 . 過 詘 道 子 語

> 不爲詘。 此雄之所以黽勉於莽賢之間而不去也。」 則 身乃道之所會也。 不自失,非聖人斷不能如此。」〇輔 孔子乃見之,亦近於詘身。 吾未之信也。」《語録》曰: 外無身,身外無道。 不敬,爲詘身以信道。 備。」楊氏曰 誠,信也。 絶者,仁也; 愚亦謂不自 道詘矣,若曰 到與他說話時,只把一兩字答他,辭 只此一 隨問 往見者,義也; : 揚雄 詘身以 而答、對 身外無道者,道乃身之所出 事 而 信 五性 謂 道 而不辯者,智也 時 却不知聖人是禮合去見他 身詘矣而可以信道, 孔子 其亡而 , 則 具焉,夫然後見聖人之全 非知孔子者。 「陽貨是惡人,本不可見 是離 氏曰: 於陽貨也,敬 往拜 身與 者,禮 「道外無身者 道 四 爲 温 也。 者 氣厚而 物矣。 蓋 身詘 出 不終 道 所

此所謂性,兼氣質而言者也。○子曰:「性相近也,習相遠也。」

地之性 此 所以生物者,理也,其生物者,氣與質也。 性。」曰: 近所謂 存焉,故氣質之性 「張子有言: 性,兼氣 質 『形而後有氣質之性,善反之,則 而 君子 言者 有 弗性 也。 者 或問: 馬。」蓋 人物得是氣質 天地 氣質之 天

若生 之理 質之性 此 偏 以本然之性不離乎氣質之中,故《集註 極 天性則無所成。」〇又曰:「質並氣而言, 盛之,則水無歸着。」〇又曰: 命之性若無氣質,却無安 義,有餘於禮而 氣質所稟,却自 言之矣。」曰: 也。 性 謂 不 以 、易大傳》詳矣。」○《語録》曰:「性是天賦與人,只 所 善 有 生 IE. 成 所謂 質 若夫子此章論性,而 ,則純 形,而 謂性固 功於聖門,有補於後學,讀之使人深有感。」〇愚謂 質之性、所稟之性,所謂才者,皆謂是也。 純駁、昬明、厚薄之不齊,故性之在是者,其 程子所謂 ,則是資質之質。」○又曰: 」, 固 粹 氣質之性者也。 其 不 (理之在是者,則謂之性。 至 「然則夫子不言性之本,何 可 有美惡之不 不足於智,便自氣質上來。」〇又曰 有厚薄。 善而已,所謂天地之性者也。 性之本,所謂極本 即 指爲本然之性,然其所以 頓 以 人只是一般人,厚於仁而 告子所謂生之謂 處。 相近爲言,則固指夫氣 性非 一同矣。 且 「氣質之説起於張、程, 窮原之性 - 氣質 如一勺之水,非 然所謂氣質者 デ 然 則是形質之質。 則無所寄,氣非 也?」曰: 以 一兼字。 相近 皆謂 性、程 然其 孟 其 子 爲 者,正 初 質 品 有 所 本 薄 此 子 同。 一天 「於 氣 而 物 於 īfīī 者 謂 妖 所 有 亦

> 明, 言耳。 相 若言其本,則性 程子曰: 善而失其惡也。 言 謂 之,則性之善者,或習於惡而失其善, 曰:「自其常者而言之,則性之善者,習於 言性善是也,何 於惡則惡,於是始 性相 不兼乎氣質而言之也。 近,是氣質之性。 則 性之惡者,習於惡而 近,以氣質言。 理 皆不 刊天 「此言氣質之性,非言性之本也 地 甚 凡是四 人物一 相 即 相 本然之性一 性善,以理言。」○輔氏曰: 遠 而已矣,謂之同 相遠 是 近之有哉?」《語録》曰:「性 者,始皆 日流乎汙下也。 也。 既不兼乎氣質 理,理 耳。 但 般,無相 相近 習 無 或問: 性之恶者,或習於 於 而終則遠矣。」〇 不善,孟子之 ,謂之一,則 則 善 自其變者 善 近。二〇又曰 「習之相 純 而 則 指乎理 日 性之本 善 進 言已 遠。」 而 乎 習 耐 高

○子曰:「惟 此 美惡 性 承 一相近,是通善惡智愚説 Ė 章而 定, 上知 而 言 非 與下愚不 習之所能 人之氣 Ŀ 智下愚,是就中 質 移 移 相 \。」知,去聲 者。 近之中, 《語録》曰 摘 出 又有 懸 絶

贅矣,又何相近之可言哉?」

性 這道理。 堯、 自 異而不害其爲同。」二〇又曰:「拒之以不信,只是説 却自有不移底人,如堯、舜不可爲桀、紂,桀、紂不可 何也? 程子無不可移之説,似不合。」曰:『且看孔子説底。 【《集註》謂:氣質相近之中,又有一定而不可易者,復舉 下 者,商辛 非必昬且愚也,往往 能化而入也,仲尼之所謂下愚也。 也。 者説。」○ 不信,自棄者絶之以不爲,雖聖人與居,不 之至,皆可 愚之不移。 成而 [暴者,有 .舜之類。 愚,然考其 人苟以善自治,則 至於相遠,則固 絶之以不爲,是知有道理,自割斷了,不肯做。 程 彊悍意。 是 語 夫子説底只如此,程子却又推其説,須知其 子曰:「人性本 漸 也 其 所謂 歸 磨 性 自 聖人 而 則 則 有不移之理。 棄者,有懦弱意。」〇又曰: 下 進 誠 皆善也 愚有二焉: 也。 以 愚也。」《語録》曰: 一彊戾 其 無不可移,雖 惟自暴者拒之以 自 , 語 善,有不可 而才力有過人 然人性本善, 絶於善, 其 自 才 然其質 暴 則 謂之 「習與 問: 昬 自 有 移者 雖至 使爲 如今 道没 愚 棄 下

> 之理? 害其爲一時之言也。」 兩意,故着二子曰字,以 蓋衍文耳。」輔氏曰: 惡之人,一 也。」或曰:「此與上章當合爲一,子曰二字, 程子所謂「雖 日 | 而能 徒善 戾如商辛之人,亦有可移之理』是 分其 ,則爲一日之善人,豈 「此必一時之言,但録之者以其 章。 然兩章 既 相 有終 承,則 不 亦不 可 移

合樂曰歌,人聲絲聲皆堂上之樂也。」 教,故邑人皆絃歌 絃,琴瑟也。 時 子 也。 游 爲 黄氏 武 日 城 宰, 「絃歌 以 , 絃且 禮 樂 歌 也 爲

〇子之武城,聞絃歌之聲。

版反。焉,於虔反。夫子莞爾而笑,曰:「割雞焉用牛刀?」莞,華

道 子 游 則愛人,小人學道則易使也。」」易,去聲 君子小人,以位言之。 對 曰 :「昔者偃 也 聞 諸 子游所稱,蓋夫子 夫子 Ė 君子 學

上矣。上撫乎下,下順乎上,安有不治者乎?」故武城能學道,則知撫乎下矣。小人在下者能學道,則知順乎曰:「上撫乎下,下順乎上,此道之當然也。君子在上者

以叛。

雖小,亦必教以禮樂。

寬廣樂易之氣象。學者所宜深加玩索也。」 IE 聞 衆人多不能 專於刑罰 飲、豈謂 也。 嘉子游之篤信,又以解門人之惑也。○治 有大小,而其治之必用禮樂,則其爲道一 對,故復是其言,而自實其戲也。 一而深喜之,因反其言以戲之。 輔氏曰:「治之用禮樂,如飢之必用食,渴之必 《集註 小邑寡民而可 前 》章末之説,則於其辭氣抑揚之間,真得聖 民 用,而 無措其手足矣,豈聖學之所尚邪?」但 無以 子游獨 禮樂爲哉? 行之。 舍禮樂則必 而子 故夫子 輔氏曰: 游以 驟 人 將 用

〇公山弗擾以費畔,召,子欲往。

弗擾,季氏宰。與陽虎共執桓子,據

邑

也。」說,音悦。 子路不説,曰:「末之也已,何必公山氏之之

山氏之往乎? 末,無也。言道既不行,無所往矣,何必公

吾其爲東周乎?」夫,音扶。 子曰:「夫召我者而豈徒哉? 如有用我者,

不得爾。二〇輔氏曰: 只是常法,聖人須有措置。1問: 『如此,則必大有所更 便不當畔季氏,所謂改過者,不過於臣順季氏而 自不可測。 過自新,舍逆從順而已,亦如何便興得周道?」曰:"聖人 否?』曰:「聖人須驚天動 於東方。《語録》曰"「此是古註説。」〇又曰" 豈徒哉,言必用我也。 『公山弗擾果能用夫子,夫子果往從之,亦不過勸 且是時名分亦未定,若謂弗擾既爲季氏臣 「魯在周之東,故云爾也 地。 爲東周,言興 然卒於不往 者,亦 料其 己。 得 (周道 一問 他 此 張 改

也。」〇程子曰:「聖人以天下無不可有爲之 人,亦無 小成苟就之事,如 不 可 改過之人,故欲 獲用焉,不 興周 道 往 以 繼文武,不 然 而 終 已

不

也。

惠。 有功,惠則足以 天下,爲仁矣。」請問之。 子張問仁於孔子。 往者,知其必不能改故 恭則不侮,寬則得衆,信則人任焉,敏則 使人。」 孔子曰:「能行五者於 曰:「恭、寬、信、敏、

是五者,則 揆之於理而合,故曰 主於五者,則本心不失,故曰 行是五者,則心存理得,而仁不外是也。]○胡氏曰 也,信則仁之實也,敏則仁之力也,惠則仁之澤也 所具之理 則無悖繆之失,而事之理常得。]○輔氏曰: 五者,則無非僻之雜,而 行是五者,則心存而理得矣。 所謂 ,而仁之發也。 固 心存 雖之夷狄不可棄者。 而 理 理得矣。 得。」於天下,言 心之德常存。 蓋恭則仁之著也,寬則仁 心存。 然是心一 以是五者施之事 以五 黄氏曰:「心主於 有 間斷之時 輔氏 無 「五者皆吾心 者而施之事, 適 E : 而 一之量 故 心 一行 則 則 不 能

> 問行而告以忠信,則疑其不足於信也。 必自 亡矣。 所不足也。」任,倚仗 不足於惠也。 倦,則疑其不足於敏也。 足於恭也。 之綱領也。 其 「五常百行,何莫非仁? 言耳。」○又曰:「堂堂乎張也,難與並爲仁矣,則 所不足而言耳。 八理周 是理一 家 遍,而仁之體用舉矣。」五者之目,蓋因子張 愛之欲其生,惡之欲其死,疑其不足於寬也 今特以此五者言之,故以爲因子張所 或 五者 有虧闕之處,則失矣。 以至於天下無適而不然,然 咸備 輔氏曰:「仁道無所不 也 則 以 加 % 語 獨以 在子張爲仁矣。」〇胡 至於色取仁而行違,則 録》日 是言,故疑其爲子張之 故其行是 問政而告之以 任 ※後 其 是堪 ·該,乃 五 心公平 倚 疑 不 氏 者,又 疑其 萬 其 足 曰 不

使,此 是而驗之。」〇張敬夫曰: 力於事,而 容,故能得於人,信則識實於己,而人知所倚仗, 其效如此。 〇又曰: 也。」〇輔氏曰: と皆以其效言也。」○胡氏 「任,如謂任俠者,是 功 無 不成; 黄氏曰: 「恭則 無 惠 通 則有 不 敬 指『恭則不侮』以下五 故能 能 日 以 「能 爲 浹 「併及其效者,欲其 人擔 洽 不侮於人; 行 於 此 當 人心, 事 Ŧi. 也。」 故 者 寬 則 句 於天 敏 又言 皆 則 '而言 無 專 不

寬、 者不知 與? 蓋恭則此心收斂,不至於放縱。 下 則 敏 此味 輔 其 惠, 氏 心 也。 曰:「所謂 公平 自有所不能已者。]〇胡氏曰: 所謂恭其本與 而 其心 周 徧 公平而周 者,所以 口 此 知 心收斂不放縱,則夫 偏者,非體仁之深 指 然恭 示學者尤 「謂恭其 其 切。 本 本

黨

也

後文體大不相似。」 章與六言、六蔽、五美、四惡之類 者,四者皆以 事言 一, 而 恭則切於身也。」李氏 輔氏 日 : 「李氏於文體 ~, 皆 \exists 亦 與 此 可 前 謂

○佛肸召,子欲往。佛,音弼。肸,許密反。密者,此必記者有工拙之不相同也。」

佛肸,晉大夫趙氏之中牟宰也。

之往也,如之何!」 一爲不善者,君子不人也。』佛肸以中牟畔,子子路曰:「昔者由也聞諸夫子曰:『親於其身

正恐其污己也。此固子路之所知也。至於人之不善不行。輔氏曰:「所謂「親於其身爲不善,而君子不人」者,子路恐佛肸之浼夫子,故問此以止夫子之

夫子之行耳。」親,猶 自 也。 不 人,不 人 其能浼聖人,則非子路之所能知也。故引此爲問,欲以止

磷,不曰白乎,涅而不緇。 子曰:「然。 不度德,不量力,輕舉 可者,聖人之事也。 磷, 者,幾希。」輔氏 堅白不足,而欲自試 之待陽 自有以處之。在上則或若堯舜之待三苗 浼於聖人? 日 浼 經聖人照臨之,則大者革心,小者革面之不暇,何至 Ĩ. 薄 磨不磷,涅 貨、公山 也。 輔氏曰: 若夫昬頑之至,不可 有是言也。 涅,染阜物。 佛肸,亦豈 「聖人道大德洪,所過者化。 日: 堅 妄 白不足而 不 「磨不磷 動 緇 始欲自附於聖人,而 於磨涅,其不磷 能 不曰 而 磷,力忍反。 言人之不善,不能 浼 欲 涅 以常理化者 後 於聖人哉?」楊氏 自 不緇 回堅乎, 試 無 於磨 而 可 ,在下則若夫子 涅,乃結反。 後 無 涅 ,則聖人又 人之不善 磨 無 不可。 終 則 可 緇 而 則 後 無 也 不 世 不 陷

吾豈匏瓜也哉? 焉能繫而不食?」焉,於虔反。

其身於不義之流也。」

終不往者,無可 佛肸之召,夫子欲往者,無不可也,不絶人之仁也。 發明之。生物之仁,天地之心,無所擇也。 人之事,有所别也。 而未可遽行也。 之常法,學者所當謹守。 生物之仁,一 佛肸之召皆欲往者,以天下無不可變之 言,聖人體道之大權也。 之所聞,君子守身之常法。 匏, 人之終不可 走以餬其口於四方者,往往借是言以自況,失聖人之旨 慮,自當見之於用而有益於人,豈微物之比哉? 動,不食則 人,無不可爲之事 則不如 此不可以不辨。」〇張敬夫 瓠 也。 是 無所 也。 匏 也 知。 變而事之終不可爲 至於論聖人之仁智,則又因程子之説而 則知人之智也。」輔氏曰: ,明庶物之知也。 瓜繋於一 黄氏 二者蓋並 吾乃人類,在 日 : 也。 體道之大權,則學者所當 「 匏 其卒不往者,知其 行而不相悖焉。 處 瓜 然夫子於公山、 天地間 蠢 而 自聖人觀之,則 曰:「子路昔者 夫子今日之所 然 不 能飲食,人 物,繫 知人之知,聖 耳。 能 動作, 夫 弗 擾、 刻 世之奔 固 然而 「守身 致知 不 有 則 無 思 能

聽之藐藐,則在人者有不可教也。」也。上之人不我用,則在事者有不可爲也。誨之諄諄,也。上之人不我用,則在事者有不可爲也。誨之諄諄,遇則有不可必者。天未欲平治天下,則在時者有不可爲不可爲之時,亦無不可爲之事,亦無不可教之人,然其所

曰:「未也。」女,音汝,下同 〇子曰:「由也,女聞六言六蔽矣乎?」對 所以 遮掩其正理也。」○胡 蔽 也。」〇輔氏曰: 孟子言詖辭知其所蔽,詖者,跛躄之類 倚於 遮掩 一偏 也。 者,見彼 「其所以 黄氏曰: 氏 日 遮掩 偏 「遮掩,言 而 亦 者, 不 猶 見 謂各隨 爲物所 此 有 謂 偏 所 遮掩 其 不 意之所向,以 倚 是 於 見之謂 僅 有 得 所 偏 遮 其 也 也

「居! 吾語女。語,去聲。

偏

而

不見其全體

也。

路,使還坐而告之。 禮:君子問更端,則起而對。故孔子諭子

蔽 蕩; 好仁不好學,其蔽也愚; 也 **絞**; 好信不好學,其 好 勇不 好學,其蔽 蔽 也 好 賊 知 也 好 不 亂; 直 好學,其 不 好剛 好學,其 不好 蔽 也

學,其蔽也狂。」好、知,並去聲。

古

貴。」愚,若可陷 而 不好學,則蔽於不屈而或至於爲狂,是以君子惟學之爲 人之私,好勇不好學,則蔽於敢爲而或至於作亂, 則 則蔽於通 仁不好學 蔽,是以其發也,皆失其當然之則,而又陷於惡焉。 之而不知學以明其本然之理,則隨其意之所向而各 有夫當然之則矣。人之好之,是秉彝之良心也,然徒好 學以明之,則存於中者固有夫本然之理,而發於外者固 知、信、直、勇、剛之六言也。 其一,未有不流於一偏者也。」○輔氏曰:「六言,謂仁、 目 德也,又必學以明天理者,何 則各有所蔽。 重淺深,當施不當施之間,其理固 六言皆美德,然徒好之而不學以明其 蔽於固守而賊 [而篤好之,不復務學以究其理之曲折,則見其 無 所 咋 ,則蔽於愛,而爲可陷可罔之愚,好知不好學, 一而爲 第高 賊 害於物; 黄氏曰: 可罔之類。 極 謂 廣而 傷 好直不好學,則蔽於徑行而訐 害於物。 不知止之蕩;好信不好學, 「仁、知、信、 也? 是六者,皆人之美德,苟能 多端也。 六者,德之大目耳, 蕩, 謂 輔 直 氏 窮高 今但見其大 勇、剛, 日 「人若 極 好剛 故好 1有所 耐 皆 理 廣 蔽 輕 美 《詩》,可以興

也,宜矣! 爲善,且嘗 也。」輔氏曰:「范氏就子路身上發明得好。 之者,未能 故特釋之。」〇范氏曰:「子路勇於爲善,其失 氏曰:「此狂字與狂狷之狂又不同,躁率則近乎剛惡也, 레 日 有剛有柔而已,勇則剛之發出者也。」狂 執,必信而不知學,則必至害物。」勇者,剛之發。 勇、曰剛、曰信、曰直,又皆所以救其 者,勇之體。 有何必 日 勇、 日 好學以 讀 輔氏曰:「人之資稟得於陰陽者,唯 剛、 書之説,則其 曰信、 明之也,故告之以 曰直,●又皆子路氣質之 失在 於未能學以 躁 率 子路勇 也。 此。 明 偏 善 以 輔

○子曰:「小子! 何莫學夫《詩》?夫,音扶

偏,故夫子特告之。

小子,弟子也。

感發志意。《語録》曰: 人,自然有感發處。」 〇 輔 氏 「須是反復讀,使書與 日 「詩 所以吟 咏 情 性 心 故 相 乳 可

0 日 直, 原 闕「曰」字,據文義

以感人之志意。志謂心之所之,意謂心之發動處也。」

可以觀,

失也。」 以 風,言天下之事,有古今治亂之變,人情物理之微 己,然後四語皆一 得失,亦可通。 觀則似指《詩》而言,謂可考詩人之得失也。 考見得失。 觀。 所謂 考見得失者, 黄氏曰:「興、群、怨,皆指學《詩》者而言, 下文既有多識,爲此以識彼,則此觀 意也。」〇輔氏曰: 合於理則 《詩 爲得, 》所以形四 悖 然以爲觀己 於理 故可 則 方之 爲觀 爲

可以群,

平,然止乎禮義而未嘗流失,故可以群。」 以至於流,則又失己。 和 而 不流。 輔氏曰: 《詩》之言,雖發乎 「群居之道雖止於和, 情 性 和而 而 温 無節 厚 和

可以怨,

皆怨,而各當乎理』者是也。」 思,則失之疏,怨而至於怒,則又失之過,而或至於傷物。 思,則失之疏,怨而至於怒,則又失之過,而或至於傷物。 是以,則失之疏,怨而至於怒,則又失之過,而或至於傷物。

君子。」

邇之事父,遠之事君。

通、曰遠,則所包者闊矣。」 五者之中,君臣、父子又其重者,故特舉而言之。其曰氏曰:「父子、君臣、父子又其重者,故特舉而言之。其曰氏曰:「父子、君臣、父子又其重者,故特舉而言。輔

多識於鳥獸草木之名。」

盡其道,多 無 其緒餘又足以資多識。○學《詩》之法,此 而於事無惑。 心焉,則有以感發其志意而爲善不懈,有以考見其得 章盡之。 人情之微; 「《論語》之論及《詩》者多矣,而惟 一或遺,學《詩》者其可以不盡 以至邇之事父,遠之事君,則於人倫之際,各 識 讀 於 和 是經者,所 鳥 而 獸草木之名,則 不 流 ,則得群居之道; 宜盡 心於此? 此章爲備,反覆周 可 心也。 以 怨而不怒,則 爲 博 苟 物 於 輔氏 治聞 此 而 日 悉 之 盡 失 盡

人 也 〇子謂伯. 而 與?」女,音汝。 不 爲 《周 魚曰:「女爲《周南》、《召南》矣乎 南》、《召南 與,平聲。 三》,其猶 IE. 牆 面 而 立 ?

之事 牆 也? 文王之化自内及外如此,則其脩身之事固在其中矣。」正 化行於江、漢之域,自 之詩,言文王后妃閨門之化,《召南》之詩,言諸侯之國 人、大夫妻被文王后妃之化而成德之事。 詩》之正 面 「二《南》之詩,於文王齊家之事則見之矣,至於脩 猶 則未嘗及也,今乃謂所言皆脩身齊家之事者, 티 : 或問:「二《南》何以爲《詩》之首篇。」曰:「《周 而立,言即其 步不 學 身者,家之本 風也。」所言皆脩 也。《周 可 行。 北 《語 也。 南》、《召南》,《詩》首 至 而 南,故 録 近之地,而 聖人之化未有不本於身者, 》曰:「問: 身齊家之事。 其 樂 章 岩 蓋文王治岐 以 一物 南名之, 不脩身 無 輔 南 篇 所 氏 齊 何 蓋 身 夫 而

乎?」問:『此可見知與行相須之義否?』曰:『然。」見?』曰:『自家一身一家,已自都理會不得,況其遠者家,則自然推不去,是一步不可行也,如何是一物無所見,一步不可行。《語録》曰:「問:『若不脩身齊見,一步不可行。《語録》曰:「問:『若不脩身齊見,一步不可行。《語録》曰:「問:『若不脩身齊見,一

敬而將之以玉帛,則爲禮;和而發之以鍾云,鍾鼓云乎哉?」

蓋

必有總屬

必相

聽

順

乃能

爲

盜

。不然,

)子曰:「禮云禮云,玉帛云乎哉?

樂云樂

帛,五 鼓,則 不 兩 少 箇序,樂只是一 以玉帛爲禮,鍾鼓爲樂。] () 將之,樂之本在於和,假鍾鼓以發之。周末文滅其質,但 之大者也。 [云乎哉]者,猶言此不得謂之禮樂也。]○胡 可謂禮樂之全。 樂之謂哉? 有本有末,玉帛、鍾 至於徒事其 播之於外者也,樂之末也。 和者在中之樂,樂之本也,鍾鼓則樂之器,所以發吾 帛則禮之器,所以將吾敬 和 義 椅,一不正,便是無序。 玉三帛,禮 理。 爲樂。 又 非玉帛無以爲禮,非鍾鼓無以爲樂。 如盜 天下 (末, 而 苟惟專務其本,而不事於末,固爲不可 文之重者也。 輔氏曰:「敬者在中之禮,禮之本也 遺其本而專事 一鼓、末也。 反 無 賊 箇 遺 至 其 和。 而 爲 物 本,則又豈 本末具舉,内外兼 程子曰:「禮 播之於外者也,禮之末 不 無 禮之本在 只此 鍾,金聲; 道 禮 無序 樂。 然 兩 其末,則 所 於敬,假 謂 亦有 字,含蓄 鼓,革聲, 便乖,乖 且 禮樂者 氏 備 只 如 禮 曰:「玉 · 夫 然禮 玉 置 是 贵 樂器 哉? 帛 和 便 此 多 也。 玉 禮 以 而

愚謂: 是就事上 己。 氏曰: 謂 樂 言,至於盜賊亦 體 不特見於玉帛鍾鼓之間。 有人心之敬與和,則見於事理者,始 和 同,雖言和 程子主於序,二説之不同 則 程子欲人知禮樂之理無所不在, 集註 禮 會 ,主人心而言 無 叛 樂也。 人能 隨 》之言樂則同主於和,至於言禮 亂 朱子以敬 處 「禮樂之本,雖細微之事,凶惡之人,一皆有之,蓋 處受用, 説。 識 無 無 則 然序和 得 之,學者須 統 同,而 二説相須 此箇禮樂, 有 與 也。 ·然其實不出序與和二字也。」〇胡 不 禮樂,姑借 和言,是就心上 二字尤親切,又見禮爲樂之本也。]〇 所以爲和 程子之序與 能 ,其義始備 ___ 則知天下無一 要之,只是箇序與 ,何也? 要 日 其近 亦 識 相 不同 八和,主 旦粗 説 得。」 聚 티: 然學者紀録,雜以 也。 有序而和矣。」〇 則 而 程子以 者極言之,非真 事 不 黄氏曰: 物無禮樂, 《集註 爲 理 但 集註 盜 一而言 和 一敬與序之不 序與和言 底 》主於敬, 也 》之敬 也。 道 氏曰: 「程子、 隨 理 禮 然 所 方 與 處 輔 而

也與?」在, 色厲 而審反。 而 内 荏 ,譬諸小人,其猶 與,平聲 穿窬

厲 ,威嚴也。 在,柔 弱也。 小人,細民也。

委曲遷就 者,務合乎

似乎

,理而

實

非

理。

使人之爲善者,莫知

乎

理

乎德,故以爲德之賊

而

深惡之。

黄氏日

理者也。

鄉原求媚

於

世,則

不必

皆合乎

理

而

畏 穿,穿壁。 人知 也。 窬, 語 録》 踰 牆 日 爲他 言 其 意在 無 要瞞 實 盜 人,故其 名, 而 心 常

〇子曰:

鄉原,德之賊

也

怕人知

,如做賊然。」

汙以 中,獨以愿稱也。」夫子 流合汙,不 之所在,故是非錯繆而稱之以爲愿也。 氏曰:「其稱原人而 言之意。」鄉原,鄉 曰:「原,若如字讀,則無義,故依 與愿同。 言也,故曰 鄉者,鄙俗之意。 言美矣,鄙之爲言俗 媚於世,故 敢少 我猶未免爲 《荀子》原慤,註 異 於 必加之以鄉者,以 也。 入, 在鄉人之中,獨以 人之愿 鄉 黄氏曰:「 以 而又居之似 然則 人也。 其 鄉 者 似德 者,亦鄙之類歟?」原 《荀子 讀作 亦 也。 鄉之得名, 猶都鄙之稱, 忠信, 見其鄙 非 》讀 愿是 而輔 蓋 德, 作愿, 其 故 氏曰: 本以鄙 俗, 愿 也 在 而 同流 稱 鄉 非 愿 都 反 人之 公論 之爲 其 有 輔 俗 亂

謹

氏

合

黄

同

也。 夫子所以深惡之也。」〇胡氏曰 自,蓋使人視之似廉潔,然實非 之正,是天下之正 一,鄉原不欲爲廉潔以異俗,故 故貪夫不足以害夫廉,似廉非廉者,乃所以害夫廉。 理反 爲 鄉原 所 廉潔,而反以害廉潔之正 亦同乎汙俗,而外爲説以 害 「賊,害也。」詳見《孟 也。 如 廉潔, 理 之正

子》末篇。

)子曰:「道聽而塗説,德之棄也。」 字爲一意,只是箇輕聽易説而已。 道也。 此,甚爲的當,但於道聽塗説少分別耳。 日: 説,則棄之矣。」輔 與上章「德之賊」文勢相類,彼似 而不知爲己,則是自棄其德矣。」○胡氏曰:「德之棄」, 日 雖聞善言,不爲己有,是自棄其德也。 聞 「君子多識前言往行以畜其德,道聽塗 此可以 若是既聽道塗之説,而復以道塗言之,務以悦人 一善則當畜之於己,以成就其德,此學問 進 德 而不進,故云『德之棄』。」〇王 氏 曰:「王氏引《大畜》之象以 德而亂德,故云『德之 其 意似以 自脩之 輔氏 氏 四 解

○子曰:「鄙夫可與事君也與哉? 與,平聲。

大廉。 一人,是惡。陋,謂猥瑣。劣,謂恳不能得之。」胡氏為之正 其未得之也,患得之,既得之,患失之。 以是惡。陋,謂猥瑣。劣,謂昬弱。四者皆鄙也。」 以是惡。陋,謂猥瑣。劣,謂昬弱。四者皆鄙也。」

E :

苟患失之,無所不至矣。」 「蓋如「有周不顯,帝命不時」,語急而文省耳。」

於道德,則功名不必外求而得,其 志於富貴,即孔子所謂 心, 志於富貴而已者,則亦無所不至矣。] 累其心; 之品大概有三: 志於道德者,功名不足以 家。」○胡氏 至矣,小則吮癰舐痔,不惜身命,大則弑父與君,禍 徼幸,乘間抵戲,然其惡猶有底止 與之事君也哉? 患得患失,則惟利欲是徇,而不復顧理義之所在矣,其 失而已。 小則吮 癰 輔氏曰:「此解『無所不至矣』一句 志於功名者,富貴不足以 舐 曰:「許昌 痔,大則弑父與君,皆 然其患得也,則求以得之而已,雖 靳 鄙 裁之有言曰:『士 或終無所 也。 夫 也。」輔 至於患失,則 成,則 氏日 生於 亦全吾 累其 及國 行險 患 夫 可 不

士也。 志,故得失之爲患,至於如 則爲,不得爲則不爲,不害於道德也。 胡氏曰: 道 視功名爲重,則富貴爲輕也。 所以若此。 於無所不至矣,其爲庸惡 枉尺直尋,始將不能免。 已是謀利計功了,幸而得之,則已矣,不然則行險徼幸, 而已矣,在我 志於富貴,即鄙夫也。 「靳氏三品之説本非此章正意,然能推見鄙夫之 志於道德,聖賢之徒也。 亦何所損哉? 志於富貴,則患得患失,終必至 陋劣之態,亦可想而見也。」〇 此。 鄙夫則富貴之外,它無所 聖賢非不事功名也,可爲 若夫志於功名,則其心 志於功名,豪傑之 豪傑非惡富貴也,

〇子曰:「古者民有三疾,今也或是之亡也。 氣稟得 之所言,蓋兼舉之。 疾。 身之氣常平和,則安寧,一 氣數,固有箇大盛衰,而一代一世,又各自有小盛衰,此 疾,今亦無之,傷俗之益衰 氣失其平則爲疾,故氣稟之偏者亦謂之 輔氏曰: 中,則 爲善,一失之偏, 「氣稟之偏,亦謂之疾,此以德言之也。 失其平,則爲疾矣。人之德, 則亦爲疾矣。」昔所謂 也。 輔氏曰: 「古今 人

矜也忿戾;古之愚也直,今之愚也詐而

已矣。」

古今處,皆是歎今之不如古 分去。」忿戾則至於争矣。 愚者,暗昧不明。 **悄厲。**《語録》曰:「廉是側 狂者,志願太高。 民性之蔽,亦與古人異矣。」愚謂: 氏曰:「末世 直,謂徑行自遂。 所謂廉者,爲是分得那義利 踰大閑矣。 矜者,持守太嚴。 一滋僞 詐則挾私妄作矣。○范 肆,謂不拘 豊 去處。 惟賢 邊 廉 隅。 譬如物之側稜,兩下 者不 小价節。 這 廉,謂 只是 如古: 《論語 那 稜 哉? 蕩則 学 分 處 角

〇子曰:「巧言令色,鮮矣仁。」

重出

赤。紫是北方間水刻火,赤黑,色似朱而非朱。」雅,正也,惡利口之覆邦家者。」惡,去聲。覆,芳服反。也,惡利口之覆邦家者。」惡,去聲。覆,芳服反。公子曰:「惡紫之奪朱也,惡鄭聲之亂雅樂

古之狂也肆,今之狂也蕩,古之矜也廉,今之

肖, 之可 也。 來,國家之傾敗 或信之,則其 悪,雖 切變亂而移易之,且其持之有故,其言若有 利 П 堯舜之聖,猶自長之。凡天地之間,是 捷給。 皆可覆 危亡蓋有不覺其 也。」〇 覆 傾, 敗 范 也。 氏 然 日 而然者。 輔 氏 「天下之 日 自古 非賢 理。 利 以 不 П

理,正 常屈於邪。 悦 爲是,以賢爲 所 「氣數難得相 而 以惡之也。 信之,則國 而勝者常少,不正而勝者常多 疑 值, 从似之間 時 不肖,以不肖爲賢。人君 利口之人,以是爲 節 每 家之覆 難得常好,故邪 惡 其 雜 也 亂 不難 而 致詳 正相乘之際,而 矣。」輔氏 焉,此 非,以 7,聖人 心亦贊天 E : 荷 非 īE. 何言哉?」

〇子曰:「予欲無言。」

地之一端也。」

是 E 學者多以 之實,有不待言而著者。 而不得其所以言,故夫子發此以警之。 初不待言而著,學者惟不察乎此,而但以言語觀聖人, 「此亦有兩意。 語言觀聖 是天理流行之實,凡動静 人,而 是以 不察其天理 徒得其 語默,皆 流 輔氏 行

而體察之意常少,是以徒得其言,而不得其所以言,故夫當務,但學者心粗氣暴,其於聖人之言,領略之意常多,一是以言而教人,固聖人之本心,因言以進道,亦學者之是以徒得其言,而不得其所以言,故夫子發此以警之。

道之前也。」
曰:「觀子頁之說,則可見矣。然此語必須在未聞性與天日:「觀子頁之說,則可見矣。然此語必須在未聞性與天子貢曰:「子如不言,則小子何述焉?」

子發此以警之。」

子曰:「天何言哉? 四時行焉,百物生焉,天

也。 티 : 道則言其體 自然而然,莫知其所以然,故謂之精義。 精 不待言而可見。 四 義之發,亦天而已,豈待言 時行,百物生,莫非天理發見流行之實, 「百物生,是天理之發見也, 又:發見則自其 也,精義則言其用也 聖人一 初而言之,流 動 四時 静 行則 而 行, 而 静,莫非 併舉 涵 顯 夫子但言天之 是天理之流 哉? 動 其 終 不離 也; :妙道 輔 静 妙 氏

○孺

悲欲見孔子,孔子辭

以疾。

將命者出

言』。 妙 其 庶幾有得乎希聖 學者玩此而 案: 故曰 妙,不待言而 生,莫非天理發見流行之實, 「《集註 夫無隱與無行而 子而已」,未及夫隱之事實也。 輔氏曰: 理,更不及己之事,則天人一貫,而天即己、己即天矣,此 時行焉,百物生焉」,則可謂至明白矣。」愚 終不喻也。 所謂聖人之言也。」此 星之明,猶患門人未能盡曉,故曰『予欲 八體用 ,聖人亦天而已。 此與前篇無隱之意相發,學者詳之。 13小子 若顔 以以 原,陰陽之理,運 前篇所謂 此章與前篇 有得焉,不惟見聖人一 顯,便當反之於踐履事爲之實,俛焉孳孳, 子則便 何 〇程子曰:「孔子之道,譬 希 不與二三子者,益更明白。」○蔡氏曰: !述」。」又曰:「『天何言哉 天之事。 『吾無隱乎爾』、『吾無行而不與二三 亦開 默識 無隱之意相發,蓋四時 行 更玩 不息, 示子貢之切 正所以發夫子之無隱 ,其他則 今舉四 四 動一静,純乎天理之 ൬ 時 萬 時 行、 物各遂其生之 行、百物生,則 未 百 免疑 惜 物 生 行、 如 乎 尤 白 四四 問 也 其 無 H 見 物

> 户,取瑟 教誨也。」 託以疾,則 之心,則終無已也。」程子曰: 罪之事不可知矣。 之教誨,所以深教之也。」胡氏日 者,仁不容絶也。 者不拒,儻非有故,未有卻之如此其峻者。 知其非疾,以警教之也。 當是時必有以 「《禮記》:恤由之喪,魯哀公使孺悲之孔子學士 孺 悲,魯人,嘗學士喪禮 而歌。 八雖庸 人亦能自省其所以見絶之由, 夫子於此,仁義並行而不悖,然其愛人 使之聞之。 辭之以疾者,義不當見也。 得罪者。 山此 故 輔氏曰: 於孔 辭以 孟 子所謂 子。 疾,而 「聖人之門,來 「聖人無疾 然其 是 歌瑟使 胡 所 不屑之 喪 氏 不屑 又使 以 禮。」 日: ൬ 間 得

○宰我問:「三年之喪,期已久矣。期,音基。

必崩。 君子三年不爲禮 明,周年也。

禮

必壞

;

年不爲

樂,

本蹙矣。 也。 恐 居喪不 然禮 宰我 樂自 習 慮其 事 而 親 崩壞,而 從兄而 崩 壞 也 出 急急於 ·; 不 輔氏 能 王帛 三年 日 鍾鼓之間 之喪,則 此 述宰我之意 禮 則 樂之 亦

隱耳。」

鑽,祖官反。 舊穀既没,新穀既升,鑽燧改火,期可已矣。」

不

知務甚矣。」

間 矣,時 Ħ. 口 止 楢白,槐檀黑,各隨 亦一 火,春取榆柳之火,夏取棗杏之火,夏季取 没,盡也。 言期年 桑柘之火,秋取柞楢之火,冬取槐檀之火 「掌行火之政令,四 因 恥言之。 彼 年而 物 ,有所疑於心 而 古 輔氏日 則天 廢此乎?」尹氏 皆變矣,而 周 升,登也。 宰我親學聖人之門,而以 一、此 也。 運 時 其 吾 變國火。」正此謂 時之方色取之。 愚謂:榆柳青,棗杏赤,桑柘黄,柞 亦述宰我之意也。 周 而 心哀 不敢 日 : 時 燧,取火之木也。 怛之實,自 物皆變, 强馬 短 喪之説 《周 也。」已,止也。 爾。」輔 有不能已者 然天運 喪 禮 至 下馬 可 固 氏 此 是 爟 》: E 爲 改 又 又 可 周 0

> 於情 尹氏説固忠厚,然宰我之失亦自 實, 較 之後世 匿 情 行 詐 而 П 在,但 不 相 其 副 致 者 問 則 之時 猶 爲 猶 出

「安。」夫,音扶,下同。衣,去聲。女,音汝,下同。子曰:「食夫稻,衣夫錦,於女安乎?」曰

其所以 弁純白,自今言之,則爲大凶矣。」要經 耳。 緣、 稻衣錦之理。 小祥,源緣者一人謂縓,禮有四 以爲未成布也。」期 禮:父母之喪,既殯,食粥、麤衰。 二寸, 筭來斬衰三升, 如 布,初來未成布也。 食、水飲,受以成布。 然古人亦不專把素色爲凶 語録》曰: 不忍者。 「縓,今淺絳色。 夫子欲宰我 八十 而 故問 小祥 今網 - 縷爲 《語録 之以 ,始食菜果 0 入之説,亦是漸 般,又如今漆 升。 小祥以縓爲緣。 此 反 蓋 曰:「成布,是稍 古尺一 《求諸 古人常用 而 不 宰我 幅 除 練 布一 心,自 既 漸 只 葬,疏 皮 看 闊 加 不 無 般,所 冠 弁 深色 古人 細 察 得 食 縓 皮 尺 成

「爲」,原誤作「之」,據《朱子語類》卷四十七改。

之實也。」
之實也。」
一方,此蓋欲其反諸心,以求其不忍稱衣錦,於女安乎」問之,此蓋欲其反諸心,以求其不忍未嘗反其心哀怛之實,自有不能已者。故夫子但以「食也」。輔氏曰:「宰我二説,皆是其所執而欲以短喪者,然

不處。皆自然而然,以發其本心不忍之端,以警其不察。不處。皆自然而然,以發其本心不忍之端,以深責警其不察。而再言「女安則爲之」,以深責為。輔氏曰:「宰我蔽執之深,雖聞夫子之言,而不察其人。輔氏曰:「宰我蔽執之深,雖聞夫子之言,而不察其為。前以言之意,不反諸心以求其不忍之實,而遽以「曰安」以為言之意,不反諸心以求其不忍之實,而遽以「曰安」以為言之意,不反諸心以求其不忍之蹟,以為言,如不食,「聞樂不樂」,故不聞,「居處不安」,故不處。皆自然而然,以發其本心不忍之端,以警其不察。

然後免於父母之懷。夫三年之喪,天下之通宰我出。子曰:「予之不仁也! 子生三年,

然後復言「女安則爲之」,以深責之也。」

喪也。 安者,使其不求諸心,隨口而言,則固已爲不仁矣,若其 此而閼絶之,使不行,則人之道息矣。 愛親之薄如此也。 之,故深探其本而斥之。 宰我既出,夫子懼其真以爲 於終迷而不反也。然則聖人之心,所以愛人無已者,於 三年之故,使之聞之,尚庶幾其能 言君子居喪之禮皆出於自然,以發其不忍於親,而 使宰我反求諸心,自得其所以不忍。 則聖人之仁也。始也問以「食稻、衣錦,於女安乎」,所以 下之通喪也。至於使之聞之,或能反求而終得其本心 以不忍於親,而喪必三年之故,自天子達於庶人,而爲天 也。輔氏曰:「子生三年,然後免於父母之懷,此君子所 之故。使之聞之,或能反求 也。又言君子所以不忍於親,而 本以斥之,言由其不仁,故愛親之薄如此也。」懷,抱 心誠以爲安,則其不仁又甚焉。 予也有三年之愛於其父母乎?」 輔氏曰:「孝者,爲仁之本。於 此所以見其出而深探其 言由其不仁,故 尼反求 而終得 及宰我不察,則又 而得其本心,不至 且夫宰我之所謂 可安而遂行 喪必三年 其 喪 必

止於三年,| 無義爲盜。」

此

心 亦可得

而見矣。」〇范氏曰:「喪雖

員 必當俯而就,不肖者必當跂 然賢 弗之忘矣」者是也。 足以報其親之説,尤爲忠厚。 跂而及之爾。」輔氏 父母之懷,特以 喪,爲足以報 制 而 而 宰我之失,夫子之意,始皆坦 不敢 者之情 過 故 故 則 其 無 至於聖人既於此爲之中 親 必 責 窮也。 宰 也。 俯 曰:「范氏發明非 而 我之無恩,欲 而及,夫如是,然後其 所謂「喪三年以爲極亡,則 所謂三年 就 特以 之。 然明白矣。 聖 非 以三年之喪 以 人爲之中 而 制 其 後 三年之 , 則 有 免 説 賢 以 於 始 爲 者

有博弈者乎,爲之猶賢乎已。」○子曰:「飽食終日,無所用心,難矣哉! 不

○子路曰:「君子有勇而無義爲亂,小人有勇而○子路曰:「君子尚勇乎?」子曰:「君子義

言,尚 爲盜。 也。 若子路後來進德地位煞高 此子路初見孔子時問 爲大小,故在上則逆理犯 輔氏曰: 大矣。子路 而言者也。 尚,上之也。 唯 有自負其勇之意,而 日: 子路好勇,故夫子以是告之。」胡 血氣所使而不以 「尚義而勇,義理之勇也。 君 尹氏曰: 好勇,故夫子以 君子爲亂,小人爲盜 子 亦 義理制之,則其爲害. 上而爲亂,在 有 ,必不復以此爲問 始疑聖門之或不 「義以る 答也。」輔氏曰:「詳 惡 乎?」子 勇 爲 此 而 下則肆 尚 無義 救 E 氏 則 以 其 也 티 : 皆以 日 勇 隨 欲 Щ 失 其 爲 所 陵 氣之勇 也。 「有 勇 尚 味其 居而 Ŀ 位 疑 也 而

禮 厚之意。 訕,謗毁 則 爲 也。 亂 下 訕 室,不 果 而 則 通 室 也。 無 則 忠 妄 稱 敬 作。 人惡,則 之心。 故 夫 勇 無 子. 無

惡之。

並去聲。許,居謁反。孫以爲勇者,惡訐以爲直者。」徼,古堯反。知、孫,孫以爲勇者,惡訐以爲直者。」徼,古堯反。知、孫,曰:「賜也亦有惡乎?」「惡徼以爲知者,惡不曰:「賜也亦有惡乎?」「惡徼以爲知者,惡不

孫,遠之則怨。」近、孫、遠,並去聲。 ○子曰:「唯女子與小人爲難養也,近之則不

怨亦非所恤矣。」君子之於臣妾,莊以涖之,慈僕隸下人?」曰:「若爲惡之小人,則君子遠之惟恐不嚴,此小人,亦謂僕隸下人也。或問:「何以知其爲

以畜之,則有以弭其多怨之意。」 子則有善養之道。莊以涖之,則有以銷其不孫之心,慈子則有善養之道。莊以涖之,則有以銷其不孫之心,慈君近不遠之間道理也。夫小人女子雖有難養之情,在君以畜之,則無二者之患矣。輔氏曰:「此正所謂

有爲而言,不知其爲誰也。」輔氏曰:「聖人之已,勉人及時遷善改過也。蘇氏曰:「此亦四十,成德之時。見惡於人,則止於此而去聲。 ,

微子第十八

言,特限於四十,則可知矣。」

微子去之,箕子爲之奴,比干諫而死。此篇多記聖賢之出處,凡十一章。

也。微子,紂庶兄。箕子、比干,紂諸父。微、箕,二國名。胡氏曰:「皆圻内國名。」子,爵

干皆 微子 諫 見 紂 紂 無 殺 道,去之以存宗祀。 比 干,囚箕子以 爲奴,箕子因 箕子、 比

猶

佯 狂 而受辱。

孔子曰:「殷有三仁焉。」

心 子之明夷」,可見其難處。」」故不咈乎愛之理,而 處。 見?」曰:『箕子、比干,都是一樣心。 而 有以全其心之德也。 易,比干一向諫死,又却索性。 國、徒使人君 紂之怒,不殺他。 改行,可見其至誠 《語録》曰:「問:『微子之去,欲存宗祀,比干之死,欲紂 三人之行不同,而同出於至 比干之死,非沽名也, 言也。 也。 要利以 被他監 仁之德,此專言之仁也。 忘君 有以全其心之德,指至誠而言也。」〇蔡氏曰 繫在那裏,不免佯狂。 有殺 也 諫 然見比干恁地死,若更死 惻 此可見其同出於至誠 臣之名。 怛 箕子之生,非懼禍也; 處。 輔氏曰: 不知箕子 箕子在半上落下,最是難 他 不咈 處 所以 此最 「愛之理,此分言之 乎愛之理,指惻 誠 箕子偶然不衝着 至誠惻 《易》中特説 難。 惻怛之意。 惻 諫,無益於 微子之去 怛之意 微子去却 怛, 何以 箕 比 怛

> 干以 絶。 謂之仁。」愚謂:三人之事雖不同,而各得其本心則 德。」 楊氏 在乎一身,而惟 有規諫之意; 諫 此可見不咈 死,猶庶幾 日 在 微子抱祭器而去,蓋不忍坐視其宗祀之 乎愛之理。 「此三人者,各得 感悟乎紂之心; 乎愛君憂國,此可見有以 三子之去就 箕子佯 其本心 、死生,其志 狂 爲 全其 奴,意 一故同 心心之 不 其

同,故同謂之仁。仁則本心之全德也

乎?」曰:「直道而事人,焉往而不三點? 而事人,何必去父母之邦。」三,去聲。焉,於虔反 柳下惠爲士師,三黜。 人曰:「子未可 以 枉 道 去

惠仕 也?」日 謂必以其道,而 枉道之意,則有 而 士師,獄官。 其 而 辭氣雍容如 屢 「進不隱賢,必以 黜 0 黜 黜,退也。 而 不自失焉者也。 確乎其不可拔者。 復 此,可 仕 其道,不以三公易其介,所以 至於三點, 謂 柳下惠三黜不去, 和矣。 耐 或問: 又不去 然其不能 是則 (焉,何 柳下 所

0 仕」,原誤作「士」,今據四庫本改

乎?」曰:「不然也。 或曰:「惠知直道之必黜而不去,然則其將枉道以 之言而亡之矣。」輔氏曰: 之於逸民之目。]○胡氏曰:「此必有孔子斷之 三點之後,雖不屑去,然亦意其遂不復仕,故孔子得以列 氣象如此,而其道則固自信其不能枉道而事人矣。 不必去魯而適他國矣。其言泛然,若無所指,蓋和 於我側,不以爲浼,所以 屢 黜 而至於三。 降志辱身,援而止之而 惠之意,若曰我但能直道事人,則固 黜而復仕,既 「以前章例之而知之也。」 三點 止,雖 而 遂不去 祖裼 是以 者之 事人 裸 也 裎

孔子行。 一吾老矣,不能用也。」 季、孟之間待之。」曰:「吾老矣,不能用也。」 一齊景公待孔子,曰:「若季氏則吾不能,以

而盡禮。 所 公之言,雖實而失於率易。 蓋自以告其臣,而孔子聞之爾。 之,事見《世家》。 魯三卿,季氏最貴,孟氏 謂 「自以告其臣,而孔子聞之」之説當矣。」 〇程子 况景公素知聖人者,必不敢以是言而面瀆之, 然此言必非 聖 人德 爲下卿。 盛道 尊,見 面 輔氏曰:「景 語孔子, 孔子 者 必 加 去 敬

> 爾。」愚謂: 子去之。蓋不繫待之輕重,特以不 至矣。然復曰『吾老矣,不能用也』,故 以待孔子也。 曰:「季氏强臣,君待之之禮極隆, 苟以利心觀,則必以爲聖人之去,有繫乎待 以季、孟之間待之,則 用 然 禮 非 而 孔 亦 去 所

一齊人歸女樂,季桓子受之。三日不朝,孔

之輕重也。

故特釋之。

孔子矣。 相無敬賢之心而去,何邪?」曰: 有「彼婦之口,可 不俟終日者與?」或問:「《史記》載孔子之去魯也 可知矣。 怠於政事 懼,歸女樂以沮之」。 + 季桓子,魯大夫,名斯。 四年,孔子爲魯司寇,攝行相 蓋欲以女子爲間於魯之君相,使之先有以熒惑 夫子所以行 如此,其簡賢棄禮,不足與 以出走」之歌,今尹氏 尹氏曰:「受女樂而 也,所 案《史記》,「定公 「齊人之謀,固欲以 謂 直 見幾 以 事。 爲 知魯 而 齊人 有爲 之君

耳,而 則 其耳 篇記 中 也 惠及下章隱逸之人,皆是也。 以 及其他,其有得於孔子之初心與?」〇范氏 然孔子之覺之也,直以其無敬賢之心,知其不足與 庸之道也。 「或遂中以不測之禍,而不慮孔子之覺之早、去之速 ,亦未嘗必於仕也,但 明 自 其禍之將至者,則 单 仁賢之出 ,感移其心志,遂 庸之道也。」 三仁、柳 區,而 下 可仕 固 乘間 - 惠則 輔 亦不外乎 氏 折 則 而 庶幾 日 :: 夫子於齊於 中以聖人之行,所 仕 進説,以 矣,接輿以 可 「仁謂三仁、賢 此 止 也。 則 沮 敗 止, 此 魯非不 尹 下 其 日 氏之言 (所爲, 謂 則 所 皆 以 欲 有 柳 此 也 未 爲 什 下 不 爲 甚

子守身之常法則可

,至於聖人體道之大權

,則又不

可

以

古

然

也。

至於無

※道而

不隱,則鳳之德衰矣。

然以

此

論

君

而 何 楚狂 , 已 而! 德之衰? 接輿 、歌而 今之從政者殆 往者不 過 孔子曰: 可 諫, 而 來者猶 「鳳兮! 可 追。 鳳兮 已 !

免於偏也

接 衰 則 接輿,楚人,佯狂 隱 興 也 接 歌 輔氏 而 興以 過 日 其 比 鳳 車 孔子, 前 辟 靈 物 也 # 也 而 有 夫子 鳳 譏 道 有 其 則 時 道 見 不 則 將 無道 能 見 適 隱 則 楚,故 **無** 爲 隱 鳳 德 道

> 學也。」 者,有避世之心 悔,無善之可 然曰『往者不可 鳳,又議其 炭白黑之不同 意慇懃諄複,是 既 尊孔子而 止 此 人逃世 比之以 例 也。 論 以以 也。一來者可追,言及今尚可 (鳳, 而 而,語 衰, 遠 遷,是 趨不 害全身 既 也。」〇胡氏 諫, 誠 又疑 而無救世之意,有堅守之操 欲其 知 助 一同者 知尊 來者 尊 其 而 辭。 (已,又 已。 聖 衰,既 望人 猶 人者矣。 也。 可 其與 殆, 懼 追,則 幸 而 其 「接輿之於孔子,既 未 其 輔氏 危也。 聖 殆 知 或 然其 人之心, 聖 不知 止 \Box 可 人 謂 所 而 也。 聖 隱 趨 觀 知 接 又 蓋 而 人無過之可 尊 則 慮 接與之言 去。 輿 無 其 不 聖 其 變 趨 啻 在 蓋 人 殆,語 通 比 於 므, 不 如 矣。 知 之 同 以 冰 絶

以爲是,故不欲聞而辟之也。孔子下車,蓋欲告之以出處之意。接輿自孔子下,欲與之言。趨而避之,不得與之言。

○長沮、桀溺耦而耕,孔子過之,使子路問津

焉。沮,七餘反。溺,乃歷反。

二人,隱者。耦,並耕也。時孔子自楚反

乎蔡。津,濟渡處。

長沮 丘。」曰: 是知津矣。」夫,音扶。 曰 : 是魯 一夫 執 孔 輿 者 丘 與? 與,平聲。 爲 誰 曰 : 子 路日 是也。」曰 : 爲 孔

流,自知津 執 今下問 輿,執轡在 津,故 處 車 夫子代之也。 也。 蓋本子 路 知津,言 御 而 執 數 轡, 周

去聲。 哉?」 耰 問 而 由 。」曰:「是魯孔丘之徒 於桀溺,桀溺 與 耰,音憂 其 滔 滔 從 而 辟 者天下皆是也,而 不 輟。 人之士也, 曰:「子爲誰?」曰:「爲 徒與之與,平聲。 豈 與?」對 若 誰 從 滔,吐 以 辟 易之? 日 刀反。 :「然。」 世之士 辟, 且 仲 不

下皆亂,將誰與變易之?輔氏曰:「桀溺之意以滔滔,流而不反之意。以,猶與也。言天

日: 逃世以爲潔 以爲天下皆滔 辟人之實也,故桀溺以夫子爲辟 魯適衛、適楚,以 子亦安能有所變易其人也哉?」而,汝也。 如水之流而不反,則誰肯聽夫子之言,行夫子之道,而夫 爲,夫人有反之之意,則夫子有易之之理,今天下皆 亦不告以津處 謂孔子。 「孟子曰 播 辟世,桀溺 丽 滔 自謂 種 至 而 而 微服 不反,則 其能辟 耰 之, 而 過宋,以 自 世 世。」耰, 既 謂 人 播 無 布所 人。 辟 輔氏曰:「夫子嘗去 不可 陽 至於桀溺之見,則 種,乃耰以 覆 貨之難,此又 種 辟 也 者,故絶 辟 覆之。 胡 亂 氏

不與易也。」憔,音武。與如字。群,吾非斯人之徒與而誰與? 天下有道,丘子路行以告。夫子憮然曰:「鳥獸不可與同

潔哉? 與同 「天之生聖賢,欲其平治天下者,理之常也。 正 憮然,猶悵然,惜其不喻己意 爲天下 群者,斯人而已,豈可 天下若已平治,則 無道,故 欲 以 道易之耳。 我 絶人逃 無用變易之。 也。 其 世 (或雖 輔氏 言 所 以 生聖 爲 當

天地之常者爲心,而其所以平治天下之道,又備盡於己,賢,而未欲平治天下者,理之變也。然既曰聖賢,則必以

曰:「聖人之仁,不以無道,必天下而棄之治,則亦何用聖人以易之哉?」○程子曰:「聖人果未欲平治天下也,則亦安於理而已矣。若天下既已平果未欲平治天下也,則亦安於理而已矣。若天下既已平界而措之,易亂爲治,易危爲安,固必有自然之應。而天

穀不分,孰爲夫子?」植其杖而芸。薜,徒弔反。曰:「子見夫子乎?」丈人曰:「四體不勤,五〇子路從而後,遇丈人,以杖荷蓧。子路問

去之以滅其跡,亦接輿之意也。

也。」愚謂:程子之言切,張子之言婉

植、音值。

從師遠遊也。植,立之也。芸,去草也。不分,猶言不辨菽麥爾,責其不事農業而丈人,亦隱者。葆,竹器。分,辨也。五穀

知其隱者,敬之也。子路拱而立。

食,音嗣。見,賢遍反。止子路宿,殺雞爲黍而食之,見其二子焉。

明日,子路行以告。子曰:「隱者也。」使子路

反見之。至則行矣。

則固可見矣。」而丈人意子路必將復來,故先夫子之欲告之,宜莫先於此也。觀子路所述,夫子之意,有以也。而丈人絕人逃世,藐然不復知有君臣之義,則義。輔氏曰:「夫子所以使子路反見之,豈徒然哉?必孔子使子路反見之,蓋欲告之以君臣之

已知之矣。」長,上聲。 大倫。君子之仕也,行其義也。道之不行,君臣之義,如之何其廢之? 欲潔其身,而亂君臣之義,如之何其廢之? 欲潔其身,而亂

知其述夫子之意無疑也。蓋丈人之接子路甚倨,即以爲夫子之語,然使之反見,則必授以見之之意矣,故子路述夫子之意如此。愚謂:子路所言雖未可

者。 子 義, 義, Ŧī. 不行,不合而去 所以行義也,義則有可不可矣,義合而從,則 禄 有 此,因其所明 蔽 幼之節不可 節 長,有以感發其心, 固子路學 幼之節 而 ,雖知道之不行,而未嘗不仕,然亦未嘗懷私徇禄 序, 也 故 君臣之義 子 故 則事之可否,身之去就,亦 父子 是以 路 得 雖 朋 或 輔氏曰:「丈人之接子路雖倨,而 力之所致。 益 問: 固 廢, 有 知 友 雖 失,或明 恭 而曉之。」倫,序也。 ,皆天敘之典 知 道 有 而 親,君臣 不潔 ,則道雖不行, 知 丈人 之不 不知君臣之義不可 其 信 道之不行矣,而 而知長幼之節不可 不 丈人因 身以 或 是 因 暗 可 行 也。 有 人之所不能 見 廢 而 亂 而 而義亦未嘗廢 義,夫 見其二子, 其二子 不自 矣,故 倫 不 仕 徒 所 可 知 亦 仕 廢,是其 婦有 人之大倫 其然也 以 無 廢耳。 廢 山 非 自 大 焉 蓋 也。 乎?」曰 行 子 其 有 忘 因 也。 道 别,長 路 然 君 八心必 夫長 固 示 子 義 丈 所 則 益 聖 是 人 路 不 謂 臣 可 以 恭, 明 於 患於 一人於 之敬 知 幼 以 有 而 仕 荷 之 徇 之 幼 有 以 長 苟 君 所 長 之 此

可 可 然義之爲言宜也,既 雖卒老于行,而終不敢 也。 忘義徇 法,君子之行,既 天,而具乎我者也; 亦 行可之仕,有際可之仕,有公養之仕」,雖是未嘗不欲 只説道合出仕纔仕,便是義。 女樂,孔子行。 季、孟之間待之,曰吾老矣,不能用也,孔子行,季桓子受 得 只説要出 便是總去就都說。 古 矣。」○《語録 則 不仕 時之安 以忘義 向只要仕。 未嘗不顧其義之如 是 具乎我者不可 就之,否則去之, 急欲得君行道。 無義 禄 而 仕爲 也。 ,此義字似有 徇禄,如世 ,纔説不仕,便 ĕ ⊟ : 如孟子説『所就三,所去三』, 義。 由 無 不可 此觀之,道義之未嘗 道合則 廢,而 「問:「仕所以行君臣之義,又 然合則從,不合則去,唯是出 而非義。」」〇又曰:「舊時人説此 道雖 日 到得 固 以 何。」〇 深藏 俗之仕者也。」福 義 兩意。」曰: 潔身 有截然不可 繫乎 存乎我,而 則 靈公問陳 都無了這 從,不合則去,即 古 輔 而 事 閉 天 殊不知所謂 氏日 便 亂 以 者 倫, 有 自 『只是一 則 義 移易 其行 可 潔,而 明 如 非 「君臣 否,身 日 相 州 隱者之爲,亦 敢 聖人憂世之心 者。 逐行; 止 離 意。 廢 必 與『孔子 仕,不是埋 此 有 一之義 則 君 也 便有去就 也 是 故聖人之 繫乎天者 或 臣之義 義, 纔 故 雖 景公以 仕 云 亦 初 説 孔 本 有 方見 亦 非 可 仕 段 時 義 非 見 但

而夫子言之也。未知是否? 〇范氏曰:| 寫本,路下有「反子」二字,以此爲子路反|

後知依乎中庸者爲難也。 義精仁熟,周旋中禮,而無 而終不離於中庸之道也。 廢 欲者也。 決絕其在我性命之情而 者之弊也。 曰:「范氏言隱與仕者之弊,詳且盡矣。 爲 饕富貴。 IE. 而 隱者爲高,故往 君臣之義 一,所 難。 不止。 以 世之人苟不知學,則不陷乎此,必溺乎彼,夫然 惟聖人不廢君臣之義, 或出 『決性命之情以饕富貴』,此 一而必以 此二者皆惑也,是以依 不與鳥獸 或 其 處 而 正 不顧,而唯在外之富貴是貪,是 而 同 不反。 夫所謂依乎中庸之難者,蓋 , 所以 惟聖人之心渾是義理,故既 終不 豪人欲之私者不能也。」❶ 群,則決性命之情 仕止久速 離 仕者爲通 於道 語出《莊 與鳥獸 而必 無 乎中 也。」 可 無 同群,隱 故 故 子》,謂 以 然不可 庸 輔 其 者 以 溺 非 不 H.

惠、少連。少,去聲,下同。

逸,遺逸。民者,無位之稱。虞仲,即仲

經傳。少連,東夷人。雍,與大伯同竄荆蠻者。夷逸、朱張,不

見

與,平聲。 子曰:「不降其志,不辱其身,伯夷、叔齊與 中倫,行中慮,其斯而已矣。」行,去聲,下同 憂。」則行之中慮,亦可見矣。 居喪,三日不怠,三月不解。 慮者,誤矣。」少連事不可考。 者,其味深矣,人心乃人之公心也,諸説多以爲中我之思 然有當於人心也,即義理所在也。 思慮也。 言中倫,謂所言有得乎義理之次第。 柳下惠,事見上。倫,義理之次第也。 慮對倫而言,倫是義理之次第,則慮亦人之正 謂:「柳下惠、少連、降志辱身矣。 中慮,言有意義合人心。 然《記》稱其「善 所謂有意義 行中慮,謂 朞悲哀,三年 輔 思慮 合人心 所 氏 行 慮, \Box 也

中權。申權。獨:「虞仲、夷逸,隱居放言。身中清,廢

● 「之私」上,原衍一「之」字,據四庫本删。

廢,固 權。 即伯 輔氏 善,合乎道之清。 仲 雍 日: 放言事 夷之清 宜有之矣。」 居吴,断髮文身, 「遁處勾吴以獨善其身,此所以合乎道之清,清 由也。 雖 無 放言以自示其不可 所 考, 然觀 放言自 其 裸 斷髮文身之爲 以 廢,合乎道之權 用,此所以合乎道之 爲 飾。 則放 隱 居 言 獨 É

我則 臣 其 不可 與義而 不可之人,故其制行各異。 然反而 孟 志而不枉己, 口 口 立 一,諸侯不得友,蓋 等,此其 以久 也 子 異 仕 一心造 、於是,無可 己。」〇謝 觀之,則爲無可 而 八則久, 不 輔 氏 仕 孔 行 日 : 最 則 則異。 雖辱 可 子 孟 高 是 氏 以 無 無 可 與 \exists 子 矣。 口 速 以 不 身 只 已遯世 也。 伯 可。 知可 言 則 仕 孔子則 而不求合,其心 七人 夷、 無不 柳 要之,七人者皆是 速。」 則仕 仕 下 而仕 可 叔 無可 離 隱 · 惠 所謂 而已,不言 齊,天子 群 遯 可 , 則 無 少 不汙 以 矣,下聖 是 不可 連 無 無不 止 口 唯 1無可 則 則 有 有 可 雖 不 無 其 可 口 止 也 不 也 得 降 人 不 時 有

是以 也,故 宜,則 清之一 者,但 逸,隱 民 無 無悶, 害義 然清 大倫也。」尹 徒,然此兩言,實出《莊子》,所謂遊方之外不可 故言雖不合先王之法,然自 中乎清而不汙,然不汙 然視數子之性行, 屑 逸民。」輔氏曰: 之 可 也。 徒 固聖人 其弊必至於害君臣之義,傷先王之教,而 權不失正 取二字以足遯 一德極 孟 無 傷 而 居放言, 也。 子 故言 不 教 不 於 語 可 氏 事, 汙 而 聖 揚 曰 : 也。 夷、惠,亦 能 也, 至於離群 亂 則 耳 此 「遯世離群,皆乾卦文言之辭。 雄 則言不合先王之法者多矣 中 固爲高矣,隱 大 方外之士,蓋 世 所以 他 「七人各守其 權 日 倫 爲 而 倫 古 : 而 句 已,去伯 有 者 二字,則似乎未善,今并 常適其 廢 必以 適 行 耳,不取 未 觀乎聖 1殊科。 領則中 盡 宜 能 指接 居雖非 也 夷之清 孔子斷之。」 - 乎權 也 中 其 故 可, 輿、 慮。 人 義 與 是 E 而 君 節,孔 也。 則見賢人。 沮 而 得 則 下 方 子 以 溺、 虞 宜, 聖 有 庸 異 拘於 伯 均 外 賊 逕 人 仲、 行 丈 權 於 然遯 亂 夷 謂之 之士 子 庭 禮 入之 然身 言 人之 惟 而 等 逸 則 矣 夷 得 於 之 世

○大師摯適齊,大,音泰。

夫子之言也。

輔氏曰:「以章首皆無「子曰」二字,故

大師,魯樂官之長。摯,其名也。

晚反。繚,音了。 亞飯干適楚,三飯繚適蔡,四飯缺適秦。飯,扶

自亞飯以下,蓋三飯也。」干、繚、缺,皆名也。食,莫食,凡四飯。諸侯三飯。大夫再飯。」故魯之樂官食之官也?」曰:「《白虎通》曰:「王者平旦食,晝食,晡亞飯以下,以樂侑食之官。或問:「何以知爲侑

鼓方叔入於河。

鼓、擊鼓者。方叔、名。河、河内。

播鼗武人於漢、鼗、徒刀反。

摇之、则旁耳還自擊。武、名也。漢、漢中。播、搖也。鼗、小鼓。兩旁有耳。持其柄而

少師陽、擊磬襄入於海。

少,去聲。

衰、禮樂僭妄、去而辟亂者,故以記逸民之後。〕然未必之隱遁以附前章,輔氏曰:「自大師而下,皆傷時之子所從學琴者。海,海島也。○此記賢人少師,樂官之佐。陽、襄,二人名。襄即孔

可。 俄頃之助,功化 下,皆散之四方,逾河蹈海以去亂。 樂之正。 子自衛反魯,一嘗治之。 知之。」末章放此。張子曰:「周 豈虚語哉?」輔氏曰: 及魯益衰,三桓僭妄,自大師 如 此。 如有 「張子以爲記者及此,必 其後伶人賤 用 我 衰樂廢,夫 期 聖人 月 愐 以 識

於一人。」
《紹子不以。故舊無大故,則不棄也。無求備《別公謂魯公曰:「君子不施其親,不使大臣

有所謂,故推言如此。」

作弛 弛,遺棄 字,亦作弛,是唐本初未嘗誤也。 之,在其 本已作施, 之爲弛。」曰:「陸氏《釋文》云爾,而吴氏考開 施,陸氏本作弛,詩紙反。 者於義爲得。] 〇 魯公, 周公子伯 而 位 也。 讀 則 如 以,用也。 不可不用。 《衛綰傳》之施易者 大臣非其 然孔説已訓爲易,則漢 福本同。 大故,謂 耳。 此 或問: 不 人則去 元 惡逆。 可 禽 五 曉,然 也 經 文

氏 棄,敬故也。 親親親也。 弟子言之歟?」 魯人傳誦,久而不忘也。其或夫子嘗與門 而不貳,敬故而不忘,用才而不苛,皆忠厚之意。」() 輔氏曰"「四者皆君國子民之事。」○胡氏曰"「不 李氏日 E 「此伯禽受封之國,周公訓戒之辭 「四者皆君子之事,忠厚之至也。」 不使大臣怨不以,任賢也。 無求備於一人,用才也。 親親而不遺,任賢 故舊無大故不 ·弛其 胡

子於三仁、逸民、師摯、八士,既皆稱 子曰:「記善人之多也。」〇愚案:此 今重複命名,故意其四乳也。」然不可考矣。 也。古者以伯仲叔季爲長少之次,如仲孫、叔孫之類。 接引之意。皆衰世之志也,其所感者 母四乳 或曰「成王時人」,或曰「宣王時人」。 列之,於接輿、沮、溺、丈人,又每 而生八子 也,輔氏曰: 「謂母孕乳 有 而二人 蓋一 篇 惓 贊 ○張 深 惨 孔 而

> 矣。 不可以不仕,多見其不知量也。」 利慕禄之徒,求以自便其私,亦借四子而詆之,欲以見其 不合於聖人之道、未至於夫子者、皆未可以妄議 亦豈非當世之賢而特立者歟? 知止者,真不啻若犬彘 聖人,猶有所不滿於心如 高節,猶使人起敬起慕,恨不得識其 不爲無病,然味其言,觀其容止,以想見其爲大,其清 及,則其所立,豈止於此而已哉? 使得聞聖人之道,以裁其所 矣,其餘數君子者,亦皆 接輿、沮、溺、丈人,此四子者,若律以聖人之中道,則 在陳之嘆,蓋亦如此。 此,則其視世之貪利 求欲爲之奴隸而不可得 惟夫子,然後可以 過 世之高 面而端拜之。 三仁則 而 勉其 慕禄 黄氏曰: 無 士 也。 (所不 間 也,是 彼於 而 若 然 貪

論語卷第九

後學 成德 校訂

子張第十九

之知,則皆未能 實,行之固至,而知之又徹。至於子貢之行,子夏 蓋顔子之穎悟,知之固徹,而行之又至,曾子之篤 曾子矣,而顔、曾之學力,又有非二子之所能及者。 貢穎悟之質,固次於顏子,子夏篤實之質,固次於 故特記之詳焉。輔氏曰:「詳考《論語》所載 若子貢,自曾子以下,篤實無若子夏。 貢次之。蓋孔門自顔子以 此篇皆記弟子之言,而子夏爲多,子 一子之言行可見。 有 以充之而極其至也。」〇胡 然穎悟篤實,皆以資質言也,子 下,穎悟莫 氏

後學趙順孫纂疏

子張曰:「士見危致命,見得思義,祭思敬,喪 誠,則篤實不足言,故但以稱子貢、子夏也。」凡一 十五章。 「以顏子之明睿,則穎悟 不足言,以曾子之純

思哀,其可已矣。」

足觀。 無憾矣。 獨能之也。「其可已矣」,若曰大節既得,爲人之道可以 喪,人所忽也,於此而各盡其道焉,是人之所難 也」,則其語抑, 决也。」四者立身之大節,一有不至,則 而致命獨不言思者,蓋死生之際,惟義是徇,有不待思 意,言將這命授與之也。」〇真氏曰:「義、敬、哀,皆言思 字,都是委致之致,見危授命,皆是此意。 致命,謂委致其命,猶言授命也。《語 「其可已矣」與首篇「可也」之説。 四者,立身之大節。危,人所畏也,得,人所欲也, 「致命,猶送這命與他,不復爲我之有。《論語 此與子夏竭力致身,必謂之學之意同。 故言士能如此,則庶乎其可矣。 曰『其可已矣』,則其語揚。」○黄氏曰: 日: 「可則同,然曰「可 授亦致字之 能 崇 録》日 餘 者,而 或問 祭與 . 致 無 而 命

683

六六七

論語卷第十

可也。」

中,然《或問》之意則又與《集註》不同,讀者兩存之
要人之言也。《集註》以爲「庶乎其可」,則固惡其言之太
置所當盡,然斷之以「其可已矣」,則似失之快,而不類乎

有? 焉能爲亡?」焉,於虔反。亡,讀無,下同。〇子張曰:「執德不弘,信道不篤,焉能爲

或作或輟,鋭始怠終,終亦必亡而已矣。」焉能 廢。 也。 當得是有,無此人,亦不當得是無,言皆不足爲輕重。」 亡,猶言不足爲輕重。 則猶言終亦必亡而已矣也。 以爲天下莫己若矣。」有所聞 弘以量言,然量有氣量,有德量,此 坤卦文言之辭,言不能 得,謂德也。 有所得 德,得諸己。 輔氏曰:「有聞,謂道也。 而 守,謂 守之太狹,則德 而居之不弘,則 執也。 兼有 太狹,謂不弘 道 衆德而 《語録》曰:「有此人,亦不 有 篤,謂專而厚也。 而信之不篤,則道 所 輕喜易足,有 孤 聞 孑然固守 蓋兼氣與德 ; 而信之不篤 也。 輔氏 德孤, 日 節 善則 而 爲有 道 則 者 有 言 蓋 廢, 也。 亦 者 用 自 所

> 其拒人也?」賢與之與,平聲。 何所不容? 我之不賢與,人將拒我,如之何而容衆,嘉善而矜不能。我之大賢與,於人而容衆,嘉善而矜不能。我之大賢與,於人不何?」對曰:「子夏曰:『可者與之,其不可

己之實。」 如是,然後得義之中,無掠虛務高之意,而 損友亦所當遠。 然大故亦所當絕,不賢固不可以拒 寬,狹則不廣。」子張譏之是也。 言,則其於善惡必有所不察。」蓋大賢雖 過高之病。 曰『不可者拒之』,則傷亟過中而害義理之正矣。 子夏之言迫狹,輔氏曰:「「可者與之」之言美矣,若 黄氏曰: 學者不可不察。 「以能容人爲高,故有不拒人之 但其所言亦有 有切於學者爲 無所 輔氏曰:「必 不容, 迫則不

泥、是以君子不爲也。」泥、去聲。
○子夏曰:「雖小道、必有可觀者焉,致遠恐

小道,如農圃醫卜之屬。或問:「小道爲農圃之

○子夏之門人問交於子張。

子張曰:「子夏

農圃醫卜之屬,施之目前,淺近不爲無益,然求其聖人之 家、治國、平天下,與夫參天地、 達於君子之大道。」〇黄氏曰:「聖人之道,自脩身而 以 而不可無者,其始固皆聖人之作,而各有一物之理焉,是 屬。」曰 必有可觀也。 家之業以治於人,道之小者也。 「小者對大之名。 然能於此者,或不能於彼,而皆不可 正心脩身以治人,道之大者 贊化育,無適而不通 然是皆用 於 也。 齊 以 世

異 子 也 道 者則不可 ,異端者,違聖人之道而 墨佛老之類 所以譏 無所不通,則不可 其 以頃 相 而言邪? 率 刻而 -而爲 也。 施也。 僞也。 許 異者也。 日: 行 或曰: 楊墨老佛之無父無君,又何 欲以 小道,合聖人之道而小者 安知所謂 小者猶可以施之近 並耕而治亂天下,孟 小道者不指

觀 耳 也 。」泥,不通也。 目鼻口,皆有 也,致遠則泥矣,故君子不爲也 所 ○楊氏曰:「百家衆技, 明 而 不能 相 通 非 無 口 猶 待

致遠而後不通哉?

所謂

面牆而

立,❷跬步而不可行者

謂好學也已矣。」亡,讀作無。好,去聲。 ○子夏曰: 「日知其所亡,月無忘其所能,可

亡,無也。謂己之所未有。○尹氏曰:「好

守之篤,則能不失。進學之道,無以復加於此矣。」學者日新而不失。」黄氏曰:「求之敏,則能日新

其中矣。」 切問而近思,仁在〇子夏曰:「博學而篤志,切問而近思,仁在

以言 求此而 問思有益於事而爲言,乃是有 言爲仁耳。然人能「博學而篤志,切問 仁 益,其後易之者,則專主於心之所存 初本謂「心不外馳而事皆有益」,後乃以「所存自 放逸,天理可存,故曰『仁在其中』。」〇黄氏曰: 是爲學功夫,未是爲仁。必如夫子所以 自熟,故曰仁在其中矣。 四者皆學問思辨之事耳,未及乎力行 也。 蓋 四 者之專主於心之所存而 得彼也。 初本以博篤切 然從 事 以此見《集註 於此,則 近爲心不外馳,學 》愈改而 所 言? 心 求 語 不 而 而言 日 録》曰: 外 愈精也。 自得之,不可 Mi 志 語顔、冉者,乃 馳 也。 問 近思」,則 惟 思爲 「此四者 若以 無所 或曰 而 事 集註 所 而 用 皆 心 以 學 存 爲 何 爲 其 只

● 「墨」,原誤作「黑」,今據四庫本改。

❷ 「而」上,原衍「而」字,據四庫本删。

得之。 轍 曰:「於是四者中見得箇仁底道理,便是徹上徹下之道。」 便何處求仁?」〇程子曰:「博學 心存則仁便存,指存心便唤做仁,固不可, 如此學問 不外馳矣。 以求爲仁之方。 中』矣。」〇胡氏曰:「力行固 辨之事,而 己者,而 則其所用 不放逸矣。 嘉陳氏曰: 〇又曰: 而 志之篤 心,則其心放 「仁在其中」也。」〇永嘉陳氏曰: 又曰: 近 思,何以言 , 則 無復外馳之患矣。 了此, 「徹上徹下,是這箇道理深説淺説都如此。」〇永 儘鞭 心皆在 此心常有定向而 「徹上徹下,謂下學中天理 自 心不外馳,則所存日熟,是乃力行之本,故 逸而 「學不博則 有以 路向 惟 心存乎學問 吾身之外矣。 所志苟 便 不收。 得夫操存涵養之效,所以謂 裏, 是 仁 心不外馳,故言『仁在其中』。 簡 在 徹 學之博,則 而 不泛濫 人能 其 不 所以爲仁,然學問思 不堅 上 思辨,則雖未見於行, 切 能 徹 中 盡 「博而 也 問 守 矣? 矣。 此四 下之道。」《語 而 , 則 此 便在 約 近 而 心常 能篤,切而又近 問 其 [者,則 思,則 ",志不 不切 篤 心 學 但離了心 此 泛 有 志 者 無 雖 思 其 濫 所 己 兩 辨 (求其 繫 篤 學 而 要 切 不 問問 笛 而 皆 在 着 不 近 録 外, 思 問 則 蓋 日 E 其 涂 所 思 在 而

哉? 不然則 之事耳。」又 進 升 推去齊家; 兄弟」; 愛物,愛物是仁民之類。 親親,便 了,便又因這件事 是 面 曰:「此語道得好。 近思在己者,則仁 自 矣。」輔氏曰: 不能力行。 2就這 遠 到第三級。 **堵**,升第一 [然住不得 處 不惟如此,又見四者之中已具 只管近。 裹近傍那 寡聞淺見,❶將 『至于兄弟』,便 推類去仁民,仁民 齊家,便推去治國。 ,須着去力行,不然則若有若亡,何 級了,便因 曰 只管恁地挨將去,只管見易,不見其難, 「必 切問 若第 : 曉得 推 固在其中矣。 先 不要跳越望 去做 近 盡乎 處 何以 近 推類 第 級 挨 思 如『刑于寡妻』,便 那 思在己者, 便 是親親 博 將 議 要跳 者 去「御于 級 去。 其約哉? 然後 件 進 須是一步了,又一步。 遠, 以 所 事,知 到第 到 之類。 如 類 謂 有 第二級,又因第 亦不是 力行之意 家邦」。 這 切與 以 三級 而 得 則仁 仁民 得 必 亦是 件 推 近,只 推 縱 先 其 事 約而 如 類 若 便 横 立 在 步 恁 理 能見於行 脩 去『至于 陡 其 會 是 能 推 地 語 其 身, 守之, 頓, 志 在 得 切 類 録 中 便 則 級 如 前 只 問 去 如 诱 己

● 「淺」,原作「諛」,據四庫本改。

陳,便 到 得 理 無 而 費力,只管見難,只管見 (恁地 減了 會得分曉 時 件,逐件推 功。 志不 便 自 自 遇 謂 得了,却不知 越不能 不曾 事自 然 知 篤 得 向 透 將去 1先理 許 前 不 徹。 則 多道 難 得軟 得 大 會 相 去,如 且 路 而 須 前 得 次亦不難。 如煮物事,合下 政 是 面 無 \遠。」○又曰:「今人不 方 撞頭 如 件, 何不教 將 能 成 義 心 透 却又理會 理,只 搕 來 徹。」 泛問 腦。 心 須 經履 如 理 是劈 蘇 人心裹若是思 便用 鏖 會得二三分 遠思 氏 這 戰 初頭 件。 曰 辛 慢火養 番 干苦? 要 則 若 曾 理 理 見 以 博 勞 便 會 經 了 索 却 會 類 學 m 行 得 道 煮 直 得 而

其道。」、 ○子夏曰:「百工居肆以成其事,君子學以致

篤。 業 肆 致 成 其事』「致其道 (者,極其所至也。) 工不居肆,則 官 氏 日 府造作之處。 君 「居肆之與學,二事 子不學, 三,以 致訓 極 則 致,極也。 則 奪 成猶 若不 於 極 外 遷 相 也 於異 類, 誘 《文集 極 然以下文 而 猶 志 物 成 \cong 也 不 而

成事與 則 子之説,則見 説得 後説 亦有 則皆 事 學 道。 義 學,可不知所 也 則 而 致 説 肆則做事不 事之與道 其 志不立,不可 也。」〇胡 而 心 則 心 始 不足以 不能 將 道 志爲外 云: 然而居 不外用,而其業 見君子之學,必當 備。 百工 (致道 邊,故 則 半 「居肆必 塗而 必 致其道,如學小道,與夫『中 欲 致道 成。 《語 氏 物所遷 由學,既 肆亦有不能 至於成 君子之欲致 必二説 居 日 : 廢 也 主 録 君子學便 一,則 肆,必 矣。」 須務 務哉?」愚案:二説 於 \mathbb{F} 誘 知所以 前 非 相 日 用 日 其所學者,又不過口耳之習耳。 而 成其事 尹 説則 須 廣 用力之專,不 功, 爲 成其 一百工 務致乎道。 不 學 而義始備也。」〇輔氏曰: 道 務 氏 可 此 能 重 立 則 不 (事,如 以致其道 專 主於 成 事與道之所以 曰 志而功不精 在居肆 學必須 居肆,方能 必 叮 : 其 固 務 立 不 開坐 致 夫欲致道 事。 學 可 與 志 由 不 務致其道。」是皆 道 道而 八爲學 ,不學則不 也。 於學。 一打鬨 足以 所 做得 然 然 亦 後説 廢」之類。 君 居 以 成 後 不可 知 過 致 而不 相須,其 事 也 肆 子 爲 致 所 由 日 其 成,不 如 能 則 君 底。 以 道; 尹 也 之 其 ·由學, 不 務 氏 子 由 用 重 致 學, 於 道 欲 然 學 故 之 故 其 功 在

二説相須而備,非如他章存兩説之比也。」

○子夏曰:「小人之過也必文。」文,去聲: 過也。」 不能 難,而 過。」〇胡氏曰:「憚於改過而不憚於自欺者,以改 欺,故必文以重其過。黄氏曰:「不能謹 有過者,過也,不能改悔而文以爲欺,又過也。 文,飾之也。小人憚於改過,而不憚於自 審思 自昧其本然之善心,反不以爲難。 而 遂 與 理 / 悖, 過矣; 而又飾 之以爲欺,是再 重其過者,始 故曰 身而 悔 重 至於 焉 爲 其

□,聽其言也厲。」○子夏曰:「君子有三變:望之儼然,即之也

和。 玉温 則不温,温則 之確。黄氏曰:「儼然,手恭而 儼然者,貌之莊。 此 非有意於變,蓋 厲者,義 潤 而栗然。」輔 精 而 不 辭 確。二〇 ·厲,惟孔子全之。」謝 温者,色之和。 氏曰: 並 行 程子曰:「他 謝 而不相悖也,如 足 氏 重。 發明 温 得變字分曉 者,心平而氣 厲者,辭 人 氏 儼 日 良 然

所以足程子之説。

蓋他

人所

以

儼

然

則

不

温

温

則不厲

者,皆有意爲之。蓋道並行而不相悖也,如良玉温潤而

栗,此喻甚切。」

厲己也;信而後諫,未信則以爲謗己也 ○子夏曰:「君子信而後勞其民,未信則以爲 信,謂 所以 孚,而後 謂信而 君之勞民,所以安其生也,而反以爲厲己也,臣之諫 也。」厲,猶 上下交孚。 成其德也,而 後 誠 勞之矣。 意惻 可 己雖有信, 病 以 有爲。 也。 怛 反以 如伊傅之告君, 而 爲謗己也。 事 而人或未之信,猶未可 人信之也。 輔氏曰:「若上下未交孚,則 上使下,皆 如 則 湯 輔氏曰:「信,謂 可 武之使 必 謂 信 誠 民 謂之信 愐 意 則 後 君 交 諫

○子夏曰:「大德不踰閑,小德出入可也。」 之矣。」 之文,小德之所在也。」閑,闌也,所以 倫,大德之所在 蓋以其所關有小大也。 細行對大德 大德、小德,猶言大節、小節。 而言,細 也。 行即 動 父子、君臣、夫婦、長幼 小德之類 静, 語 故 默,與 胡氏曰:「《書》以 云猶 止 大節 八凡應 物之出 對進 朋 小 友之 節

邪? 若夫拘 道 免有自恕之意,此所以不及曾子歟。」○胡氏曰:「觀人之 學,戰戰兢兢,無時不然,直至死而已,豈有大小久近之間 有空闕間斷 ○輔氏日 皆不踰閑者,上 直尺者矣。」〇黄氏曰: 盡 正不可自恕。 定,小節 言,不能無弊。 小者不致意焉,則併其大者失之矣。」 ,取大端而略小失,猶可也,若立心自處,但曰謹其大者 合理, 子夏之言,豈 子夏篤實次於曾子,而有小節出入可也之論,則是未 言人能先 拘 有差亦所不免。 於小廉曲 「道理無空闕處, ,便是這 亦 一以小差爲無害,則於大節必將有 無 也。 有激 害也。 謹,而 立 裹欠少了,更無填 學者詳之。」《語録》曰:「大節 大德盡 而云乎? 乎其大者,則小 「子夏此語信有病矣,然大德小德 然吴氏謂此章不 臨 大節則顛倒錯亂者,無可觀也 亦無間斷時,無小大精粗, 善而小德未純者,猶其次也。 〇吴氏 此又學者之不可不察。 (補處。 日 二、此 能無弊,學 節 是以君子之 雖 枉 章之 或 尋 未 者 而 既

何?」洒,色賣反。掃,素報反。 進退,則可矣。 抑末也,本之則無。如之〇子游曰:「子夏之門人小子,當洒埽、應對、

> 心誠 矣。 子游 然此 意之事,則無有 譏 子 小學之末耳,推 夏 弟 子,於 威 儀 其 容 本 節 之 如 大 間 (學正 則 口

矣。 惟聖人乎!」别,彼列反。焉,於虔反。 孰先傳焉? 子夏聞 君子之道,焉可誣 之曰: 孰後倦 噫 焉? 言游 也? 過 譬諸草 矣! 有始有卒者,其 木,區以 君子之道, 别

同。 此? 爲後 之,若夫先傳後倦 深,不啻白黑之易見,故如草木之有大有 語之,則是 淺深,不問 草木之有大小,其類固有 子之道,非 倦 一,如誨 而學不昭 而倦教。 輔氏曰: 人不 其 然在吾之目中, 誣 以 「窮理之至,知言之極,則學者所得 之而 , 則 生 其 倦之倦。 但學者所至, 熟 君子無是心也 末爲先 른 而 概 然後循 君子之道,豈 區,猶 而 以 别矣。若不量 傳 一,但 高 之, 自有淺深 其次第 一時 且 類 其可 小, 非 遠 也 其 等 而 者 以 릳 類 級 其 言 可 强 之淺 各 而 其 如 如 君 至 而 教 不

事

此。 序,而 知 其序,而 其 之道,豈有誣之之理?」若夫始終本 無大小 正以理無大小,而 教以遠大也。」或問: 後 是也。」豈可責之門人小子乎? 麽樣子?」曰: 「如云下學而上達,當其下學,便上達天理 其味,勉而行之,終不得其方,則是誣之而 於言之未知,知之未至,不察學者淺深生熟之異,而 人有序,何也?」曰: 曰:「君子教人有序,先傳以小者近者,而 之,則惟聖人爲然、《語録》曰: 以子游之所謂本者彊而語之,則學者漫而聽之,實不 教 理 教以大者遠者。 而 故不知理之無大小 人之有序,故於門人小子 ,而理之無大小者,莫不隨其所在而 理之全體,固已虧於切 有所遺也。 一, 舍近 教人者尤欲必 求 遠,處下 蓋由其序,則事之本末鉅細,無不各 無不在,是以教人者,不可 「無大小者,理 ,則以 窺 非先 由 「既以爲理無大小,而又以爲教 高, 其 洒掃 近細微之中 序 而欲 則不惟其所 傳 也。 應對 以 直教之精 也; 「問:『聖人事是甚 子游之説,蓋 近小,而後 爲 矣。 無所 有序者,事 末 己。 末 妄意 而無本; 此所 以 遺 義 君子教人 者 不 程 以 神之 失於 以 不 由 不 也 不 子 貫 不 H 得 理 口 其 知 概

對

日: 出。 此。 言,則未嘗有大小之間 以究夫形而上之理 子只在謹 末以達本,工夫不偏 其小者、近者,而後從事其遠者、大者,是謂 義人神」,更不用做其他事也。」○陳氏曰: 擇,此所謂『教人有序』也。 者便須從始做去方得,聖人則不待如此做 始終皆備。 然若不得程子説得『君子教人有序』四 無本末,無小大。 「理無大小,無乎不在,本末精 ,以盡夫形而上 ,便是形 「洒掃應對,所以習夫形 但 聖人「有始有卒」者,不是自始做到 方舉 洒掃應對之 洒掃應對,精義入神,便都 獨。 而 後來忽然思得,乃 一者之全體也。」○《語録》曰: 上者 也。 或問 靠在 而 此其事之大小固不同 無 端,❶未及乎精義人神之云者 理 一邊。」又曰: 非 不在也。 洒 而下之事 無 是謂 粗 掃應 皆 大小 要從 對 知 「洒掃應對」便是「精 程子之言,意蓋 也。 <u>T</u>i. 却 便 在這 故 頭做去,不可 終,乃是合 句,也 是 是 也。」〇又曰 精 循序 「須是先從 有 也 形 洒 裏了。 矣、然以 義 本末小大 而 此章 無緣看得 漸進 入神,所 上 故 掃 者。」 若學 下便 將 由 君 應 如 理 事 揀 謂

0 但」,原誤作「無」,據四 庫 本改。 體 道 小

非大底是全體

·,

底不全體

也。」〇問

山此

只

是

獨

處

之全體

只只

是

道

中

之

節。」

曰:「合起

來

便

是

道之全

粗

不 理 静 放 事 對 形 遠

要「只 序,以 合當理會處, 理無大小」,故學者即是小者,而可 八事小事 底理 公遇,只 矣。 會 上有 是理。 底、「精義人神」自是精 可 而 程子之意,正 通 做功 説 ,只理 E. 徐 以 在謹獨」,此甚言小之不可 盡夫小者近者,而後 豪髮 其曰『便是』云者,亦曰 會起,方漸而至於精者大者。」或曰: 者也。」○《文集 繹 理 「洒掃應對」便是 在謹 夫始得。」〇 事即 其 無 精 會 蹉 緒 大小 那精 便 獨。 粗 過 理 者,以 角 巨 謂 理 結之, 底。 則 細 與 但 理 他 《語 不 理 即 無 是 盡 既 理會,故『君子只 知 事,道 \mathbb{Z} 故 上 大小 説 録 「精 用 底,然道理 是合當做底 無 便 其 通之, 理 司 $\check{\exists}$ 洒 義人神」。 盡 詞 有 會。 散 以 故君 時 間 不離乎是耳,非即 若 進 事 掃應對 在 當 則 斷 有 不 忽 夫遠者大者。 萬事,那 子之學,不 欠闕 其 有 如 所 却 以并舉其 可 也 小大,理 詞 事 何 不 「洒掃 是事 説 足, 在 耳 備 般,須 故 便 箇 而説者 謹獨 謹 箇 洒 , 所以 而 用 是 君子 而 應對」只 獨一。 不是? 却無 大,則 意 可 粗 掃應 是從 做去。 意 可 直 底 須 以 反 故 不 洒 亦 **灬小大**。 得 失之 對 粗 事 不 貫 以 是 掃 此 \exists 由 難 矣。 問 是 又 不 非 底 動 不 若 爲 爲 其 其 應 明 形而 便是 日: 以 少 能 聖人之道,更

事物之理而言也。 下,而道則形 至小之事,❶亦有之矣。 非有象之可見,特因下文形 大,大處小處 有 謹 「以《易》考之,其曰 上者爲大也,蓋不但至大之事方有形 至精之理。 獨,只管 不謹 則 而上 都 理 形 會 是 而 其曰 也。 理 大處 洒掃 上下 理 形 小 一小小小 應對 形 便 無大小者 故 而 而 處 相 上,謂 日 不 而 上 間 ,事物至粗,然其 底事 理 下 者,蓋對 到 斷 者而爲文,言器乃 否 無大小」 超乎事物之表,專指 ', 非 理 便 便 照 以 形 管 日 不 洒 而 周 不 也。」又曰 而 掃 下者 币 到 亦 上之理,雖 應 所以 是。 對 而 $\overline{\bigcirc}$ 理 然者 言 爲 形 黄 無 蓋 小 形 而 小 不

抑 耳 而

非謂 亦有 形上之理 神』是一 義入神貫通 然如何。」《語録》曰: 洒 所以然。 樣 掃應 即 道 對 理。 洒 其 掃 便 只 日 洒 亦 是 丁貫 有 掃 「精 理。 通 精 形 應 只 義 粗 而 一對 人神」。 此言「洒 上之理。」○黄氏 雖 理」,言二者之理 必 洒 從 有 洒 掃 所 古 掃應 以 應 掃 是 然,「精 「精 對」與「精 對 應 一, 只 日 義 對 只 義 神」有 與 「其日 看 義 神 般 所 精

0 之」,原誤 作「 理」,今據四 庫本改。

無

於所以 曰 : 也 物 此,以 會那本,這便不得。 然之事也; 未嘗以其事之不同 神,本末精粗,不可同 形 對之事,其然也,形而下者 以 本 即 至 之至精者也、 者,理之妙 須是就事上理會道理,❷非事何以 精 而上 (有本末,而本末不可分者,何也?」曰:「有本末者,其 ·粗之事與至精之義固不同,然至粗之事其所以然者, 至精之義也。」又曰: 然。」或問: 末爲 精 義 「治心脩身是本,❶洒掃應對是末,皆其然之事也,至 與洒掃 入神」者 義人神,本 然則 者也。 兩 而 理也。 不可分者,以 段 不可 應對對言 自形而 如夫子之言性與天道之類是也。 蓋 「「其然」、「所以然」之説。」曰: 事 也。 測 言精究義理,極其微妙,以至人神。 理無精粗,本末皆 , 而 又不可説這末便是本,但學其末,則 者。 下者 日 不 有餘於此不足於彼也。」曰: 洒 而 蓋以至粗之事,對 可 凡物 其所以然之理 今其所精之義至於人神, 語矣。 而言 也; 掃 説 應 這箇 洒掃應對之理,所以然也 則 對 自 是末,不足理會,只 以識理? 洒 有本末,不 是 夫形而上者言之,則 掃應對之與精 是 其 也。」〇《語 然 貫。」〇又日 至精之義 洒掃應對,末 "; 必 洒 程子引 可分 「其 有 義人 則 掃 録 也 理 所 Ξ 應 義 神 0 0

> 子四段 其 循 精 説 對 本便 條之意,實相表裏。 而不勉不思,從容自中耳。」 愚笑: 所以爲聖人者,初不外乎此理,特其事事物物皆 如此者,謂 小,亦不過由天理之全體而著見於事物之節文。 而後其節文之著見者如此 是其 也。 序 末 此 粗 上,便可 在此也。」〇黄氏曰: 次言道 而 章文意最爲 而 本 細推 然必有 本便在 漸 末 洒掃 之, 進 無精 所 其 到 則 不不 應對之節文也。 以 首言理 分雖 聖人事。」黄氏曰: 然,所以 此 粗 可厭 以以 也。 詳 見學有精 殊 盡 無 「然」之爲言,猶曰如 也。」又 發明 末 大小,以 黄氏 非 而 而 謂 其後四 Ŀ 所以 曰 理 求 粗 末 日 見 段 而 則 本。 以 如 即 程 事 所 道 「洒掃 此 子 是本, [條,皆 以 則 有 《集註 者, 0 自 蓋 大小 無 第 派小大 也。 與 學 謂 應 洒 此 由 所 聖人之 而 對 有 也。 但 第 者 以 掃 此理 條, 無精 又 理 引 雖 此 學 當 明 次 應 則 其 至 理

言

[「]上」,原誤作「一」,今據四庫本改 是」,原 你誤作 「思」,今據四 庫本改。

事,不以事之近小 然乎? 大精粗 之説爲當也。」○愚謂 或曰 註 先後二字考之,則 粗 立之意。 》先後以義理之精粗 《集註》又以程子第一 者爲之也。 曰 : 又次言便可 此 亦取 前 程子先後以 理 其所釋傳 亦足以 至聖人事, 有不該 一而言 學其末而 見編次之意至 條説本章文意最爲詳 則 也 教者所施之次第而 與 程子之説又不若 倦之義爲詳 則亦 本便在此者,理貫於萬 以 其 介所以 精 盡 而 然而 耳。 不 言、《集 集 苟 盡 然以 無小 註 者 矣。

)子夏曰:「仕而優則學,學而優則仕。」

然仕 然仕 物致 輔氏 於所主之事,有暇 也。 仕以見學之用,特治己治人之異耳。 所 其 優,有餘力 當 事者,必先 然也; 以 知爲事,故曰事 則 曰:「仕所以 而學,則 事言 以 陳 事 力就列、 ,則當其 ,異者,有治己治 也 所 有 H 行其學,而學所以基 致君 以 事者,隨所 異。」〇胡氏 則 以 仕與學 及其餘,非 資其 盡 澤民爲事,學 其 人之别 仕者益深 事,而 主而爲之緩急,必 理 EI. 有所輕重 百 也。 仕 以 則 而 其 後 理 學以 與 以 仕, 事 可 學 言,則學其本 誦 一於其間 學而 異,故當 故 及 爲仕之本、 理 詩 同 日 其 讀 先 ,者,皆 理同 書 也。 餘 仕 盡 格 心

> 之義 則 則所 則仕,爲未仕者言也,謂學 則不可 無行道之功,以 而言之也。 以 以不學,不 驗 其 學者 仕 驗其學。 學 而優則學,爲已仕者言 則 益 無 廣。 知新之益,以 ,有餘 要之,學是終始 力,則不 輔 氏 日 資其 可以 也 此 事。」 仕 又推 謂 不仕,不 仕 學 極 有 此 而 餘 仕 優 章

○子游曰:「喪致乎哀而止。」

意。 足而 戎狄之道也。 以爲喪致乎 而遂廢乎禮哉。」 與其易也,寧戚。」「喪,與其哀不足而 而 意。」愚案:「而止」二字,亦微 其易,寧戚』,『不若禮 致極其哀,不尚文飾 簡 要之,喪固貴乎 哀有餘。」皆假設得失兩端而言之,故不害。 略 細微之弊。 哀而 君子造次 止,則其言便 哀,然禮不可 顛沛不違乎仁, 豈以哀戚之故 學者詳之。 也。 有 不足 過 楊氏曰:「『 廢, 於高遠而 故 禮 而 有過 日 有 輔氏曰: 哀 直 餘,不若禮 簡忽禮文之 有 情 於高 餘」之 而 喪, 子游 徑行 「喪 遠 直 不 與

未仁。」 ○子游曰:「吾友張也,爲難能也。然

耐

高,故於此四字皆有所不足。 誠 子 實則無真切之意,不惻怛 張 行 過 高, 而 少 誠 則 實 無 惻 隱 怛 痛之情,子張 一之意。 愚謂 旅務外好 不

曾子曰 爲仁矣。」 毅木訥近仁。』寧外不足而内有餘,庶可 内 能有以輔人之仁。一一范氏曰:「子張外 密察之功,既不可輔之爲仁,於人無切偲觀感之助 堂堂,容貌之盛。 而爲仁,亦不能有以輔人之仁也。 難與並爲仁,實具此兩意。 不足,故門人皆不與其爲仁。 「堂堂乎張也,難 言其 蓋務外好高,則於己無 務 外自 與並爲仁矣。」 高,不可 子曰:『剛 有餘 輔 氏日 ,亦不 體 以 輔 而 認

能也。」

○曾子曰:「吾聞諸夫子:人未有自致者也,

者。 皆極其至。 致 盡 胡 氏曰: 其 中人以下,則罕能之。 極 「上智之資於理所當 也。 蓋 人之真 惟父母之喪,哀痛慘 然者,固 情 所 不 不待 能 勉 自 强 已 而

> 他 ○曾子曰 可 自盡也,於此不用其誠,惡乎用其誠。」 良 怛,蓋其真情之不能自已者,聖人指 心,非專爲喪禮發也。」〇尹氏 能 也; 「吾聞諸夫子: 其不改父之臣,與父之政,是難 孟莊子之孝也,其 日 以示人,使之自 親 喪 固 識 所 其

私意,便自容不得。 故其 不能用。 多人,如長孫無忌、褚遂良之徒, 處,自行不得。 獻 孟 蓋善之也。」〇《語録》曰:「人固有用父之臣者,然稍拂他 莊子之賢不及其父,而能守之終身不改,故夫子以 難。《文集》曰:「獻子,賢大夫,其臣必賢,其政必善。 子 莊 他孝行雖 有 子,魯大夫,名速。 又季文子相三君,無衣帛之妾,無食粟之馬 賢德,而 古今似此者甚多。 有 亦有行父之政者,於私 可 莊 稱,而皆不若此事之爲 子 能 高宗因 用 其父獻子,名蔑 如唐太宗爲高宗擇許 其 臣,守 立武 欲 昭 稍 ,其政。 儀 有 事, 爲 不 難 便 便

■「此」下,原行「此」字,據四庫本删。

季武子便不如此,便是不能行父之政。以此知孟莊子豈

不爲難能。」

○孟氏使陽膚爲士師,問於曾子。曾子曰:

恤周盡

如

此,嗚呼仁哉!」

得其情 逸 情,則喜矣,豈知 之無其素故 於法之中。仁人之言蓋如此。]〇輔氏曰: 太刻之意,或溢於法之外,得情而矜,則不忍之意,常 法也,非 之散也,以 義薄,不相 内則無尊君親上之心,外則無仰 維繫。或問:「民散之説。」曰:「生業不厚,教化不脩 陽膚,曾子弟子。 二"迫於不得已,則使之無其道故也,陷於不自知,則 [則心放,放則哀矜之意不萌 ,則哀矜而 維繫,而日 迫 也。 於不得已,則陷 使之無道,教之無素。 後世 哀矜而 治獄之官,每 有離散之心耳。」謝氏 勿喜。」黄氏曰: 民散,謂情義乖離,不相 勿喜之味哉? ,其於斷獄 事俯育之賴,是以 患不得 於不 且人喜則意逸, 剖訟 「得情而喜 其情,苟 「民之犯 知 故其 之際,必至 曰 : 也 得其 民 罪 恩 犯 故 則 教 有 行 疎

哀矜之意生而喜心忘矣。 詳味曾子之言,至誠惻怛而體於過中失人有不自知者。 唯能反思夫民情之所以然,則

君子惡居下流,天下之惡皆歸焉。」惡居之惡,〇子貢曰:「紂之不善,不如是之甚也。是以

去聲。

非也。」 之地。 故朱子於此既述其正意,而又明言或者之説 之甚,而或者又從而推衍其說,以爲真得子貢之心者 此,欲人常自警省,不可一置其身於不 身有汙賤之實,亦惡名之所聚 下 曰:子貢服行「恕」之一字,故能見得紂之不善本不如 曰:「此章之意,全在 流,地形卑下之處,衆流 非謂紂本無罪,而虚被惡名也。 下兩句,而 世 儒乃以 之所 也。 歸。 上 兩 而斥以 子貢 句 喻 輔 生 善善 X 爲 是 説 H.

也,人皆見之,更也,人皆仰之。」更,平聲。〇子貢曰:「君子之過也,如日月之食焉:過

○衛公孫朝問於子貢曰:「仲尼焉學?」朝,音

六八〇

潮。焉、於虔反。

公孫朝,衛大夫。

識,音志。下焉字,於虔反。 道焉。夫子焉不學? 而亦何常師之有?」識其大者,不賢者識其小者,莫不有文武之子貢曰:「文武之道,未墜於地,在人。賢者

之者。 本 所謂無適而非者,亦豈離於文章禮樂之間哉? 子、師襄之儔耳,若人太廟每 者識其小,而後得師邪? 唯所取而得,則又何時而墜地,且何必賢者識其大,不賢 墜」、「在人」之云者考之、則可見矣。 若曰道無適而非, 實,貪鶩高遠之意,故其説 曰:「此固好高者之所不樂聞,然其文意不過如此,以『未 周之禮樂文章皆是也。 文武之道,謂文王、武王之謨訓功烈,與凡 意 師也。 則 正 識,記也。或問:「文武之道爲周之禮樂。」 大率近世學者,習於老、佛之言,皆有 一指其 事 實 (而言, 常如此,不可以不戒 此所謂人、正謂老聃、萇弘、郯 不如是之空虚恍忽 事問 在人, 言人有能記 焉,則廟之祝史,亦其 也。 但 厭 而無所 一子貢 然彼 薄事

據也。」

○叔孫武叔語大夫於朝,曰:「子貢賢於仲

| 尼。」語,去聲。朝,音潮

武叔,魯大夫,名州仇。

之牆也及肩,窺見室家之好。 ' 是服景伯以告子貢。子貢曰:「譬之宮牆,賜

牆卑室淺。

夫子之牆數仞,不得其門而入,不見宗廟之

美,百官之富。

有,言牆高而宫廣也。 七尺曰仞。不入其門,則不見其中之所

得其門者或寡矣。夫子之云,不亦宜乎!」

此夫子,指武叔。

也; 尼不 絶,其何傷於日月乎? ○叔孫武叔毁仲尼。子貢曰:「無以爲也,仲 仲 -可毁 尼, 也。 日 月 他人之賢者,丘 也 無無 得 多見其不知量也!」 而 踰 焉。 一陵 也, 雖 猶 欲 可 自 踰

聖人耳。」多,與祇同,適也。 受化工之生也。 無以 未嘗不欲物物而生之也。 自絶於孔子。 陵。 爲,猶言 日 月, 聖人未嘗有絕人之心,彼謗毀者自絕於 喻其 無 胡氏曰:「聖人之心,如化工之生物, 用 爲 至 彼傾者覆之,物自傾,而不得 高 此。 自 土高 不知量,謂不自 絶,謂以 日丘,大阜 謗毁

子乎?」)陳子禽謂子貢曰:「子爲恭也,仲尼豈賢於

697

知其

分量

言不可不慎也。 子貢曰:「君子一言以 爲恭,謂爲恭敬推遜其師 知,去聲 爲 知 也 言以爲不知,

夫子之不可及也,猶天之不可階 責子禽不謹言 而 升 也。

階,梯也。 可階而升。輔氏曰:「大,則思勉之所可及,力行之所 大可爲也,化不可爲也,故曰不

> 至,故 可至,故曰可爲。 日 不可 爲。 若化,非思勉之所可及,力行之所 唯 其 非 人力之可 爲, 故 \vdash 不 叮 可 階

而升。」

如之何其可及也。」道,去聲 綏之斯來,動之斯和。 夫子之得邦家者,所謂立之斯 其 生 也榮,其死也哀 立,道之斯行

時雍。 得?』曰:「「五畝之宅,樹之以桑,百畝之田,勿奪其 感應之妙,神速如此。 治」、「惟 之歡喜踴躍、遷善改過而不自知,如 曰「勞之來之」,「又從而振德之」,振 來謂來歸己。」動,謂鼓 綏,安也。 教之也。行,從也。 育之類,「斯立」則民即得以遂其生矣。」道,引也,謂 便是。」」〇胡氏曰:「植其生者,制民之産,使足以仰 立之,謂植其 動丕 《語録》曰: 應溪志」,皆是 來,歸 生也。《語 「問:「那處見得鼓舞?」曰:「放動 附 舞之也。 也。 黄氏曰:「行謂惟命之從。」 動之斯 陳氏曰: 黄氏 録》 《書》之「俾予從欲以 曰 : 德處便是鼓 曰 : 和 和,所謂 」意思。」言其 「感,乃上四者 | 問: 「綏謂撫安之 那 於變 處 時 使 見

論語卷第十

執其中。

四

海困窮,天禄永終。」

始 難 以 也。 也。 已極於高遠矣。 貢之所謂,而又有以深探夫聖人動化之妙,則其所見 子之得邦家者,其鼓 「不可階而升」者也。 司 妣。 應,乃下四者。」樂,謂莫不尊親。 人語,乃知晚年 ·流者也。」 愚謂: 「上下與天地同 人雖 蓋 程子曰:「此聖人之神化,上下與天 思勉及也。」輔氏 不離於聖,而 見 學者所宜熟玩而深思也。」 其變化,而 流」,此則非人力之所能爲,而 進德,蓋極 ○謝氏曰:「觀子貢 神化,謂「所存者神,所過者 舞 有不可知者存焉,此 曰:「謝氏既足以發明 群 莫窺 動 於高遠 其所以 哀,則如喪考 捷 於桴鼓 也。 變 稱 所 化 化 地 影 夫 聖 蓋 謂 子

堯日第二十

凡三章。

堯

日

「 答 !

爾

舜!

天之曆數在爾躬。

允

困窮,則是君失其職,則天禄固當永絶矣。 塊然不動者爲是而守之哉?四海之人困窮,則君 地也。 後也。 而立之君,使司牧之,則君之職 予人君之崇高富貴也。 禄亦永絶矣,戒之也。 本,則不可得而執矣。 其氣之時象如此也; 賢所言中,有二義: 過不及之名。 也。」允,信也。 德知之,非若讖緯之説,徒以其姓名見於圖錄 之序也。 曰:「帝王相承,其次第之數,若曆之歲月日時,亦有先後 曆數,帝王 此堯命舜,而禪以帝位之辭。 曰『允執其中』,蓋以其在事者而言,若天下之大 或問: 然聖人所以知其序之屬於此人,則亦以其人之 相繼之次第,猶歲 「曆數之説,若後世讖緯之學者,奈何?」 《語録》曰:「是真箇執得。」中者,無 或問"「執中之爲無過不及。」曰" 大本云者,喜怒哀樂未發之時之理, 中庸云者,理之在事而無過不及之 且聖人之道,時止時行,夫豈專以 如人臣 輔氏曰: 然,有職 在是矣。 一天禄 則 時 咨,嗟嘆聲。 儻 有 氣節之先 四海之人有 禄。 謂 而爲 天生民 天所賦 聖 言

舜亦以命禹。

《虞書‧大禹謨》,比此加詳。 舜後遜位於禹,亦以此辭命之。今見於

帝 : 躬有罪,無以萬方,萬方有罪,罪 曰 二:「予小子履,敢用玄牡,敢 惟 賢人,皆上帝之臣,己不敢蔽。簡在帝心, 命」者,不敢有 『天下賢人,皆上帝之臣,己不敢蔽。 輔氏曰: 惡也,在帝心。」言桀有罪,己不敢赦。 知之,如天檢點數過相似。 變其禮也。 有湯字。 告諸侯也。 此 有罪不敢赦。 帝所命 引《商書 「「桀有罪,己不敢赦」者,爲天吏而行天討也。 履,蓋湯名。 湯誥》之辭。 此述其 簡,閱也。《語録》曰:「善與罪,天皆 與《書》文大同 豪利天下之心也。」又言君有罪非 帝臣不蔽,簡 初 爾之有善也,在帝心,我之有 請 用玄牡,夏尚黑,未 命 而 小 蓋 簡在 昭 伐 湯既 異。 告 在 在 桀之詞 帝心,惟 朕 帝 于皇皇 而天下 放 躬。 日 心 上當 桀 帝所 也。 朕 而 后

> 之。 私窺聖人者曰,此 予一人」,誠是不關他 薄於責人之意。 民 曰:「所以「見其厚於責己薄於責人之意」者,蓋以 所致,民有罪 湯曰『萬方有罪,罪在朕躬』,武王曰『百姓有過,在 聖人以 事,此蓋言其實理 實君所爲,見其厚 此其告諸侯之辭也。 道 媚 天下 也。 然耳。 聖 人 寧 後 於責己 有 世以 其身 輔 是 心 己 氏

周有大齊,善人是富。齊,來代切哉? 侮聖人之言甚矣!」

此 錫予善人」,蓋本於此 其所富者,皆善人也。 大賚于四海。 以 下 ·述武 王事。 見《周書 賚, 《詩序》云「齊 予也。 武 成》篇。 武王 克商 (所以 此言

也。言紂至親雖多,不如周家之多仁人。」此《周書·泰誓》之詞。孔氏曰:「周,至一人。」

謹權量,審法度,脩廢官,四方之政行焉。

皆是也。 懂, 科解也。 法度, 禮樂制度

興滅國,繼絶世,舉逸民,天下之民歸心焉。

舉逸民,謂釋箕子之囚,復商容之位。三興滅繼絶,謂封黄帝、堯、舜、夏、商之後。

者皆人心之所欲也。輔氏曰:「興滅繼絶,所以順

天命而不忘前聖之功。● 舉逸民,所以順天理而不廢天

下之才。此民心所由歸也。」

所重: 民、食、喪、祭。

生,喪以送死,祭以追遠,五教三事,所以立人紀而厚風教,君臣、父子、夫婦、兄弟、長幼,五典之教也。食以養武成曰:「重民五教,惟食喪祭。」蔡氏曰:「五

寬則得衆,信則民任焉,敏則有功,公則説。

説,音悦

俗

,聖人之所甚重焉者。

也 此 於武 〇楊 王之事 氏 無 所 論 見 恐 語》之書,皆聖人微 或汎言帝 \pm 之道

> 非如異 平。 於是 而不足以開物成務者之爲也。」 其慮後世遠矣。 承之次,皆此意也。」輔氏曰:「記者以是終篇,則 孟子於終篇,亦歷敘堯、舜、湯、文、孔子相 與夫施諸政 終篇,具載堯舜咨命之言,湯武 言,而其徒傳守之,以明斯道者也。 本末具舉,體用不遺,其爲之有序,其成之有驗,固 而 端邪説之坐談空妙,展 己。 事者,以明聖學之所傳 所 聖人之學始 以著 明二十篇之大旨 轉相 於格物,而 迷 自以爲窮神 終於國 誓師 者,一 之意, 治 故於 知 也。 天下 化

子曰:「尊五美、屏 費,芳味反。 勞而不怨,欲 張 ○子張問於孔子曰:「何如斯可以從政矣?」 日 : 「何謂 子 五美?」子曰:「 張 而 不貪,泰 티 -四惡,斯 何 而不 謂 惠 可 驕 君子惠而不費, 以 而不費?」子 威 從政矣。」子 而不猛。」

^{● 「}不」,原脱,今據四庫本補。

乎? 乎?」焉,於虔反。 之有司。」出 慢令致 日 瞻 斯 仁,又焉貪? \Box 不 視 不 嚴 亦 因 擇 期謂 泰 民 教 口 然 而 之所利 而 绺 ,去聲 之賊 不 殺 而 望 君子無衆寡,無小大,無敢 驕 謂 ; 子 勞之, 而 平 猶之與 之虐; 而 張 畏 ? 利 □ -之, 又誰 之,斯 君 不 人也,出納之吝,謂 子 斯 戒 何 怨? IE. 不 不 視 謂 其 亦 亦 成謂之暴 四 衣 威 欲 惠 惡?]子 冠 而 而 尊 不 而 不 慢 猛 其 費 得 ;

是約 不 之以物 也 日: 刻 虐 後 果 消謂 期 東、立 「暴與賊意相似,何以分别? 以誤 也 語 殘 則是 與 録 限、 其 酷不仁。 **ĕ** 人,而 賊者,切 民, 輸 有 納及 言 司之事 而必刑之,是賊害之也。 於其 一等是如此,史家多有此般字。」均 禁止等事。 暴,謂卒 害之意。 出 而 納之際,乃 非 上句是工役等事,下句 猶之,猶言均 遽 爲 緩 無 於前 政之體 漸。 或吝 而 致 急於 陳氏 期 所 之 而

〇子曰:「不

知

命,無

以

爲

君

子

也

來請 便誤 取以附前章之後。 也。 當賞 其驗 口 氏 體 納之間 功 與 當 知 則 日 雖 而 事 便 凡事皆不 :「告問 也。 多,人 也。」愚謂: 故記之以 機。 封 吝惜 後賞之,則 用賞,當做 《語録 刻 如 而 李絳 亦 印 可 不 便 政者多矣,未 恩不 如 敢 ĕ ⊟ : 不 刓 夫子之爲政,蓋與帝王若合符節 繼 勸唐憲宗速賞魏博 孔子論爲政之方,莫詳於此 用 此 自 。 忍 懷 帝王之治,則 做。 專,却是 歸上矣!』 「只是戒人遲疑不決 當 其 弗能予,卒 爲 若遲 惠 處 便果 矣。 本 疑 職 īE. 怠 有 當 是此 決 忽之間 將 項 爲之也。」〇 然 如 夫子之爲 ±, 意。 以 羽 此 \exists 人 底意 取 使 之備 若 君 ,故門人 『若待其 縮 敗, 人, 思。 爲 有 靳 政 司 者 政 尹 亦 有 若 大 出

程子 君子不成。 子?」《語 知 命 İ 則 : 死 録 見 知 生自 $\stackrel{>}{\exists}$ 害 命 必 「學者所以學爲君子,若不知 有定命,若合死於水火, 者 避, 知 見 有 利 命 必 而 趨 信 之也 何 須 以 在 水 爲 則 火 君 裹 做

然有指 是也。 便趨 不 見利亦不苟就,故全得在我之義理, 必 人開 底,此 甚粗 死; 言,謂貧富、 知東西 者,蓋緣只見得 生趨避計較之心。 程子知而信之之説甚善,此政孟子所謂 知此 合死於刀兵,須在刀兵裏死,看 隕 П ,見害便避 ,然所謂知命者,不過 處人都信不及,便講學得待如何,亦没安頓 若知 亦,亦, 命而 理而 南北, 獲於 解説 貴賤、 言者, 信之,始 而未信 貧賤 無一 道理,都 , 如 窮通 有 豪疑惑之心也。 , 怵 飲一 何成 古人刀鋸 有箇 ,則知猶未至也; 指氣 迫於利 啄,自 得喪, 得 不見 地 而言 君子 如此。 盤 害 那 在前,鼎 有定分,及遇小小利 可 者。 也。」〇又曰:「此 以 定而不可易者也。 刀 倀 若這裏信不及,纔見利 進脩 鋸 倀 此 1如何 然後 命固天之所賦 知 鼎 所謂 鑊在 然無容足之地 而信之,則 見害 鑊。」〇 逃不得。 可以爲君子 知 命,則 後,視之如 亦不 而弗去』者 輔 處。 指 如人之 是 此 氏 予也, - 苟避 害,便 學者 氣 至 説 日 也 其 今 耐 無 粗 雖

不知禮,無以立也。

何以爲君子乎?

日 不 知 「禮,謂三千三百之禮文,是乃天理之節文,人事之儀 禮 則 耳 I 無 所 加 手 足 無 所 措 輔 氏

> 也。 聽, 手 苟不知之,則耳 持 足履, 皆冥行妄作 自 真 無所 而 加 己 手足 矣, 將 真 無 何 所 所 措 據 而 能 視

則

不知言,無以知人也。」

立乎?」

乎天。 利害不 天者。 而 之罪人也,可 篇,得無意乎? 學者少而讀之,老而 爲,必先格物窮理,然後能之。」〇尹 辭 言之得失,可 三者,則君子之事 遁』云者,皆是也。 心之聲也,故因言之得失,則可以 其意無窮, 内,而後可 言爲可 》所謂『吉人之辭寡,躁人之辭多』,孟子所謂 知己 能 知禮,知其 動乎外,而 一而不能 列之《論語》之末,其旨遠矣。」○輔氏曰: 以察諸 用,不幾於侮 不念哉?」黄氏曰"「知命, 以 在己者。 此其工夫密矣,固 知 後可 知人之邪 人 者,未 以 知天 備 脩諸 知言,知其在 矣。 耐 必 聖言者乎? 己。 能 不 Ē 知 能 弟子 益 知 非臆 乎 其 知己者,未必 氏 三則 人之那 輔氏曰: 己。 人者。 度意料者之所 記 티 : 義理 三言 此 『詖 正。 知 知 言 有 之簡 不 以 知 天則 其 能 以 淫 知 終 斯 繫

足以盡人之情,故尹氏以爲君子之事備矣。」言,則在人者無遁情。能是三者,則内足以成己之德,外「知命,則在我者有定見。知禮,則在我者有定守。知

論論卷第十

後學 成德 校訂

六八七

孟 子

朱子集註序説

後 學趙順 孫纂 疏

氏,名岐,東漢京兆人。 而 否。」〇《文集》曰:「《孔叢子》雖僞書,然與趙岐未知其孰先 孔子之孫,名伋。 ○愚案: 公族孟孫之後。《漢書》註云: [孟子真得子思之傳,則疑親受業於子思者爲是,而《集註》 也,姑存之。」○輔氏曰: 》及《孔叢子》等書亦皆云『孟子親受業於子思』,未 在漢魯國騶縣。 列傳》曰:「 〇《索隱》云:「王邵以人爲衍字,而 騶人也,翳,亦作鄒,本邾國也。 「子思之門人,無有顯名於後者, 受業子思之門人。 字子車。 孟軻,趙氏曰:「孟子,魯 一説字子輿。」〇趙 子思, 和是 趙氏

> 而後得也。 兩存其説。 又以《中 蓋 自古聖賢固 庸》一書觀之,所以傳授心法, 有聞而知之者,不必待耳 又曰: 『王者之迹熄而《詩 開 傳 孟子 以 示 面 藴 命

梁。 子在齊。」故《古史》謂:「孟子先事齊宣王,後乃見梁惠王 又何有長短於其間哉。」游事齊宣王,宣王不能用。 其理則一,其時又去孔子未遠,孟子必皆 而得之、非真有見於孟子之心與道者、不能也。 哉?」○輔氏曰:「趙氏但引《詩》、《書》而云爾,非能 於事情。 孟子之道也。 此而言,則趙氏謂孟子長於《詩》、《書》而已,豈 子通五經,尤長於《詩》、《書》。」程子曰:「孟子曰:「可 奥,如此其至,則當時門弟子中,豈無見而知之者哉? 適梁,梁惠王不果所言,則見以爲迂遠 亡、《詩》亡然後《春秋》作。」又曰: 『春秋無義戰。』又曰: 者也。」故知《易》者莫如孟子。 則仕,可以止則止,可以久則久,可以速則速。」「孔子聖之時 從而受之,愈益光明,亦宜有之也。」道既通,趙氏曰:「孟 『《春秋》天子之事。」故知《春秋》者莫如孟子。」尹氏曰:「以 其後二十三年,當齊湣王之十年丁未,齊人伐燕,而孟 案《史記》:「梁惠王之三十五年乙酉,孟子始 至於程子知《易》、知《春秋》之説,則皆以其言 一一理會得 五經雖異 知 孟子 有見於 一而闊 透 徹

鎔 如

鑄

而

成,非

綴

緝

可

就

也

《論

語

》便

是記

録

綴

緝

所

爲,

非

文字矣。」

首章註曰

「門人不能盡記其辭」,又第四章

上註日 七

「記者之誤」,

何?」曰:

前

説是

,後兩處失之。

熟讀

篇,觀其筆勢

如

○《文集》曰:

問:

『《序説》謂

「《史記

》近是」,而於《滕文公》

自

者不合。 耳。」當是之時, 仲尼之意 孫子、田忌。 孟子先游梁 此是太史公所見 、孰是 **社王、齊** 章,三萬四千 》等書皆 》爲正,伐燕實湣 説 軻既没, 也。 湣 丽 不 不合。 E 同 退 而後至齊見 ,作《孟子》七篇。」趙氏曰:「凡二百六十 孟)輔氏 《史 -六百 其 一獨《孟 而 軻 徒 天下方務於合從 耐 ,略與韓子論其所傳相似。」是 秦用 E 乃述唐、虞、三代之德,輔 王時事,恐是後世傳寫,誤以『潛』作『宣』 與 記 (萬章、公孫丑 八十五字。」韓子 通 子》以伐燕爲宣 萬章之徒 「詳攷朱子之説 近 宣王矣。 鑑 商 是。 议 鞅 伐燕之歲 0 グ,楚 然《考異 相與 韓 序《詩》、《書 子, · 日 : 王 魏 則 記 爲宣王十九年 時 事,與 名 連 用 軻 常以 「孟軻之書, 亦 愈 衡,以 所 吴 無它據,又未 言焉耳。」愚 九起,齊 《史記 唐 《史記》、《古 以 鄧 学,述 氏 攻 州 所 非 則 日 人 伐 如 用 軻 是 荀 屬也。 死不得 舜,以 焉 此非 而

知

子

者識其小,而體其全且盡者,則爲得其傳耳。」 以至於孟子,其間相望有 子,名況,楚蘭陵人。 空撰得出,必有所見。 文、武、周公傳之孔子,孔子傳之孟 禹,禹以是傳之湯,湯以是傳之文、武、周公, 其 深知所傳者何事,則 不詳。」程子曰: 韓 特此心之體,隱乎 盡 子曰: 其 此 傳 心之體 焉。 而 堯 揚子,名雄,漢蜀郡人。 릳 若無所見,不知言所傳者何事。」〇 荀 以 或數百年者,非 「韓子此語、非 百 與 未易言 是 姓 禹、 揚 日 傳之舜,舜 湯、文、武、周 I 用 之間 也, 也。 擇焉 是 堯、舜之所以 得 · 賢 蹈襲前人,又非 П 者 公、 傳 而 ○《文集 識 以 耳 軻, 孔子傳之 不 其 是 授密相 (大,不 精 傳 軻 爲 ¥ 堯 之 之 語 付

本已失。 道不到。 説 \exists 而 小 其與田 韓 ·疵。」程子曰:「韓子論 又曰:「孟 子 揚 其論荀、 謂 駢 子 荀 雖 慎 揚 少 、 揚 到 過 大醇 則 氏 申 非 然 醇 不 小疵,非 也。 害、 亦 平 不 韓 醇 荀 孟子甚善,非 識 子 非之徒觀之, 者 是 性 極 就 也 更 偏駁,只 他 説甚 論 荀 性 見得 道。」〇《文 與 則 處 句 説,只是 荀 揚, 孟子意,亦 性惡,大 揚 大 爲 醇 泛

録 得 醇 耳。 爲非 Ĭ 韓 程子説荀、揚等語,是就分金秤上説下來。」 若是 子 ,只是説 會説 底 那 説 邊 那 然以 邊 一,亦自 這 邊 觀之,則 湊 着這 湊不着, 邊。」〇 故 《語 覺

傳,而 實 學 ПП F. 好。」問: 就 子,皆其學也。」〇《文集》曰: 得 弟子 其 思之學出於曾子。 徧 得。 子曰: 子 發 該實處説否?』曰: 『韓子亦未必 其宗。 後 觀 觀 也。 明之,以 其啟手足之言 有子 又 曰: 離 而 文學者 源 「學焉而皆得其性之所近。」曰: 「孔子言 觀其 散 恵 盡 遠 故求觀聖 輔 爲 識 孟 啟 ,就文學上 脯 分 「孔子之道大而能博 曾 氏曰: 軻 也, 手足 1參也 子只 處 末 然不言其 所 諸 故學焉 益 時之言 魯 緣 謂 韓子但言孔門諸 一學得。 分。 侯之國, 資 人之道者,必自 自孔子 然顔子没後,終 質 息 問: 所 尚存, 魯鈍 可 惟 德行、 而 以 以 獨傳 「大是 ,没,獨 皆得 孟 有此 見矣。 此 又各以 故 言 軻 志不容 用 之故。 語者 『政事者 意,但 子,唯曾 就 師 其性之所近。 功於 ,門弟子 所 得聖人之道 渾 孟 子 傳者子 就 其 少 淪 内 孟子 軻氏 故 如 思 懈 處説 德 者深 程 就 子之學獨 所 此 者 行 政事 子 看 思、 始。」 之傳 而 能 不能 篤 此 又 言 亦 博 者 子 授 從 孟 聖 確 語 Ì. É 是

道之所以終傳,而有子思、孟子之學也。」

然賴 言 其 救 貴 子 下 孟 次、壞爛 者,爲此 侏離矣。 能 Ŧ 辭 子 廓 賤 雖賢聖,不得位。 其言,而今之學者 而 又 如 闢 日 霸 而 也? 之,廓 而 也 不 故愈當 揚子雲日 己。 收。 然 如也。」夫楊、 其 向 所 推 大 謂 無 尊 經 尚知宗孔氏,崇仁 空言無 孟 存 孟 『古者楊、 大 氏 + 氏 法 則 以 施 墨 於千 皆 皆 行, 爲 雖 墨 服 功 百 切 IF. 寒 滅 不 左 道 路 何 在 衽 安 而 義 廢 補 在 不 禹 Щ

也。 處。 程子 子 力之譬,精密切當 處」,以其 論「大而化之之謂 然其英氣未化 愚案: 티 : 或問 知 言 於程子曰 至字,恐當 未敢便 也。 非 聖 未 有 想像臆 圭 敢 聖 道 作 角 : 便 而 聖字。 見 他 孟 道 不可 度 處 他 是聖 之所能 是 子 知之之謂 故 〇輔 聖 還 未 人」,以 人,然 及, 敢 可 氏 便 是其 謂 神 道 其 」,與 聖 他 學 「學 學 行 是聖 人否 Ė 已 夫聖 言 已 到 也 到 聖 ? 到 知 至 此 處 孟 聖 15

使夫氣質剛柔之不齊者,皆無有異懦怯弱之態 道 如對梁 夫子只説一 E 當作二事,言仁義、養氣,自是二事。 來。 義。 言。 不然。 義 ,而各得以充滿夫仁義之量,其功多矣。」 仲尼 仲尼 只此二字,其功甚 、惠王 程子又曰: ,若「只此二字,其 『孟子有功於聖門,不可勝言」者,蓋總言仁義、 與 箇立人之道曰仁義而已,孟子則 只説 只 宋經 説 可見。 箇志,孟 「孟子有功於聖門, 箇仁 功 義氣二字,則又發夫子之所未發, 甚多」,則又專 一字,孟 多。」輔氏 子 便説 言二字,則 子 日 指 開 許 開口便説仁義 養氣言也。 勇 「或疑『二字』 口 多 包不 便 不 猛奮發於 養 説 盡 氣 可 矣。 勝 出 仁 養 蓋 可謂 티 :

識時矣,則其以道自任者,宜也。」

之,必 輔 知 也 \Box 氏 所 。輔氏日 EI: 以 求其所以善而復其本, 又 孟 自 「孟子之學已到聖處,見得透徹,所以發明得 E: 子 反 ൬ 性 不 「孟子有 「孟子言性 善、 流 於惡。 養氣 善,使天下之人,資質之美者聞 大功於 之論 此 資質之不善者聞之,則亦庶 其所以 谐 皆 世,以 有 前 大功 聖 於世 其 所 言 未發。」 也。」又 出。 性 善 平

> 不識 又論禹、 王伐紂,時 孟子之時 以言學。 時 時 又曰:「學者全要識 稷、顔回、曾子、子思同道 則以數聖賢之道爲不同矣。 固不可不識。 也」,此識 顔子 ,世既 陋 時者也,與程子所論顔、 無人,安可不以道自任。」輔 《記》言『堯授舜,舜授 巷自樂,以有孔子在焉。若 時。 且 日易 孟 若 子謂孔子爲聖之時 不 地則皆然」,孟 孟之意同。 禹 識 ,湯放桀,武 時,不足 若 子 氏

光。 雖 義 質,然在學者分上,則不必 光耀 子去 子之言比之,便可見。 圭 也。」或曰:「英氣見於甚處?」曰 理。 是好氣質,若銷 角 比之玉,自 也。」輔氏曰: 英氣 聖人只 又曰:「孟子有些英氣。 如張子所謂 甚 豪 化未盡 害事。 「德勝於氣,性 髪 是 「英氣是剛明秀發之氣,此自是 間 有 猶 論此。 温 有 如 圭 孟 潤 且 顔 角 命 學要變化氣質 子 子 含蓄 如 則 於德」,方始是 大賢, 便渾 才有英氣,便有 有時 冰 氣 與 而 象, 厚不 水 亞 發 渾 聖之 精 但 故於義理 無 成 同, 然 好底 非 以 許 就 純 次 不 多 孔 顔 是 氣

朱子集註序説

象,所以爲實,人有温潤含蓄氣象,所以爲聖,其理 言。 只以言 又爲其次也。」〇又曰: 不同,其去聖人,只隔 甚 害事 若就言上看得分明 語 也。 論之,何也? 顔 子之質 「冰與水精及玉之比 雖 膜,故可爲聖人之亞。 則 言,必聲也,德之符也,有德者 甚 其德無餘藴矣。 剛 明, 然其 學 力 玉 固 到 有温潤 自精 後,便 而孟子 也。 切 含蓄氣 自 地 L必有 然却 渾 位 厚

日: 其 正 或 則 論 智 教 定。』千變萬化,只説 論 事 事 邪説之害, 人存心 別以 能 平天下,其本只 或問:「心得其正,然後知性之善,語若倒置,何邪?」 此 然 ·無足爲者矣。《大學》之脩身、齊家、治 楊 正 語 ,則曰『格君 氏曰: 其 亦 惻隱、羞惡、辭遜、是非之心爲之端。 後 心 非 養性,收其 無理 知 心 則曰:『生於其 性之善。 得其 但 孟 文意不 Œ 子》 是正 ,然後有以 心之非」,『一正君 從心上來。 (放心。 全 一書,只 故 心、誠意 如 孟 有 真知性之爲善而不 至 心、害於其政。」 子 病 論仁、義、 者。 是要正 遇 而 人能 人便 蓋 른 知 性 īE. 人心 道 心得 而 之善 禮、 心, 性 或 疑

傳矣。」 른 唐以後爲 作 數,假饒 性本然純粹至善可見矣。」歐 懥 心者,性之郛郭,心不得其正,則性 耳。」〇篇 寂滅之云,故曰「聖人之教人,性非所 輔氏曰: 人,性非所先」,可謂誤矣。 已」,却自説得好。「心得其正,然後知性之善」,此説 能 可 「《大學》之脩身、齊家、治國、平天下,其本只是正心 心之後,於脩身、齊家、 來』,甚説得孟子 .處,天 正 添 ·恐懼、好樂、憂患一循其自然之則而不失其正,然後吾之 心 所 一物,堯、舜 輔 ,則事無足爲者」,則其語 「歐陽子未及識孔孟之所謂 治之道 謂 氏 地 文 日: 率 懸 得 意, 性 所 隔 功 楊 以 。」輔 而 (業, 只 氏 循 所 又可 治國、平天下,更有 不 發 天 以 同 明 氏 以 日 理 爲 孟 陽永 是 明 使學者知爲學之要。 子 是 萬 白 亦失之大快。 人 子 此 詳 亦不得其正矣。 世法,亦 叔却 也 永叔,名脩,廬陵人。 欲 性 説 盡, 先」耳。」人 變萬 判 之 而 真 斷 言『聖人之教 外 Τ. 但 私 化 可 見 夫 邊 以 是 帝 在。 觀 只 老釋氏清 繼 用 性 與 率 説 《大學》正 至論『人 王 孟 必 誠 後 從 聖 計 F. 性 尤 子 又説 及 使 意 心 賢 不 用 之 而

朱子集註

後學趙順孫纂疏

録》

⊟: 此 禮厚幣以

招賢者,而孟子至梁,得其事之實矣。」〇《語

是梁惠王招之而至,孟子出處,必不至

以禮貌先焉,然後往答其禮耳。

故《史記》以爲梁惠王卑

境

而來,

則必

就見也,然後往見之。若異國之君,不得越

子猶守先王之禮,故其所居之國而不仕焉,則必其君先

梁惠王章句上

凡七章。

孟子見梁惠王。

梁惠王,魏侯罃也。 都大梁,愚案: 魏初 都安

縣 邑,在漢河東郡安邑縣,至惠王徙大梁,在漢陳留郡浚儀 僭稱王,諡曰惠。《史記》:「惠王三十

五年,卑禮厚幣以招賢者,而孟軻至梁。」或

問:「孟子不是諸侯,此其見梁惠王,何也?」曰:「不見

之禮,未仕者不得見於諸侯。 諸侯者,不先往見也。 見梁惠王者,答其禮也。 戰國之時,士鮮自重, 蓋先王 而孟

孟子卷第

錯了。」

王曰:「叟不遠千里而來,亦將有以利吾

國乎?」

叟,長老之稱。 自春秋至於戰國,先王之道不明,人心陷溺,惟知有 類。 真氏曰:「孟子初見惠王,惠王首以利國爲 王所謂利,蓋富國彊兵之 問 利

而已。」

已矣。 孟子對曰:「王何必曰 ·利 ? 亦有仁義 而

仁者,心之德、愛之理。義者,心之制、事 之宜也。《語録》曰:「問:「德與理,俱以體言,制與

0 「至」,原脱,今據四庫本補。

曰 : 미 事,裁斷當理,然後得 外,然所以制 若鋒與刀,初未嘗相 宜」,方是指事物當然之理,未説到處置合宜處。」〇 義如刀相 才見箇事來,便知這 去,可底從這一邊去,不可底從那 又曰:「仁言「心之德」,便見得可 就在外之事説,凡事之來,其中皆有箇宜處,便是義。」〇 爲義」是也。」」〇又曰: 制』,却只是説義而已。」〇問: 用,義又自有義之體用。『心之制』是就義之全體 説到親切處。「心之制 宜,俱以用言否?」曰:「「心之德」是渾淪説,「愛之理 「事之宜」是就千條萬緒各有所宜處説。 一句乃一章之大指,真氏曰: 是。」問:「莫是以制其心?」曰: 是否,若可否都不能剖 義就心上論,則是心之裁制決斷處。 祖似,其 其義 鋒 者 可 箇事合恁地處,此便是『事之宜』也 一,則在 以 離也。」〇又曰:「『事之宜」雖若在 宜。 割制他 「仁對義爲體用,仁又自有仁之體 」都是説義之體,程子所謂 判 凡 心也。」〇又曰: 便 事 物,才到 「心之制」是裁制?」曰" 是 到面 此 一邊去。」〇又曰: 「制如利斧,事來劈將 包四者。 心 前, 「《孟子》七篇,以 頑 面前,便判將去。 便須有剖判,是 鈍 「事之宜」非是 宜字乃裁 無義 「所謂『事之 義言『心之 了。 處說 斷 陳氏 「我 此 仁 後 方 物

> 家』? 先利,不奪不饜。 千焉,千取百焉,不爲不多矣。 苟爲後 家,千乘之國弑其君者,必百乘之家。 利而國危矣。 王曰 『何以利吾國』? 功於聖門矣。一下文乃詳言之。 義爲首。 「立人之道,曰仁與義」,而孟子言仁必以義配。」可 士 庶 程子有曰: 『孔子言仁,未嘗兼義, 人曰『何以利吾身』? 萬乘之國弑其君者,必千 乘,去聲。曆,於豔反。 大夫曰『何以 後多倣 上下 獨 此 於《 利吾 乘之 義 萬 《易》曰 交 謂 取 征 而 有

國。 車萬 也。 交征 里爲井 方百里,出車千乘也。 也。征,取也。 此言求利之害,以明上文「何必 乘。 萬乘 百乘之家,諸侯之大夫也。 ,四井爲邑,四邑爲丘,四丘爲甸,甸六十四 國危,謂 千乘之家者,天子之公卿,采 之國者,天子 上取乎下,下取乎上,故 將 有 弑 千乘之國,諸 畿 奪 之 内 禍。 地 方 愚謂: 日 千 乘, 利 里, 古者 侯之 之意 車 井,五 地 出 數 日

未 有

而 遺

其

親

者

也,未有

吁 !

車一

百

在

之所有不止也,於是篡弒之事興,其害有不勝 井,除 下之分定,不然則凡有血氣者,皆思自足其欲,非 奪之,而其心猶有所不足也。」○真氏曰:「理明則 義則循理而 爲足也。 爲先,則 六千四百井,兵車百乘,故稱百乘之家。 千乘,故稱千乘之國。 五等之封也。 萬四千井,兵車千乘,故稱千乘之家。 十四萬井,兵 畿内、周禮 十二家。 一分,亦已多矣。 乘,故 可畏哉! 曆,足也。 山川、溝壑、城池、邑居、園囿、街路之屬,定出賦 不弑 《周禮 輔氏曰:「此最 有 通出甲士三人,步卒七十二人,牛十二頭,兵 車萬乘,故稱萬乘之國。 制 大國亦不過百里,出 》所 徇 其 》甸 謂 利 (君而 言臣之於君,每十分 都鄙 讀 諸侯之大夫,采地其大者,亦出賦 則 爲乘。 横 也。 若又以義爲 流而 説得人心求利之意出 盡 天子畿方千里,提封 雖上公不過百里,出 奪之,其心未肯 無節,故 賦六萬四千井,兵車 諸 天子之公卿,采 侯之國則畿外 弑,下殺 雖弑 後 其 而 尊卑上 君 盡攘上 計 而 以 蓋 鼠賊六 耐 百 者。 以 利 Ŀ 取 盡 尚 地 六 萬 此言仁義未嘗不利,以明上文亦有仁義

也。

其

義 而 後 其 君 謂不後也,蓋於義言之,則莫急於君也。」故人君躬行 此,則 者必愛其親。 則必不後其君矣。」〇 者宜也,其發則事皆得宜,而所宜者莫大於尊君,故人義 主於愛,而愛莫切於愛親,故人仁則必不遺 而所施亦有君親之不同,何也?」曰:「仁者人也,其 親,義者必急其君。 遺,猶棄 利之心焉,一有求利之心,則利不可得 義固無不利矣,然以是爲言,則人之爲仁義也,不免有求 所者,而初非有求利之心也。《易》所謂『利者義之和』, 正謂此爾。」曰"「然則孟子何不以是爲言也?」曰"「仁 然也,居仁由義,循天理而不得不然者也。 乃所以爲求利之資乎?」曰:「不然也。 已之意也。或問"「仁義未嘗不利,則是所謂仁義者 君臣父子之間 也。 敬君者,義之實也,故義者必急其君。 後,不急也。 ,以至於天下之事,自)輔氏 或問:「或主於愛,或主於宜 「愛親者,仁之實也,故仁 言 仁義,天理之自 而 無一 者必 其 其親矣。

急

害至矣。

愛其

(發則

義

然仁義得

於

而

物不得

其

仁義 不待外求而勉强爲之者也 以誘之,則人心之固有者,亦皆興 義,人心之固有。 利,方爲義時,便計不後其君 仁義中有自然之利耳,非謂方爲仁時,便計不遺 於己也。 而 無求利之心,則其下化之,自親 蔡氏曰:「不遺其親、不後其君之説,不 人君躬行仁義以感之,而 之利也。」〇輔 (起而 自然尊君親上,有 無求利 氏曰:「仁 以其親之 之心 過 戴 推

王亦曰仁義而已矣,何必曰利?」 我之相形,人欲之私 人人具足,物物圓 植此,氣聚乎此,則 者,如草木之根於地也。 之,只緣有己有物,彼此 義根於人心之固有,天理之公也。 重言之,以結上文兩節之意。 〇此章言仁 「天以是理賦予於人,而人則具是理於其心者也。 [成,故曰天理之公也。] 利心生於 理命乎此、未有此氣而先有 相形,便生出 曰固有 也。 輔氏曰 者,又見其 箇 :「利心,人本 較短量長、 非可 輔氏曰 此 移 理 争 彼 日

根

以

也。

物

無

是徇,故曰人欲之私也。」循天理,則不求利

而

自

○輔氏曰:「太史公之説,似疎而實密,似闊

而實切

似淡

競少之意來。

遂欲己長人短,人少己多,偏

詖

反側

惟

名

氏曰: 曰:「未必知也。 異哉?」司馬氏,名遷,西漢龍門 怨。 王問 也。 太史公。 利」,常防其源也。 曰:嗟乎 以造端託始之深意,學者所宜精察而 謂豪氂之差,千里之繆。 利而未必得,然妨人害物,招 未得而害已隨之。 而遺其親,未有義而後其君」之意。」徇人欲 物,各得其宜,故自無不利。」〇蔡氏曰: 無不利; 『何以利吾國』,未嘗不 ○太史公曰:「余讀《孟子》書,至梁 「此發明「苟爲後義而先利、不奪不饜」之意。」所 自天子以至於庶人,好利之弊,何 ○或問:「太史公之歎,其果知孟子之學耶?」 ! 輔氏曰: 利誠 以其言之偶得其要,是以謹 「無所爲而爲,故不求利 亂 輔氏曰:「有 故曰『放於利而行,多 之始也。 尤取 此《孟子》之書所 禍,故害常隨之。」〇蔡 人。 · 廢 所爲而爲,故雖 爲太史令,自號 「此發明『未有仁 『夫子罕言 書而 而著之耳。」 ,則求利 然 歎 **| 成己** 明 也 以 惠 辯 求 成

理; 利,此所謂君子未嘗不欲利 塞源 害。 者,正説得孟子「上下交征」,「不奪不曆」之意也。」程 泊而 者,民生所不可無者也,故乾之四德曰利,《書》之三德 是之時,天下之人惟利是求,而 宜 深玩。 專欲利己,則必害於人。 實 而 惟仁義則不 君子未嘗不欲利,但專以 有意味。 救其弊,此聖賢之心也。」輔氏 故孟子言仁義而不言利,所以拔 其 Ξ 「自天子至於庶人,好利之弊,何以異 嗟嘆而 - 求利 言,誠 也。 惟能循仁義而行,則體 而 有以深發於人心。學者最 但專欲求利,則 未嘗 利爲 不 不復 利 也 心 日 不 知 則 順有 顧 哉 「利 本 有 當 有 子 義 日

○孟子見梁惠王,王立於沼上,顧鴻鴈麋鹿,

而自無不利。

此一章之大指。

於牣 《詩》云:『經始靈臺,經之營之,庶民攻之,不 音棘。 麋鹿魚鼈。 樂之,謂其臺曰 麀鹿攸伏, 麀鹿濯 日成之。 恐煩民,戒令勿亟。」子來,如子來趨父事也。 日 其條然而成,如神靈之所爲也。」○愚案: 也。 意。 故臺也。」營,謀爲也。 獲晉侯以歸 所以望氛祲,察災祥,時觀游,節 此 速也,言文王 也。 「引《詩》而釋之,以明「賢者而後樂此」之 魚 麀,音憂。鶴、《詩》作翯,户角反。 **《詩** 靈臺,文王臺名也。 躍。」文王以 《詩傳》曰:「庶民來作之,不終日而成。」亟 經始勿 ,乃舍諸靈臺。 古之人與民偕樂,故能樂也。 大雅・靈臺》之篇。 戒 靈臺,謂 亟,庶民子來。 以 濯 民力 勿 1,白鳥 亟 攻,治也。 杜預云: 其沼 爲臺 也。 《詩傳》曰 鶴 勞佚也。 《詩傳》 鶴。 曰靈沼 在 爲 於,音鳥 沼 京兆鄠縣,周之 《左傳》云:「秦 不日,不終 王 王 謂之靈者,言 Ĕ 經,量 「國之有 1,樂其 在 在 而 「文王心 靈 靈 民 《詩 有 度 呕 有 歡

有。 美辭 麀。 而民反 也。 下 至易驚動,不驚動而攸伏者,無害獸之心,鹿信之而 以域養 ¥ 有囿,囿 濯 伏,安其所,不驚動 一亦得 蓋 禽獸。」麀 濯 牣,滿 如子趨父事,不召自來也。」靈囿、靈沼,臺 歡樂之,既 由 以享其樂也 文王 肥 中 澤 化、牝 也。 有沼 能 貌 愛其 鹿 加以 也。 孟 也 鶴 子言文王 《詩傳 民, 鶴,潔白 也。 美名,而又樂其所 愚 案: 故民樂其樂,而 愚謂: Ĕ 鹿 雖 貌 牡 「臺下有 攸, 所 用 \Box 於,歎 醪 民 也。 牝 囿 力, 弗疑 , 鹿 \Box

保其樂

也

音曷。喪,去聲。女,音汝。 與之偕亡,雖有臺池鳥獸,豈能獨樂哉?」害,《湯誓》曰:『時日害喪? 予及女偕亡。』民欲文王亦得以享其樂也。

也。 樂」之意也。 有天下, 此 、引《書》而釋之,以明「不賢者雖有此 日 · ; 指 如天之有日, 夏桀。 《湯誓 害, 》,《商書》篇名。 何 日亡 也 吾乃亡耳。 桀嘗 自 時, 言 是 不 吾 愚

> 案 以 而 與之俱 明 目 此説出《尚書大傳》。 君 之曰,此日 獨樂 蓋 而 不 欲 何 恤 其亡之甚也。 時亡乎? 其 民怨其虐,故 民,則民怨之而不能 若亡則 孟子引 因 其自言 我 此

者。 何也?」 河 河 梁惠 東凶亦然。 内 鄰國之民不加少,寡人之民不加多, [X] 王曰: 則移 察鄰 其 「寡人之於國 民 於河 國之政,無如寡 東,移 也,盡 其 粟 心焉 人之用心 於 耳矣。 河 内

移粟以給其老稚之不能移者。東,皆魏地。凶,歲不熟也。移民以就食,寡人,諸侯自稱,言寡德之人也。河内、河

或五 如 兵孙既接,棄甲曳兵而 孟 子對 ? 日 曰 : 步 而後 不 王 可,直不 止 好戰,請 以 ·百步 五. 走。 以 + 戰 或百 步 耳 喻。 ,是亦走 笑 百 步 填 步 而 然 鼓之, 後 也。 則 止

好,去聲。 \vdash 王 填 如 音田 知 此 則 無 望 民 之多 於鄰 或 也。」

廢。 水溢 爲 育 在 移粟之事,然大荒大札,則令邦國移 矣。」輔氏日 行 渞 不 進 填 後世 盡 而 : ·卹其 一,以 先 鼓鼓 以 心 而 無憾,又積三十年之耕 若夫先王之道,所以 養 移民 王之道, 歲 而 金 音 民 民, 其 無菜色。 望 或 退。 也。 民之多於鄰國 歉於此 移粟 民, 惠 《周 愚 直,猶 王 不 而 謂 ,荒政之所不 其 而 禮 能 可 豐於 視 》以荒 徒 此 行 區 制 以 以 但 哉 言鼓音之塞滿 從,則 品 民之産,豐 政十 小惠, 而 此 是爲 也 移 有 民移粟之事 而 九年 有二, 移民移粟, 然皆 言 笑 民 盡 廢 -之食 年 以 聚萬 此 彼 心 也 也。 固使之仰 辟 不 以 也 則 焉, 固 民 災 顧 能 雖 礕 有 就 雖 然 兵 何足 有 所 賤 無 則 不 楊 鄰 以 行 早 事 不 所 末 能 氏 或 鼓 \pm U 乾 俯 蓋 謂 可 音鳥。

勝 鼈 不 違 用 不 農 口 也 勝 時 · 穀不 穀 食 也; 與 魚 可 斧斤 鼈 勝 食 不 以 可 也,數罟不 時 勝 人 食,材 Щ 林,材 人洿 木不 木 池 可 木 勝 可 魚

> 用,是 憾 王 王 道之始 使 民 養 也。 生 喪 勝,音升。 死 無 憾 數,音促。 也。 養 罟, 生 音 喪 死

> > 無

以時 棺 要非 之初 禁。 網罟必 農 材木之類。 大備者,一 人不 多 節愛養之事 地 不 ,水所 槨 違 時, 也 入山 得食。 法制未備 草木零落,然後斧斤入焉。 所 此 聖人之所能 謂 以 用四寸之目,魚 林之類。」然飲 數, 時, 則民生淳厖,未用多爲之防, 聚 春 撙節愛養之事,謂不違農時、不用數罟、斧斤 送死 也。 至 耕 密 也。 Щ 冬乃 夏耘 ,皆民 也。 盡 林 愚 且. 也。 輔 謂]1] 氏曰: 役之 秋 罟, 因 食宫室 天地 澤,與民共 所 濁 收 天 水不 急 不 網 自 也。 之時。 地自 「爲治之初,法制 然之利 滿尺,市 而 也。 流 所 不 之小坎 不 然 以 二則 口 洿, 窊 之, 謂 口 之利 凡 養 此皆 無者。 り也。 Ŧi. 生,祭祀 勝 有 天下之事 不 而 穀 得粥 食,言 興 所以 下之 爲 有 古 魚鼈 而 作, 治 者 撙 厲

反。 據其身臨天下而言曰 戴 謹 寒,然而不王者,未之有 百 豚狗彘之畜, 五畝之宅,樹之以桑,五十者可以 、於道路矣。 七十者衣帛食肉,黎民不飢不 庠序之教,申之以孝悌之義, 畝 終 死,乃人世之始終。 心 皆有 數,去聲。 Ź 一無所憾,而民心得矣。 爲本,故以 田 以資之, 勿 王,去聲。 無失其 奪其 此 則 王,則去聲。 八時,數 於是二者皆有以濟之,則人世之始 爲 人 凡有天下者人稱之曰 ,時,七十者可 王 無 此其所以爲王道之始也。」 道之始。 所 口之家可 也。 恨 後皆倣 矣。 衣,去聲。 此 輔 頒白者 以 王 以 衣帛矣; 氏曰: 道 Ŧ 無 食肉矣; 以 ,則平聲。 畜 飢 養 勑 不負 得 矣; 生送 雞 民 六

居也。 入於邑。 舍,城邑之居亦各得二畝半。 爲八百八十畝,餘二十畝,八家分之,得二畝 在邑。愚謂: Ŧi. 畝之宅, H 在野 中不得有木,恐妨五穀,故於牆下 日 一夫所受,二畝半在 古者一 廬, 在 夫一婦受私田百畝,公田 邑 日 里。 春令民畢出 廬各 在其 田 田 在 野,冬則畢 中 半 十畝 U 而 畝 里 爲 是 半 聚 廬

以明教,庠則行禮而視化焉。」申,重

也,丁

寧

反

覆

之界也。 + 以 五十 庠序,皆學名 之家矣。 其所當得耳。」百畝之田,亦一夫所受。 之皆帛 以教民尊長敬老而 衣帛,七十而後食肉 度之節,始於略而終於詳,大率如此。」曰: 之畜,人力所爲,則非七十之老,不得以食之矣。 不可勝食矣,又言老者然後可以食肉,何也?」 自生之物,養其小而食其大,老幼之所同也。至 肉不飽,未七十者不得食也。 之時,如孟 植 百步爲畝,今以二百四十步爲畝,古之百 桑 畝也。 者 以 衣 井 而 供 不 愚謂: 地 肉 至此 蠶 得 食哉? 春犧牲 即 即 衣 事 也。 井 則經界 經界,謂 節 0 也。 ,何也?」曰 田 用 《文集 顧 Ŧi. 也。 毋 勤 其 十 生也。 畜,養也 用 、財有 治 Ē 田 ¥ 始 地 牝之類 有 , 井 分田 不贍 衰, 定 若其意則豈不欲少 「此先 間 分, 地 經經 有序 則 非 或問: 均 故 王品 也。 老 畫 無 時 帛 無 必必 而鄉 者或 其 畝當今之四 不 不 節之意,所 溝 曰 既 謂 不受田 Ŧi. 七十 愚謂: 受之家。 有 煖, 塗封 反不 + 於 先 日 席,序 孕 芻 Ξ 魚 而 魚 非 字 未 古 得 後 制 豢 鼈

狗 彘

食人食

而

不

知檢,塗有餓

。李而

不

知

發,

理

亦

過

鄰

死

則

日

二。非

我也,歲也。」是何異

於

前人人

大成。 極財 背。 直之、輔之、翼之,使自得之」,是爲王道之大成也。」 又爲之學校之教,使之得以全其性。 法制 既 治禮 頒,與 民,是王道之成 得衣帛食肉,然 勞,不使之負戴 髮之人,猶秦言 七十,舉重以 富 成 品節之詳,極 義 戴、任在首。 而 輔 以左右民,則不惟制民之産, 斑 相之道,則 教 同,老人 而 以 事 孝 飽 父 見 了悌 煖 民情之變故 也。 母 亦 輕 於道路 黔 則 無教 、頭半 夫民 不 也。 財 首 爲 輔氏曰:「盡法制 至於 人 成 也。 孝, 7;則 白黑者也。 矣。 黎,黑也。 知愛親 衣食不足,則 輔 己備 善 又近 飢 少壯之人,雖 相之道,以左右 使之有以養其生, 如帝堯所 寒也。 衣帛食肉但言 事 見,聖人之制 敬 於 兄 長 禽獸 長 黎民, 品節之詳 負,任在 此言 謂『匡 而 爲悌 不 代 作 之、 暇 盡 不 黑 其 故 已 而

下之民至焉。」莩,平表反。 而 殺之,曰: 非 我 也 ¬, 兵 刺,七亦及。❶ 也。』王無 罪 歲

貸也。 檢,制 也。」又曰:「孔子之時,周室雖微,天下猶知 而 不加多,歸 知發,則其所移特民間之粟而已。 制度品節之意異矣。 之産,又使狗彘 無事外 事 如 國 益 操 脩 此 而 刃 如,但言其事而理自 也。 歲,謂 其政。 之理。 己。 者之殺 可謂實矣。」輔氏曰:「天下 莩,餓死人也。發,發 罪 理 〇程子曰:「孟子之論王道,不 於 歲之豐 天下之民至焉,則 人也。 貫於事,事 歲 得 N N 以 一, 是 無違 凶 食 不罪 至於民 統 也。 人之食, 知刃之殺 矣,如 於 歲 理。 惠王 則 飢 孟子之論王道 唯 而 物 ·無理 則 不 必 不 倉 格 死, 乃 但 能 與 能 廪 知 外之事 多 以 以 至 自 猶 先 制 而 於 反 不 民 \mp 民 賑 是 則 不

知

0 「及」,四庫本、四庫薈要本同,於義當作「反」。

七〇二

改耳」。 周武王,孟子是也。」 永嘉陳氏曰: 周 復知 不當坐視而莫之救,此則所謂「仁之至,義之盡」也。」〇 君以行王道而王。 猶以爲主也,故孔子以尊周爲本。 蓋 之塗炭已極。 尊 心猶知尊周之爲義,則是天命之未改也,人心不復知有 春秋之時,周室雖微,而天下猶知尊周之爲義,則是於義 「【王者,天下之義主」云者,在天下之義,當以爲主也。 説天命之改,莫是大勢已去否?」曰: 『然。』○輔氏曰: 視天命之改與未改耳。」《文集》曰:「問:「程子 子時,七國争雄,天下不復知 可以王矣。 ,則是天命之已改矣。 王者,天下之義主也。 周之爲義,故《 有周 然天命之改與 當爲周 則 是人心之義不以爲王矣,故孟子勸齊梁之 「此是孔孟灼見天心,以天自處。 文王,孔子是也。 此孟子所以勸 當是時,諸侯能 孔孟『亦何心哉? 春秋》以 (未改,亦視人心之向背而已。 又況生民之塗炭已極,仁者固 尊周 聖賢亦何心哉? 日天命去周,便當爲 至七國時,天下已不 齊梁之君 有 視天命之改與未 爲 行 周 本。 王 了; 而 周有 道 生民 至孟 也 , 則 日 人

> 梁惠王曰:「寡人 惠王曰1字,則已是分爲兩章。 承上章言願 時説話,「以梃與刃」、「以刃與政 安意 以 願 承 安承 教。 雖分爲兩章,然其實只是 教。」 有以異乎」,皆 輔氏 日 : 既 着箇「梁 所以

明殺人非兵與不可罪歲之意。」

曰 : 孟子對曰: 以 孟子又問而王答也 刃與政,有以異乎?」曰 「無以 異也。」梃 「殺人以梃與 徒 頂 反。 刃, 梃 杖 無以異 有 以 也 異乎? 也。

莩,此率獸而食人也。曰:「庖有肥肉,廄有肥馬,民有飢色,野有餓

異於驅獸以食人矣。厚斂於民以養禽獸,而使民飢以死,則無

去聲。惡在之惡,平聲。 率獸而食人。惡在其爲民父母也? 惡之之惡, 獸相食,且人惡之。爲民父母,行政不免於

君者,民之父母也。惡在,猶言何在也。

仲 苨 用之也。 曰:『始作俑者 如之何其 使 其 無後 斯 民 飢 乎!』爲其象人 而 死也?」俑,

而

音勇。

爲,去聲

則其流必至於此,人心之所以爲危也。 馬乎?」輔氏 亦孰有率獸食人之心? 害,未嘗頃 父母告之。 古 使民 作俑 子惡其不仁,而言 而 愚謂:以木人送葬,設機而能踊跳,故名之曰俑。 以爲從衛,謂之芻靈,略似人形而 俑 古易之以俑 未 不恤 ,從葬木偶 嘗有率獸食人之心。然徇一己之欲 飢 其民 而 死乎? 刻而忘于懷,何至視之不如犬 夫父母之於子,爲之就 E : ,則其流必至於此。 則 人也。 「李氏發明得最 有面 〇李氏曰:「爲人君者 然徇 其 必 目機發,而大似人矣。 古之葬者,東草爲 無後 己之私欲,而不恤其民 好,雖 也。 故孟子以爲民父 大無道 故以爲 孟子言 틴 故孔 利 之君 民 澼 此 中 人

> 庶 母告之、爲人上者、必能體父母於其子頃刻不忘之心、 幾其能盡保民之道矣。」

死者一洒之,如之何則可?」長,上聲。喪,去聲 也。 地 比,必二反。洒與洗同。 梁 於秦七百里,南辱於楚。寡人恥之,願比 悪王 及寡人之身,東敗於齊,長子死焉, 曰:「晉國,天下莫强焉,叟之所 西 喪 知

不知所以自反,乃於見賢之際歷敘其喪敗 若剛勇而有爲者,然細考之史,則其敗於三國,皆非 號曰三晉。 也,徒以争城争地,不失之貪,則失之繆。 言欲爲 與楚將昭陽戰敗,亡其七邑。 + 者,所謂文侯也。 號 魏本晉大夫魏斯,與韓氏、趙氏共分晉 年,秦取 年, 曰三晉。 齊擊 死者雪其 魏少梁,後魏又數獻 惠王,文侯之孫,故猶自謂 魏,破 故惠 與趙籍、韓虔俱爲晉大夫,三分其 恥 王猶自謂 其 也。 軍, 輔氏 虜 晉 太 國。 晉國。 比,猶爲也。 子 地 「惠王之志,疑 而 事 於秦。 申。 愚案: 既 欲與死者 惠 如 + 王 此,猶 義舉 魏斯 地, 又 地

快者所爲耳,豈有君人之度,而知所謂大勇之理哉!」一洗之。此正如匹夫賤人勢出無聊,不勝其忿,而求一

孟子對曰:「地方百里而可以王。

百里,小國也。然能行仁政,則天下之民

歸之矣。

彼

長,上聲。 甲 兄,出以事其長上,可 耨。 王如 -利兵 壯者以暇 施 仁政於民, 省,所梗反。 日脩 其孝悌忠信, 省 刑 使制梃以 斂、易 罰,薄税 皆 去聲。 撻 斂, 秦 耨, 以 楚之堅 深 事 奴 耕 ₽. 其 反 父 易 音扶。 凍

己。 手足,而得以安其生。 省刑 斂 則又其效驗 而得以保其生。 氏曰:「仁政在於養民而已。 ,則民不聊 罰 以 薄税斂,此二者仁政之大目 暇 也。 生、民不 日 故孟子言仁政首及此二者。 脩 深 耕易 其 孝弟忠信 聊 薄税斂,則民不至有所闕於衣食 耨 生,則其 則薄税斂之所致 省刑罰,則民不至無所錯 人以 於農事 事 父兄 亦 荷 出 也, 下 H. 也 面數句, ,重税厚 鹵 以 莽 事 長 其 而 輔

> 奪 政,則 餓,兄弟妻子離散。 禮義,是以 耘 生,則其於人道亦何暇脩爲之哉?」易,治 也。 其民時,使不得 民得 盡己之謂忠,以實之謂信。 尊君親上而樂於效 盡 力於農 耕 養,去聲 放畝,而 耨 以養其父母,父母 又有暇 死 也 也。 君 日 以 脩

彼,謂敵國也。

彼陷溺其民,王往而征之,夫誰與王敵? 夫,

則誰 民往正 正 陷,陷於阱。 也。 與我爲 其罪。 以彼暴虐其民,而 敵 溺,溺 彼民 哉 方怨其上而樂歸 於水。 率吾尊君親 暴虐之意。 於我 上之 征

故曰:『仁者無敵。』王請勿疑!」

而已。 孔氏曰:「惠王之志在於報怨,孟子之論 「仁者無敵」,蓋古 恐王疑其迂闊 語 也。 故 故 勉使 百 里 勿疑 可 Ŧ, 也 以 在 此

上

,則省刑罰之所致也。

嚴

刑峻罰,則民不樂生,

民不樂

謂志於救民,則至誠惻怛,成己以 心熏灼焚燒,愈撲愈熾,不至於大敗極壞 不當報而報,則是忿懥者之所爲耳,忿懥者之所爲,則 報者,亦有不當報者。若惠王之事,則 之本意。」孔氏,名文仲,臨江人。 於救民。所謂唯天吏則可以伐之,蓋孟子 成 ○輔氏曰:「怨有 物, 所謂不當報者 而 日有 不已。 一日之 若所 也 其

○孟子見梁襄王。

功。

其曰『爲天吏則可以伐之』,則其所以自治者嚴矣。」

襄王,惠王子,名赫。

『定于一。』語,去聲。卒,七沒反。惡,平聲。畏焉。 卒然問曰:『天下惡乎定?』吾對曰:出,語人曰:「望之不似人君,就之而不見所

知。 語,告也。不似人君,不見所畏,言其無 於外者則存於中者之符也。 德之符。其外如此,則其中之所存者 儀也。卒然,急遽之貌。蓋容貌詞氣,乃 可 敬之儀 輔氏曰: 「容貌詞氣,形於外者,德則存於中者,形 就之而 不見可畏,則 襄王望之不似人君,則容貌 容貌 無可畏之威 可 威

> 也, 卒然而問,則其詞氣又急遽而無序也。 如此,則其中之輕脱 天下當何所定。 荒 孟 肆 子對 可知矣。」王問 以 必 合于 列 其形於外者 或 一,然後 分争,

定也。

『孰能一之?』

王問也。

對曰: 『不嗜殺人者能一之。』

嗜,甘也。輔氏曰:「如人口之嗜美味也。」

『孰能與之?』

王復問也。與,猶歸也。

放此。

哉! 也。 而 秦 殺 我 觀 其 \Box 舉天下皆在吾仁愛之中,又孰有涣散乖離而不一 然,非有爲而爲之者也。 則 好 周 而 沛 天下 晉 復 X 太 孟 意 生 ·然,雨 已哉?」輔氏曰: : 七 固 分,或 致 祖 而 悪 人牧, 及隋,力能合之,而好殺不已,故或 子以來,自漢 八月, 孟子之言 非 悦 死,人 之。 詳 皇帝,能 以不嗜殺人爲一 盛 究其實,未 而 遂以 謂 貌。 夏五 歸 其餘 心 牧 之。 非 公亡國。 所 民 浡 六 「蘇氏所謂「孟子之言,豈偶 殺 苟 天下 高 之君 同 然, 蓋人君之心誠能不嗜殺 輔 月 人愈 祖 爲 有 氏曰: 也。 天下之具 大 及光武及唐太宗及 不 興 者 孟子之言,豈偶 故 也。 以 多 而 四 起 「言此 人 油 르 爲迂者矣。 而 貌。 君 君 領, 然, 也。」〇 皆以 天下愈 以見理勢之當 不 然不 頸 禦,禁 雲 嗜 也。 盛 殺 歸於我 蘇 不 深 人,則 然而 亂 貌。 止 子 然 嗜 原 氏 蓋 聞乎?」 王

乎?

之一端。」 也,不然,須深原其 已哉」者,亦 直 據 理 意而詳究其 耐 言 之耳。 實,然後知之。 然 唯 知 學 者 知 此 其 亦 爲 窮 實 理 語

齊

宣王

問

曰 :

齊

桓、

晉

文之事

可

得

以 孟子 後 公、名小白。 之後,初以陳爲氏,後改姓田 疆 齊宣王,姓 ·對 曰: ,和之曾孫,是爲宣王。 世 無 傳 「仲尼之徒無道 晉文公,名重耳。 田 焉。 氏,名辟 臣 未之聞 諸 疆 至田 侯 愚案: 桓、文之事 僭 和始篡 皆霸諸侯 也。 稱 田 王 公齊而 氏 也。 無 本陳公子 有 者, 之。 齊 則 是 相 辟 完

到功利上,自 者,大學之序,所行者,先難後 之説略,董子之説詳, 意 羞 道,言也。 也。」董子,名仲舒 稱五伯。 然無有道桓、文之事者。」○真氏曰: 董子曰:「仲尼之門,五尺 爲其先詐 故 西 引 漢 以 廣 力 爲 獲之仁,其 ĴΪ 而 説。 人。 後仁義 夫仲尼門 ○輔氏 心思 也,亦此 日 念 慮 「孟子 孟 童 所 未 子

之道。 無 之後,其 已,必欲言之而 能 或問:「王霸之辨。」曰:「古之聖人,致誠 深闢 Ŧi. 霸者,惟 不 仲 止也。 舒爲然。」以、 王,謂 已 王天下 通 心 用。 以

義以濟私欲而已。」 [順天理,而天下自服,王者之道也。齊桓、晉文,則假仁

王,莫之能禦也。」曰:「德何如,則可以王矣?」曰:「保民而

知果有此

事否

保民又不外乎此心。」

保民又不外乎此心。」

保民又不外乎此心。」

保民又不外乎此心。」

保民又不外乎此心。」

保民又不外乎此心。」

對曰: 『然則廢 王 『舍之! 吾不忍其觳觫,若無 曰:『牛何之?』對 曰:「何由 曰:「若寡人者,可以保民乎哉?」曰:「可。 坐 於堂上,有 知吾可 釁鍾 牽 也?」曰:「臣 牛 曰:『將 與?』曰:『何 而 過堂 以 下者, 釁鍾 罪 聞之胡 而 三王 可 就 王 廢 死 見之, 龁 地。 也? 티 : 曰,

音斛。觫,音速。與,平聲。以羊易之!』不識有諸?」齕,音核。舍,上聲

觳

恐懼 穰却不祥也。 胡 血 龁 以 貌。 齊臣 塗其釁 孟子述所聞 《周禮》云: 也。 郄 也。 釁鍾 愚謂: 「上春釁寶鎮及寶器。」戴 上, 新 鑄 胡齕之語 古者器成 鍾成, 而 而問 釁以 而 殺性 区王,不 1111 ,所以 觫 取

E見片之段棟万下忍没,即所胃則穩之王爲愛也,臣固知王之不忍也。」曰:「有之。」曰:「是心足以王矣。 百姓皆以曰:「有之。」曰:「是心足以王矣。 百姓皆以

物也,必知所以愛之矣。 則其於親也,必知所以親之,於民也,必知所以仁之,於 仁者天地生物之心,而人之所以爲心者 子遽以是心爲足以王者,何也?」曰:「不忍者心之發,而 矣。故孟子指 心、仁之端也。 充之也。或問"「齊王不忍一牛之死,其事微矣,而 王見牛之觳觫 而言之,欲王察 擴 ൬ 不忍殺,即所 而充之,則 然人或蔽於物欲之私,而失其 可 識 也。 謂 以 於 是心之存。 保 惻 此 隱 四 而 之 擴 海 孟

見焉。 孰知此爲本心之發,而足以王天下哉?」愛,猶吝也 子得其本心之正 又未見王之所以及民之功,是以疑其貪一牛之利。 國之時,舉世没於功利,而不知仁義之固 反以桓、文爲問,則孟子安得不指此以開示之耶? 亦即是心以推之而已,豈自外至哉? 發,而仁之端也。古之聖王,所以博施濟衆而仁覆天下, 爲不淺矣。 終不可得 本心之正 若齊王之興兵結怨, 而亡也。 ,故其所發 然其不忍一牛之死,則 ,而有 故間而值其不蔽之時 有不然者, 以通天下之志,盡人物之情 而急於戰伐之功 然其 根於天地之性 不可不謂 王既不能自 則必 有,齊之百 則 之惻隱之 随事 其 知,而 非孟 然戰 所蔽 ,而發 姓 亦 則

故以羊易之也。」愛一牛? 即不忍其觳觫,若無罪而就死地,爱一牛? 即不忍其觳觫,若無罪而就死地,王曰:「然。誠有百姓者。齊國雖褊小,吾何

姓之譏是辯, 忍之實矣,亦 有學問之功,知體察之要,則因孟子之言反求 言以羊易牛,其迹似吝,實有如 然我之心不 而 何 但略及其所以不忍者以自解, 暇 更 辯 如 百姓之言? 是 也。 輔氏 今宣王乃汲 日 百 「使 而 姓 則 是 汲 識 宣 所 前 於 其不 \pm 譏 日 百 而

都不知講學也。」

愛 非 牛羊何擇焉?」王笑曰:「是誠何心 大,彼惡知之? 日 也。」惡,平聲 愛其財。 王無 異於百姓之以王爲愛也。 而易之以羊也,宜 王若隱其 無罪 乎百姓之謂 而 就 哉? 死 以 地 小 列則 我 我

是,卒無以自解於百姓之言也 本心不忍之實。 異,怪也。 百姓之言。 曰:「宣王既無講學之功,不知反求之理,而徒自辯 孟子故設此 皆無罪 不能然,故卒無以自解 而 故 死,何所分别 隱,痛也。 孟子又設此以 難、欲王 而王 猶不能 反求 然 問難之,蓋欲 擇,猶分也。 於百姓之言也。 也,而 而以羊易 而 但 得 以 其本 百姓之言爲宜 Ŧ 反 牛乎 言牛 求 偂 輔 得 解 ? 羊 王. 於 氏

曰 : -聲,不忍食其肉。 君子之於禽獸 無 傷 也,是 也,見其生,不忍見其 乃仁 是以君子遠庖 術 也, 見 4 未 厨也。」遠 死 見 羊 聞其 也

無

已

發

此

不

有

此

而

得

0

輔

遏了這 惻隱之心已發乎中,又見 忍之心,則此心 是乃爲仁之術 緣後人把做變詐 忍 傷 心 氏曰: 心 以 而易之。 謂 處,須着 不爲害,以 ,豐 既 言雖 雖 而 遂 愐 箇不忍之心,遂 法之巧者。 無 發 無 吾 不 以 鍾 **法以** 「巧亦非穿鑿以爲巧,蓋隨物賦形,逶 此 口 有 自 而 心之用 乃是他既 有 又不 箇巧底 乃得 而 解 解 遏 終 處之,則 百姓之言,不爲 亦吾 其 於百姓之言,故孟子 未 看了,便 不 流 心 可 爾。」〇真氏曰: 不得 心本 **《語** 行。 得 道 之所惑。 見羊 周 廢。 亦徒 釁鍾 理 旋 施 録》曰: 道 然之善。 耐 若 始得。 得 是不 事大似 矣。 善而 流 當當 則 那事,又不抑 於 行 此之時 然後告以 其 好。 此 已。」蓋 矣。 「術字本非不好底字、 當 然 理 而 住不得,只得 齊宣王見牛之時 害 無 處 告 此 却不知天下事 宣 見 無 未 事 也 以 以 乃 \pm 箇 其羊易牛者 不可 牛 殺 形 所謂 遏了這箇 實 雖 處之, 措 4 則 而 有 不 輔 迤曲 置 無 術 知 百 既 氏 此 無 法 以 便 也。 也。 姓 日 · 雖 折 所 心 則 所 抑 不 不 有 之 仁之術 二者 所爲 之心 所 類 將 又習聞釁 矣。 遏其 雖 也。 害, 理 及。 發 死 能

見

者

只

處

術

言

而

宣

E

不覺,故無所妨。 忍,釁鍾又不可 妨。 有貴於學問之功 ,則心之所具 得以 施於見聞之所及者」是 無妨,謂 流行之體; 而終不得 苟或無以 此所以 故 故用之以 而 適 也 輔 哀 鍾之禮不可廢,是以能暗合於義 其宜若此者,蓋其良心之發,偶 ,所謂法之巧者也。 兩 以 氏 全 鳴 理 羊 日 處之, 施 爲仁之術 而 (者也。 廢,此乃事理 事 也。 未見羊則 夫。 易 無 則 無礙 此即下文所謂 「唯其 禮 害 牛, 是 則 見 蓋人之於禽獸 理 也。 此 所 天 牛 生 而不忍之心 既 命 則 謂 其理 心 則 同 未形 於此 也。 也 仁 雖 有 膠 而 此 宣 義 未形,其 時 發,而 轕 類 心 而 者 之時 「君子之於禽獸,其 王 《異,故 並 見 已發, 而 之際, 輔 雖 行 聞 不 得 彼 氏 終 未 流 而 而 不 雖 日: 理未 不 以 其待禽獸 此 而 施 嘗 及 行 能 不 無物欲之蔽,而 用 同 理 得 人之所 心 之, 「殺 知學問,然 以 也 兩 相 於 也。」聲 則 形 Ĕ 施 羊易 悖, 見聞 於 全 則 則 是 矣。 4 生 發 與待 是 我 則 以 難 既所 無 在 而 4 而 此 君 乃 無 不 我 所 不 處 之 異 謂 無 其 L 爲 則 妨 者 妨 口 子 心 者 不

七〇九

不見而易其所見也。 見其生,聞其聲,以推廣其爲仁之術,不必屑屑然以 知學問 是。 之類 不同。 輔氏曰: 見其死,聞其聲不忍食其肉,是以君子遠庖厨 庖厨者,亦以 牛之觳觫而不忍殺,乃以羊易之,孟子所謂『見其生不忍 大夫無故不殺羊,士無故不殺犬豕,與天子 ,以羊易牛,然後仁義之心得以兩全而無害也。」 然二者人固多由之而不自覺也。」其所 ,皆是所謂 .者必遠其庖厨,乃所以預養是不忍之心,不使之 所謂用之以禮 「唯其不忍之心止施於見聞之所及,故古之君子 不忍之心施於見聞之所及。 預養是心,而廣爲仁之術也 孟子言此,以見宣王之初心本無不 則 如 《記》所言,國君無故不 則如 無故歲三田 以 己之類 宣王見 必 . 殺 其所 牛, 遠 皆

待洛反。夫我之夫,音扶。 所以合於王者,何也?」說,音悦。忖,七本反。度,吾心。夫子言之,於我心有戚戚焉。此心之吾心。夫子言之,於我心有戚戚焉。此心之王説曰:「《詩》云:『他人有心,予忖度之。』

《詩・小雅・巧言》之篇。戚戚,心動貌。

用明 及禽獸,而功不至於百姓者,獨何與? 之不王,不爲也,非不能也。」與,平聲。 一羽之不舉,爲不用力焉,輿薪之不見,爲不 見輿薪,則王許 不足以舉一羽;『明足以察秋毫之末』,而 曰"「有復於王者曰"『吾力足以舉百鈞』,而 言,而 力、用明、用恩之説以曉切也。」 掖之術而抽其端緒以告之,則亦何能使宣王前 充,而又未知所以用力推廣之方也。 心復萌也 而得也。 蛇曲折之意莫不盡見,而亦莫非吾心本然之善,非從 「孟子所言,曲 然猶未知所以反其 輔氏曰: 焉,百姓之不見保,爲不用恩焉。 前日之心復萌,乃知此心不從外得, 「戚戚,心 哉? 向非孟子 盡其 宣 之乎?」曰:「否。」今恩足 王此心 據理之極,知 動 理,故宣王前日之心復動 而 有 雖發動 本而推之也。 所慘傷 言之要,深得 也。」王因 而 故孟子此下復以 其 端 尚 爲不之爲 微 于中, 夫開 輔氏 孟 H 不忍之 其 然則 子之 導 體 日 耐 以 誘 用 外 未 委

於物 緩,推 傷 以凡人言之,推 察,看教分曉 皆 與 皆是從分金等子上說將來。 相親 也。 也。 銖爲 夫推廣仁術 之性,人爲貴。 可 至 復,白也。 此 自然而然,雖至愚之人,亦莫不然。 人,又爲同類 也。 則 與上文所謂人與 重 一兩,十六兩爲斤,三十斤爲鈞,四 則 其勢遠、 輿薪,以車載薪,大而易見也。 秋毫之末,毛至 難 廣仁術,則仁民易 有不得已而 是以 今恩以下,又孟子之言也。 舉 ,則仁民易 不可 也。 其 鈞,三十斤。 廣此 而 惻隱之發,則 事 相親,故惻隱之發,於民切 難。 模糊率 八禽獸同 羽, 資以 心 故人之與人,又爲 ,愛及同 而愛物難。 自 鳥 爲用者,使之皆被吾之愛而 略, 君 生 秋 夫天地之性人爲貴,而人之 羽 人者言之,發政 而 聽其 類者 愚案: 五權之法: 二十 而愛物難。 而 異類,故待之不同 末 所以 於民 自然 其勢便 羽, 鋭 鈞 學者須是 難所以易者,且 事 爲石。 小小 切 至 過 其 施 而 而 司 蓋 輕 便 而 輔氏日 (事易,至 於物緩 許, 休 百 臨 於 類 天 難 易 之説 使民 事 鈞 物 猶 地 見 舉 若 而 體 無 四

> 得以 之同 自不肯爲耳 自 事難者既能 而又有以處之,而使是 心 類繁殖 宣王既能 孟子爲一 不肯爲耳。 能及物矣,則其保民而王,非不能 類 遂其生者,其勢便、 而 鳥 相 爲其所難,乃不能爲其所易 羽、輿 |獸魚鼈咸若者,其勢遠 親 有以及之,則以 所 薪之譬,以明愛物之難,而 謂 輔氏曰:「今王此心既發於見牛之際 保民 心得 其 而 (事易)。 王者 是 以 流行矣。 心 則豈 而 極輔 其 施 ,何哉?」今王此 (事難。]○真 於勢近 有 相 則 不 財 是 能 成之道,使 於其 仁民之易。 ൬ 者 哉? 事 也, (勢遠 易 但 但 與 而 庶

能也。 爲 語,去聲。 超 曰 挾太山以 北 形, 也,非不能也。 :「不爲者 也 海 狀也。 爲長者折枝,語人曰『我不能』,是 之類 爲長者折枝,以 爲長之爲,去聲。長,上聲。 超北 也; 與不 挾,以 海,語 王之不王,是折 故王之不 能 腋 者之形 人曰 長者之命,折 持 物 『我不 主,非 也。 折,之舌反 何 以 能」,是 超, 枝之類 異 挾 草木之 躍 太 就 Ш 而 \exists 也。 不 渦 以 不

聽,有手足而自執自行,固不難 乃我之固有,廣而充之,在我而已。 充之,在我 枝,言不難也。 而 르 是心 何 難 固有,不待外求, 之有? 也。」 如 有 輔氏 耳 自 日 耐 自 擴 是 視自 而 1

矣。 人所 獨何與? 與,平聲 推恩足以保四海,不推恩無 弟,以御于家邦。』言舉斯 天下可運於掌。 老吾老,以及人之老, 今恩足以及禽獸,而 以 大過 人者 《詩》云:『刑于寡妻,至于兄 無 他 幼吾幼 焉,善推 心加諸彼而已。故 功不至於百姓者, 以保妻子。 以以 其所 及 人之幼 爲 古之 而已

之間,人物之衆,其理本一,而分未嘗不殊也。 吾幼,以及人之幼,而 幼,謂我之子弟。 之老,謂人之父兄。 運於掌,言易也。 老,以老事之也。 天下可 或問:「老吾老,以及人之老,幼 人之幼,謂人之子 吾老,謂 幼,以 運於掌,何 幼 我之父兄。 也?」曰: 畜之也。 以 「天地 弟。 其 吾 人 理

者。 妻,謙 功,使之循序而進。 下者, 至兄弟,以御於家邦。 自易以及難。 之。輔氏曰: 於愛物,皆 孝悌始,然後可以推而及民與物也。」故古人必 非但若人之同類而已。 與天之生物一本同意。 王反之,則 親推之,然後及於仁民,又推其餘,然後及 親離、故無 雅 邇,無一 故 氣,又非但若人之同 若 誠能以其心而不失其序,則雖天下之大,而 推己可以及人; 思齊》之篇。 1或反 辭也。 物 而 此, 不得 老吾老,幼吾幼,以及人之老幼, 由 以 「勢有近遠,當由近以及遠, 必 則必 御、治也。 近以及遠,自易以 保妻子。 其所 有 不然則 有 故 以其分殊,故立愛必 此蓋自然之序,而人所不能 其故 故於心爲至親至切,而行仁必 刑,法: 焉,其治豈不易哉。」《詩 蓋人之骨肉,本同一 矣。 倒行而逆 矣。 類 蓋骨肉之親,本 故 不能 也。 是不 而 復 施 른 可 推 推 寡妻,寡德之 之,如無源之水 不 恩,則 自親 事 本 及 · 致 輔 氣而 有難易,當 氏 其 而 難 始 刑 日 : 克復之 親疎 再 由 衆 寡 生 自己 爲 一此 大 問 今 親 百 叛 又 天

此宣王之不善推也。」民,由民以及物,此古人之善推也。能及物而不能及民,民,由民以及物,此古人之善推也。能及物而不能及民,無根之木,不旋踵而乾涸枯瘁矣。」○真氏曰:「由親以及

心 權 爲甚。 問: 萬 爲甚。」〇又曰:「本然之權度,亦只是此心。 若心之應物,則 ,然後知輕重 而 也?」曰: 長 權 미 謂之五度。 度,丈尺也。愚謂:分、寸、尺、丈、引,各以十累 物易見、心無形。 理皆具 稱 不度以本然之權度,又有甚於物者。 短,人所難齊,必 「心有 度物差了,只是 量之者,亦以 稱 錘 王 「輕重長短之當然,固本心之正理,其爲權 輕 應物之時,須是子細看 度之,謂稱量之也。 一請 也 重長短,而又曰 渡之! 一;度, 此心之用 度物之輕重長短易,度心之輕重長短 愚謂: 以其輕 事差,心差了時,萬事差,所 以 然後知長短。 度之之度,待洛反 稱上謂之衡。 而反求之耳。」〇《語 重 權 當以心 長 度度之而 合如. 短之難齊,而 爲權度 言物之輕 何 稱 便是本然之 此心本然 而稱量,何 後 錘 物皆然 謂 録 可 之權 $\stackrel{>}{\exists}$ 見。 以 或 不 起 度 重

> 此請 日: 權 而使王自稱量其心也。」故 去,而本然之理始可 短如此分明了,然後究其所以然之故,則吾心之蔽 輕且短,失其當然之序而 百姓。是其愛物之心重且 權度,失其本心。」今王恩及 至興甲兵,危士臣,結怨於諸侯,又却忍爲之,便是不合 度 「此指宣王之心偏詖處言之也。 也。 王度之也 如 齊王見牛而不忍之心見,此是合權度處, 復。 此 孟子所以 上文既 禽獸 不自 長 必 發其 引物資 前 先見得其 而 知 功不 仁民之心 端 也。 權 度之説 一; 而 輕 至於 輔氏 重 於 Æ 及

心與?」與,平聲。抑王興甲兵,危士臣,構怨於諸侯,然後快於

而 於殺觳觫之牛者。 者爲快也。 以王愛民之心所 抑,發語辭。 度之也。 然三事 輔氏曰: 士,戰 以 「孟子雖 故指 實 輕 + 非 且 也。 以問 人心之所快,有 短 引物 構, 者,必其以 資權 王,欲其 結 度之説 也 以此 是二 孟 而 其 子

七四四

以輕且短者,實 人心之所不忍有甚於殺觳觫之牛者,王若以是爲快,則 士 王 臣、結怨於諸侯三事、使王度之。 稱 量 其 心,然又恐不 以 是三者之爲快蔽之也。 知 所 以 稱 量之要,故舉興甲兵,危 蓋宣王愛民之心 夫此三事 乃 所

宜乎愛民之心輕且

短

也。

之也。 不 明於 初 其末流之禍 結怨於諸 朝秦楚,沧 輕 不快於此者,心之正也; 也。」 忽 志之失,而不知反者,欲誘之也。 短 而 他 4 侯,則末流之禍耳。 欲之所誘者獨 而獨 之 中國, 功 則 觳 不 以 觫 撫四 暗 至於百姓也。 爲不 也 於此。 夷,是其本志 快於此 而 獨 暗 在於日 此 者, 有是志,則有 於 而必 其 此 心之明 也 是,是以 其心尚 者, 愛民之心 輔氏 爲此者,欲 興 謂 也。 日 甲 明 功 是禍 兵,危 於他 不 「辟 其 而 至 矣。 卒 所以 心 土 者,謂 士臣 於 溺 地 尚 誘 百 指 於

> 欲辟 聽於 與 ? 與 爲肥、抑爲、豈爲、不爲之爲,皆去聲。 若所爲求若所欲 吾不爲是也。」曰: 諸臣皆足以供之,而王豈爲是哉?」曰: 曰 (闢同。 : 土 耳 爲 抑 朝,音潮 地, 與? 爲采 肥 甘 朝 秦楚, 涖中 色不 不 便嬖不 足 ,猶緣木 足 於 然則王之所大欲可 足使令於前 視 口 與? 於 或 而 目 而 求 與 便、 輕 魚 撫 ? 令,皆 煖 也。」 几 與? 聲音 夷 不 平. 與,平 足 也。 聲。 知 王之 不足 於 辟 以 體

若, 州,西 或。 開 木求魚,言 便嬖,近習嬖幸之人也。 廣 如 愚案: 接漢 也。 此 以中,北 也。 秦跨 朝, 必 致 不 至 有 所 汝 《禹 可 爲, 其 南。 得 貢》雍、梁二州 來 指 故 朝 興 皆 爲 也。 兵 已, 大國。 結 之地。 語 怨之 秦、 助 涖 楚, 辭。 楚 臨 盡 有荆 也。 辟, 緣 大

木求魚,雖不得魚,無後災。以若所爲,求若王曰:「若是其甚與?」曰:「殆有甚焉。緣

日

「王之所大欲可得聞與?」王笑而不言。

行

貨 曰

商、居貨日

賈。

發政施仁,所以王

勝? 海 敵大,寡固不 聞 所 何 内之地方千里 欲 與 ? 日 以異於鄒敵楚哉? 盡 心 日 力 楚 而 可 人 鄒 爲 以 勝。」曰:「 者 人與楚 之,後必 敵 九 齊 衆, 弱固 人戦 集 蓋 有災。」 然則 有 亦反 其 , 不 則 小 미 其本矣。 日 古 王 以 : 以 以 不 敵 口 爲 可 彊 服 以 得 孰 甚

所謂 天下九分之一也。 齊 殆、蓋,皆 集有 後災也。 其 一,言集合齊地 發 語 反本,説見下文。 辭。 以 鄒, 一服八,必不 小 ,其方千里,是有 國。 楚, 能勝, 大 或

與、聞與之與,平

聲

朝,音 朝,耕 今王 之市,行旅皆欲 君者皆欲 潮。 發 者皆欲 政 賈,音古。 赴 施 愬 仁, 耕 於王 恕,與 出於王之塗,天下之欲 於 使天 王之野,商 八訴同 下仕者皆欲 其若是,孰能禦之?」 賈皆 欲 立 藏 於 族其 於 王 之 王 恒

> 之也。 天下、 後得,而可大之業自爾循至,此天理人欲之分也。」 反其本,則循理者也,無所爲而爲之也。 首章意同。 可得 弱 非 之本 所 計 獲求 能 論 反其本,則所欲者 矣。 也。 得,用 輔氏曰:「力求所欲,則徇欲也,有 蓋 近 力 力求 者 雖 一勞,而 悦,遠 所欲 所 欲 者 者 不 則 來 反不 求 先 所 難 則 欲 . 如 而 後 者 大 所 至 獲, 期 爲 小 反 而爲 先 彊 與 不 能

邪侈 同。 是罔 民, 志 王 ,胡登反。辟,與僻同。 曰 : 明 則 曰:「無 無無 民 以 無 吾 也。 不 教 恒 ·爲已。 我。 惛,不能 産 焉 恒 有仁人在位,罔 産 因 我 無 而有恒心者,惟 及陷 雖 焉,於虔反。 進 恒 不 於是矣。 心 敏,請嘗試之。」層 於罪 苟無 1,然後 民 願 恒 士爲 而 從 夫 心,放辟, 可 而 子 爲 能。 刑之, 也? 輔 ,與昬 吾

也。 恒 生之業,則下文所言『五畝之宅,百畝之田』是 常也。 常 心, 人所 産,生業也。 常有之善 常産,可 心 也 常 輔 氏 也。 生之業 日 常 常常 有

不見而取 常 名也。」士嘗學問 之善心 心,故不知禮 心 ,則下文所言 民 則 之也。 義 而陷於放僻邪侈也。 不 能 ,知義理,故雖 「善與禮義」是 輔氏曰: 然矣。 「緣民無常 罔,猶 也。 若遂從而 無常 善,又禮義 羅 産,所以 網 産 刑 之,是 欺 而 之總 無 其 有 常

矣。」使民有常産者,

又發政施仁

之本

也。

也。

則盍

反其本者,責其

何不反本也。

其

辭

古

有

輕

重

盍

何

不

也。

輔氏曰:

蓋

亦

反其本者,

言

其

當

反

本

下同。 然後 足以 是故 驅 明君制民之産,必使仰足以事父母,俯 畜 而之善,故民之從之也輕。 妻子 ,樂歲終 身飽, M 年 免 畜,許六反, 於死

誠

無異於以羅

網罔民,欺其不見而取之也

放此 凡治字 惟救死 畜妻子,樂歲終身苦,凶年不免於死亡。 今也制民之産,仰不足以事父母,俯 輕 ,猶易也。 爲 理物之義者,平聲; 而恐不 贍,奚暇 此言民有常産而有 爲己理之義者,去聲。 治禮 義 哉? 常常 心 治 不足以 也。 平. 後 此 聲。 皆

王欲行之,則盍反其本矣。 贍,足也。此所謂無常産而無常心者也。

> 寒,然而不王者,未之有也。」音見前章。 戴於道路矣。 謹庠序之教,申之以孝悌之義,頒 百畝之田,勿奪其時,八口之家可 豚狗彘之畜,無失其時,七十者可 五畝之宅,樹之以桑,五十者可以 説 具下文。 老者衣帛食肉,黎民 以 以 衣帛矣; 白 無 食 不 者 肉矣; 飢 飢 不 矣; 不 負 雞

氏曰 故孟子爲齊梁之君各陳之也。」輔氏曰:「八 雖有仁心仁聞,而 本,常生之道,故以告齊梁之君者,其 口,乃上次農夫,言此者,舉其次多者耳。 家,次上農夫也。 此言制民之産之法也。 「爲天下者,舉斯 此王政之本,常生之道 民不被其澤者,不行先 心 趙氏 加 諸 説 曰:「八口之 彼 亦 得 所 而 其 謂 〈要。」楊 Ŧ 政之

王之道故也。 楊氏之説,本末具舉,首尾該盡,亦深得孟子之意。」〇 故以 制民之産告之。」輔氏日

른 能擴充以行仁政。 要,不過推其不忍之心,以行不忍之政而 此章言人君當黜霸功,行王道。而王道之 齊王非無此心,而奪於功利之私,不 雖以 孟子反覆曉告,精

切

也。 黄氏曰:「儒術之不見用於世,以其空言而無實 用

儒術 挾區區之小數 ,而不 知爲國之大體 相傾 相 詐 戕

用孰過於此! 夫元后者,民之父母也。 父母之於子,必

母之身。今也爲民父母,聽其自生自死,自愚自智,而 先有以養之,而又有以教之,然後爲之子者,得以全其父 民皆知尊君親上,而天下之人亦皆引領而望之,其爲實 使民養生喪死而無憾,然後教之以孝弟忠信。 不惟吾之 不謂之空言乎? 賊,不惟爲敵國之病,而吾國之民固亦不得安其生矣,豈 故功利之説常易以求售於人。 如 則皆實用也。 此,而 蔽固已深,終不能悟,是可歎 儒術則不然,自 爲功利者則曰,兵可强,國可富也, 不知夫功利者乃空言,而 五畝之宅,百畝之田 相 相 然

> 哉 ! 之問 然於世變之衰,而聖賢之道不得行也。」 輔氏曰:「《集註》所斷章指數語,尤包括得 皆空言而無實用,必待管、商之術而 孟子之精切,與宣王之不悟。 也,又倡 虞氏九官、周官、六典,無非儒者已試之效,孰謂其 爲功利 之説以 斲 熟讀 喪之, 豈爲民 而詳 後可以爲國乎?」〇 玩之,尤使人慨 意盡,而深嘆 父母之道

孟子卷第一

後學 成德 校訂

七 七

孟子卷第一

朱子集註 後學趙順孫纂疏

梁惠王章句下

凡十六章。

暴未有以對也。」曰:「好樂何如?」孟子曰: 莊暴見孟子,曰:「暴見於王,王語暴以好樂,

現,下見於同。語,去聲,下同。好,去聲,篇内並同

王之好樂甚,則齊國其庶幾乎!」見於之見,音

諸?」王變乎色,曰:「寡人非能好先王之樂 他日,見於王曰:「王嘗語莊子以好樂,有 莊暴,齊臣也。 庶幾,近辭也。言近於治。

也,直好世俗之樂耳。」

猶古之樂也。」

曰:「王之好樂甚,則齊其庶幾乎!

今之樂

變色者,慚其好之不正也。

今樂,世俗之樂。古樂,先王之樂。

孰樂?」曰:「不若與人。」曰:「與少樂樂,與 曰:「可得聞與?」曰:「獨樂樂,與人樂樂,

衆樂樂,孰樂?」曰:「不若與衆。」聞與之與,平

聲。樂樂,下字音洛。孰樂,亦音洛

獨樂不若與人,與少樂不若與衆,亦人之

常情也。

「臣請爲王言樂:爲,去聲。

此以下,皆孟子之言也。

音,見羽旄之美,舉疾首蹙頞而相告曰: 『吾 妻子離散。』今王田獵於此,百姓聞王車馬之 夫何使我至於此極也

空 父子不相見、兄弟 音,舉疾首蹙頞而相告曰:『吾王之好鼓樂, 今王鼓樂於此,百姓聞 王鍾 鼓之聲,管籥之

樂 不 王 也。 相 之 見,兄弟 好 蹙,子六反。 田 獵, 妻子 夫 何 頻, 離 使 音遏。 散。 我 至 此 於 夫, 無 此 音 他, 極 扶。 也 不 同 ? 與 樂 之 民 父子 樂, 同 與

鍾鼓管籥,皆樂器也。愚謂:管,笙也。籥,簫也。

音洛。

之所建 舉,皆 析 額 同 旄,旌屬。 晉人假羽旄於鄭。」 羽。」釋云:「全羽、析 樂, 也。 也。」又案:《周 也。 謂 獨 憂戚 愚案:《春秋傳》: 疾首, 樂 其 杜 則 禮 預曰: 身 頭 羽 蹙 直 而 痛 司 其 以 有羽 常 不 也。 額 ×: 「范宣子 析 恤 而 「九旗之數,有 羽爲旌,爲王 蹙, 其 無 極, 帛 民, 也。」不 假羽旄於齊。」 聚 窮 也。 使之 也 者族 ·與民 全羽、 頻, 窮 羽 車

百 疾 音,舉欣欣 今王鼓樂於此,百姓 病 姓 與? 罪 王 車 然 何 馬 有 以 之音,見 喜 能 色 鼓 樂 而 聞 相 也?』今王 Ē 羽 告曰:『吾王庶 旄之美,舉欣 鍾鼓之聲,管籥之 田 獵於此 欣 幾 然 無

木

也。

有 以 八、平聲。 能 喜 色 \mathbb{H} 而 獵 同樂之樂,音洛 相 也?」此 告 Ē. 吾 無 他 \pm 庶 與 民 幾 無 百 樂 疾 病 也 與 ? 病與之 何

與民同樂者,推好樂之心以行仁政,使民

今王與百姓同樂,則王矣。」

各得

其

所

也

楊氏 正 欲 但 樂猶古樂。 樂,開導其善心,深勸其與民 奉 國之時,民 矣,所謂 好 韶》 道 以 樂 與 其 티 : 舞,必 身。 ; 民 禮 而 孟子之言,救時之急務,所以 同樂之意,則 樂 能 齊 「樂以和爲主,使人聞 孟 與 治天下,當 窮 其 放鄭聲。 其實今樂 子 庶幾 百 財 切 盡 姓 於 者 同之,則 人君 如此。 救 蓋孔子之言,爲 無古今之異耳。 如 民 古樂,何 獨 孔子之言 天 故 以 同 下 大 范 南 鍾 樂, 之 齊 氏 可 面 鼓 王 之 民 管 不同。 口 而 樂 i 絃之 邦之 必 若 之 歸 謂 也 用 好 É 必 ? 今 戰 之

主,及與民同樂爲樂之本,又可以足范氏之説。」 子之説 以此,姑正 音 韶 而 **×**,≪ ,可謂平正明 疾 濩 首 其 蹙 無 本 頻 補 白 而 無 於治 則 己。」輔氏曰:「范氏辨孔子、孟 餘 雖 藴矣。 也。 奏 以 故 而 ^ 楊氏 孟子 咸 公論樂以 × 告 ^ 英 齊 和 \approx 王. 爲

戀反。 諸? 齊 宣 孟子 王 對 問 曰 : 曰 : 「文王之 於傳有之。」囿,音又。 囿 方 七十 里, 傳,直 有

有 故 以 分天下有其二之後。] 傳,謂古書。 「養獸曰囿」之訓乎!」古者四 于囿、《春秋》之書『築鹿囿』,則可知矣。 何 圃 有 也? 毓草木, 藪牧養蕃鳥 度閒 一, 其 講 者, 「文王由方百里起,不應有七十里之囿,故疑 武 蕃 亦三分天下有其 觀此章所言及文王 曠之地以 事,然不 育 鳥 뾆 之所。 欲馳騖 爲囿。 、默。 一靈囿 今乃以囿 輔氏曰: 一之後 於稼穡 時 然文王七十里之 所 之田 有,與衛獻公之射 爲 輔氏曰: 「大宰九職 蕃育 也 場 況《説文》又有 ,皆於農隙 與? 圃之中, 鳥 「孟子時 潤 人其在 之所 輔 以園 氏 鴻

古書有此説耳,然亦未必其然否也。」有之,今不復存矣。然孟子所謂「於傳有之」者,亦言據

乎 ? 雉 也?」曰:「文王之囿 日 日 兔者往焉,與民同之。 : : 「若是 芻,音初。 寡 人之 其大乎?」曰 蕘,音饒 有 方 四 方七十里, 芻蕘者往焉, 十里, 民以爲小,不 民 民 猶 猶 以 以 爲 爲 小 大,何 亦宜 也

芻,草也。 蕘,薪也。輔氏曰:「芻謂取草者,蕘謂

取薪者。」

之罪。 大,不亦宜乎?」阱,才性反 郊關之内 臣始至於境, 則是方四十里,爲 有囿 問 方 或 四 之大 + ·里,殺 禁, 阱 於國 然 其 後 麋 中。 鹿 敢 者 人。 民 如 以 臣 殺 聞 爲 X

關。 禮 **:** 愚謂: 入國 而 五十里爲近郊,百 問 禁。 或 外 里爲遠 百 里 郊。 爲 郊 關 郊 者、蓋 外有 郊之

○齊宣王問曰:「交鄰國有道乎?」孟子對門。阱,坎地以陷獸者,言陷民於死也。

 \Box 大王事獯鬻,句踐事吴。 文王事 有。 良 惟 夷, 仁者爲 惟智者爲能以 能 以 獯,音熏。 大事 小, 小事大,是故 鬻,音育。 是故 湯 句, 事

音鈎。

足以 仁字體 之私。 事大,弱之事彊,皆是 事大。」曰:「不特是見得 動。 事 之禮尤不 識 小 同仁,自不見大小彊弱之異也,豈復 洪者,仁之量也。 心自不能已。 仁人之心,寬洪惻 小,是仁者之心 國雖或不恭,而 時 盡智者之用。 智者爲能以小事大,蓋 勢。 用分曉,蓋仁 故小 敢 故 大國 廢。 國 惻怛者,仁之意也。 吾所以字之之心自不能已, 尤更説 寬洪 明 輔 雖 心本 《語録 義 氏曰"「此説足以盡仁人之心。 道 雖 或 理 惻 理 似但,而 利害明,道理自合恁地。 不恭, ·無間 見侵陵, 怛 謂 合恁地。」○輔氏曰: 知者 》曰:「問:『仁者爲能以 明得 便 斷 見得 是 也。」智者明 無較計大小彊 而 吾 小 有較計之私哉? 心義理之原。 吾 利 國不恭,亦 而吾所以 仁與物無對,一 害甚 所以字之之 明 故 義 撓 「此説 事之 祇 小之 識 他 理 弱 時 得 大 得 寬 不 故 視

> 以金 蔡氏 也。 服矣,又何求焉。」夫差與之成而去之。 美於此者進之。」嚭曰: 『古之伐國者,服之而 飾美女八人,納之太宰嚭。 謂 大夫種行成於吴。 王 者有量度之明 永嘉陳氏曰: 便流於私欲,只 是以大國或見侵陵, 勢,謂識得 也。」〇又曰: 知 ,則更論甚敢與不敢? 狄 事 玉子女賂君之辱。」夫差欲與之成 曰:「案《國語》、《史記 句踐,越王名。 見《 即 在外時勢之輕 詩 「仁者無計較之私,忘其孰大而 「《集註 獯鬻也。 要就 自知不能 大雅 曰:「寡君之師徒不 則在 利避害,更不 》只言義理 重。 我事之之禮自 敵大。」湯 事見《國 所 愚案: 曰: 「子苟赦越國之罪,又有 》載,越 謂不敢廢,方始是知之極致 唯其 大 時 王 顧 獯 知得,方能 王 勢 事 事 義 鬻 棲 而 語》、《史記 句踐後與范 理 足以 者, 見 見 於會稽之上,使 E 不敢 子 當 後 後 胥 匈奴之先 如 辱 若言利 敬 廢,若元不 已。 篇。 孰小。 章。 諫 何矣。」〇 君 以循 矣,願 今已 越 害 之, 文 所 智 人 111

也。樂天者保天下,畏天者保其國。樂,音洛。以大事小者,樂天者也,以小事大者,畏天者

謀十年,而竟滅吴。」

然也。 天者, 《語録》曰:「仁者與天爲一、智者順天所命。 覆,無不周 不敢違理,智之事也,與天爲二,故曰畏天。」包含徧 豈不能事小? 以小事大。然此亦各因一事而言,惟仁者能如此,智者 定之拘。」〇輔氏曰:「言仁智者之氣象規模有此效也,非 度,不敢縱逸,保一國之規模也。《語録》曰: 也。仁者固能事小,然豈不能事大? 能如此耳。 聽天所命者,循理而行,順時而動,不敢用其私心,故能 者,嘉人之善,矜人之惡,無所擇於利害,故能以大事小。 然合理,故曰樂天。 所以覆地也,小者自當事大,此坤之所以承乾也。」自 之,則道也。二大之字小,小之事大,皆理之當 ○輔氏曰:「自然合理,仁之事也,與天爲一,故曰樂天。 輔氏曰:「以道理言,則大者自當事小,此天之 理而已矣。 非專以事大事小爲仁智之分,樂天畏天之别 一國,以其德之厚薄、量之大小而言,亦 遍,保天下之氣象也。 但其事之之情,則有樂天畏天之異耳。」 輔氏曰:「即 不敢違理,故曰畏天 智者固能事大,然 程子所謂「天專言 與天爲一 制節謹 無

惡敢當我哉』 《詩》云:『畏天之威,于時保之。』」 對曰:「王請 王曰:「大哉言矣! 寡人有疾,寡人好勇。」 王請大之! 夫撫之夫,音扶。惡,平聲 《詩·周頌·我將》之篇。時,是也。 其人民而已。故不能知事大之禮,又不能行恤小之仁。」 「齊王唯其好勇,故但欲辟土地,朝秦楚,争地争城,以刈 言以好勇,故不能 謂仁者智者之心欲其如此也。」 無 好小勇。 此匹夫之勇,敵一 事大而恤 夫撫 劍疾 小也。 視曰、『彼 人者也。 輔氏曰:

能已,故謂之大。 暴集隨涸,故謂之小。義理所發之勇,如天開地闢,自不勇,義理所發。愚謂:血氣所爲之勇,如溝澮之水,疾視,怒目而視也。小勇,血氣所爲。大

地 涇 沅 徂,往也。 爱,於也。 也。 徂 共之衆也。 共,阮地,今有共池。 篤,厚也。 大 雅 旅,衆也。 莒、《詩》作 皇矣》篇。 祜,福也。 愚案: 遏、《詩》作按,止 侵阮徂共,蓋侵阮直至共之 旅。 密國在今寧 赫,赫 徂 對, 荅. 旅, 州。 謂 然 也 阮國在 密 怒貌。 以 人侵 也。 荅 今

恥之。 下曷敢 其助上帝,寵之四方。 天下之民。衡,與横同 書》曰:『天降下民,作之君,作之師。 此武 有 越 王之勇也。 厥 志?』一人衡 有罪 而 武 無罪,惟我在,天 行於天 王亦一怒而 下,武 惟 安 王 \Box 勇也。」

異之也。」有罪者我得 異之於四 《書・周書・泰誓》之篇 書文少異,今且 亶聰明,是以天德寵 方也。 依 輔 此 氏曰: 異之也。 而 解之。 誅之,無罪 「謂 也。 作元后,是以天位 天寵 寵 然所 異 之 者 武王於天下 四 我 引 方 得 與 介,寵 而 今 寵

> 任也。」 也。 所過越,則何至有作亂之事乎? 志而作亂者 安之。我既在此,則天下何敢有過越其心 人之作亂,皆 衡行, 謂 乎? 過越 作 亂 其 輔氏曰:「心志,謂天下之心志 心志 也。 之故 孟子釋《書》意如 此 耳。 武王以天下之重 若守其心志,

今王亦一怒而安天下之民,民惟恐王之不好

此,而言武王亦大勇

也

天下仰望之心也。

此文王之大勇也。

王若能 怒不 爲,然後可以有爲也。」張 不好 氣之怒也。 君人者,必能懲小忿,然後能養大勇。 恤 以 救民,以安天下。 小 除 ?勇耳。 可 事大,以交鄰國,能養大勇,則能 暴 有,理義之怒不 亂 如文武之爲,則天下之民望其 而拯己於水火之中,惟 大勇者, 〇此章言人君能懲 輔氏曰: 理 敬 夫曰:「小 義之怒 可 「章旨 無。 所謂 之説 也。 知 小忿,則 人能 此, 勇者,血 語 恐 血氣之 簡 有 一怒 則 王之 除 意 所 可 暴 能 不

下不安分,上不恤民,皆非理也。

輔

氏

E:

則爲性情之正。發於血氣,則爲人欲而不正耳。理義血情則性之動也,但所發有理義血氣之不同。發於義理,氏曰:「此説發明先儒所未到。怒乃人情之所不能無者,以見性情之正,而識天理人欲之分矣。」輔以見性情之正,而識天理人欲之分矣。」輔

上矣。樂,音洛,下同。
 一此樂乎?」孟子對曰:「有。人不得,則非其一一齊宣王見孟子於雪宮。王曰:「賢者亦有

氣,是乃天理人慾之分也。」

皆有此樂,輔氏曰:「此釋「有」之一字。」不然,則 者共之而已也。 下之不得此樂者,必有非其君上之心。 宮室之外,故曰離宮。」言人君能與民同樂,則 民同樂,不可使人有不得者,非 曰:「此釋「人不得則 雪宫,離宫名。 輔氏曰: 『非其上矣』一句。』明人君 「離,猶别 也。 但當 别在其所居 與賢 當 輔氏 與 人

樂者,亦非也。不得而非其上者,非也,爲民上而不與民同

己之樂爲樂,而以天下之樂爲樂,不以己之憂爲憂,而以

未之有也。 民同,而民不與君同其憂樂者鮮矣。 民之憂而不敢恣己之樂,是之謂與民同憂。 ○真氏曰: 仁如此,則天下之民其將何往? 多,然其懽忻愉怡,痾痒疾痛,舉切於吾之身矣,君 以天下,則君以民爲體, 爲憂,如是,則憂不以一己而以天下。 不以一己而以天下。 君以民之憂爲憂,而民亦以 曰:「君以民之樂爲樂,則民亦以君之樂爲樂,如是,則 民之憂而 樂民之樂而民樂其樂,則樂以天下矣,憂 「因己之樂而圖民之憂,是之謂與民同樂。 民 憂其 憂,則憂以天下矣。 民以君爲心。 雖 欲不王,不可 故爲人君者,不以 天下雖大,兆 憂樂皆不以 君之憂樂與 得 君之憂 己 輔 也。 能 民 因

陳

其所受之職

也。

愚謂:

廵所守者,自上

察

下

也

廵

所

守

廵行

諸

侯

所守之土也。

述

所

職

天下之憂爲憂。 如 此而天下不歸 者,未之有也。」

於先王觀也?」朝,音潮。 昔者齊景公問 儛, 遵海 而 南 ,放于琅邪。 於晏子曰:『吾欲 放,上聲 吾 何 觀 脩 於 而 轉 口 附、 以 比 朝

遵,循也。 晏子,齊臣,名嬰。 觀,游 放,至也。 轉附、 琅邪 朝 齊 儛 東 ,皆山名也。 南 境 上邑

名。

也

遊 遊,吾何以休? 述 狩,廵狩者廵 不足, 秋省斂 晏子對曰:『善哉 職 足也。 述, 一豫,爲諸侯 者述所 陳 也。 夏諺,夏 職 所守. 省,視也。 而 (度。」 狩 也 助 吾王不豫,吾何以 也; 問也! 時 不給。 無 之俗 諸 ,舒救反。 非 斂, 收 侯 事 夏諺 語 者 天子適諸侯 朝於天子曰 也。 省 穫 曰 : 、悉井反 春 也。 豫, 省 一吾王 助? 耕 給,亦 樂 述 曰廵 而 也。 職 不 補

若流。 息。 今也 朝。 侯皆取法焉,不敢無事慢遊以 爲 郊 述所職者,自下達 王 野 睊 不 皆無 者一 流連荒亡,爲諸侯憂。 然: 睊 ,察民之所不 胥 有 遊 師 讒,民乃 無 行 一豫,皆有 上也。 事 而 而 糧 足 作 空行 王十二歲 食, 而 慝。 補 飢 恩 者, 助 惠 者 方 睊,古縣反 之。 而 廵守,諸 弗 命虐民 以及民,而 病其民 又 食,勞 春 故 夏 秋 侯六年 也。 飲 者 諺 循 食 弗 諸 以 行

庸之國,縣 極 逆王命,則虐必及其民矣。」若流,如水之流 命諸侯、豈 也。 也。 精之屬。 爲 今,謂晏子時 也。 師。 方,逆也。 慝,怨惡 《春秋傳》曰:「君 流 固欲其 睊 連荒亡, 邑之長。 睊 也,言民不 也。 如 命,王 側目 此哉? 解見下 師, 輔氏曰 貌 命 不過使之愛 衆 也。 ·勝其 行 也。 胥 文。 「此主言齊 師 輔 相也。 二千五 從。」糧 勞而 氏 諸 養 曰:「王者之 侯,謂 斯 事 起 民 讒, 謂 而 無 謗 百 耐 云爲 Ę 怨 X 附 窮 謗 糗

七二六

諸侯憂,故知爲附庸之君,縣邑之長也。」

連,從獸無厭謂之荒,樂酒無厭謂之亡。厭,從流下而忘反謂之流,從流上而忘反謂之

平聲

下。 國。 獵 亡爲喪亡。 亡,猶失也,言廢時 此 釋上文之義 也。 且下文但言『荒亡之行』耳,亦不可便以爲喪亡之亡 從流 荒, 然 上,謂 此 廢 四四 也 也。 弊相等,不應樂酒 挽 舟逆水 失事 樂 從流下,謂 酒, 也。 以 而 飲 之弊,獨 輔 上 放 氏 酒 日: 舟隨 爲 從 極 樂 獸 舊 言 水 一説以 其 也 田 而 喪

行也。』
先王無流連之樂,荒亡之行。行,去聲。惟君所

也

故

《集註

》創爲此説,當矣。」

言先王之法,今時之弊,二者惟在君所

行耳

補 景公説,大戒於國, 不足。 召太 師 曰 : 出 『爲 舍於郊。 我作 君 於是 臣 相 始 説 興 之 發

子釋之,以

爲臣能畜止其君之欲,乃是愛

樂,如字。 樂!』蓋《徵招》、《角招》是 君何尤?』畜君者,好君 其數稍 事。 欲,宜爲君之所尤,然其 財之意。 角皆以招名之,亦舜作歌以康庶事,鼓琴歌 也。 子 意。」其詩、《徵招 木聲清濁中, 發倉廩也。 補助之法,故下文即言興發倉廩以補不足也。」與 戒,告命也。 「出舍於郊,則是欲行上文所謂 也。 愚謂: 輔 徵, 陟里反。 少,故爲事。 氏曰: 尤,過 樂有五聲,三日 樂有 其數多少中,故爲民。 韶 太 出舍,自責以省民 五聲,官、 也。 樂蓋 師,樂官 招,與韶同。 事謂人之所營事務也。 》、《角招 極 言晏子 於和樂、故取 商 也。」説,音 角、 角爲 循行郊野,察民之不足 也。 》之詩 心 也。 畜,敕六反 徴、 則 能 徵主火,火聲 民,四 羽 君 何 其 畜 其名以見和 也 是 臣, 也。 過 悦。 詩 止 也 南 招,舜 哉 ? 愚 日 其 風 日 爲 己與晏 輔氏 角 謂: 以 徴 君 稍輕 主 阜民 樂之 『畜 ☐ :: 徵 之 孟 樂 木 爲

問

當毀之乎?

且止乎?」

其君之無欲。」○尹氏曰:「君之與民,貴賤雖愛君乎? 忠臣之心,惟恐其君之有欲。姦臣之心,惟恐其君之有欲。姦臣之心,惟恐其君者也。真氏曰:「《易》之大小畜,皆以止爲義。其君者也。真氏曰:「《易》之大小畜,皆以止爲義。

謂 氏曰:「尹氏之言平淡有味,熟讀 不 深切矣。 同,然其 八心未 王 始 示 有 能 異 推 也。 而 而詳玩之,自有感發於 用 之,惜哉!」輔 孟子之言,可

○齊宣王問曰:「人皆謂我毁明堂。毀諸?

人心,而孟子之意亦無餘藴矣。」

廵守 書 時 朝 貢欲去告朔餼羊之意同,以其無用,故 趙氏曰:「明堂,泰山明堂。 有明堂處」云。」人欲毁之者,蓋以天子不復 諸侯之處,漢 郊祀志》:武帝元封元年,"封泰山,泰山東北 ,諸侯又不當居之也。 時 遺 址 尚 在。 輔氏 周天子東廵守 欲毁去之也。」王 E: 輔 氏 此 日 : 止與子 阯,古 「《漢

王政,則勿毁之矣。」夫,音扶。 孟子對曰:「夫明堂者,王者之堂也。 王欲行

曰孤。 老而 哿,工可反。榮,音瓊 發 王曰:「王政可 人,哀此榮獨。』」與,平 征、澤梁無 之治岐也,耕者 政 明堂,王 王政,則亦可 無 施仁,必先斯四 此四者,天下之窮民 夫 日 者所居,以出 禁,罪人不孥。 寡。 以王矣。 九一,仕者世禄, 得聞與?」對曰:「昔者文王 老而無子曰獨。 一者。 聲。 何必 政 ^ 孥,音奴。 詩》云: 令之所 而無告者。 老 一段哉 而 關 無 幼 也。 鰥,姑頑 市 一部 妻 而 譏 \Box 文王 無 能 而 父 不 行

界爲 方一 之南有周原,蓋周之舊國。 北,唐屬 岐,周之舊國也。 九區 里 岐州岐山縣,本朝屬鳳翔府,蓋 爲 井,其 區之中,爲 愚案: 田 九一者,井田 九 岐 百 山在漢右 田 畝 百 箭括 畝 中 扶 嶺也。 之制 風美陽 畫 中 井字, 百畝 岐 也 Ш 西

也。」世 有爲暴之譏焉。 周公之意,是必將以抑 税 市之吏,察異服異言之人,而不 市 報之如此,忠厚之至也。 之不失其禄。蓋其先世嘗有功德於民,故 其以一分饒與民,則又變狹而之寬,因以寓厚民之意 氏曰: 百畝 之,教之而成材則官之。 力合作,計畝均收,大率民得其九,公取其 失,故變其法。 先公後私之意,則 易助爲徹 而爲徹。 爲 也。 ,謂都邑之市。 公田 ,而同 「治岐之政,耕者九一,是助法也。 禄者,先王之世,仕者之子孫 輔 聖人之於法度,非有所不得已,則不應變易之。 外 ,雖不可知,要必出於不得已。 氏曰: 養公田 八 雖一夫受田百畝, 以此見變法易令之識,非易事也。」澤, 百 關 必田 畝 市譏而不征、《周 商賈 一是九 譏,察也。 畯 爲 之官漸有急於公而緩於 私 而 歸之農 Щ. 分 關,謂 如不足用,亦 而與同溝共井之人通 而 八家各受私 也。 征 税其 禮 及《周禮》,則 若非斯民浸失 , 税 道路之關。 及其弊 一,故謂之徹)則關 征 商賈之 也。 市 也 皆 也,則 有 私 征。 歸 使 教 田 之 易 輔 不

乃裹餱糧,于槖于囊。 王曰:「善哉言乎!」曰:「王如善之,則 曰:「昔者公劉 行?」王曰:「寡 雅 愛護之。此又體仁之至,而王政之本也。」《 無尺寸之膚不養,然於心 恤,故必以爲先也。 寡孤獨之人,無父母妻子之養,則 禁,經制大備,乃王道之成。」 奏,妻子也。惡惡 乃王道之始。 妻子,使之養其老而 其身,不及妻子 曰:「文王治岐 亦禁其暴殄天物者,而使取之以其時而已。」○永嘉陳氏 也 謂 腦水。 正月》之篇。 輔 氏 E : 梁, 成周門關 關 「澤梁不禁,至 好貨。 謂 市不征,澤梁無禁,因民所利 也。 魚 哿,可也。 人有疾,寡 市廛皆有限守, 梁。 腹 《詩》云:『乃 輔氏曰:「先王以民爲 恤 先王養民之政 腠理易於 思戢用 其 周 與 幼。 禮 民 榮,困悴貌。 傷犯 則 同 光。 人好 山林川澤悉有厲 不 Ш 利, 處,尤 幸 澤 弓矢斯 積乃倉, 皆 詩 貨。」對 尤 不 而 有 耐 當有 導其 何 · 小 宜 體 有 設 利之 厲 . 為 雖 憐 禁 止 鰥 禁 以

貨, 者 張 有 ,干戈戚 與 裹 百 糧 姓 也, 同 揚,爰方 之,於王 然 後 啟 口 何 以 行。』故 有?」餱,音侯。 爰 方 居者有 啟 行。 積 王 槖,音 倉 如 行,行 托 好

王

天

下也

何

難

之有

戢,《詩

》作輯

音集

愚案: 公劉 言 間,公劉始立國於豳之谷。 大其 也。 也。 窋,不 大於斧也。 大而斧小。 大雅 王 王 自 不 政 窋 好 難 國 戢 無 舜 以 生鞠陶,鞠陶生 公劉 家也。 安 底曰 貨 也 封 公劉,后稷 爲好貨,故 《太公六韜》云:「大柯斧,一 后稷于邰,不 爰,於也。 集 而能 孟 橐,有底 》之篇。 也 子言公劉之 戚,斧也。 推己之心 言思 之曾 公劉,是后稷之曾 取 窋失其官守,而 啟行 積,露 豳,今邠州三水縣。 日 民 囊。 孫 安 無制, 揚,鉞 言 也。 集 以 民 積 皆所以 其 及 往 富 也。 愚案: 而 也。 民 名天鉞。」 民 自竄於戎 遷 足 孫。 不 于 餱,乾 也。 如 盛 能 愚謂 后 此 何 楙 稷生 以 餱 詩 行此 《狄之 真 ·, 是 是 有 也 光 糧 糧 氏 • 鉞 鉞 不

> 餱 曰:「人君豈 糧之積可 也。」今王好 能 不 事 儲峙之富? 貨 亦 惟 能 能 推 如 此 此 心, 使民 則 其 亦 於 有

王如 來胥 太王 朝 \pm 故亶 公叔 案: 先公也。 爲大王也。 毁隃生公非,公非生高圉 王 走 日 緜》之篇也。 而 不能 好色,愛厥 又言此者,好色則心志 好色,與百姓 宇。」 馬 公劉生慶節,慶節生皇僕,皇僕生差 父以 祖 写寡 率 生 蓋未追王前之本號古公。 行 名言。 當 大王,是公劉 西 人 王 是 有 水 亶父,大王名也。 政 古公,大王之本 時 妃。 滸 疾,寡人好色。」 來 也。 同 至於 也, 朝 《詩》云:『古公亶父,來 之九 之,於王何有?」大,音 走 , 高 内 大王,公劉 馬 《岐下。 圉 世 無 生亞 孫 怨 蠱惑, 避 女,外 當 南 狄 對 愚謂: 號,後乃 爰及姜女, 聿 殷 詩 弗,差弗生 亞 人 末 九 用 日 幸 之 時 世 無 度 古公,猶 生 大 公叔 猶 一昔 難 孫 奢 曠 追 雅 尚 毁 也。 侈 夫。 質 尊 祖 隃 者 愚

而必 暗拘 蓋 據 然後自然有此等功用 則亦勉强做不得,須是學到孟子地位,能如 邪之事。 論事 其 心以 也。 能推此心,使民 循西方水厓漆沮之側,東行 率 大王之妃也。 也 孟 孟 理 菲 鍾鼓、苑囿、游觀之樂,與夫好勇、好貨、 子 也。」 滯 而言之耳。 子 循 對 愚謂: 每 及民 心,不止 無怨 ,徒以激其 與 時君之言,其所以充其善 也 若夫就事 愚 如 人 此 也。 謂 古公避狄之難,其 曠者,是 君 滸, ,豈不能堯舜 此 亦 其君之聽與 君 言 就 真氏曰:「人君豈能無妃匹之奉? 篇自 論事 有配偶之安可也。□○楊 胥,相也。 水 也 事 而使之拒 皆所以 厓 ,則是後世 論 大 1首章 至所謂豈不能堯舜其君 王 也 事。 而至於岐 不聽,用 來以早朝之時,疾走其馬 一好色, 吾説耳。 至此,大意皆 l 而格 其君乎?」輔氏日 擴充其善 宇,居也。 若使爲 岐 不知學者之所爲,淺 與 下 其非者,乃陳 山之下。 而 不用, 若夫孟子之事 能 岐 他知言養氣 人臣者, 則 心 氏 推 Ш 曠,空 姜女, 不 而 己之 之下 \Box 則 善閉 同 可 格 得 亦 惟

其行 體 此,不但贊 相 也。 盡其性,此即 行而異情者而辨析之。 私之異耳。 之,則以爲慊,而 好貨、好色之心,以常情 者之間,不能以髮,而其 能 言之,則是固天理人情之所不能無者,但 去遠矣。輔氏曰: 而私於一己者,衆人之所以滅其天也。 公於天下者,聖賢之所以 好色之心,皆 己者,衆人之所以滅其天理,此即 察於所謂豪髮之際,然後力求所以 去遂有盡性 無者。 二者同異不過豪髮之間 雖 同 女 其理 而 故 公劉、 然天理 其 、滅天,興王、絶世之相 集 之密,正 情 又自以 註 則 天理 大王與民同欲之事 異。 》舉 「鍾鼓、苑囿 人欲 欲 夫聖賢之與衆人,其於好 胡 爲疾,恐不足行王道。 論之,則雖若不可 之所 循理 使學者因 氏知言之説,所 同 前 而公天下者,聖賢 有 是非得失之歸, 其終之是 盡 行 遊觀之樂,與夫好 其 齊 反如 而 異 其 (言以 循 也。 王 人情 有理 情 夫理 性 此 自 謂 反 非 爲,故齊王 以 縦 也 天 得 與欲、 諸 而 理 失 爲 欲 然以 循 之 集 克 疾 之 而 貨 人 所 縱 註 理 八之事 其 好 至 則 所 公與 私 欲 實 》言 勇 相 欲 欲 而 不 其 於 以 色 言 百 理

耳。」故 相 夫豪氂之辨,同行異情之實,與夫天理人欲界限之不 意之所在。 輔氏曰: 學阿世之言,而 微如此哉。」學者以 推己之心以及夫民,循理而不縱欲,公天下而不私一己, 大王之事。 則其實又甚密而且 貨好色,則似若疏且易矣。 實密,其 人。然後識孟子真非曲學阿世之說,而己之所以克去 肾断 孟 「讀之者,徒既其文而不究其實,則亦不知夫其 事 子因 以 故又欲學者體之以心,驗之以身,真有以見 非孟子據理之極,知言之要,何能 r似易 遏 人 時 一難矣。 而實 欲 君 知所以克己復禮之端矣。 身體之,則有以識 而 之問,而 法,指孟子之説。事,指公劉 然必使之爲公劉、大王之事, 存天 難 輔氏曰:「不直禁其好 理 剖 其 析於幾 法 辨析 其 似 非 微之 疏 其 曲 可 而 精

而言他。治,去聲

託,寄也。比,及也。棄,絶也。子,則如之何?」王曰:「棄之。」此,必二反。其友,而之楚遊者。比其反也,則凍餒其妻(○孟子謂齊宣王曰:「王之臣有託其妻子於

氏

曰:「言君臣上下各勤

其

任

無墮

其

乃安其身。」輔氏

曰:「各勤

其任

指

心

而

言

無墮

其

私意,復歸於禮之端緒

,亦可得而默諭矣。」

「已之。」曰:「士師不能治士,則如之何?」王曰

曰:「四境之内不治,則如之何?」王顧左右師皆當治之。已,罷去也。 士師,獄官也。其屬有鄉士遂士之官,士

然,顧 子所以治四境之道而力行之,則齊國其庶幾矣。 舉也。」及此而王不能答也。 心,無責己求言之志,則其不足與 非艱,行之爲艱,使齊王沛然達其所愧,反躬自責,訪 於下問如此,不足與有爲可知矣。 「王顧左右而言他,則 治問王,故先設此二事以開其 孟子將問 「常人之情,知人則明,自知則 左右以釋其 此 而 愧 先設上二事 ,言他 亦 自知其 事 暗。 以 明,而使之自知 曠 亂 有爲,可知矣。」○趙 職爲可愧矣。 其 其憚於自責,恥 孟子將以四境之内 以 解, 發之,輔 有 護疾忌毉之 輔氏 其 今乃不 然知之 職 氏 有 ☐ :

乃安。」 職,指 事 而 言。 君 臣 上下 内 盡 其 心, 外 盡 其事 則 其 身

者所 木之謂 ○孟子見齊宣王曰 進,今日不知其亡也。」 也,有世臣 之謂 :「所謂 也。 故國者,非 王 無 親 臣 謂 矣,昔 有 喬

不可 者,則. 木也。」 宜有。 與君 氏曰: 國舊矣,故曰 而 故國者,則在 蕭何,唐之房、杜 世 此言喬木世臣,皆故國 世臣,累世勳舊之臣,與國同休戚者也。 用之者,今日亡去而不 則 無世臣,人 同休 自然與國同 昨日 「謂如畢公弼亮四世之類是 但所以爲故國者,則以其有世 無 親 1故國。 戚者 所進用之人,今日有 臣 君不 是也。 矣。 此 休戚矣。」親 也。 可 喬木乃年深高大之木,亦故國之所 而 無親 況世臣乎? 不在彼 君 知,則 輔氏曰: 臣 臣。 [所宜有。 、雖親 體,自 臣,君所 今齊王之臣 也。 也。 謂 臣亦無之矣,況世臣 然與之同休戚矣。」 臣,而 輔氏 腹心之臣,如漢之 服勤王家,至歷 :亡去 輔氏 親信之臣 然所以爲 非 曰:「齊之爲 昨 ☐ : 以其 而 H 「故國 不知 有 所 喬 累 輔 進

> 王曰:「吾何以 乎? 悟其始之所進者擇之不精 言齊王之意,則問此 何以先識其不才而舍之邪? 知 王意以爲此亡去者,皆不才之人。 註 》始分爲兩人,然後其意明白。」 而 誤用之,故今不以其去爲意耳。 舊説皆以 親 識其不才而舍之?」舍,上 臣便爲世 一句,似無來歷 故問 臣,故 何以辨之於初 以其解 也。 輔氏曰: 膠 蓋宣 轕 不 分曉 \pm 也。 我 「若不先 於此,始 大 初 宣 間 不 王 集

曰 : 戚,可不慎與? 尊, 疏 用 皆以『如不得已』一句連下文説。 戚,非禮之常,故不可不 遠之賢而用之。 之常也。 如不得已,言謹之至 人,唯於不得已之際,方致其謹 「國君進賢,如不得已,將使卑踰尊,疏 踰 戚,故不可 然或尊者親者未必賢 與,平聲。 不 謹 是使卑者踰 雖 也。 若 謹也。 可 言不得 通,然 蓋 且下文但 尊 如 Ë, 尊,疏 輔 尊 此 氏 則 則 親 言 日 則 將 必 親 因 使 是 者 「先儒 進 或 或 卑 踰 禮 疏 踰 人 君 踰

資質,亦明快易曉者。」

未必賢 段結之云「所 是『至謹』之意。 《集註 之言自察其賢 者踰戚,則又非禮之常,尤不可不謹也。 》直以「如 ,則又將 調進 (否而用舍之,亦未嘗言其不得已之意。 進其疏遠之賢者而用之,至使卑者踰尊, 不得已』一句 人君於進賢之際,皆不可不謹,故於下 賢 如 不 得已者如 連上文説。 此。 言如 至於尊 不得 者親 已 者 故

疏

之。 也; 然後去之。 勿聽; 國人皆曰 左右皆曰賢,未可也; 或 左右皆曰 人皆曰賢,然後察之,見賢焉,然後 去,上聲 不可,勿聽,諸大夫皆曰 不可,然後察之,見不可焉 諸大夫皆曰 「賢,未 不可 用 可

後從 者。 而 俗 宜 左右 可信 ,則其論公矣,然猶必察之者,蓋 mi 近臣 爲 才者不得以幸進矣。 而 故 用舍之"則於賢者知之深,任之重 必 衆 矣,然 自察之,而 所 其言 悦者, 猶 古 恐 亦 未 其 親 可信。 有 蔽 見其賢否之實,然 特 於 所謂 立 私 諸大夫之言 而 也。 爲 進賢 俗 至 人 (如不 一於國 所 有 憎 日

> 猶恐其 言未可 得 深而無所疑; 其賢否之實,從而 察其用,如孔子之視,所以 故又必自察之。 亦不容於幸進 公矣,然世又有同 已者. 或有蔽於私 以爲信。 如 此 矣。」 非徒任之,任之必重而不可易。 所 諸大夫則 俗 用 也。 輔氏 謂 舍之。 而爲 察之,則 至 曰:「左 衆所悦者,特 一於舉 觀 職位尊矣,不容 則 於賢 所 必因 國之人皆以 由 右近 察 者 言 非 臣,未必 以 所安,然後能 V. 徒知 察 而 其 有 爲 爲 心 俗 然 不 盡 至於不才 之,知之必 賢 考、 賢,故 所 , 則 憎 者, 親 迹 其 者 見 然 其

聽; 左右皆 國人皆曰 日 可 殺,勿聽; 可殺,然後察之; 諸大夫 皆 見 可 日 可 殺焉,然 殺, 勿

後殺之。

故

E

或

人殺之也。

故因 少 此 此 私 Œ 道。 也。 言 論 卯,皆天理人情之至,所謂 非 進退 輔氏曰:「命有德、討有罪、二事 蓋所 獨 人才而 以 謂天命天討,皆非人君之所 此 併及於 進 退 用 人才,至於用 刑。 天討 舜 也 之於四 相 凶 反 刑 而 孔 實 子之於 亦 相 連 得 以

如 此,然後可 以爲民父母。

孟子對曰:「於傳有之。」傳,直戀反。○齊宣王問曰:「湯放桀,武王伐紂,有諸?」

放之也。」
 成为,是也。《書》云:「成湯放桀于南巢。」蔡放,置也。《書》云:「成湯放桀于南巢。」蔡

桀、紂,天子。湯、武,諸侯。曰:「臣弑其君可乎?」

人謂之一夫。聞誅一夫紂矣,未聞弑君也。」 曰:「賊仁者謂之賊,賊義者謂之殘,殘賊之 言,一事不合宜,便傷義。 殘義之罪輕。 傷敗彝倫 滅絕天理,故謂之賊。 賊,害也。 倫 大法虧滅 了,便 故謂之殘。 仁義都是心之天理,仁是根本,賊仁則大 殘,傷也。 是殺 人 底 似手足上傷損一般,所傷者 人 《語録》曰: 害仁者,凶 害義 般。 者,顛 義 就 「賊仁之罪重 倒 暴 節 錯 淫 事 虐, 亂 Ŀ

> 夫。 葉。 氏下此數語 之,則理所當然。 弑之罪也。」勉,建陽人。 上者有桀紂之暴則可。 四 義、衆惡皆備之證驗也。」《書》曰:「獨夫紂。」 衆叛親離,不復以爲君也。 事者而言。 害淺。 曰:「斯言也,惟在下者有湯武之仁,而 滅絕天理,則是殄閼其根本。 家牆」,便是絶滅天理。」○輔氏曰: 小,猶可 「不以禮食」、「不親迎」之類。 海 此賊 所以深警齊王,垂戒後世也。 歸之,則爲天子; 凶暴淫虐,指發於中者而言。 補。」〇又曰 仁賊義之害,又有輕重之不同也。」一夫,言 然發於中者必見於外,見於事者實生於心。 , 所以著萬世, 爲人臣者之戒 自臣下言之,則不得已之大變。 「傷敗彝倫只是小小傷敗常 〇輔氏曰: 若是那「紾兄之臂」、「踰 傷敗彝倫,則是損害其枝 天下叛之, 不然,是未免爲篡 「賊之爲害深,殘之爲 輔氏曰: 顛倒錯繆,指見於 「此事自 「此賊仁賊 則 人君言 理 爲 王 故 勉 蓋 在 獨 如

大木。工師得大木,則王喜,以爲能勝其任○孟子見齊宣王曰:「爲巨室,則必使工師求

矣。 也。 舍女所學而從我」,則 夫人幼 斤 人 斲 而學之, 而 小 之, 壯 則 何 王 如 而 一怒,以 ? 欲 行之。 勝,平聲。夫,音扶。 爲 不 王曰 勝 其 二姑 任

舍,上聲。

女,音汝,下同

大,而王欲小之也。
之師,故知其爲長也。」姑,且也。言賢人所學者工人也。輔氏曰:「匠人爲衆工人,則工師乃衆工人 巨室,大宫也。工師,匠人之長。匠人,衆

何以異於教玉人彫琢玉哉?」雖,音溢。至於治國家,則曰『姑舍女所學而從我』,則今有璞玉於此,雖萬鎰,必使玉人彫琢之。

謂二十 玉 或 也 璞,玉之在石中 **國** 家 也 語 》云:「二十四兩爲鎰。」《禮》云:「朝一鎰米。」註 則 不 应 輔 徇 敢 兩。 氏曰: 私 自 趙 欲 治 岐 「人唯愛玉、唯恐損之、故不敢自治 而 而 始 者。 誤 不 付之能者,愛之甚也。 註 任賢,是愛國家不 爲二十兩。 鎰、二十兩 玉 也。 人, 愚謂: 玉 如 而 工 愛 治 亦

> 從其 行其 之,則 則當責成於己,遇否則當聽命於天。」 孔孟終身而 也。」〇范氏 必付之能者。 所 雖 所學; 日 好。 治之,乃所以 至於治國家,乃 曰:「古之賢者,常 不遇 而 是 世之庸君,亦常 以 一、蓋 君 害之。 臣 以 相 不任 此耳。」輔氏日 遇,自 是愛國 賢 者 患 患 家 古以 而 賢 人 反 徇 不 者 君 私 爲 如 欲 「德義 不 不 愛 以 能 能 玉 爲

○齊人伐燕、勝之。

閉,遂大勝燕。 大亂。齊因伐之。燕士卒不戰,城門不案《史記》,燕王噲讓國於其相子之,而國

乘,去聲,下同 以 宣王 不 至 萬 一於此。 問 乘之國伐萬 曰:「或 不取,必有天殃。 司謂 乘之國,五 寡 人勿 取,或 旬 取之,何如?」 而 謂 舉之,人力 寡 人取之。

見序説。輔氏曰:「伐燕實湣王事,序説辨之已明。以伐燕爲宣王事,與《史記》諸書不同,已

今此作宣王者,後世傳寫之訛也。」

以

萬

乘之國伐

萬

乘之國,簞

食

壺

一漿,以

迎

王

孟 有行之者,武王是也。 子對日 :「取之而 燕民悦 取之而 則 取之。 燕民 不悦,則 古之人

勿取。

古之人有行之者,文王是也

裹也。」 之絶否 問: 子曰 能處之而無愧哉? 尤嚴,所謂問不容髮之際,非理明義精,德至聖人者,孰 之意,其庶幾乎!」○輔氏曰:「文王、武王,豈有 耶? 日: 天下之心哉? 不 絶,則是君 商 命之絶否,何以知之? 商 期而會者八 紂 「文武之事,與齊之取燕若不同者,而 二、此 至武王十三年,乃伐紂而有天下。 之世,文王三分天下有其二,以服 則 「張子詳 亦 事間 不過察於人情,則又與孟子之言,實相表 臣。 亦順天命 百 矣。 才有 不容髮。 當日命絶, ,武王安得 第深考之,則 而 不敢 豪利心,則失之矣。 人情 違焉耳。 日之間,天命未 則 而 於文武之心、孟 而已。 止 爲獨夫。 而張子之説爲 之哉 孟子引之,何 然其 ??」或 諸 豪利 然 侯 事 張 命 子

火益 師。 明切。」 食、飯 矣。」 節,竹器。 伐 民將轉而 之道 熱,亦運 豈有他 輔 也。 氏 日: 當 望 哉? 愚謂: 運,轉 而 順 救 一趙 已矣。」簞,音丹。 民 於他人矣。 圓 氏 避水火 也。 心 發 簞,方曰笥,飯器也,以 明 言齊若更爲 得 民 也。 人心 心悦 天 食 如 趙 意 音嗣 水 氏白 則 爲 益 暴虐 天 之理 ... 「征 竹爲之。 意 得 則 如 亦

對 未 日 聞 曰:「臣聞七十里爲政於天下者,湯是也。 齊人伐 以 千里畏人者也。 侯 燕,取之。 多謀伐寡 入者, 諸 侯 何以待之?」孟子 將 謀 救 燕。 宣 Ŧ

千 里畏 人,指齊王也

《書》曰:『湯一征,自葛始。』天下信之。 爲 面 後我?』民 而 征 西西 夷 怨 望之,若大旱之望雲霓 南 面 而 征 北 狄 怨。 也。 日 東 歸

時 市 者 雨 降 不 止 民 大悦。 耕 者不變。 《書》 誅 曰:『徯我 其 君 而弔其民,若 后 后來 其

蘇

。] 霓, 五

稽反。

徯,胡禮反

下也 天之正 之未加 來者如此。」此言湯之所以 矣,后來我其復生乎。 蘇 國之民,皆以 也。 雲,陽物 雲合則 之,信其志在救民,不爲暴也。 言湯何爲不先來 兩 今《書》文亦小 息也。 引 徯,待也。 者,則 書》,皆《 也, 雨 蔡氏 陰陽 霓 ···; 虹 怨望其 出 EI: 地 和 湯 見 商 后,君 而 之正 爲 則 「湯師之所往伐者, 來, 既雨,則雲散而 他國之民,皆以湯爲我君,而望 征 書 我 咋 曰『何獨後予』。」霓, 氣。 我 君, 征 也。 之國 仲 愚案:《爾 七十里 雄 一,初征 而 虺》之誥文也。 謂 蘇,復生 也。 待 之 虹,雌 霓見矣。 其 一而爲 也。 雅 蔡氏曰 奚爲後我, 則 來,使己得 * Z 日 謂 待 之霓。 政 也。 天下信 虹 「雲出 我 於天 「湯師 后 也 则 他 動 與 其 久

> 置君 王 之何 水火之中也,簞食 今燕虐其民,王往而 地 父兄 速 侯之心 畏,忌 而 而 齊之取燕,若能 拯 而 其可 而後去之,則猶可及止也。」旄與耄同。 出 肆 齊 不行仁政,是動 ,係累其子弟,毁 救 爲 可 令,反其旄 也。 也。 是以 也? 殘 以 虐 爲政於天下矣。今乃不 係累, 倍 不 天下 則 地 免乎 如 倪, 無 壺 執 并 天下之兵也。 湯 固 征之。 以 一漿,以 止其 以 其 之征 燕 縛 畏 慰 千 宗 也。 齊之彊 而 燕 里 廟,遷 重器,謀 迎 葛,則燕 民 增 民之望,而 而 重器, 王. 以 畏 師 倍 也。 爲 累,力追反 其 人 將 於燕 之 寶器 重器 也 人悦之, 若殺 · 行 仁 今又倍 拯 地 服 己 也。 也 倪 .政 於 其 如

發 虜略之老 反,還也。旄,老人也。倪,小兒也。 而 止之也。 小也。 ○范氏 猶, 日 尚 :「孟子事齊、梁之 也。 及 止,及 其 謂 未 所 五稽反。

能,而舍所學以徇之哉」一 甚好。 法湯 武。 而 君 舍所學以徇之哉?」輔氏曰: 湯武之師,則天討 論 武,則 蓋治民 蓋莫非道也,而堯舜之道 道 德 則 是 不 必 爲 法 也。 稱 亂。 堯 堯 《集註》又益以 舜 句,尤爲有功於學者。 豈 舜, 則 可 則 論 是 謂 「范氏發明 Œ 征 爲 吾 道也; 伐 岢 暴 君 則 可 不 莫 謂 孟 必 行 非 能 此萬世 吾 子 稱 師 師 君不 此 也 湯 而 不 意 幾,上 君

也? 誅,則 三人,而民莫之死也。 鄒 與 鬨 疾 〈魯鬨。 ,胡弄反。 視 其 長上之死 穆公問 勝,平聲。 曰:「吾有司死者三十 誅之,則不 長,上聲。 而 不救,如之何 下同 可 勝誅 則 ; 不 可

臣

字事

君之大法

也

鬨 衆 鬭 不可盡 聲也。 誅也。 穆公, 長 鄒 上,謂 君 也。 有 不可 司 也。 勝 誅 民 怨

其

上

一, 故

疾

視

其

死

而

不

救

也

壑, 壯者散而之四方者, 幾千人矣; 孟 子 對 曰 N 年 饑 歲 君 之民 老 而 弱 轉 君之倉 乎 溝

哉?」輔氏

日

一范

氏

説

得

君

民

相

與

八之義

甚

明

且.

「穆公不能反己,

而猶

欲歸罪

於民,

) 豈不

誤哉』,

辭

意

深

穆公不能反己,猶

欲

歸

罪

於民,豈

不誤

之,如子弟之衛父兄,手

足之捍

頭

目

也。

廩實, 也。 爾者也。』夫民今而後得反之也。 一聲。夫,音扶 曾子曰: 府庫 充, 『戒之戒 有 司 莫以告, 之! 出 是上 乎 君 爾 慢 者 無 而 , 反乎 尤焉 殘 下

及有 轉 飢 司 餓 也 輾 轉 尤,過 而 死 也。 也。 充, 滿 也。 謂

行仁政,斯民親

其上、死其長

矣。」

疾苦。 民。 豐年則斂之,凶 本,本固邦寧。]有倉廩 亦愛之矣。 君不仁而求富,是 故 是以 君行 ○范氏 仁政 民 親 年 了; 則 愛 則散 以 曰 : 其 有 有 上,有 之,恤 府庫,所 司 司 書》曰 知 皆 重 愛其 其 危 斂 以 飢 難 而 民 寒,救 爲 民 則 不 民 赴 惟 知 而 也 救 其 邦 民 恤

厚,最宜詳玩。」

○滕文公問曰:「滕,小國也,間於齊楚。事

齊乎? 事楚乎?」間,去聲。

滕,國名。愚案:滕國在漢沛郡公丘縣東南。

一焉:鑿斯池也,築斯城也,與民守之,效死」孟子對曰:「是謀非吾所能及也。無已,則有

而民弗去,則是可爲也。」

國君死社稷,故致死以守國。至於民亦爲一無已見前篇。一,謂一説也。效,猶致也。

居之也。

詳見下章

僥倖而苟免。輔氏曰:「築城鑿池,致死以守者,守也。○此章言有國者當守義而愛民,不可之死守而不去,則非有以深得其心者不能

僥倖而苟免也。」 夫間於二國,而徒欲擇彊者而事之,以覬一日之安,則是表也。 使民亦爲之死守而不去,則非愛民者不能也。若

何則可?」 〇滕文公問曰:「齊人將築薜,吾甚恐。

如之

相密 薛, 邇。 或 名,近 齊 [取其] 滕。 地而城之,故文公以其 愚案: 薛 國即 漢魯國。 薛 縣 偪 與 滕

而恐也。

岐山之下居焉。非擇而取之,不得已也。郊,孟子對曰:「昔者大王居邠,狄人侵之,去之

與豳同。

邠,地名。言大王非以岐下爲善,擇取而

何哉? 彊爲善而已矣。」夫,音扶。彊,上聲。統,爲可繼也。若夫成功,則天也。君如彼苟爲善,後世子孫必有王者矣。君子創業垂

如 失其地,而 功,則豈 不失其正,令後世 然君子造基業於前,而垂統緒 創,造。 之何, 則 可 統、緒也。 必 但 其後世遂 至乎? 彊 於爲善,使其 一可繼 彼,齊也 言能爲善 有 續 天下,乃 而 行 미 君之 耳。 則 於後,但 繼 如 天 力 若夫成 而 大 理 既 俟 王 也。 命 無 能 雖

世之必興也。」 其所當爲者,彊爲善之事 當爲,不可徼幸於其 於天耳。 〇此章言人君 也。 所 難 僥 倖 但當 必。 於其 輔 竭 所 氏曰:「勉彊 力於 難 必 者 其 期 所 後 於

焉。 我將 其所以養人者害人。 之所欲者,吾土地也。 玉,不得免焉。 得免焉; 或 歸 昔者大王居邠, 市 滕文公問 則不 邠 去之。」去邠,踰梁山 屬,音燭 人曰: 『仁人也,不可失也。』從之者 ·得免焉。 事之以犬馬,不得 티 : 乃屬其耆老而告之曰:『 狄人侵之。事之以皮幣,不 「滕,小 如之何則 二三子何 吾聞之也: 君子不 或 一; 邑 免焉; 可?」孟子 也。 于 岐 患 竭 力 Ш 事之以 乎 以 之下 無 對 狄 君 事 如 以 居 ? 人 珠 大 君

屬 皮, 而 殺人,是以 謂 集 虎、 也 豹、 其所以養 土 麋、 地 本 鹿 生物 之 人者害人也。 皮 以 也 養 人,今争 幣, 帛 邑, 也

> 或 作 邑 也 歸 市, 人衆 而 争先 也

死

去。」 又言或謂 日 世 守 土地乃先人所受而世守之者,非 也, 非 身之所 能 爲 也。 效

勿

己所能 正 或 君 也,正謂 死 社 專。 稷之常 此也 但當 法。 致 死 傳所謂國滅君死之, 守之,不可舍去。 此

請 擇於斯二者。」

義字作 國以圖 能爲。 告之。 文公審己 死 字』。」〇輔氏 彼,皆義 審 能 者,國 己量力,擇而 如大王則避之,不能 經字。 然權非大賢以上不能爲 然則孟子之意, 也。 [君死社稷是 量 存者,權 力, 日: 經 티 : 擇 則 遷 而 義 取 也。 定 處之可 國以 也; 便 固欲文公勉守其常法耳。」〇楊 而 其 近 在文公唯有 圖存者,大王 不 權 守 焉。 可 也 IE. 易 則 如 夫大王 經則 或 。《文集》曰 而 謹 對 可 俟 此二法 權 守 人皆 以 是 一之事 字 死 常 如 説 也。 當 者,義 此 法 勉 故 須 守 或 也,故 文公所 「或請 併 改 正 可 蓋 舉 作 以 也。 而 遷 使 以 俟 經 如 改

乘

輿

君車

也。

駕,駕馬

也。

孟子前喪父,

氏 告之,非 已,禮之正 티 : 「孟子之於文公,始告之以 :得 也。 己 也 至其甚 然 無 大 恐,則以大 王之德 而 效死 王之事 去, 則 而

或不從而

遂至於亡,則又不若效死之爲

氏曰: 愈。 末 可爲者,不 論,自世俗觀之,則 矣。 前 故又請擇於斯二者。」又曰:「孟 不循天理之正者,非聖賢之道也。」輔 「楊氏二條 凡事求可,功求成。 . 過 説盡 如 此 事理,而後條尤有補於世教。」 可 舍 謂 此 無 則 謀矣。 取必於智謀之 必爲儀、秦之 然理之 子所

乎 ? 喪。 出 未 何哉? 知 魯平公將出。 ,則必命有司 所之。 君 禮義 無見焉 君所 由賢 敢請。」公曰: 爲 ! 公日 所之。 嬖人臧倉者請曰:「他日 者出。 輕身以 : 今乘輿已駕 先於匹 而 「諾。」乘,去聲 孟子之後喪踰 「將見孟子。」曰 一夫者,以爲賢 矣,有司 前 君 :

> 應辞也。 後喪母。踰,過也,言其厚母薄父也。

應辭也。

以不往見也。」曰:「何哉君所謂 樂正 踰也,貧富不同 曰:「否。 士,後以大夫,前 曰:「或告寡人曰 子人 謂棺 見, 曰: 槨 也。」人見之見,音現 衣衾之美也 「孟子之後喪踰 以三鼎, 君 奚爲 间 不見 後 以 踰者? 與,平 孟 Ŧi. : 前 非 軻 鼎 喪」,是 與 也 前 所 ? ? 以 謂

遇哉?」爲,去聲。 嬖人有臧倉者沮君,君是以 樂正子見孟 吾之不遇魯侯,天也。 「行或使之,止或尼之。 子,曰:「克告於君 沮,慈吕反。 臧氏之子焉 行止,非人所能 尼,女乙反。 不 果 君爲 來也 能 焉,於虔反 來 使予不 見 也 也

俗之心窺孟子,故孟子以此發之。」 曰:「章旨之説,深得聖賢出處之道。 盛衰。乃天命之所爲,非人力之可及。輔氏 所能爲哉?」〇此章言聖賢之出處,關時運之 處,實關時運之盛衰,然則其所以不遇魯侯者,又豈臧倉 天命存焉,實非是人之所能使所能尼也。 「凡人之行止,須有人使之尼之,故人多歸咎其使尼之 人。然在君子觀之,則其人之所以行所以止者,固 則我之不遇,豈臧倉之所能爲哉? 而非此人所能使,亦非此人所能尼也。 之者。然其所以行所以止,則固有天命, 人之行,必有人使之者。 克,樂正子名。沮、尼,皆止之之意也。言 其止,必有人尼 樂正子亦未免以世 況孟子 輔氏曰: 之出 自 然 有

孟子卷第二

後學 成德 校訂

孟子卷第三

朱子集註 後學趙順 孫纂疏

公孫丑章句上

子也。」

凡九章。

功,可復許乎?」復,扶又反 公孫丑問曰:「夫子當路於齊,管仲、晏子之

○真氏曰:「齊宣王既慕桓、文,而公孫丑復慕管、晏。 意,尚恐孟子不敢以管、晏之功自期,是全未知孟子也。」 也。 以問也。 侯,許,猶期也。 公孫丑,孟子弟子,齊人也。 管仲,齊大夫,名夷吾,相桓公,霸諸 輔氏曰: 「此必是丑初見孟子時 孟子未嘗得政,丑蓋設辭 當路、居要地 事。 觀 其 蓋 語

之事。 輔氏 ☐ :

孟子曰:「子誠齊人也,知管仲、晏子而已矣。 於時俗之見聞 問,則亦不復知有聖賢之事業。 齊人但知其國有二子而已,不復知有聖賢 愐 己 「世衰道微,聖學不明。 此齊人之所以 雖有英才美質,不 但 知 其國之有 人不 知 過 有學

霸者功利之説深入人心,爲日已久,故不惟時君慕之,而

者亦慕之也。」

音增。 管仲孰賢?』曾西艴然不悦,曰:『爾 比予於是?』」覽,子六反。賴,音拂,又音勃。 政,如彼其久也; 予於管仲? 然曰: 『吾先子之所畏也。』曰: 『然則 或問乎曾西曰: 管仲得君,如彼其專 『吾子與子路孰賢?』曾 功烈,如彼其卑也。 也; 何 阚 行 吾 曾,並 .曾 何 子 乎 西 曾 或 比 與 蹵

色也。 之孫。 孟子引曾西與或人問答如此。 蹵,不安貌。先子,曾子也。 曾之言則也。 烈,猶光也。 曾西,曾子 桓公獨 艴,怒

尊子 彊國 子路之才,視管仲誠 故不道管仲之事 御 其見於施 之才,曰: 孰從而返之邪? 議其舍王 譏 用 稱 其仁』稱之。孟子學孔子者也,何其言之異邪? 任 王 ·晏子於齊固無功烈之足言,若管仲者,孔子蓋嘗以 霸術 者 ,不知禮之議 ,稱其攘夷狄 道 管 匡天下,●固有所不逮 而甘 詭 路如 ··, 子 仲 而 也。 四十 處於霸之下者。」楊氏 用霸之罪, 行 遇 路 所指 『千乘 此 爲,如是 霸 則 而 而尊中夏也。 餘 紨 固未嘗略。 固 獲 範 以此防民,商鞅、申不害之流猶以許 而 不 年, 故言 爲不 則 禽 我 一同矣。 羞 之國 人將 耳。 馳 而已。 是專且久也。 比 及 輔 驅 氏 管 功烈之卑也 可可 靡 況世變日 然孔子雖 日 然子路之所學, 曾 然趨 孟子所 一种者 而 也。 曰:「孔子言子 使治 西,仲尼之徒也 不 其 於霸 楊 獲者也; 氏斷置 何哉? 於九合諸侯, 譏,譏其 然則 下,使孟子 稱 其 矣。 其 管仲 賦 功 波 得 則聖人 曾 含 也。」使 而 真 極 流 王道 前 器 管仲 孔子之 譬之 西 氏 滔 不 分明 不復 小之 \Box 推 路 滔 如 知 之 力 而 晏子猶不足爲與?」

多耳。』」 作一人説,則似以子路爲御之善而射未善。 者,故不獲耳。 是之謂也。 禽耳」,則是併與功都説了。 此則是以御 但云子路譬之御者,則範我馳驅者,若管仲 人,不獲又是一人, 詭遇是 曰「子路則範我馳驅 道,其於管仲之事,蓋有所不屑爲者。 人所能兼者。 《集註》之意,蓋謂子路是範我馳驅而 而譬其所爲,未説到功上。 恐不若只從其本説之爲得 管 仲 而不獲者也,管仲之功 則 詭 遇 人,獲禽又是一人。 然案《孟子》, 以 逢 桓 或曰: 公之爲, 今《集 範我 也。」 然射 則 楊 蓋 註 馳 詭 티 : 詭 氏 故 灣 遇 今若 不 御 驅 遇耳 本説 得 遇 是 益 而 非 禽 只 \mp 獲

乎?」子爲之爲,去聲 티 : 管仲,曾 西之所 不爲 也, 而子爲 我 願 之

日 : 日 「管仲以其 ,孟子言也。 君 願 霸,晏子以 望也。

顯 顯 名也。

與,平聲

其

君

顯

管

仲、

0 匡 原 避 宋太祖名諱, 「正」,以下重見,不再出

曰:「以齊王,由反手也。」王,去聲。由猶通。

反手,言易也。輔氏曰:「譬如人自以手反覆,此易

爲耳。」

足法與?」易,去聲,下同。 德,百年 繼之,然 曰:「若是,則 後 而 大 後崩,猶未洽於天下,武王、周 行。 弟 子之惑滋 今言王若易然,則文王 與,平聲。 甚。 且以 文王 不 公 之

商,乃有天下。周公相成王,制禮作樂,然數也。文王三分天下,才有其二,武王克滋,益也。文王九十七而崩,言百年,舉成

後教化大行。

皆賢 武丁朝諸侯有 之君六七作。 曰:「文王何可 丁未久也,其 又有微 人也,相 以子、微 與 故家遺 天下, 天下 當也? 輔 仲、王子比干、箕子、膠鬲 相 歸 猶 俗,流 之,故久而後失之也。 殷 運之掌也。 由湯至于武丁,賢聖 久矣,久 風 善政,猶 則 紂 難 之去 變 有 也 存 武

> 王猶 尺 地 方百 莫 非 里起,是 其 有 也, 以 難 民 也。 莫 非 朝,音 其 臣 潮 也 鬲,音), 然 偂 又 文

音歷。輔相之相,去聲。猶方之猶與由通

當, 也。 甲、太戊、祖 猶 自 敵 武 也。 T 至紂 乙、盤 商 自 凡 庚 成 七 皆 湯 世。 賢聖之君。 至于武 故家, T, 舊臣 中 間 之 起 太

家也。

基,不如待 齊人有言曰:『雖有智慧,不如 鎡 基, 田 時。」今時 器 也。 愚 則易 謂 蓋 然也 耒耜 之屬,或云 乘勢;雖有 鎡,音 大 鋤 也 銊

時,謂耕種之時。

有其 政 夏后、殷、周之盛,地未 有 而 其 (地矣; 王,莫之能禦也。 民 矣。 雞鳴 地 不 狗 改辟 吠 相 辟,與 矣, 聞 有 而 過 民 (闢同 不 千里者 達 改 平 聚 JЦ 矣,行 也 境 而 而 齊 齊

里。今齊已有之,異於文王之百里。又雞此言其勢之易也。三代盛時,王畿不過千

犬之聲 稠 密 也 相 聞 自 國 都 以 至 于 四 境, 言 民 居

悴於虐政,未有甚於此時者也。 且 |王者之不作,未有疏於此時者也, 民之憔 飢者易 爲

食,渴者易爲飲

於紂之猶 年,異於商之賢聖繼作,民苦虐政之甚,異 甚,不待甘美也 此言其時之易 有 善政。 也。 自文、武至此 易爲飲食,言飢渴之 七百 餘

孔子 曰:『德之流行,速於置郵而傳命。』郵,

置,驛也。 引孔子之言如此 郵,馹 也。 所 以 傳 命 也。 孟 子

爲 倒 當今之時,萬乘之國行仁政,民之悦之, 懸也 然。」乘,去聲 故事半古之人, 功必倍之,惟 此 猶 時 解

倒 懸 , 諭困苦也。 所施之事半於古人,而

> ○公孫丑問曰:「夫子加齊之卿 以德行之速,乘時勢之易,此真有所不難 功倍 由 於古人,由 此 霸 王 不異矣。 時 勢 我四十不動 易 而 如 德 此 行 心。」相 也 速 相, 則 也 動 得 行道 愚 心 謂 否

焉,雖 乎?」孟子曰:「否。 得位以 怪矣。 日: 疑,習於世俗之論 以齊王猶反手之説告之矣。 之功,可復以自許否乎? 章乃公孫丑設辭以問孟子,若當要路於齊國,管、晏二子 雖 此 由 承上章,又設問孟子,若得位 「言雖由此 此而 其併以 行道 一,則雖 成 王霸爲言者,丑 而爲霸爲王,不是差異。」○輔 霸王之業,亦不 由 而 此而 不肯 遽捨 成 孟子既言二子之功不足爲,而 霸王之業, 故丑復設辭 也。」任 方聞孟子 足怪 大 是 以問 之説 責 亦 而行道,則 宜 重 孟子,若遂 氏 而 然 H 《語 如 未 而 能 此 不 Ē

霸 王 事 輔氏曰: 「公孫 亦有 丑問孟子「動心否乎」,非 所 大,恐 「任大,謂加齊之卿 恐 孟子擔當不過, 懼 疑 惑 而 動 相 有 其 謂 所 責重,謂 以 心 疑 卿 懼 乎? 相 而 富 人望以霸王之 動 貴 其 動 語 心 其 録 也。」〇 心,謂 Ĭ.

後

能

不

動

似

非

所以言聖人,恐於

《集註》之意,不能

無

小

業。 孫 動 而 動 H. 其 凡 心 正 心 未免此,故以爲問 人氣稟弱 也 況 任 四 大責 + 小 彊 重 而 不 如 仕 知 此 ,蓋疑孟子擔當不去,有所 持養 君 其 心豊 子 者, 道 有 遇 明 事 不 動 便 德 疑 者 立 哉? 惑 恐 之 懼, 疑懼 時 想 公 以

孔子

四

+

而

不惑

´, 亦ァ

不

動心之謂。

或問:「孟

티 :

「李説是也

萬之疑

%過矣。

難

氏問: 謂 惑 知 而 心 孟 非 惑 畏怯,雖當盛位、行大道,亦 子之不動心。」曰 也。 ,不疑則 孔子之不惑 則 言 夫子亦嘗曰 子之不動 道 ,亦其事 之有? 明德立 自 「明則不 大抵 氣 不動矣。」 雖 自 《易》所謂 也。」○輔 人年 心,則 二事 则 则 不 年四 亦 ·疑,立則 何以 動 」萬氏曰: 四 並 如 矣。 德 「盡心知性,無所疑惑,動皆合義, 十,亦是 進 此 + 仕哉。 氏日 不疑其所行者,蓋如 立 以 耐 之謂 而 不懼 而 不動 已。 見 其 「《集註 || || || 孔子之不惑,則道明之謂 思焉,其 沛然行 也。 序 箇 ,然未有 今日 爲聖人之不惑,以 必 大節指, 禮 唯其不惑 以 孔子 》乃是借 其所 終 知 不 四四 言 明 也已。」〇 不惑 , 所以 無 此, 十日 爲 而能 彼以明此 然後 事 先 而孔子之不 使之出 一一一 亦 文 彊。」而 不惑 不 孔 者) 陵陽 能 疑 無所 子 不 何 仕 猶 也 之 不 故 李 動 仕 而 心

> 疑,則 差也。 乃其餘事,斯 知之明 **《集** 註 而 又足以見其 》不惑章又云: 無所事守 道明 矣。」既 「於 德 事 日 立 理 無 非 之當 所 有次第 事 然者, 守 則 也。 皆 不 黄 無 動 氏 所 心

曰:「若是,則夫子過孟賁遠矣。」曰: ,告子先我不動心。」 責,音奔。

可 心,其不動心又先於孟子,以 ○輔氏曰:「告子外義,未爲知道,然未四 足以動其心,不是把捉得定。 爲 未爲 難能,故丑借以贊孟子不動心之難耳。」孟 多力之士, 賁往歸之。 曰:「孟賁血氣之勇,雖非孟子等倫,然時 之勇,丑蓋借之以贊孟子不動心 孟賁,勇士。 知也。」 難 知道 也。 語 乃 録》曰 愚案: 能先 告子,名不害。 孟 賁,齊人,能 我不動 子是義 此觀之,則不 告子不動 心,則 精 生拔 理 一明,天下之物不 心 動 + 4 人莫不以 之難。 此 子言告子 孟 是 時 角。 心 已能 亦 未足爲 硬把定。 賁 秦武 未足 血 輔 賁 不 氣 動 爲 氏 好

曰 : 「不動心 有道乎?」曰 一:「有。

則 麤厲又非告子比,然其心一以必勝爲主,一以不懼爲主, 子之説,本云不動心 故其心亦皆不動。 程子曰:「心 《如黝、舍二子事,皆有窒礙,説不合也。」 所謂數子者,即併下文黝、舍言之。 有主,則能不動矣。」輔氏日 以此觀之,則程子正意可 有道,如數子 ,皆中有所 黝、舍二子,其 見。 主,便 不然, 心 一程 不

夫。 撓,奴效反。 挫於人,若撻之於市朝。 北宫黝之養勇也,不 不受於萬乘之君。 無嚴諸 朝,音潮。 侯。 乘,去聲 惡聲至,必反之。 視刺 膚撓,不目 萬乘之君,若刺 不受於褐寬博 逃 一、思以 黝,伊 糾 反 豪 裼 亦

刺,殺 褐 侯 衣,賤者之服 目 北 毛 逃,目 宫姓 也 也。 布 黝 ,黝名。 被 蓋 愚謂 嚴, 刺 刺 而 也。 畏憚 客 以毳織 轉 膚撓,肌 之流 睛 不受者,不受其挫 也。 逃 輔 布曰褐。 避 膚被 氏曰: 言 也 無 寬博,寬大之 刺 以 可畏憚之諸 挫 而 其言所謂 猶 撓 辱 屈 也。 也 也 一視

> 不 挫,反報之。」 以必勝夫人爲主,故 動 心者也。 輔 無 氏 有 日 尊 貴, 亦 視 以 其言 之 而 如 知之也。 几 上夫,不 ·受其 其 心

能爲必勝哉? 敵 孟施舍之所養勇也,曰:『視不勝猶 而已。」 戰也。 矣。 量 而 心者也。 案?」曰: 孟 此是古註 敵 姓。 後進,慮勝 慮 舍蓋· 語録 舍自言其戰雖 如如 勝 説。 施,發 ₩ E 輔 力戰之士,以 而 孟之反,舟之僑,尹公之他之類。」 氏曰: 後 後 能 而 此 面 無懼 語 後 進 「亦以 孟 只稱舍 施 聲。 戦, 會,是畏三 舍譏别 而已矣。』舍,去聲,下同。 其言而知之也。 則 不 2字可 舍,名也。 無 勝,亦 是 人,舍自 見。 懼 無 軍 爲 勇 問 無 者 主 云我 而 所 **《語** 惟 勝 也 有 則 畏三軍 懼。 其 而 也 會 録 心以 何 能 舍豈 不 ₩ ⊟ 例 無 動 若 量 懼 無 可

勇,未知其孰賢,然 孟 施 舍似曾 子, 北 而 宫 孟施 黝 似 舍守約 子夏。 也。 夫二 子之

懼爲主,故不問其徒之衆寡,我之勝否

遇

敵

則

戰

也。

刺萬乘之君若刺褐夫」而知之也。」以

必勝爲主,而

所似。 何?」曰:「二人勇力之士耳。 L 勇,只要與人關,故子夏之學似之。 明之,非以其 子、子夏,雖非等倫, 取之。曾子之學,只是點檢自身。」故二子之與 日 : 反身,蓋對曾子 身而盡 者,特堅守不變之謂,於反身處未有 「《集註》以子夏爲篤信聖人,至曾子,則以爲明 思之類,便見得他有箇緊要定底意思。」○昭 指,但將其平日所言詳味之,有篤信聖人氣象。」〇 何以言之?」曰: 「此因孟子説處文義推究,亦無事實可 曰:「問:「曾子反求諸己,固有可見處,子夏篤信聖人, 主也。」子夏篤信聖人,曾子反求諸己。 專以必勝於人爲主也。 黝 能 務 「子夏篤信聖人,但看他言語,如博學、篤志、切問、近 不懼,故曾子之學似之。」賢,猶 敵人,舍專守己。 ,則理無不明,行無不慊矣。」黄氏曰: 或問:「孟 (道爲同乎二子也。)○黄氏 而言也。 施舍之於曾子,北宫黝之於子夏 舍專守己,謂舍專以我無所懼 子夏之學,看着聖人篤信而 然論其氣象,則各 孟子特以其氣象之所似 輔氏曰:「黝務敵人,謂 孟施舍之勇,只 以 勝 知 ⊟ : 也。 其 「北宮 盡 武李氏曰: 「子夏未 理。 也。 約 語 、是要 黝之 篤信 若 要 録 有 曾 柰 反 V 而 進 盡 爲 黝

> 也。 黝,所守爲得其要也。」 敵人,則不屈於外, 守,則舍比於黝,爲得其 言論二子之勇,則未知誰 舍專守己, 則無懼 (要也 於我。 輔氏 勝; \exists 是舍之比 論 其 黝 所

惴,之瑞反。 焉,自反而縮,雖千萬人,吾往矣。』好,去聲。 勇於夫子矣:自反而不縮,雖褐寬博,吾不惴 昔者曾子謂子襄曰:『子好勇乎? 吾嘗聞大

爲横者三。 三]。」愚謂: 之吉凶相反,而有横縫之異。 古尚質,故冠之吉凶相 乃一章大指,所繫不可失也。《檀弓》曰:「古者冠 記》多有此字,每與衡字作對,下文直養之說,蓋本於此, 子,孔子也。 此言曾子之勇也。 縮縫,今也衡縫。」愚謂:凡物縮之則直,衡之則横 惴,恐懼之也。 古者以皮束棺, 縮,直也。《文集》曰 似,而 子襄,曾子弟子也。 蓋不用 惟直縫之同。 又曰:「棺 往,往 鐵故 而 也。 :「《儀禮》、《禮 今尚文,故冠 敵之也。 束縮二衡 爲直者二, 夫

孟

心,不得於心,勿求於氣。』不得於心,勿求於

夫志,氣

夫

可

得

聞

[與?」「告子曰:『不得於言,

勿

求

於

則是緣公孫丑反復問難,故又説得如此詳盡。 見己之所以不動心,亦是如 不動心,其原蓋出於此,下文詳之。 知、所可 之自反而以縮不縮爲勇怯 曾子,則曾子之守尤爲得其要也。」○《語録》曰:「孟 得其要耳,非以約爲一物而可守也。 要也。或問:「既以孟施舍爲守約矣,又曰「舍之守氣 言 施舍之守氣,又不如曾子之守約 氣,固未嘗反之於心,以自顧其直與不直也。 氣象,雖大略有似於曾子,然舍之所守,不過是一身之血 就氣上做工夫,曾子就理上做工夫。」○輔氏曰:「論舍之 養勇,然以黝比舍,則舍之守爲得其要。至以舍而 不如曾子之守約」,何也?」曰: 「引曾子謂子襄之言以明不動心之由,在於自反而縮 氣,又不如曾子之反身循理,所守尤得 孟 施舍雖 比 也。 反身,謂自反。 似曾子,然其所守乃一 ,則其所守之要,非舍之所 此其意。至此已足矣,下文 「守約云者,言其所守之 循理,謂 蓋黝、舍皆守氣以 直 也。」 其視曾子 輔氏曰: 孟子之 身之 施舍 比於 以以 其 能

 \Box

過

敢問夫子之不動心,與告子之不動心, 故曰:『持其志、無暴其氣。』」聞與之與、平聲。 之帥也,氣,體之充也。夫志至焉,氣次焉。 氣,可,不得於言,勿求於心,不可。 志之夫,音扶 不相干。 速也。 能堅忍固執,以守其一偏之見,所以學雖不正,而能先孟 於心,而不必更求之於氣 是亦得,不是亦得。」〇又曰:「告子之意,以爲言語之失, 告子説也。 當直求之於言,而不足以動吾 更求其助於氣,此所以 心,於心有所不安,則當力制其心,而 不達,則當舍置其言,而不必反求其 又斷以己意而告之也。 此一節,公孫丑之問。 《語録》曰:「『不得於言,勿求於心』,是心與言 『不得於心,勿求於氣』,是心與氣不 告子只去守箇心得定,都不管外面事,外 蓋其天資 心 古 孟子誦告子之言, 告子謂於言有所 守其心 念慮之失,當直求之 剛 勁 有

而

不

動

之

不

必

相

貫。

此

面

766

理

於

把定 所 後 己有。 平. Ü 子不 抵 古 未必皆氣使之,故勿求於氣,未爲甚失。」○輔氏曰: 求於氣」者,不失其本,則猶可 + 因言之失而 而 F 本 心 言 言 就 以 有 心是本,氣是末。 有 而 居 而 是 而 而 緩於末,猶之可 從事 其心 唯恐 丸臲 别更 仁義之氣,睟然達於外。」此「不得於心,勿求諸氣」, 彼 心 不 . 動 爲「急於本 時 能 先孟 程 F. 心 耐 杌 能 謂 也。」〇 動着 整理 也。 ~ 爲説 能 子 於末也。 不安,則 通 不 動 子不 所 達,乃 自 也。 其心,然心之不正,則未必皆氣使之。 得 謂 他心,故 ,堅持其心,言與氣皆以爲末節 若心有所不安而更求其助於氣, 累 而緩其末,猶之可也」,猶言尚爲可)輔氏 示 動心 於心 其 正失其心之平也。 其所以失也。 此四句,乃告子不動心之法。 若言有所不達 心 故程子亦曰: 『人必有仁義之心 知 日 也。」 也。 雖義理亦皆以 義在 也。 而 「達字與 孟 安字與『於汝安乎』之安同 内」者是 勿 《語録》曰:「「不得於心, 也。」〇又曰:「心之不 子 求 「舍置其言」,謂 既 而 「辭達 諸 反求其理於心 也。 爲 誦 「力制其心」,謂 氣 在外而 而已矣」之達 其 者,急於 此 言 其 而 則是 所 不敢 而 不理 蓋告子 以 置其 斷 則 也。 含其 未 認 「氣 Ė 會。 本 之 同 然 大 勿 四 爲 硬 是 前

而

叮

嘉陳氏 正相 也。 於言 其 遂遺 交相養之説觀之,則勿求於氣之説 其心之病,孟子所以爲 邪遁,言之病也; 子反之,是因其言之或失於外,而遂 得於言 言有不順、理不通達,即是 覺,無以擇乎義之所安,故斷之以『不可」。」〇又 謂 而 之不當,未有不出於心者。 不求 矣。」〇輔 極 有 不 告子乃言不求於心, 而不求於心」,以考其所失,則 反,故於詖淫邪遁之辭 得於 則 所 於 日: 也。 須就 未 内,其 志 「言上有病,便是他心上有 是 氏日 盡之詞 言 心 見見 古 E 而 蔽陷 心之所之,而 不可 理 可 「言,心聲 白會。 不 哉? 離 知言。」然凡 耳 求 也 此是 窮, 心 心有 諸 故曰 而 必 而 輔 心之病 正 也 他不 知 心, 日 氏曰 愐 不順 矣。 其 雖 其所受病之處。 『勿求於心』,則 明 ル也。 爲 尚 知 發 則 E 不 遺 則 其 言 理 於 未爲 病, 可 氣之將 既 「以下文氣志 語 其 可 言 中 處。 不 П 因 也 録 所 當 頑 者 無 失 通 而 盡善。」若 其言之病,知 必 ₩ ⊟ : 以 反求諸 然 孟 不 達 於 亦 矣」。」〇 實 然者 子 達 處 而 帥 出 曰 : 外, 二不 與 蓋 矣。 也。 有 無 僅 於心 貴於 詖 告 於 所 心 所 言言 論 口 而 永 告 不 得 淫 子 可 内 不 知

<u>티</u> 緩。 Œ 是 極 有質,雖 本末,交相 守其志,然亦不 亦 餒乏者,實賴氣爲志之卒徒也。 下文又言『是氣也而反動其心』,亦可見矣。 而 卒徒之聽命於將帥 也。 「志至氣次,只是先後。 大抵是氣隨 氣 致其功 有所之處,志即心也。 ,其於存養之功 由 亦 「持志所以 箇 志至焉 而 將 輔 人之所 帥 緩急底意思。 氣 云心爲本,氣爲末, 氏曰: 而 而 即 則 心 無 無 動。 培 次 卒 直其内也,無暴其氣所以 「心有知而氣無知,雖云氣壹則能動 所偏廢焉 (氣便在這裏,是氣亦至了。」○又曰: 以 ,且將無 徒, 養。 之。 也。 充 故以 可 則 志雖爲至,然氣亦次之。」〇又曰 滿 志至此, 《語 不 不言心而言志者,志者,心之動 或問: 亦 (志爲氣之將帥,氣從志所 則 但志則就其動處言,故尤切 於身, 致 虚名而 然人之所以充滿其身而 息之不存矣。」○《語録 録》曰: 志 養其氣。 正 ,氣亦隨之。」人固當 持 志而無氣,則志無所使, 而氣自完,氣完而 已。 而 志養 「志最緊,氣亦不 爲 故 防於外也,兩者 志之卒徒 氣之爲交養。 志 蓋其 心無形 古 内 爲 使,猶 志,然 $\stackrel{>}{\boxminus}$ 志 而 不 一只 耳。 外 敬 至 者 益 口 至 氣

> 以未嘗 而不動者, 殆不可同年而語 見於此。 子養氣,後面更有許多説話在,然其不動心之大略,則 養故 可。 氣。 工夫兩下皆要到,然後言順氣平,而其心自然不動。 上亦不可無工夫。 末貴乎交相培養。 輔氏曰: 無正志助長之病,方得其養 無如敬以直内」也。 下皆不可不理會。 工夫。」○輔氏曰:「志與氣雖有緩急,而實不争 志是最要緊,氣亦不可 也。 守即持也,敬 故程子 其視告子外義而不顧言悖 「言與心雖有内外,心與氣雖有本末,而 必其不 必言致者,見養氣之難,須是以集義爲本,而 謂 前 氣者在志,養志者在直內,切要之道 則主一而 故程子有言: 故人當敬守其志,而又不可不致養其 孟子雖不及言上工夫,然朱子嘗謂 動,而 養即無暴也,凡氣發得暴者,皆失其 緩。 矣。 也。」此 無適也,欲持守其志,非敬不 自 持其 然不 「發禁躁妄,内斯静專。」 志無暴其氣,是 而氣麤,硬守定其 則孟子之心 動之大略 多,則 内外 兩 也。 邊 所 孟 具 本 做 兩

動志也。 其 既 氣』者,何也?」曰:「志壹 曰『志至焉, 今夫蹶者趨者,是氣 氣次焉」,又曰 則 ||清 也, 動 其 氣 而 志 反 氣 動 壹 無 其 則 暴

心

志。」如: 爲 則 躓 説得輕了。 動志? 志,若志專 分得好,但 者言也。 與一字同。 壹 必 録》曰:「公孫丑疑只就志理 專持其志 孟子之言, 公孫丑見孟子言志至 更問氣也。 輔氏曰: 之動 也。 専 氣 固 人顛躓 故蹶者趨者,反動其心,此却説得 若成 趨,走也。 從之; 在 説 也 至第二説,以爲志專 亦漫聽之而已,必不能 「此見丑之有志於學也。 《語録》曰: 淫解 可矣,又言無暴其 動氣,則 故又問曰:『持其志,無暴其氣,何也?』 德者,志已堅 動氣 輔 趨走,則氣 然氣之所 ,則豈不動氣? 氏曰: 則 (動志; 孟子言志之所向專 便動 「氣若併 此 定, 一會。 志, 而 本程 則 在 動 氣次,故問 理會得志,氣自隨之,不 專在是而 在 氣不 動志 志,則動 専 則動 氣專在喜怒,亦豈 子説 如是 使其 氣 處,自然引動 一,則志亦 能 則 但 氣,氣專一 問 無志于學,則間 動。 何也? 好。 氣,此 便動氣,亦 之反覆 其 反 説 志 如 蹶,顛 爲養 末 以 動 此 則 也。」 後 爲 《語 其 反 着 則 不 動 太 雖 氣 膏

> 是要以志爲主,工夫須多在志上 説。」曰:「此言其多少之分也。 是心; 是不可 求於氣之云者,而不盡善之,於此亦可見矣。」○輔氏 動氣者什九,氣動志者什一。」或問:「程子之 持其志,而又必無暴其氣也。 氏曰:「志者,心之所之,故可言『向』。氣則做出來底,便 奔走而來,偶喫一跌,其氣必逆而心不定,是氣之能動其 可支吾之際,所以易動得心。1曰: 『是。」」〇又曰: 「今人 堅定,莫須蹶 「什九、什一,所以極言其多與少耳。 心,人之奔走,如何心不動得?』曰 焉。 「志動氣者多,氣動志者少,雖氣亦能 如人於忙急之中,理會甚事,亦是氣未定也。」〇輔 及其蹶趨,則是氣也。 以向言,只得下『在』字。 《語録》 趨,亦 Ĕ E 不 問 能 動得否?』曰 「蹶 此其察理精矣。」所 趨 而孟子所以猶有取於勿 如蹶 反 方可。 動 「蹶趨多遇於猝然 者 所以如 其 程子曰:「志 趨 「蹶 心,若 動志,然亦在 故 2者,要 程子 趨 此説者,只 自是 是 如 又 志 以既 此 有 動 養 曰 者 持 説 其 得

心

浩然之氣。」惡,平聲 敢問夫子惡乎長?」曰: 「我知言,我善養吾

其志而已。こ

曰 :

也。 然 所以然邪? 聲也,一 之事 公孫 體之充者,泛言之耳。 流 蔽陷離窮之病 其 盡 氣 曰:「盡心,知至也。 未知孟子之所以 如)輔氏曰: 氣之本 理 此 失養故 行之貌 心 而人之所以充滿其身者。 過于吾前者,其理皆軒 《文集》曰:「浩然之氣,乃指其 知 其故也。 者 丑. 接乎耳,則豈不 圃 「, 有 體 性 復 識 「盛大,言其體。 一,於 言有是非得失, 問 餒 何 オ 其 則言有詖 氣,即 孟 鬱塞 得, 《語録》 所 凡 是 惟 子之不 知性,物格也。 故 非 天 長 然亦 孟 則 問焉, 所 能 得 下之言,無 而 淫邪遁之失矣。」浩然,盛 便 子 究極其 豁呈 非 謂 能 流行,言其用。 ,而所以然者,則心也。 失之所以 非 其本然之體用,自是浩然, 外 爲 「公孫丑既知告子之失,而 動 而 體 氣之本 然, 露, 此 孟子告之。」知言者 善 之充者。 理 心 而 無 物格知至,則凡天下 養之以 本來體段 耐 而 所 别 所遁情。 用 識 不有 有 孟 以 其是非 然 浩 才怯小,則 子 異 氣即 然之氣 也。 復 本 以 又 於 耐 況言,心 天 得失之 言 其. 自 詳 告 究 地 心 輔 也。 大 浩 極 告 初 子 之 便 謂 有 氏

猛果決 蚍蜉 不 無所 理 以 擒者,特幸而已。」○輔氏曰: 中,而熊虎貔貅百萬之衆,又皆望其 任而 正 節 告子之不動心,正猶勇夫悍卒,初無制 之赴湯蹈火,有 之不動心,知言以開其前, 義,而於天下之事 於天下之事無所疑; 而 由 該體 應之,夫復何疑之有? 成浩然也。」蓋 失其養,故餒乏而 顧 相 懾。 疑惑,恐 蟻子之援, 而 反。 不動心也。 而不留行,夫復何懼之有? 用 已爾 也。 如智勇之將,勝敗之形,得失之算,已 其不 懼,等字 知言則於 徒 死無 惟 特其 輔氏曰: . 動 二,是以千里轉戰 不充乎體 知 或問: 也。 (勇而 心, 言 道 無 故無 養氣 義究極 道 「孟子能知人言之是非,告 挺身 殆亦 所懼 養 則 「疑、懼 「知言養氣之説。」曰 唯 體 灬所疑; 氣 有 以 則 也。 孟 冥然 一告子之學 無 於道 赴 以 子 餘, 旌 此 則 二字,以應此 義 勝 敵 養氣以培其後,故 善養之,故 明夫道義 , 所 麾,聽 其 有 義 也 料敵之謀,又 無覺,悍 用 向 事 貼 所 以 其不爲 也。 無 來, 其 襯 以 配 前 判然於胸 得 金鼓,爲 孟 則 言 章第 復 夫 當 與 起,勇 人所 其 以 道 其 然 此 大 道 而 視 無 初

扞格 氣爲 者,亦幸 是 乃 硬 自 紀定 末 以 而 不 而 其言爲外 耐 顧 其心 不知求。 耳。 ,冥冥然都 而 亦 此 不復 岢 所 能 考。 謂 終不動 無 IF. 知 孟 相 覺 反 子 哉 於 也 善 養 其 切 其 然 氣 其 事 不 皆 動 所 而 漠 心 以 告子 者,不 然 能 與 乃 不 動 之 過 以

雖

而

敢問何謂浩然之氣?」曰:「 此 之可驗 獨得,謂非人所與知。 志 形聲之驗,有未易以言語形 孟子先言知言而丑先問氣者,承上文方 氣 而 ,則言語誠 言也。 則 孟子之實有是氣可知矣。」 有未易形容者矣。 難言者,蓋 有形有聲,則 其 有可指之驗,惟無形 難言也 容 心 故程子曰 者。 所獨 愚謂: 得, 而 心 觀 論 無 聲 所

其 爲 氣也,至大 至 剛 以以 直 養 而 無害,則 塞 干

天地之間

「直字斷 IE. 至大初 語録 氣, 句 而 無 則養字全無骨 人 問 限 得 量 《集註 以 工, 至 生 剛 者, 》於剛字下點句, 肋 不 ,只是自 其 可 屈 體 撓。 反而 段 本 縮,是以 何也?」 蓋 如 天 是 地 直 也。 \Box 之

更無 所作 物不能 剛不可 爲之害 矣。 所作 人固 是用 以生,然須是所 之矣。」惟其 指言氣之本相 不滿不足之意,則非塞矣。」〇輔氏曰 是流行,即 此但言其盛者耳。 大至剛者,乃氣之本體如 量』者,謂 有清 無 則 有爲之間隔者矣。」程子曰:「天人一 是稟天地之正 功 害 《語録》曰:「充塞,是遍滿之意。」〇又曰 爲以害之,則其 濁厚 處。 沮 屈撓」者,謂 也。 則 乃爲得 抑 充塞宇宙 是氣 所謂 之也。 薄之不齊, 「塞乎天地之間」,乃其效 (自反 至 也 之體始 爲 浩 其 大 凡 至剛 所 然之氣 其 氣以 **三堅勁** 初無限 此 而縮 養 而 事 乃「天地 一體段 無有 爲 合義, 然論其 果 生,然其 無 此。」〇 也。 而 則 氣之本 決,雖 (本體 量 本如 所 邊表之處,窮 又 自 便是 虧 無所 不 之正 本, 得 反 是)輔氏 欠 一言用 間 金 也。 不 其 而 則 作 盛 」者、孟 亦 石 而 氣 未嘗異 直 虧 所養 曰:「至大初 爲 者 大。 也。」〇又 「以 不 亦 充塞乎天地之中 「人雖是稟得 而 , 如 仰 能 品盡之時 而 舉 透過,舉天下 子以 人得以 直 不 無盛 無 充 ; IE. 體 也 所 可 忘 則 塞 而 至大至 而 也, 愧 有 屈 衰之異 回 : 也。 足以 生 助 所 無 無 又 撓, 長 俯 此 無 謂 害 更 間 無 IJ 豪 便 無 該 至 限 至

意。 餒, 不 義 也 地 罪,便覺沮屈 箇氣無欠闕,所以曰 害 且. 無處不透。 不 足以 而 之正氣,然天人一 一以麤言之,如 「,則 分别。 養 知 氣自流通不息,一 所爲 充乎 而 其 寒 無 乎 是 小 害,則 身,而 有 去不得 浩 夫 他氣剛,雖 也 私 項 然之] ° | 《語: 地 意 全 羽, 失 理 遮隔 也。」〇輔 得 其 天人一 ; 爲私意所遮隔 故 盛 其 氣, 箇 録》曰: 金石也透過去。 了, 大之體 本體,而 孟子更不分别,直以爲己之氣 爲 意 也。」〇又曰: 則 私 乃 氏 氣 便 \Box 如 意 吾 「天地之氣 也。 不 塞乎天地,若不 此 所 流行, 氣 浩然之氣 纔 ,則便 謝 蔽 也 被 人便 蔽 則 氏 面 上去不 漢 飲然餒 無 曰 王 是稟 養 是 欿 處 本 數 遮 得 而 不 然 ·是天 務 其 隔 得 乏, 到 浩 無 集 而 + 今 之 這

其 爲 西己 者,合而 氣也],配 有 義 與道; 助之義。 無 **《**語 是, 録》 餒 日 也 問 餒 奴 配 罪 字 反。 從

憚

若

無

此

氣

則

其

時

所

爲

雖未

必

不

出

乎

義

道

而

爲

之

助

使

其行

之勇

決

無

所

疑

然是無

虧

欠時

輔氏

曰:「心得其

Œ

,如《大學》所

氣之盛

大流行者自可

見

故

人當於

此

際體

認

取

盛

大流

行,則其氣方始

無所虧欠也

謂

Œ

心。

無四

者之累,

則

心

始

得其

正

矣。

心

得

其

IE.

一,則

然之氣

,須於心

得

其

IE.

時

識

取

又

日

浩

之能 然。 好。 單,得 子謂 體虚乏而不充也。」一言 充 節 切 出來,故朱子用此意,而 又曰『氣與 有合於道義者 他。」〇輔氏曰:「此意本於李先生曰 意。二〇又曰: 助 前 制之用。 矣。」義者,人心 只訓 但 體 襯 斷 孟子分明説配 養得 這氣襯貼起來,便 也 制者 語録》 貼二字 作合,今以助意釋之,有據否?』 道 那 所 道 輔 Ď 義 氣充不餒, 説 者,人事 氏 用 ,若無此 「如有 配字極 티 : 以 兖 道則是物我公共自然之理 義與 處 出 之裁 正將,又立箇副 人能 餒 當 此 氣 又就 視切。 道 來』,朱子 自張大,無 理者也。」〇又曰: 方合得 然之理。」 如 不是 則 人之不 養 制 配字説 八只是 兩 蓋 成 那 謂 物 道 餒 所不達 此 食 道 道 出 義 相 將以 箇 配 義 而 者, 此 是 補 氣 Ē 兖 衰 飢 是 飢 句,蓋已極 貼 虚 出 配 所 底 機貼 底物 則 乏 天 他 非 餒 「義者,人心 只 來 以 今人做 義 乃 便 而 理 是 説 説 其 起 謂 覺 則 得 李 本 來」, 所 有 配 氣 氣 於精 吾 先 得 兖 道 自 以 助 事 便 合 不 其 理 生 亦 孤 助 之 是

於道義, 而 不 足以 然 其 有 體 爲 有 矣。 所 不充 或問: 則 「何以言氣之配 亦 不 免於 義 疑 與 於心, 外 之也。

懼

之餒 漫蕭索 理 者 道 有以害之,則 殊,然其渾 也,又因 人言之,則 也。 ,然後有是氣,而理之所以行,又必因氣以爲質 也?」曰: 矣。 而不能 氣也者,器也,形而下者也。 是 或 合 氣 必 略 道,體 理 र्ता 明 丽 以 知 自 後得 無 道 道 自振矣。」○《語録 理 間 集 義之爲貴,而 也。 以 義 也 ,氣自氣,其 乃 行 義,用也。 然後能 如 焉。 此 蓋三者 生 欲 浩然而 苟爲不 **ĕ** ∃ : 浩然之氣 恃之而 二者皆理 以本體言之,則 雖 知 充 「謂養成浩然之 有上下體 者,且 有 所 以 為,亦 也,形 而 養馬 一爲慊 義 也 用 與 且 有 耐 然 丽 之 散 道 以 是 L.

平. 安能 氣 時 以 不養得此氣,自衰颯了,合當做底事,也 有爲。」〇又曰: 配 道 義,方襯 貼得起。 「將這氣去助道義,方能 不然,雖 有 道 義 畏縮 行得 ,其氣懾 不敢 去。 怯 若 去

做。 動 合下無工夫。]〇輔氏曰: 着 如朝 知 他是小人,不敢去他,只是我這 廷欲去這小人,我道理直了,有甚怕 「氣合乎道義而爲之助,便是 氣自如 他! 此 便 不 是 敢

是 義 所生者,非義襲而取之也。 行有不 慊

兖出

來之意

則 一一一般。 慊,口簟反,又口刼 我故曰,告子 反 未嘗 知義

其

義,勇 拏而 集義, 愧,俯不怍。」〇輔氏日 有些子不合道理, 俯仰無所愧怍矣。」〇 要合宜,自然積得多。」〇又曰:「只是無 《文集》曰: 直,是以無所愧怍,而 義,而其養之之始,乃 而行,有積習工夫者也。」〇又曰: 行得一件事合義,便將來壯吾 兵之襲,有襲奪之意,如掩人不備 掩 而已矣。」〇輔氏曰:「集謂積集於此,不 語 取 録 來,夫是之謂襲。」〇又曰:「襲 而爲之,以襲取其氣也。」言氣 也, \ \ : 猶言 此 如齊侯襲莒之襲。 「集義是平時積累工夫。」〇又曰: 氣乃集 積 心 善 下 《語 、義而 便不 蓋 氣 録》日 生。 足。 欲 雖 此 由 氣。 事 可 事 事 氣 纔 事 以 皆 而攻襲之者。 「猶日 事 以爲浩然之氣 自 事 皆合義 **《語** 如 配道 事都 合義 雖 皆 事 刼 然 合 録 寨相 可 合於 於), 則 發 要合道理。 ÿ ⊟ 道 以 事 而 生 使之張大 理 似, 胸中浩 「只是件件 事一 足。」 自 不求箇是 配 一於中。 ,便仰不 義 非 謂 襲 可 反 乎 行之 襲, 順 以 如 如 也 常 道 理 攫 總 用

慊,快 是行 病 能 乃 充矣。」然則 直,便自不足於心。 積。 所 於 此 之功,襲取是一 浩然之氣自然發生於中也 所 無所 謂 義 甚 要切 爲事 所 義 ,蓋不知心之慊處,即是義之所安, 日 集 不充矣。 便便 若所行 調嫌 事合宜,便可 不 二件 義 一, 而 達 事合義, 也 可 説 以 者 内 然其 一, 足 得生字 掩 自 合義 生浩 ,則銜 義 義 有不合於義 襲 反 輔 自 朝 養之之始, 也 外 岢. 底 氏 不 其 掩 於 反 分明。」非 事 然之氣矣。 ·, 而 在 才有不足於心,則氣之體便 Ð: 快與 取 而 夕之事,從而 直 外 輔氏 能搏 其 常 外 不復以 而 「氣是集衆義而生,故不 足 氣以 直 則 則在 哉 E 取浩然之氣 也。」言 得 則 所謂「自然發 不 由 則 ? 歸於己也。」〇又曰: 之也。 「慊是 自 仰 乎 -足於 只行 反 集義 無 《文集 義 告子 掩取,終非 便 所 所 心有 其不慊 爲 不 也。 以生之。 愧 心 行 直。 事 不 $\stackrel{>}{\exists}$ 所 語 生於中二 事 俯 而 集義 銜 録 知 處,即是不 無 自 有 Ë 則 偶 其 之義。 **₩** 「告子之 所 此 若 有 反 有 是 合於 必 體 不 作 所不 既 可 我之 理, 也。 歲 不 句, 不 有 合 不 不 非 而 月 而

> 何自 意也。」詳見《告子》上篇 求於心, 義,則當舍置其所言 之而不 即 事,只就心上理會 也。 心,故雖義,亦以爲在外,而不敢認 去,只就心上理會。」」〇輔 充,則義之不在外也明矣。 不合於義 合於義。 外 義 而 義 求 能 , 外 則是因言之失而 之意 故直以義爲外 生哉?上文「不得於言勿求 ,非欲求之於外也。』曰: 也,非 則 自反便不 《語録》曰:「問: 内 則是全然不知此理 也一直 而别更爲説。 直 而不求。」〇輔 自 氏 是將義 心之理便不 今告子乃曰 日: 「 累 其 心。 告子謂言 「外義之意,蓋告子外 『告子直 屏 爲 若言 己 除 平 氏 矣。 足, 有 己 去,更不 日 : 居 有 唯 所 是將 浩然之氣將 此 氣之體 有 「所 内 即 恐 不 於 所 也, 復 外 動 得 義 不 行 心, 義之 非 着 以 得 屏 便 而 有 他 反 於 除 爲 外 不

助苗 芒然 矣。」其子 宋人然: 必 有 長者 歸。 事 焉 宋 寡矣。 趨 謂 而 人有閔其苗之不 而 其 勿 往視之,苗則 人日 正,心勿忘,勿 以爲 無益 一今日 而舍之者,不耘苗 、稿矣。 病 長 助 矣,予 而 長 揠之者, 天下之不 也 助 苗 無 長 芒 若

害之。」長,上聲。揠,烏八反。舍,上聲。者也,助之長者,揠苗者也。非徒無益,而又

言師出 也。 不正 티 : 句。 心 自 義 用 義也。」○黄氏 蓋必之之意。古人言正字,皆謂 臾之有事。 必有事焉,有 必 戰 力之地,乃言須當 則 不 亦 「正者,等待期望之意。」○《語録》曰:「正則有 不 反,戰不正勝。」此正字與孟子説正心之正 有事焉 謂 同 近 同 Œ 不可必期其反,戰不可必期其勝 Ė 無 心,謂 也 世 ※ 忿 懥 勝」是 此 或 《文集》曰 曰:「猶言必 而勿正」,趙氏、程子以七字 勿以其 輔氏曰:「正,謂 與《大學》之所謂 恐 并 所事也、《語録》曰:「有所事,只是 懼 也。 下文「心」字讀之者 用力 心預期之也。 好 語 樂、 也。 「如言 有所作爲。」如 憂 録》日 ĪĒ. 患四 預期 必也。」《春秋傳》 有 事於顓臾之類,非 也。 預 者之累 若《大學》之所 「《公羊傳》云: 正 也。」如作正 期 勿 心者,語 有 也 ΙË 而 謂 心 事於顓 一般。 亦 《文集 體 勿 所 自 謂 預 通 「師 $\check{\boxminus}$ 待 爲 意 心 彼 得 期 正 是 集

可用 也。 不得 待也。 所以集義之節度,則又當如是也。」閔,憂也。 至於充盛 以集義爲事,或心生而未熟,或 則必出於私意,有 義爲 其 疲倦也。 以集義爲事也。 目,不要等待,不要催促。」〇輔氏曰:「必有事焉者,謂 言必有事者,是養氣之法度也。」○又曰:「是集義中小 〇又曰: 物之來,自有以應之,不可萌期待之心。 乃集 當勿忘 江耳。 意作爲,以 而拔之使長也。 芒芒,無知之貌。 義 事 勿忘者,勿忘其以集義爲 「集義是養氣之丹頭,必有事,是集義之大法 其 則 小, 而 養氣之節 其所有 語 舍之不耘者,忘其所有 但 意固 勿 助 當勿 勿預期其效者,謂 預期 氣之長 所作爲而逆其天理矣。 不同 事 忘其 言人能 度 也。」此言養 其 也。 而 所集義之事 也。 不可 效。 集義以養其浩然之氣,故 其人,家人也。 夫養氣 集義 事 語 作 其 也。 勿 而 録 也。 古 Œ 爲 或 未多,氣雖 氣者,必 \Box 在 也。 少間待之不得 助長者,是待之 以 未 是助之長也。」 於集 勿助 事。 「勿正 充,則 助 勿忘, 握,拔 長 其長, 生而 揠 者,勿 以 病, 然其 謂 謂 而 但 集 不 節 未 雖 必

不

可詳

考,

然即

其

以

義

3爲外

而

彊

制

其

心,與

辯

論

則

自

義 딩 : 者 害。 然不 心 理會言之得失,事之是非,氣之有平不平,只是硬 則 害之矣。」如告子不能 免於正助之病,其於所謂浩然者,蓋不惟不善養,而又反 子而言也。 將 不忘其所事 之長,則氣反被害,將如 之而不得,乃妄意作爲以助氣之長者也。 之而不耘者,是忘其 助之長 不期 ,則氣失其養,不能發生 一者,則 蓋不惟 必不 使不動, 養氣 如此 勿忘、勿助長,又是那集義底節 耘 然而 則失 能 者, 則 一章在不動心,不動 氣 然矣。 恰如説打硬脩行 蓋告子不能 免於 日引月長 則 不善養,而 得 氣得 正之不 養 其 夫其 而 正 其 集義之事者也。 養 E 而充塞天地之體,沛然流行之用 助 養。 集義, (所謂 苗之槁死而後已也。 而 得, 集 之 而已。 無 揠 勿正 揠 病。 義, 又反害之矣。 而 般。」○愚謂: 心在 所 則 而 則 欲彊 而 害 至於妄有作爲 反 妄 而欲彊 度。 反以害之者 不 其 勇,勇在氣, 矣。 制其 以 有 妄作爲 助之長者,是預期 八於所 若告子,則 害之。 作 然忘其 心,則必 輔氏曰 告子之事雖 爲 制 則 謂 苟 《語録 其 者 Ē 氣 集義之 制 氣 集 以 浩 無 運不 在 指 無所 義 壓 心, 不 助 也 含 然 是 氣 那 集 能 告 而

其心 所陷 復起,必從吾言矣。」誠,彼寄反。 何謂知言?」曰 大流行之體 執己私 邪 ,害於其政; ,屢變其説 解知 ,亦已多矣。 其 所 展 發於其政,害於其 離 「詖辭 轉 求 遁 勝 知 辭 即 其 其所蔽, 知 狹 復,扶又反 其 陃 所 蔽 固 事 窮 淫 有 辭 害 生 知 於 於 其

去。」①遁 僻 氏曰: 也。 説愛無差等,却又説 斜。1〇又曰: 此 淫,放蕩也。 「凡從皮,皆是一 也 公孫丑復問 《語録》曰: 「放蕩,謂 輔 逃 氏 「如楊氏爲我,墨 避 邊意,如跛 無 「詖,是 語 也 檢 施 邪 録 而 由 説得 僻, ĕ ∃ : **《**語 孟子答之也。 説得 親 謂 始 是脚 録 漸 「淫 不 次夸張泛濫 邊長, 日 楊 E 者説 氏 朱不 兼愛,各只 長 説 得周 遁 得 一短,坡是 肯 邊 如 遮浩 拔 短。」〇 去。」邪 墨 向 詖, 者 喎 見 毛 瀚。」〇 夷之, 邪 以 邊。 Ш 又曰 偏 利 乖 邪 陂 他 邊

^{●「}向」,原誤爲「句」,四庫本同誤。今據四庫薈要本改。

爲

成

却

了 間 也

於理 了。 管説得闊了。 叛,愈去愈遠。」窮,困 言形於外,故以病言。」 被 放蕩則必邪 則天下利矣。 四者相因,言之病也。 遁了。」○輔氏曰: 下,又遁 物 īĖ , 只見 只是偏了。 所 「陷 事 説 有不通 路 離 蔽, 以 畢 語 遂與 ,只見 叛 是 處 自 録 邊。 竟用不得 身 却説 僻 遁。二〇又曰: 前 $\stackrel{>}{\exists}$ 去 Œ 溺 一邊,不見一邊。」陷,沉溺 支蔓淫 所 困躓 如 邪 初間 路 天下非 也。 在 以偏者,止 佛氏,他本無父母,却説父母經,這 問 相 僻則必 逃 那 鬱 是 ,其説 離 溢,纔 屈。」 裏,如 輔 如 避謂走閃,説得皆成回互走作去。」 了。 拔一 四四 屈 氏 此,後 逃 必 四 者相 也。 日 : 毛 恁地陷入深了。 陷 既離 有 緣他蔽了 避,四 遮 至於窮。 者 所能 輔氏 溺 來只管陷 則四 「叛去,謂其 隔 因之説。」日 亦 去了 輔 於水,只見 者 氏曰: 也。 日 利,若人人不拔 相 者 相 爲是 正 因 偏陂 俱 邊, 大 路 《語録 人 則 有, 他 裏 困 皆 也。 於是 他 如 心 水 一「詖 屈 則 説 面 言之病 其序 那 被 而 與 心之失 **∀** 去, 窮了,又 必 謂 物 有 三語 不 Œ 解, 放蕩 自 向 漸 事 物 其 理 見 毛, 是 一心 録 也 如 不 背 初 只 隔 心 違 岸 他 者,何 也。 如 而 必 而

 \Box

有

害於政 其孰 於欲。 其言之病而知其心之失,是即其用 其心之窮屈於義理也。」即 之失,又知其害於政 之偏詖者,由其心之蔽於理。 此。」○輔氏日 人之有言皆本於心。 言之四病與心之四失表裏又相因也。 不然,則必有是四者之病矣。 言。」人之有言,皆本於心。 無蔽 困屈 此。 無 非 能如是哉。 能之。 蔽,然後其言平正 心與 事之決 辭之邪僻 則 ,四者亦 非心通 陷離窮之三失皆無之矣。」〇永嘉 理 然 輔氏曰:「此言孟子之所以 相 遊 者, ,其於天下之事 而 不然,則 因, 不 於道,而 隔 由 ·可易 蔽則心之初失也。 則心之失也。 則 其心之離於道。 必沈溺,沈溺 知其 者 事之決然而 其言之病 如 辭之淫放者,由 (用者 通 無 此, 如 達 而 疑 或不 燭 是 其 知 心 而 於天下之理 照 則必 輔 據 言,心 其 心 存 辭 知 數 而 無 其 氏曰: 其 體 能 之逃遁 其 於 明 叛去,叛 陳氏 不 計 始 也。 知言 心 病 中, 體 聲 明乎 其 乎 愐 可 知 , 見 也 \Box 無 知 故以 又 也 心之陷 此又言 湯者 其 者, 故故 苟 正 其 所 其 知 Œ 去 心 始 爲 理 終 大 疑 其 由 失 則 理 日

直。 謂不 哉 ? 衆人之上,則亦安能辨衆人之曲 之不差,蓋不待求而 般,如何解辨得他?」〇輔氏 辨決矣。」《語録》曰:「程子只言高如衆人了,便見得 以 不肯 是言見識 子知言,正如 曰:「心通 足以知夫道之實也。 於四者之病,其 者或不見其終者有矣。」彼告子者,不得於言而 所謂在堂上者,莫只是喻那心通於道者否?」曰: ,則其於天下是非得失,真如 較 動 (輕重,孟子所謂 若猶未免雜於堂下衆人之中,則 與人一般低 求之於心; 輔氏曰:「此言告子之學,離本末,隳内外,而不 心,殆 高似他, 乎道,然後能辨是非,如 亦 冥然不覺,悍然不顧 人在堂上,方能 方能辨 立在堂下,如何辨得人長短。」○問 知、思而 何以知天下之言而 既不能知天下之言而無所疑 至爲義外之説,則 他 知言是也。」又曰 是非 得 曰:「心通乎道,謂 持權衡於此 也。 直邪? 得失。 至於見識 而已矣。」程 辨堂下 若 非 親到 見 而 識 持 輕 不 無 自 孟 超 與 重 心 不 權 所 「此只 测則 不 孟 子 分 出 與 他 能 Ш 子 免 衡 疑 理 地 於 豪 所

然則夫子既聖矣乎?」行,去聲。德行。孔子兼之,曰:『我於辭命則不能也。』「宰我、子貢善爲説辭,冉牛、閔子、顔淵善言

位,則何能以是言之哉。」

長,而 而咀 子者,心得之,身體之,所以言之親切 蓄有餘之味,不 使偶合於理,則亦輕虚浮淺,既無沈着痛快之意,又無含 身,而貌言之,其支離蔓衍,離真失 之親切而 事者也。 指孟子而言,下段夫子字爲指孔子而言,然後 皆有所不及者、蓋惑於兩夫子字而然。 氏,名之奇。三山人。 此 今孟子乃自謂 也。」説解 一節,林氏以爲皆公孫丑之問 嚼 兹其所以 孔 言語 子兼之, 有味 三子善言德行 堪 爲善也。」公孫 咀 也。 也。 我能知言,又善 嚼 ○輔氏曰:「林氏之説當矣。 不堪 然猶 輔氏曰:「大凡非得於心、體於 德行,得於心 涵 自 泳必 者,身有之,故言 丑言 謂 Œ 矣。 不 而 者,固 今以此夫子字爲 有味, 數子各 養 能 惟冉、 而見 氣 是也。 於 不 明白 可以 関、 足 辭 於 則 有 論 顔三 先儒 命。 涵 無 是 政 所 行 林

則夫養 者務本耳。 吾未之有得」同意。」 曰:「辭命 此 也。 兼言 ,則必將見於行 夫子,指 知 於 語 其 德行 辭命者,欲使學者務本而已。」輔 如 豈 在聖人, 豈有不能? 與《論語 非德 此 孟子 則 而 行 事。 於言 有之,輔氏曰: 也。 乎。」然 》所謂『文莫吾猶人也,躬行君子,則 況此章本爲當大事 語 辭 〇程子曰 命,何 則 所以如此説者,正欲教 贵 患 不 「知言則 其 既 :「孔子自謂 不 不動 聖 能 在 哉 矣 我在 心 乎 而 至 人一 言 ? 於 氏 所安。

夫·音扶。 夫聖,孔子不居。是何言也?」惡,平聲。夫聖之也,教不倦,仁也。仁且智,夫子既聖矣!』我學不厭而教不倦也。』子貢曰:『學不厭,智曰:『夫子聖矣乎?』孔子曰:『聖則吾不能,曰:「惡! 是何言也? 昔者子貢問於孔子曰:「惡!

此夫子,指孔子也。學不厭者,智之所以之言,而引孔子、子貢問答之辭以告之也。惡,驚歎辭也。昔者以下,孟子不敢當丑

何言也」,以深拒之。自明,教不倦者,仁之所以及物。再言「是

一體,冉牛、閔子、顏淵則具體而微。敢問昔者竊聞之:子夏、子游、子張皆有聖人之

故以 也。 但未 之未全,故未極於廣大耳。 冉、閔、顏子之德行,則具有聖人之全體,但養之未至,充 文學名,子張以 則 勉,滯於形迹,未若聖人之大而化之,無復限 識之,不言而 其性之所近。 道,大而能博,門弟子不能徧觀 此一節,林氏亦以爲皆公孫丑之問,是 體,猶 體 爲具體而微爾。」○輔氏日 惟冉牛、閔子、顔淵氣質不偏,理義完具,故 廣大 猶 肢。 耳。 信者,獨 如 肢 高明 具 游、夏得其文學,子張 也。 體,謂得 或問:「六子之不同。」曰: 稱 能 是固 具 具 介 體 使其極於廣大,則是固 其全體者宜 各得聖 聖 而 而 「孟子謂 人之全體 盡識 微 上人之一 謂 得 也,故學焉 人之有是四 其 有 但 威 體 夫游、夏以 其 量之可言 儀 猶 矣。 「聖人之 全 皆 而 役 其 至 聖 各得 於 默 也 體 而

以德 天地 顔子之亞 心之德 行稱,然恐冉、 聖, 也。 則 然 與 此 聖 閔二子之所至,終未及於顏子也 論 人相 亦未得爲 去,特 精 細 間耳。」安, 蓋 冉 閔、 顔 處 子 也 雖 數 至 皆

公孫 \mathbb{H} 復 問 孟子 既 不 敢 比 孔 子, 則於此

子欲 何)所處 世

曰:「姑舍是。」舍,上聲。

力行以酬其志,不可徒有此志也。」○愚謂: 於聖人之域耳。 自暴自 足於顏子者。 顔子歟?」天台潘氏曰: 也。 孟子言且置是者,不 人,孟子之心終未慊 陵陽李氏問: 棄。 蓋古人之志,大率如 蓋非 前輩 不足於顏子,以顏子不幸短 如 也。 云,纔遜第 《集註》之説,則孟子猶 「孟子之志,願學孔子,是誠有不 觀下文「乃所願,學孔子」, 欲 以 此。 一等事 數子 然立志之後,要須 所 與别人做, 至者 學未至 命 有 而 不足於 自 便是 則可 一於聖 未至 處

君不 也。 曰:「伯 事,非其民 何 事 夷、伊 非 苐 尹 ,何使非 不 何 使; 如?」曰: 民; 治則進 治亦進,亂 不同 亂 則 道。 退 亦進 伯 非 夷 其

見矣。

則 伊 未能有行焉; 居,聞 久 尹 見此篇之末及《萬章》下篇 是者五,乃相湯 之,使之就桀。 而 伯夷,孤竹君之長子。 餓死。 也。 可 以速 文王之德 可 伊 以 則 乃所願,則學孔子也。」治,去聲 仕則 尹 速 孔 桀 而 而 有 仕 伐桀 歸之。 不能用, 幸之處 子 可 也。 兄弟遜國,避紂 也。 以 及武 止 皆 ± 復歸於湯。 則 古 聖人事 王伐紂, 止 聖 湯 人 聘 口 也,吾 而 以 隱 用 去 久 如

自有生民以來,未有孔子也。 伯夷、伊 不同 班,齊等之貌。 也。 尹於 輔氏 孔子,若是 日 公孫丑問 「自生 一民以 班乎? 來 未 而 有孔子,則 孟子 曰 : 答之以 伯 否。 夷

殺 而 日 : 君之,皆 一不辜而 然則 有 能 得 同 以 天下,皆不爲也。 與?」曰 朝 諸 侯 有 : 天下 有。 是則同。」 得 行 百 里之地 不 與

伊尹固不得與之齊等矣。」

平聲。朝,音潮。

《集註》以爲根本節目之大者。」○輔氏曰: 哉?」於此不同,則亦不足以爲聖人矣。 節 謂 爲 即 爲,心之正也。 也。 而 根節目之大者,惟在於此。 蔡氏曰:「此見孟子 有,言有同 心通乎聖,而群聖人之心所以不約 目 節目之大者也。 所謂本根之大者也。 君之、皆能以朝諸侯有天下、非德之盛、何以 ,非心得其正而 之大不 行一不義、 正,則 也。 不爲外物所動者,何以及此 所謂 本根之大不立,固無以爲節目之正 聖人之所以 殺 以 行一不義、殺一不辜而得天下不 本根者,又豈能至於若是之盛 一不辜 百 里 而 而得天下有 而同者,惟在於此,故 王天下,德 爲聖人,其本 「得百里之地 及此 此 之盛 所 即 不 所 此

言,未可知,當屬上文讀。」三子智足以知夫子之汙,下也。《語録》曰:「汙,是汙下不平處,或當時方

智識 明與汙下正相反,高明則必不至汙下矣。 道 明其言之可信 高明矣。 假使汙 呵 下,必 私所好 也。 而空譽之,則其識 不 輔氏曰: 阿私 「智足以知聖人,則其 所好 而 趣汙下矣。 反覆極言之. 空譽之,

以明三子之言必可信耳。」

宰我曰:"『以予觀於夫子,賢於堯舜遠矣。』 孔子,今人連堯舜也不識。」 所以與天長地久,雖堯舜不能與也。」○又曰: 哉 ? 言也。 於斯、食於斯、寢且處於斯、終身由 功久近之不同也。堯舜之道非得孔子,則後世 賢於堯舜,語事 不異,以其德言也。 孔子,則後世 子又推其道以 程子曰:「語聖則不異,事功則有異。 此言事功始終成就之不同也。」〇永嘉陳氏曰: 堯舜治天下,夫子又推其道以垂教萬世, 一亦何 垂 事 功也。 教 ·功則 所據哉?」輔氏曰:「語 萬世 有異,就其所爲 蓋 堯 而不自知,夫子之功 堯舜之道 舜治天下, 事與 「當時若無 一亦何 一,非得 此 成 夫子 聖則 所 言 功 「衣 夫 據 事 而

子貢曰: 『見其禮而知其政,聞其樂而知其

自生民以來,未有夫子也。』 德。由百世之後,等百世之王,莫之能違也。

子也。」 發也。 下,莫不盡見,無 從百世之後,以是等差百世之王,其政之優劣,德之高 莫若夫子之盛 等百世之王,無有 者,泛言其理實如是也。」是以 見人之禮則知其政者, 遡其末而知其本 言大凡見人之禮,則可以知 聞 미 人之樂而知其德者,因 以 知 有 其 也。 德。 人能遁 能遁 輔氏曰: 輔氏曰: 其 其情者,而見其皆 我從百世之後,差 其發而知其 情, 惟 其政,聞人之 而 「禮者,政之本 其 也。 見 理 其皆莫若夫 之如是,故 (藴也。 樂者,德之 大凡 我

其萃,自生民以來,未有盛於孔子也。」」垤,大也。聖人之於民,亦類也。出於其類,拔乎也。聖人之於民,亦類也。出於其類,拔乎之於飛鳥,太山之於丘垤,河海之於行潦,類 以有若曰:『豈惟民哉? 麒麟之於走獸,鳳凰 德

百里。

麒麟,毛蟲之長。愚案:牝曰麒,牡曰麟,屬身,牛結反。潦,音老。

潛心 曰 : : 起也。 尾,一 鳳,雌 幾有得於心。若泛然讀過,則亦何能有益哉?」 者王也,有若之所言者聖也,此其爲不同 子所論皆以事功言,但宰我之所言者帝也,子貢之所言 衆人,然未 潦,道上無源之水也。 角,不踐生草。 日 而玩索也。」輔氏曰: 孟子此章,擴 萃,聚 凰,狀 有 如鶴,五 如 也。 孔子之尤盛 鳳 色而 言自古聖人,固 凰 前 河,羽 聖 文。 出,高 「學者須是潛心玩 所 蟲之長。 垤, 蟻 未 者 發,學者 出也。 耳。 也 封 愚案: 皆異 愚 也。 拔,特 : 謂: 所宜 程 雄 於 \equiv \Box

○孟子曰:「以力假仁者霸,霸必有大國,以

力,謂 所有,而霸者之所有其大者,則土地甲兵 是也 而 借 其 土. 輔氏曰:「力,如今人之言事力也,蓋生於己之 事 地甲兵之力。 以 爲功者也。 假仁者,本 霸,若 也。 齊 桓、 無 假仁者,謂 是心, 晉文

之所固 事,以 己本無是仁心,徒以 力而不借仁以行之,則雖霸者之功,亦無由可致矣。」以 爲,生殺予奪 德行仁,則自吾之得於心者推之, 其 也。 圖彊霸之功, 有 盛者也。 也。 輔 、闔闢斂散 自吾之得於己者推 氏 日 夫假仁者固不足道,然有 如齊桓、晉文也。 其土地甲兵之力,而 「德謂 自 得於己而不失者也 然無所往而 而 行之,則 Ŧi. 非仁矣。 霸獨以桓、文言 借 夫仁之一二 土地甲兵之 唯 無 吾 適 之所 則 而 性:

《詩》云:『自 者,中心悦而 以 力服人者,非 西 誠 自 心服也,力不贍也, 服 東 也, 自 如七十子之服孔子也 南自北,無思不服。」 以德服 人

此之謂也。」

不仁,是猶惡濕

而居下也。

惡,去聲,下同

孟子曰:

「仁則榮,不仁則辱。

今惡辱

而

居

贍,足也。《詩 以 謂 而 其不同亦 王霸之心,誠僞 誠 誠 行之,終非己者,非僞而何? 應。 者,成己者也。 如形聲影響之相隨,蓋不容於有異也。] 〇 鄒 如 此 己以 大雅 不同。 輔 氏曰: 偽感,人以偽應, • 文王有聲》之篇。 故人所以應之者, 「以力假仁者、僞也。 以德行仁者,誠 己以誠感,人 也。 所 假

> 若夫正心脩身之道 然其所謂無意者,非如木石之無意者,無期必之私 ○輔氏 若此章之深切 能 敢 氏 爲優矣。」 之喻、荀子隆禮 未有如是之深切著明者,亦爲得之。 7日: [] 不服 不服 日: 以力服 「鄒氏以 以德服 從古以 尊賢、重法愛民、與夫曰 一,則自 而著明 有意無 人者,有 人者,無意於服 來,論王霸者多矣,未有 有 不可已者。 也。」鄒氏、名浩。 意釋力與 意 於 其視董子美 服 德字,最 至謂自古 | 粹日 人, 駁諸 而 爲 毗 論 玉 人不 意耳。 説 簡 陵 碔 Ŧ 皆 砆

好榮惡辱,人之常情。然徒惡之而不 榮,徇人欲者常危辱,固人理之自然也。 得之之道,不能免 而 而 人情之同然也。 居仁、惡辱 咈其理,好榮而不居仁,惡辱而 而 不居不仁者是也 然心爲之宰,則以 也。 輔氏曰: 居不仁者是也。 心苟不 其 情 「本天理 而 好 宰,則 榮而 順 其 理 惡辱,亦 肆 者常 去其 夫惡 好 其 情 榮 安

行,故 者之所爲也。 其 下,此又易見之甚,而人未有不知避者,故以是曉之而欲 每 唇 、省覺也。 陷焉而不自知 而 居不仁,其爲得失是非甚易見也,而情性之不治者, 徒知惡辱而終不能免辱也。」 夫惡辱者,義之端 不仁則不足以安其守,不智則不足以決其 故以惡 濕而居下者曉之。 也。 居不仁者,不仁 夫惡濕 不智 而居

職。 必畏之矣。 如惡之,莫 國家閒暇,及 如貴 閒,音閑 德 而 是 尊士,賢者在位 時 明 其 政 刑。 一,能 雖大國 者 在

行利 及,我欲之。」詳味此意,則惟日不足之意可見矣。」 意 以 在 位 輔 此 士 氏日 則 可 職 因 有爲之時 則 行 見矣。 則 其惡辱之情, 之事, 指其 足 「彊仁者,勇者之仁,勉彊於行仁者也。 以 足 亦自 Œ 人 以 輔 也 君 氏 而言之。 脩 此 日 而 政 而 詳 善俗。 造 「《春秋傳 而 而 味 耳。」貴德, 立 進之以 及 賢,有德者 事 字, 能,有才者,使之 》曰"【及,猶汲汲 則 或 彊仁之事 惟 猶 家 日 閒 尚 ,使之在 不 暇 德 所謂安 足之 也 也 也 口

> 之?』徹,直列反。 户 詩者,其知道 詩》云:『迨天之未 今此下民,或敢 乎 土, 音杜。 ! 陰 侮予?』孔 能 雨 綢,音稠。 治 徹 其 彼 或 桑 繆,武 子 家, 土 日 彪反 誰 綢 敢 爲 繆 侮 此 牖

《詩 綢繆, 則仁之理亦自可識,非是心之存者,能之乎?」〇真氏 子讀之,以爲 民,誰敢有侮予者?」周 傳》曰: 公所作,所謂安仁者之事,而 贊之,以爲知道 纏縣巢之隙穴,使之堅固,以 此,今此在下之人,或敢有侮予者乎? 處 君之爲國,亦當思患 迨,及也。 也。 • 「託爲鳥言:我及天未陰雨之時,而往取桑根,以 纏緜 翢 子,鳥 風 知道。 補 徹 自 取 茸也。 鴟鴞》之篇,周 知道,則仁矣。 謂 也。 也。 也。 公以 輔 圃 牖户,巢之通氣出 非 氏 備 桑土,桑根之皮 言我之備患詳 預 鳥 日: 彊 陰 防之。 仁. 之爲 雨 詳味 「《鴟鴞》之詩 者之所 之患 公之所 思患 巢 則 孔 能 如 預防之義 子 此 此 作 下 讀 密 則 土 也 故 也 《詩 人 比 如 而 孔 周

安,而不爲般樂怠傲以自禍,庶幾免於燕雀之譏乎。」 是燕雀之智不及鴟鴞遠矣。 安,自以爲樂也,突如棟焚,而母子恬然不知禍之將及, 之時,豫爲之備若此。 翫 曰:「孟子引《鴟鴞》之詩,以爲彼羽毛微類,而 細娱而忘大患,可乎? 今國家閒暇,不 昔人有言,燕雀處堂,母子 爲國者必能憂勤兢畏以 能 脩明 政 能於未雨 刑 顧 圖 相 14

猶緩.

也。

此言禍之自己求者

般,音盤。樂,音洛。敖,音傲。今國家閒暇,及是時般樂怠敖,是自求禍也。

欲則無緣得當乎理,偷安則是私心之所爲,其爲不仁言其縱欲偷安,亦惟日不足也。輔氏曰:「縱

禍福無不自己求之者。

結上文之意。

甚矣。」

也。」孽,魚列反。 一『天作孽,猶可違,自作孽,不可活。』此之謂《詩》云:『永言配命,自求多福。』《太甲》曰:

猶念也。配,合也。命,天命也。此言福《詩・大雅・文王》之篇。永,長也。言,

禍也。違,避也。活,生也、《書》作逭,逭,之自己求者。《太甲》、《商書》篇名。孽,

士皆悦而願立於其朝矣。朝·音潮。 ○孟子曰:「尊賢使能,俊傑在位,則天下之

願藏於其市矣。 市廛而不征,法而不廛,則天下之商皆悦 俊傑,才德之異於衆者。

而

其廛。 獄 司者治之耳。 不取之也。」問"「古之爲市者,以其 物。 廛也。」《語録》曰:「「市廛 各出廛賦若干,如今人賃鋪 廛,市宅也。張子曰:「或賦其市地之廛, 而不征其貨,或治之以市官之法,而不賦 市之類,皆是古之遺 「法而不廛」,則 蓋逐末者多則 此是周禮市官之法否?」曰: 但治之以市官之法 制。 蓋自 面相似,更不征税其所貨之 ൬ 廛 不征」,謂使居市之廛 以 有 所有易其所無者,有 抑之,少則 箇 所 而 已,雖 在 然。 以 爲 如漢之 廛 不必 市 賦 者 其 亦

觀孟 居。 如 邑規模之大概。」〇 位者及士者 譏 招 多 商賈百物皆入焉。 之屬皆在 中 中 市 此。 間 察異服異言之類。 徠之也。 ,則賦其 自 而外朝 子所論 有 君 品 許多事。」○問: 或 焉。 則 都如 廛以抑之; 征 皆 君之宫室 市官之法, 區,左 商 後 不得 井田様 自)輔氏 賦 品 [此賤丈夫始之説,則知先王之政必是 則 市 其 爲 少 如 宗 中惟 市 E 廛 宫 畫 則不 此 則 廟, 周 室前 市四 者 爲 市 「此雖是張子以意度言之,然 有罰。 九 民乃得入,凡公卿大夫有爵 禮 右 廛 謂 在 區 則 收其 面 何 但 品 司 社 有門,每 面 處?」曰 左右各三區 治以市官之法,所以 市 爲外朝, 稷在 市地 朝 薬 背 馬。 物 錢。 市 日 凡朝 價,治 市 左 此 蓋逐 此 門開 祖 或 會 都 皆 争 右 末者 民 邑之 君 藏 訟 社 所 則 庫 都 矣。 廛

鍋 譏 而 不 征 則天下之旅皆悦 而 願 出 於 其

解 見 前 篇

路

野 耕 者 助 而 不税, 則天下之農皆悦 而 願 耕 於其

但 使 出 力 以 助 耕公田 而不税其 私 田 也

欲

而

滅

天理

者

之所

爲

也。

斯

民

何

其

不

幸哉!

氓

非

先王之法

也

輔

氏

日

此

則

是

末

流

之害,

法 通 用 一者。」 耐

輔氏

日

助

而

不

税

則是用助

法

耐

不

用

貢

法。

周

之徹

無夫里之布, 則天下之民皆悦 願爲之氓

氓,音盲

市 Ξ. 過 當 種桑麻與閉民無職事者,上之人皆有 浮浪之民泰然,都不管他。」」○輔 可考。]又問: 罰之使出一 也。」《語録》曰: 之使出一里二十五家之布; 出夫家之征。」鄭氏謂: 周禮》: 其 熈 宅之民,已 『後世之法與 寡 盛 時 孤 獨 民 四 「宅不毛者有 皆 民 者 着業 夫百 賦 此 問: ൬ 無常業者罰 正相 己。」今戰 而 其廛,又令出 無游 『一里二十五家之布。』曰:『亦不 畝之税, 反,農民賦 手與 里 之, 甚 宅不 或 氏 布 貧 如 曰:「先王之政,宅不 税 時 木 法以抑之。 何 丁錢 此夫里之布, 民 民 種 家 者 罰 無 桑 無 所 却 得 力 切 謂 常業者 麻 恁 職 重 役 取 地 者,罰 此所以 而 事 之征 重? 游手 者,

民也。

者 信 者,天吏也。 率其子弟,攻其父母,自生民 也。 能 行 此 如 此, 五者,則 然而不王者,未之有也。」 則 無 鄰 敵 國之民仰之若父母 於 天下。 以 來,未有 無 敵 於天下 能 矣。 濟

吕氏 者之得失,使後之人君知所警勵也。」 則赤子爲仇讎。 章言能行王 位 武 命,不敢不從者」,如栽培傾覆,推亡固存者是也。 氏曰:「『奉行天命,則謂之天之吏,廢興存亡,惟 亡,惟天所命,不敢不從,若湯武是也 者,皆能爲之,故 者」,湯武以征 曰:「奉行天命,謂之天吏。 政 伐得 ,則寇戎爲父子,不行王政 曰『無敵於天下者,天吏也。』 〇此 輔 天下, ·氏曰:「所以極言行王政與不行 其 /迹著故 也。 要之,聖人得 廢 岩 興]。|輔 天 存 所 湯

〇孟子曰:「人皆有不忍人之心。

地生物之心以爲心,所以人皆有不忍人之天地以生物爲心,而所生之物因各得夫天

接。 然命之? 生物之心,則 所以人物得之,無不有慈愛惻怛之心。]〇又曰 心。」〇又曰: 本不須説以生物爲心,緣做箇語 生不窮。 物。 天地即是 從下面衮到上面,又衮下來,❶只管在裏面衮,便 心 天包著地 也。 他别 所 謂 《語 人物則 無可 包得 爲 但 別無 心,②亦豈 巨如磨子 没這 録 「天地生 勾 許多氣在 當, 得此生物之心以 所作爲,只知生 身。 相 , 只得 「天地 物, 似,只是會磨 切 纔 這裏無 切 有 生 自 然做? 以 這 物。 生 是 血氣之身,便具 温 出 物爲心,譬 不 句 物 暖和 處,衮 爲心,所以 似 難、故著箇 而 出 如 得 르 這物事。」○又曰: 云天命,豈 煦,這 人,便 番 亘 如 箇箇 古亘 丁,便 箇 甑 以生 有 天 便 「無天地 **这蒸得** 蒸飯,氣 地 是諄 許 生 是仁。 肖 一今,生 多應 物 生 他 熟。 番 物 爲 諄

正。 「衮」字,致文意不通。今皆據《朱子語類》卷五十三補「衮」字,「衮到上面」之「衮」原誤作「蒸上」,「又衮」脱「甑蒸飯」至「衮下來」,「甑」上原衍「飯」字,「從」上原脱

0

誤作「似」。今皆據《朱子語類》卷五十三乙正。天命」二句原互倒,又重出「所謂爲心者」句,「但如」原「所謂爲心」至「磨子相似」,按「所謂爲心」二句與「如云

0

心也。」 斷? 出 之心矣。」〇真氏曰: ,故物物皆具此理,何況人爲最靈,宜乎皆有不忍人之 觀夫春夏秋冬,往古來今,生意同 天地之心於此可見。 「天地造物,無他作爲, 萬物之生既從天地 流, 何 惟 嘗 以 生 生 意中 息間 物爲

掌上。 不忍人之心,行不忍人之政,治天下可運之先王有不忍人之心,斯有不忍人之政矣。以

行也。 不言察識推廣之事,但言全體此心,隨感而 其端緒而 是指不知學者,故言物欲害之。 見得衆人不能如此。 之故,與夫先王之所以能然之由,使學者得以 聖人全體此 焉者寡,故不能 言衆人雖有不忍人之心,然物欲害之,存 不忍人之政 夫人皆有是不忍人之心,惟學然後能知 推廣之於政事之間。先王則 也。 心,隨感 察識 輔氏曰:「孟子言先王如 集註》又發明衆人之所以 而應,故其所行, 而推之政事之間; 存焉者寡,所以 指聖人也,聖 應,故 致 之。 此 不 其所行 知 不 無 一人更 衆人 則 能 而 能 非 惟 察 力 便 妖

平聲。

惡,去聲,下同

天下雖大,運以此心而 吾性分之中,治之固爲近且易耳。]〇真氏曰:「人有 欲不雜,故有此仁心,便有此仁政,自然流出,更無 心而私欲間斷,故不能達之於用 無非不忍人之政也。 人之心,行不忍人之政,則體 此亦可見聖人之忠恕。 有餘矣。」 用兼備。 惟 聖 而天下雖大,皆 人全體本 夫以 ·心,私 不 是 忍

也。 於孺子之父母 所以謂人皆有不忍人之心者,今人乍見 將入於井,皆有怵惕惻隱之心。 非惡其聲而然也。 也,非所以要譽 怵,音黜。 内,讀 於鄉 非所 爲納 黨 以 孺子 朋 内 要 交 友

也。 乍, 淺而深也。 隱痛之深者,謂痛之發於理也。 其心有所驚懼而 然惕然,皆是其心驚懼 也。 猶忽也。 《語録》曰: 隱,痛之深也。 此皆所以名狀不忍人之心,亦可謂 動 「惻是初頭子,隱是痛。」〇輔氏曰: 怵惕, 也。 前 惻傷之切者,謂傷之切於己也 念起之意。 此 驚 即 動 始也 所 貌。 ||休惕 謂 緣其卒乍 不忍人之心 惻 中 也 傷之 善於形容 而 隱 見,故 痛,自 怵 切

在 子,身裏也,言滿身裏皆惻隱之心。 故 恰 洛中 内 即 即 殼耳。 纔 有 仁而不忍 者矣。」○蔡氏 意,未暇 此 滿 語 語 是 身裹。」問:「心所發處不一,便説惻隱,如何?」曰 日 似 觸 虚 莽莽蕩 萬 録 此 是就人身上指出理充塞處、最爲親切。 録 有此 大段 物 用 著,便是 俗 處。」〇又曰: 腔 =所 滿腔子,只是言充塞周 心 語。」〇又日 子 迅量量 當應接 體,更 痛 蕩,無交涉矣。」〇 少 於中也。」内,結。 是 傷 「方其 一是 不 隨 這 到 惻 通 固 日 見 惡其 無内外之别。 箇 但 處,便 更 是 隱之心。」《文集》曰: 物 「滿腔子,是只在 乍 而 (痛,只 更遲霎時 無此 「惻者傷其 事 (被不救之名。) 言 乍 見之 時 見時 發,非 「只是 足被此 出 少 如 來,大感則 也,着手脚 間 針 滿 《語録 則 隔 若見不得,却去腔子外尋, 一私意 徧,本來如 失仁於外也 子 由此三者而 這 要,求。 了不得 略 軀 癢 ₩ ⊟ : 這軀 在腔子裏,亦只云心 隔 挑 殼, 胸 大應,小 不 了。二〇又曰: 此 疾 也。」程子曰 都是惻 得,縱有許 殼裏。 「腔子只是此 血 痛 此。」〇又曰: 聲,名 若於此見得 「腔子猶言 ,隱者 出 ,莫不 感 也 則 腔子,乃 隱之心。 便 然 痛 小應。 相 痛 多私 便 也。 也 其 「腔 關 o 失 心 軀

> 心。 得,非 又非以避不仁之名也。 聲 之時 知 得 而 勉 身言之。天地之間,充塞上下,渾然生物之意 曰 : 心,觸處即 人得此以爲 心,見一蟻子亦豈無此 惻隱之心,渾身皆是,無 然,所以言人欲造作之私。」〇 此箇真心。 而將入於井,乍見之者,無間 而 而 方其此心驟發之時,非欲以此納交,非 然,即 勉而中,所以言天理自然之妙。 「人須是 中,天 , 其 心 是,無 心 學者先識 理之自然也。 怵 人欲之私矣。」輔氏曰:「謝氏要人識 則 識 惕 有 亦四體百骸,充 欠闕 其真心。 ,乃真心也。 心?」〇陵陽 倉猝之間 得 也。」黄 處 此心, 不發。 賢愚 然後 真 氏 塞 内交、要譽、惡 方乍見孺子人 無安排 氏 李氏 曰 : 遍 如 皆 日: 有 滿 内交要譽,惡 非 見 進步 極 謂 有 赤 無非 思 孺 無矯 欲以此 惻 子 是。 處, 而 無有空 旧 子 有 腔子 此 飾 得 傷 非 未 惻 惻 謝 Ŧ 痛 隱之 偂 有 其 思 指 隱 井 其 氏 非 天 之 聲 之 所 而 人

由是觀之,無惻隱之心,非人也,無羞惡之

機

自動

,此所謂

真心也。」

●「些血」,原誤作「血也」,今據四庫本改。

心,非人也。惡,去聲,下同。心,非人也,無疑讓之心,非人也,無是非之

乎外。 之也。 大 照乎物也。」人之所以爲心,不外 陰陽; 其 善 非義而憎之於外也。 之惡,惡者,惡人之惡, 也。 兩字,有内外人己之分,惟是非 者,以其非禮而還之於人也。 0 然有此念起; 辭,解使去己也。 羞,恥己之不善也。惡,憎人之不善也。 人,是非自是兩樣分明。)蔡氏曰: 論惻隱而悉數之。 《語録》曰: 若説四端,便如四時,若分四端八字,便如八節。」 蓋仁義禮皆在内而外接乎物,惟 非者,以其惡之未分而非之也。」〇又曰: 脯 以爲是也。 「羞者,以其非義而恥之於内也。 隱是惻然之後隱痛,比惻爲深, 「四端八箇字,每字是一意: 辭者,以其非禮而不受於己也 讓,推 辭者,辭己之物; 但仁是總名。 非, 言人若無此 是者,以其善之未分而是 以與 知 端,則兩字皆在 其 人人也。 乎是 惡 智則獨在 若説仁義 ௱ 讓者,讓與 惡者,以 ,則不得 四 羞者,羞 惻是方惻 以 是,知 者 内 内 「毎端 爲 故 耐 而 便 非 讓 外 照 其 他 如 己

> 哉 ? 惻隱不存,則三者亦何有哉?」○又曰:「賦形爲人,孰 是非而言者,蓋仁爲衆善之長,有惻隱則三者從之矣。 ○真氏曰:「孟子始言惻隱之心,至此則兼羞惡、辭遜 則非人也者,所以明其必有,而使人知反求之於己也。」 之中,故此因 無此心? 曰:「人之所以爲心,雖不外是四者,然仁則又貫乎三者 如此,則雖具人之形以 讓之心矣。背善趨惡,舍正習邪,則無復是非之心矣。 恥,則無復羞惡之心矣。 鷙,傷人害物,則無復惻隱之心矣。 謂之人,所以 私欲蔽塞而失其本真耳。」 苟無此心,則非人矣。 [論惻隱而 明其 悉數之也。 生,亦何以異於禽獸哉。」〇輔 驕淫矜誇,傲 必 有 也。 然所謂無者,豈其固 至於言人若無此心、 頑 黄 很 鈍 凌 氏 嗜 物 \Box 利, 則 暴 寡 無 虐 E 鮮 狠

辭 惻隱之心,仁之端也,羞惡之心,義之端 我者耳。 惻 讓之心,禮之端也,是非之心,智之端也。 底 智,性也。《文集》曰: 道 隱、羞惡、辭讓、是非,情也。 理 ,禮則是箇恭敬樽節 仁則是箇温 和 慈愛底 「性非有物,只是一箇道理之在 底道 道 理, 理 智則 , 則 是 仁、義、禮 是 箇分别 箇 斷 制 也 是 裁 非

在 無 處

其

中。

心

統

攝 時

性

情

宰 之。

如

統

百

萬

心

統

如

0 派所用

又曰

心 軍

有物

在

中,

而

其

頭

緒 以

見於外

也。

外

面

可 四

見底,

其中之所

故

者

端

緒

自 驗

然

發

見

七七五

是非之情

發

愐

仁

義 緒

禮

智 頭 其

本 緒

也。」〇

輔

氏

日

謂

及至

動

,此處最當體認。」〇又曰: 統兵之統,言 「性者,心之理。 面。」〇又曰: 辭遜是情之所發之名,其端所 主宰,是心。 「性對情言,心對性情言。 方有 主宰之謂 ,隨人所看。」〇又曰 義、 見,及其 是 爲 辭 有 情也。」 是 於 主宰也。 有 用,而 遜,智 非 渾 「性是静,情 禮 人心, 然 以主之也。」〇 大抵 箇 儱 情者,心之用。 理,然命之以 智皆性中 底 侗 也 物在心裏,此心 心, 1者爲 性 發 心則貫之。」〇《語 物, 心與 與 乃 而 言主宰, 情皆出 動 性 統性 是 是 爲 性 是動 性 静 情 性 非 用 是 皆 似 爲 之本 有此 又曰 於心, 心 心,却 理之名 情 則仁者爲惻 主 隨 則 合如此,是性。 統 心者, 宰 而二 發 事 者也。 體。 物 混 具此 則 理, 甚微 發見 猶 而 故 然 非 兼 似 録 似二 性 不 體 情 統 方 是 心 動 包 性 兼 惻 情之 分 是 著 情 皆 統 静 是 能 静 各 其 也 隱, E 隱 뭬 自 時 動 主 從 文 統 而 這 有 未 而 然之性 然可 之主 兼此 未發 以其 欲之間 有 也。 情 訓 之,則 緒發見於外,然後可 惡、辭遜、是非,是心統情。」○黄氏曰: 此 言,仁義等以性言,必又言心在其中者,所以 也。」〇又曰 (文集》曰:「謂之端者,猶 陳 總字者,有訓主字者。 而 懸 惟 氏 大 也。」端,緒 兩義 謂之心。 隔也。」〇又曰:「仁、 而爲言爾,非是性 未 情 得 日 可 惻 是 發 也。 得 隱 而謂 裏 而 「四端之説,是就 而見。 面 然心統 見, 羞 心雖便是 之統 有 悪、 是 猶 也。 譬猶 辭 也。」〇陳氏 四 得 遜、 有 者之體 而尋 是

言。

或

指

體

,或指用

情

在

裏

動

處

,是情。

物

在

中

而

緒

見於外

有物

在中

而

不可

見,必

因

大

其

情

之

發,

圃

性

之本

主。」〇又曰:

又曰:

羞惡

是

非、

性

是

理之總名,仁、

 \mathbb{H}

「性爲

體

情

此

性不是 「情與心

别 固

又曰 心出出

> ,其流行該徧,貫乎動 而全體者言之,則性 :「心之全體 性情, 湛 , 只就 然 静 也; 虚 渾 丽 明,萬 淪 以 妙 其 用又 理 物之中 已 具 發 無不 足, 而 指 妙 在 無 用 其 焉 E 豪 者 私 發 故 言

底道

理,凡

此

四

者,

具

苗

脉

不相

殺亂

所謂

義者爲羞惡,

禮

者爲

,漠然無形象之可

性情,

然又能

爲性情

之主

幸

故 性 有

日 :

惻隱、

羞

悪等

以

統性

情

而

爲

非性

情

之外

别

有心,只是總

義、禮、智,是

心

統性

惻 地

隱 頭

羞 如

統字兼

兩

義

箇

地

頭,

情又是一

箇

絲,若其無絲在内,則緒何由 之端緒,而見其性之本然。」〇永嘉陳氏曰 不明,故茫然不知得。」〇 外。」〇又曰: 也,物之緒也,譬之繭絲,外有 「四者端緒,日 蔡氏曰 用間 而見於外?」 條緒,便 常常發見,只是人看 性 不 可見,以 知得 「端者,端 内 其 有 初 專 倪 發 理

其君者也 而 人之有是四 自 謂 不能 者,自 端 也 猶 |賊者 其 也; 有 四 謂其君 體 也。 不能者,賊 有是四 端端

者 有之説。 四 體, ,物欲蔽之耳。 四支,人之所 物欲蔽之,應上物欲害之之説。」 輔氏曰:「人所必有,應上 必 有者也。 自 謂 明 不 其 能 必

不充之,不足以事父母。」擴,音廓。 始然,泉之始達。苟能充之,足以保四海,苟凡有四端於我者,知皆擴而充之矣,若火之

來滿了,如注水相 老,以及人之老,幼吾幼,以及人之幼」。 開,充是放滿。」〇又曰: 擴,推廣之意。 似。 充,滿也。《語録》曰 推 推 是注下水去,充則 是從這 裹 推 到得 將 注 去 充,則 得 如 這 擴 填得 老 是 器 脹 吾

義、禮、智,

心之體

也。

惻

隱、

羞

惡、

辭

遜

一、是

非,心

之用

能矣。 此。 之所以與我者,可以無不盡矣。 情,心之體用,本然 保妻子,極 能 《語録》曰: 滿了。 無難保者; 本然之量。」〇又曰:「日新又新,常常如此,無間 或能推之於一國,而 量,所以推不去。 量本足,以 及推廣將去,充滿其量 量,則其 處發見。 無緣得 由 學者於此,反求 此 蓋仁義之性,本自充塞天地,若自家不能 這 愚謂: 而遂充之,則 箇殼子滿,只是箇空殼子。」 其 包括天地,兼 日 新 「此四者,皆我所固 知皆即 近 足以保四海,極其遠而言之也。不足以 不能充之,則 而 或能推之於一家,而 言 又新,將 不足以治天下,此皆是未足以 之也。 此 ,則廣大無窮。」○又曰:「此心之 利萬物,只 推 全 默 四 廣, 海 具, 有 有。 識 此 雖 雖 而 不 其 而 而 章 是 事之至近而 遠,亦吾度 充滿其本然之 初發時,豪毛如 能 擴 不能 四 人 各 所 充之, 自 自已者矣。 端端 黄氏曰:「仁、 有 論 推之於 不能 在 條 人 擴 我 斷 充 則 之 理 充,則 内 也。 盡 滿 或 性 如 不 隨 其 其

子爲 子之説,乃爲仁由己之意。 始也。 然其充與不充,亦在 其後之意也。」〇程 前言日新又新,將有不能自己,所以 以予我仁義禮智之性,可以各各充滿其量 意、正心、力行之事也。 則足以保四海,不充之,則不足以事父母。 孺子入井之端,又告之以火然泉達之始,知是理而 反不知焉,何哉? 我,而人之所以爲人者也。天下之人,飢食而渴飲,趨利 惡、辭遜、是非者,仁、義、禮、智之用也。 而避害,則知之矣,至於天之予我而人之所以爲人者,乃 莫不有是理; 莫不有是體,則莫不有是用 智者,木、火、金、水之理也; 功用 求默識 人稟五行之氣以生,有是氣則必有是理,仁、義、禮、 能 此言天之所與我者可以無不盡矣,所以言充廣於 之遼絕乃如此,其教人之意亦切矣。」○輔氏曰 擴 者,格物、 而充之。 孟子憫斯人之愚而莫之覺也,既啟以 子曰:「人皆有是心 致知、窮 既能 不能然者,皆自棄 我而已矣。」輔氏曰:「程 熟玩之,自有以啟 有是體則必有是用 窮理,又能 理之事也。 言其 力行,則天之所 莫不有是氣,則 推 ,此天之所以 擴充之者,誠 而 充不充之間 廣之意於其 無遺憾矣。 人進 惻 惟君 充之, 隠、羞 德之 也。 不可 函 端之中。」

而

反

夏末。《月令》載『中央土』者,以此故也。」○永嘉 者,實 成四端。」愚案:四端之信,猶五行之土。 禮智,莫非實理之所爲,故四端不言信 誠。」又曰:「四端不言信者,既有誠心 曰:「五行無土位,位在四象之中。 王十八日,或謂王於戊己,然季夏乃土之本宫,故尤王於 行之有土,非土則不足以載四者。 時則寄王焉,其理亦猶是也。 不待是以生者。 定位,無成名,無專氣。 端,則信在其中矣。」《語録》曰:「信是誠實。 ○永嘉陳氏曰:「信者,實有此者也。 《有是仁,實有是義,與禮智皆然。」○黄氏曰: 故土於四行 而水、火、金、木 又如土於四 五常無信位,位 四 《語録》曰:「如 無不在 而 端不得信,則 信在其中矣。 一時,各 一,於 爲 此 在 陳 四 無 無 刀口 氏 四

也。

恐不傷人,函人唯恐傷人。 ○孟子曰:「矢人豈不仁於函人哉? 不慎也。 函,音含 巫匠亦然,故術 矢人唯

甲 也。 愚謂: 函之爲義, 取其 能 包裹 人人身。 惻

匠者作爲棺槨,利人之死。函人之仁也。巫者爲人祈祝,利人之生。囷人之心人皆有之,是矢人之心,本非不如隱之心人皆有之,是矢人之心,本非不如

不仁,是不智也。焉,於虔反。夫,音扶。 夫仁,天之尊爵也,人之安宅也。莫之禦而孔子曰:『里仁爲美。擇不處仁,焉得智?』

日: 義、禮、智皆從這裏出。」○輔氏曰:「五性皆是天之賦與 曰 : 於人者 是那裏來。仁、義、禮、智亦皆善也,而仁則爲萬善之首, 理,所謂心 者,所謂元者善之長也,故曰尊爵。《語 也。仁、義、禮、智,皆天所與之良貴 仁者天地生物之心,得之最先,而 處 里有仁厚之俗者,猶以爲美。 「元、亨、利、貞皆是善,而元則爲善之長,亨、利 「問"「如何是得之最先?」曰"「人先得那生 不於仁,安得爲智乎? ,故曰良貴,謂 生道也。 有是心,斯具是形以生也。」」〇又 天所予我自然之貴也。 此孔子之言 人擇所以 貴字 兼 統 、貞皆 Œ 底 録 自 四 而 對 道

> 斯不仁矣。」 非不智乎? 者,我所自有,苟欲爲之,誰能止者? 曰:「莫之禦而不仁,則是自不爲之耳。」○真氏曰:「仁 如此,而自不爲之,豈非不智之甚乎? 宅。」此又孟子釋孔子之意,以爲仁道 人欲之阽危,人當常居其中而不可有須臾之離,故曰 者必以求仁爲先務也。」〇又曰:「仁者,天理之本然, 所謂依於仁,造次必於是,顛 此所以有安而無危也。 無止,故有陷溺之危。 體之德。 中,而不可須 自然之安,無人欲陷溺之危。 「五性皆人心之德,而仁則周貫乎四者之中,故爲本心全 天理有則 故仁智二者常相須焉,不仁斯不智矣,不智 臾離者也,故曰安宅。 而不流,故有自然之安。 克 人當常處其中而不可 盡 人欲,純是天理,方始 流沛必 於是之意。 乃甘心於不仁,豈 人當常在其 人欲横 須臾離,即 此 輔 聖 之大 氏曰: 是仁 輔氏 門 流

由,與猶通。 爲役,由弓人而恥爲弓,矢人而恥爲矢也。不仁、不智、無禮、無義,人役也。 人役而恥

爵字而言。」在人則爲本心全體之德,有天理

不智。 然不覺,又懵然無知,則 輔氏曰:「不仁則頑然不覺,不 以 不仁故不智,不智故 而下句只言不智者,蒙上句,故不必言也 自然不知禮義之所在。」 智則 不 知 懵 然無知,故 禮義之所在 不仁 既 則 頑

如恥之,莫如爲仁。

三者在其中矣。不言智、禮、義者,仁該全體。能爲仁,則此亦因人愧恥之心,而引之使志於仁也。

怨勝己者,反求諸己而已矣。」中,去聲。 仁者如射,射者正己而後發。 發而不中,不

爲仁由己,而由人乎哉?

)孟子曰:「子路,人告之以有過則喜。 喜其得聞 人矣,是豈可不懼 於本然之善,不知則其過愈深,將陷溺焉,而失其所以 氣稟之偏,則由乎物欲之誘。 曰"「人受天地之中以生,本自無過,所以有過者 於善, 則又豈可不以爲喜乎? 而 改之,其勇於自 哉。 人有告我以 人能 然非子路之勇於自脩 過,我因得而改之以 知而改之,則 脩 如 此 「,非 可 輔 以 出 爲 復 氏 於

> 爲賢,故可以爲百 説,程子是順説。 則 難其人,故可以爲百世之師。」 其過而改之,則必能全天之所以予我者而階之,以 則喜,亦可謂 頤。 忌醫,寧 此二字,極有意。」周子曰 無窮焉。今人有過,不喜人規 亦不能然也。 舂 陵人。 滅 其 程子曰: 自脩 『亦可謂百世之師』者,一 、身而 世之師;一 百世之師矣。」輔氏曰:「周子是反 兩字雖 無 「子路,人告之以 悟 出 以見能勇於自脩如此者,實 也。 仲 《大學》, 由 噫 喜 而 !」周子,名 如 聞 集 以言喜 過,令名 註 諱 淤 有 疾 爲 得 此 過 聖 m 聞

禹聞善言則拜。

也,其心純 能無過,但勇於自脩,是以喜於 言,則至誠 己以受天下之善也。 書》曰: 屈己,拜而受之。」 是天理本然之善,故 「禹拜昌言。」蓋 輔氏 得 不待其 曰:「子路賢者 不 聞 待 而 ?有過 改之。 有 過 禹 但 而 也,故 則 能 聞 聖 屈 善 人 不

人以爲善。舍,上聲。樂,音洛。 大舜有大焉,善與人同。舍己從人,樂取於

不善 或問: 行之,非有彊勉之意也。 目 愐 在己也。 人,言其不先立己,而虚心以聽乎天下之公,蓋不知善之 不知其孰爲在己,孰爲在人,所謂善與人同 舜之心,無一豪有我之私,是以能公天下之善以爲善,而 人之别,但人有身,不能無私於己,故有物我之分焉 善 己所得 舜 以我之聞,聞彼之善,拜以受之,猶有人己之分也。 無大小之別。 禹雖皆是聖人,然禹則學而 言舜之所爲,又有大於禹與子路者。 人同,公天下之善而 也。 行之於身,蓋不知善之在人也。 勉 川則 ,則善與人同耳。 而 彊 舍之也。 然謂之舍己者,特言 「善與人同。」曰:「善者天下之公理,本無在己在 而私 無所係吝而舍己從人, 人有善, 樂取於人以爲善,言其見人之善,則至誠 而 者,故曰公天下之善而不爲私也。」己未 取之於己,此善與人同之目也。 禹聞善言則拜,聞之者禹也,言之者人也, 謂之樂取者,又以 善與人同者,蓋善乃天下之公,非人 此二 知者,舜則 不 其 一句本 忘 爲 私 私 見 順 此二者,善 事,特交互言之,以 其心 也 理 人生而 而 與理 已 知者,故 輔氏 也。 非 與 一,安而 舍己 日 人同 謂 則不 樂取 善 至於 己 亦不 與 惟 從 有 之 舜

> 則 之同,而初無在己在人之異也。」 唯大舜善與人同,公天下之善而不爲 己,是皆不能以善爲天下公共底道 是善與人同之條目。 見聖人之心,表裏無間如 而不能舍以從人,人之有善,則 豪勉彊之意,而樂然取之於己。 無 豪係吝之私,而脱然舍以從人,人之有善,則 凡人之情,己有不善 此耳。」〇輔氏曰: 雖 欲勉 理而 如是,則 私。 彊 各自以 而 故己 通天下 不 則 此 能 爲 必 或 兩 取 有 私。 未 句,乃 之於 不用 唯 係 善 故 吝

自耕、稼、陶、漁以至爲帝,無非 河濱,愚案: 舜之側微 耕于歷 濟陰定陶西南 Щ , 愚案: 有陶 丘 歷 亭。 Щ 取於人者。 在 漁 河 東。 于 雷 陶 澤 于

愚案:

雷,夏兖州。

澤在

濟陰

於此。輔氏曰:「舜之取人以爲善,初未嘗有助人爲善使天下之人皆勸於爲善,君子之善,孰大則彼益勸於爲善矣,是我助其爲善也。能與,猶許也,助也。取彼之善而爲之於我,

潮

浼,莫罪反

間。 善之誠,無彼此之間 人者是也,在己之善有以及於人,是與人爲善者是也。」 時,未必不以爲詆訐而惡之矣,尚何喜之有哉? 彼此之間。 言之也。三人者,雖 及於人。 此。]〇此章言聖賢樂善之誠, 於爲善,則是聖人成己成物之事,故曰君子之善孰大於 之意也。 人之爲善 故其在人者有 也 孟子推 輔氏曰: 使子路 因吾取人之善以 説 其 而有彼此之間,則於人告其 ,故在人之善有以裕於己,無非取於 有淺深之不同,然其樂善之誠,皆 事,故以 「聖賢云者,兼子路、禹、舜之事 以 裕於己,在己 爲 爲善, 取 諸 丽 人以爲善,乃是 使天下之人皆 初 無 者 彼 惟 有過之 有 此 有樂 之 以 而 無 助

者,不受也。 之,若將浼焉 惡惡之心,思與 朝,與惡人言,如以朝衣朝冠坐於塗炭。 不立於惡人之朝,不與惡人言。 孟子曰: 惡惡,上去聲,下如字。 「伯夷,非其君不事,非其友不友。 不受也者,是亦不屑 是故 鄉 人 立 諸侯雖有善其 ,其冠不正,望 立於惡人之 就就 辭 己。 命 望 然 朝,音 而 推 至 去

> 氏曰: 意。」已,語助 爲輕者,不盡其義也。 切,只是不汲汲於就,不汲汲於去。 爲聖之清也,柳下惠不屑之意亦然。」○又曰 善辭令而來者,固 也。 無禮者,固速去之矣。 也。」《説文》曰:「動作切 而 塗,泥也。 不以就之爲潔,而 潔,猶美也。 不顧之貌。 然伯夷雖有善其 「如此解屑字,方説得夷、惠之意出。 苟以其 鄉 人,鄉里之常人也。 有 浼,污也。 時 解 、辭命禮意之美而就之,是切切 世之所謂 而 詩 命而 切 就 》所謂 之。 切 至者亦不肯就 於 切 惟 『不屑髢也』者,亦 清者,不 屑, 伯 是 也。」不 屑字却是 夷不然 也。 趙 就惡人耳。 氏 先儒多 而 屑就,言 語 望望,去 \exists 此其 重。」〇 況 Ⅰ:「潔 動 録 不 是此 所 於 解 作 道 曰 屑 切 以 若 是 而

以其 爾 能 援 柳下惠,不羞汙君,不卑 而 浼我哉?』故 爲爾、我 止之而 道。 遺 啃 爲我,雖 佚 而 由 援 不怨, 由 而 然 袒 止之而 與之偕 裼 伌 小 裸 官。 窮 裎 止者 而 而 於我側 進不隱 不 不自失焉 ,是亦不屑 . 憫 ()爾馬 故 必

辭

七八二

去已。」佚,音逸。 袒,音但。 裼,音錫。 裸,魯果反。 裎,

音程。

焉能之焉,於虔反

程,露 賢、必 也。 也。 者,言欲去而 能浼我哉」,惠之言也。 見,不肯發出,尚有 其下文云『必以其道』。 柳 曰:「然。」〇又曰: 類,乃是隱賢,是枉道也。」問:「所以不解作不蔽賢 避其賢。 不隱賢,不枉道 下惠,魯大夫展禽,居柳 阨,困 不自失,不失其 以 身也。 其 如己當廉却以利自汙、己當男却以怯自 道 兩 也。 句 可 由 所 也。 「進不隱賢,便是必以其道。 留 相 憫,憂也。 由, 藏,便是枉道。」〇又曰: 承 若作不蔽賢説,則下文不同 也 只 《語録》曰: Œ 自 作 也。 得之貌。 袒裼,露臂也。 句 爾 演。」遺 援 下而 不隱 爲 而 爾」至「焉 止之而 偕, 佚, 諡 賢 「進不隱 惠 人有所 謂 放 並 矣。」 處 也。 不 處 裸 謂 止 棄 之 隱

> 故其終不免有弊。 和 得一分,救不得那九分清和之偏處了。」○輔氏曰: 不當學。」 \Box 味二子之行,則 不念舊惡,不以三公易其介,固是清和好處,然十分只 弊,所以孟子直説他隘與不恭,不曾究其末流 不至者其弊乃如此,只二子所爲,已有此弊矣。]○又曰: 不可由也。 至極之地。 其玩世,視他人如 「不恭是處己 以聖人顧二子,則二子多有欠闕處。 而至於聖,則是造乎至極之地 「夷、惠皆絶 如此,是待人如此?」曰: **《**語 所謂窄狹與簡 德 然既 無也。」夷、惠之行,固皆造 君子不由者,謂於理有不可 而不合中庸 録》曰:「夷隘,惠不恭,不必言效之而 有所偏, 慢者見矣。」❶○ 故好處直是可學,弊處却 也。 則 纔有欠闕 然其初不 不 『是待人如 能無弊,故)永嘉 由 如 能 處 此。 也。 此。 「由清 便 無 陳氏 偏 平 救 詳 如 蓋 有

孟子卷第三

後 學 成 德 校 訂

問: 0 狹」,原誤作「陜」,今據四庫本改。

君子不由

也。

隘

,狹窄也。

不恭,簡

慢也。

《語録》曰:

孟

子曰:「伯夷

隘

柳下

惠不恭。

隘與不

恭,

798

甲 日:

子旬

戌亥爲孤

,辰巳爲虚

甲戌旬 《史記》

西爲孤,寅

卯

「時,四時

也。

日,日

辰 也。

》註六甲 申

孤

虚法:

孟子卷第四

朱子集註 後 學趙順 孫 纂疏

之,即知吉凶矣。

地

利

險阻

一、城

池之固

也。

和,得民心之和也。

六十甲子日定東西

南

北四

方,然後知

其

孤

虚

實

而

向

背

○愚

調:

孤虚之法,以一

畫爲孤,無畫爲虚,二畫爲實,以

子丑爲孤,午未爲

虚。

Ŧ

相,如東方木,王相於郊之類。」

孤,戌亥爲虚,甲辰

旬:

寅卯

爲

孤,申

- 西爲

虚

甲

寅

旬:

爲

虚

甲

申

旬

午

- 未爲

孤,子

H.

爲

虚

甲

午旬

辰

巳爲

公孫丑章句下

凡十四章。 自第二章以下,記孟子出

天時

不如地利也。夫,音扶。

處 行實爲詳。

孟子曰:「天時 也。 類。 天時,謂時 氣之盛衰也。 録》曰: 支,十二支也。干,十干也。 王相指日時。」〇輔氏曰:「時,十二時也。 孤 虚以方位言,如俗言向某方利、某方不利之 其法具於兵書,所由來者遠矣。」〇蔡氏 日支干、孤 不如地利, 虚、王相之屬 地 孤虚,星 利 不如人和 也。 也。 日,十日 王相,五 《語

> 環而攻之,必有得天時者矣; 三里之城,七里之郭,環而攻之而不勝。 然而不勝者,是 夫

也。 之善者。 里七里,城郭之小者。 言四 面 攻圍,曠日持久,必有值天 郭,外城。 環,圍 時

米粟 城 和 也 非不高也,池 非 不 多 也 ; 非不 委 而 深也,兵 去之,是地 革 非不 利 堅 不如 利也,

人

革,甲 也。 愚謂: 古者之甲以革爲之,故函 人爲攻皮

之工。後世始用金曰鎧。 粟,穀也。 委,棄也。

言不得民心,民不爲守也。

天下順之。 道者寡助。寡助之至,親戚畔之,多助之至,險,威天下不以兵革之利。得道者多助,失败已:域民不以封疆之界,固國不以山谿之

域,界限也。

戰,戰必勝矣。」
以天下之所順,攻親戚之所畔,故君子有不

曰:「言得天下者,凡以得民心而已。」之道,而夫子所謂「我戰必克」者,皆爲是也。」○尹氏言不戰則已,戰則必勝。輔氏曰:「此帝王常勝

朝。」章内朝, 寡 也,有寒疾,不可以 人得見乎?」對 孟子將朝王,王使人來曰:「寡 並 音 潮 曰 : 唯 風。 朝 將 不 朝 之朝, 幸 將 視朝 而 如 字。 有 人如 疾,不 不 造,七 識 就 能 到 見 可 反 浩 使 者

下同

者,義 者,禮 衡 侯乎?」此以在其國 哉?」此以往他國 自尊之意,故不往見也。 事則王自來見,或自往見王,但召之則不可。 如見梁惠王,是惠王先來聘之。 幣來聘,故賢者受其幣而 説他不合來召。 則不可。 也。 子本欲朝王矣,王召之,則辭而不 疾以 王,齊 王不合託疾否?』曰: 也,則若之何而可往哉?」〇《語録 於齊,實處賓師之位 然。 其相見之節,王 也。 也。 召 物 王 有重輕 Ŧ 孟子,故 Ŧ 於此可見孟子之心至公無私 也。 而 不 召 知, 蓋在 則 之,則 而 孟 而 言。 權亦從而前 就而 而言。」」〇輔氏曰:「孟子本將 孟子亦以 ,而未嘗受禄,蓋 他 子 託疾以召孟子,故 『未論齊王託疾。 既 或 答萬章: 答陳代: 本 見 失禮 往 時 孟子則可, 將 見之,所 諸 矣, 却也。」 既至其國,或 朝 侯無越境之理,只得 疾 往 「天子不召 「如不待其 $\stackrel{>}{\exists}$ 王 而 何 辭 謂 其 非 孟子自 問: , 因 答禮 託 王 也?」曰: 也。 孟子 看孟子之意,只 齊 事 疾 不 Ŧ 八者, 爲實 制 師 招 行 亦 召之,則 「莫是以 一之所 或問 往 知 宜 義 而 以 而 又 而 (師,有 孟 , 如 往, 是 而 朝 不 見 得 疾 況 也 託 Ŧ 何 Ŧ

明日出弔於東郭氏。公孫丑曰:「昔者辭以

日愈,如之何不弔?」病,今日弔,或者不可乎?」曰:「昔者疾,今

時中之義也。 子以疾辭齊王而不往朝,然又出 取瑟 疾者,亦所以警教齊 見,然又取瑟而歌,使之知其非 者 東 **、郭氏** 5,疑 而 辭。 歌 ,齊大夫家 同 辭 意。 疾 Ξ 而 輔 也。 氏曰: 出 也。 此 弔 皆 「孔子以 疾,所以 昔者, 聖賢 與 弔東郭, 孔 至 警教孺 疾 子 昨 誠 而使之知 解孺 應 不 日 物, 見 也。 悲 悲 耐 也。 而 孺 得乎 其 不 悲 或 孟 非 出

於 曰:「請必無歸 王 命,有采薪之憂,不 次朝,我 使人問疾,醫 不識 能 ,而造於朝 來。 至 否 能 孟仲子對曰:「昔者有王 造 乎?」使數人要於路 朝。 ! 」要,平聲 今病 小愈,趨造

也。 孟 子者也。 而 造 仲子,趙氏 仲子權辭 朝 以實己言。 采薪 以 以對,又使人要孟子令勿歸 之憂,言病 爲 孟子之從昆弟 輔氏曰: 不能 「仲子雖學於 采 薪 學 孟子, 謙 於 孟 辭

> 情也。」 於儀之多而 然未免於世俗之習,懾於勢之尊 不 察 其意之不 誠 故 作 而 不知 此 態,是 在 己之有義,眩 亦 世 俗

敬 主敬。 堯舜之道,不敢以 言者, 豈以 子,外則君臣,人 與言仁義也』云 曰:「惡! 不得已而之景 王 也。」惡,平聲,下同 丑見王之敬子也,未 仁義爲不美也? 是何言也! 丑. 爾,則不敬莫大乎是。 之大 氏 陳 宿 於王前,故齊人莫如 倫 焉。 也 齊 景子 人無 見所以 其心 父子主恩, E 以 曰『是 : 敬 内 義 \pm 也。 我 與 君 何 則 我 非 足 Ŧ 臣 父

景丑 真氏曰: 善閉邪,責難於君之敬,聖賢之所行,故曰敬之大也。」〇 奔走承順之敬,世俗之所知,故曰敬之小。 告其君者乃敬之大者也。 言,敬之大者也。 歎辭也。 氏,齊大夫家也。 「景子但知聞 景丑所言,敬之小者也; 命奔走爲敬其君,不 輔氏 僕 日: 隸之臣 景子,景 「景丑之説,擎跽 唯 唯 知以堯舜之道 H. 承 孟子所言, 命 也。 孟子所 外外 曲 若 陳

也。齊人之敬君以貌,孟子之敬君以心。」 其君,然心實薄之,曰『是何足與言仁義』,此不敬之大者

不果,宜與夫禮若不相似然。」夫,音扶,下同。諾,君命召,不俟駕。』固將朝也,聞王命而遂景子曰:「否,非此之謂也。禮曰:『父召,無

不同也。
不同也。
不同也。
不同也。
不同也。
不同也。
不同也。
不同也。

之 ? 吾義, 及也。 民 日 党 與如: 德 :「豈謂是與? 曾子曰:『晉楚之富,不可 慊,口 ____ 是或一道也。 吾何 彼以其富,我以吾仁,彼以其爵,我以 簟反。 朝廷莫如爵、鄉黨莫如齒、輔 惡得 慊 乎哉?』夫豈 有 其 天下有達尊三: ,以慢其 不 義 一哉? 而 爵 曾 子 世 與 · 数 平 言 長

慊,恨也,少也。或作赚,字書以爲口衘物

自成一 齊王但有 所謂「曾子之説、蓋以德言」者、特指吾仁吾義云耳。」今 日: 也。 此三者。 一般道理也。」達,通也。 雖一本,而其用則有萬不同。 以爲言,是或 曾子之言,而云夫此豈是不義,而曾 意而言者也。 謂『吾何慊』、《漢書》所謂 所謂「慊於志」,則以銜其快與足之意而言者 不同耳。 快、爲足、 孟子言我之意,非 「自『天下有達尊三』以下,則 然則 樣。 禮經之説,固是正理,然曾子之説,又或 《大學或問》曰:「孟子所謂 曾子之説,蓋以 爵耳,安得 爲 慊 讀者各隨所指 恨、爲少 亦 别 但爲心 有一 如景子之所言者。 『嗛栗姫』,則以街其恨與少之 以 種 蓋 而觀之,則並 此 則 有所衡 時異時殊, 道 通天下之所尊,有 慢於齒 是孟子自 因 理 德言之也。 其 也。 事 之義, 「嫌於 則聖人處 行 説, 輔氏 而 德乎 也。 面不悖矣。」 耐 心」,樂 所 日 孟子所 子 其 大 集 衘 之各 别 輔 「道 註 引 有 爲 氏

焉,則 故 將 大有 就就之。 爲 之君 其尊德樂道 必必 有 所 不 ,不如是不足與有 召之 臣。 欲 有 謀

爲 也 樂,音洛

子之心也。 日 : 後 子曰:「古之人所以必待 大 有 往者,非欲自 「以爲欲自尊大者,世俗之見也。 爲之君,大有作爲,非常之君 君子之所爲,衆人固不識者,正謂此 爲尊大也,爲 人君致敬 不足與有爲者, 是故 耳。」輔 盡禮 也。 也。 而 程 君 Œ

故湯之於伊尹,學焉 桓公之於管仲,學焉 而 而後臣之,故不 後臣之,故不勞而 勞 而 Ξ, 霸

所 今天下地醜 教,而不好臣 先從受學,師之也。 德齊,莫能 其所受教。 後以 相 尚。 好,去聲 爲臣,任之也 無 他 好 臣 其

而

者 可 醜 役 也 類也。 使者 也。 尚, 過也。 所 受教, 所教,謂 謂 己之 聽從於己, 所 從 學

仲 湯之於伊尹,桓公之於管仲,則不 Ħ. 不 爲管仲 猶 不 可 '', 孟 召, 子自謂 而 況不爲管仲者乎?」 也。 輔 氏日 「孟子到 ·敢召。 此,不 管

> 悲矣。」 夫君。 爲恭 下日趨於大亂 而後德業成,此 富貴爲 「賓師 當 也。」范氏曰: 得已而 而 而不居職任事。」」〇此 惟知恃勢以驕夫臣; 德業成矣。 仕有官職 如何?』曰: 上下之情扞格而 直言之。 而 重 以 一, 而 極敗, 責 自然之理 者,故其言如此。」《語 不如 「孟子之於齊,處賓師之位 以 難 輔氏曰: 『當時有所謂客卿者是也 而 貴 陳 是,則公孫丑之徒 世 臣不能 不接,德之與 善 章見賓 德 俗 也。 「天地交而後萬物遂,上下交 猶以 爲 尊士爲 世 止 敬 一衰道 孟子爲迂 於敬 師 微,君 人君 不 業 賢, 而 終不足以知 涣 以 惟 濶 散 録 不能 則 不 趨 大概尊 知 於事,亦 偂 ĕ ∃ : Ŀ 自 以 走 無 止 屈 下 、成,天 崇 於仁 承 問問 禮之 以 此 交 高 順 陷 可 義

此矣。」 受。 受; 之受是,則前日之不受非也。夫子必居一於 ○陳臻問 前日之不受是,則今日之受非 於宋, 餽七十鎰 曰 : 「前日 而受; 於齊,王餽兼金一 於薛, 餽 也 <u>Ŧ</u>i. 百 + 今日 鎰 而 不 而

陳臻,孟子弟子。兼金,好金也,其價兼倍

於常者。一百,百鎰也。

孟子曰:「皆是也。

為斷制也。」 也,故曰皆適於義也。陳臻只就事上較量,孟子則以義不一也,以義言,則受者義所當受也,不受者義所不當受不一也,以義言,則受者義所當受也,不受者義所不當受

『餽贐。』予何爲不受? 贐,除刃反。當在宋也,予將有遠行。行者必以贐,辭曰:

贐,送行者之禮也。

餽之,予何爲不受?爲兵之爲,去聲。當在薛也,予有戒心。辭曰:『聞戒。』故爲兵

之也。

薛君以金餽孟子,爲兵備。辭曰:「聞子之時人有欲害孟子者,孟子設兵以戒備之。

有戒心也。」

也。焉有君子而可以貨取乎?」焉,於虔反。若於齊,則未有處也。無處而餽之,是貨之

二]。」去,上聲。 士,一日而三失伍,則去之否乎?」曰:「不待 ○孟子之平陸。 致也。 章,非特可以知辭受之義,而亦可以知所予矣。 之事,而尹氏併言辭受取予者,何也?」曰:「學者玩此 理則是適於義也。」○問:「孟子但有辭有受有取,初 當於理而已。」輔氏曰:「理,體也。義,用也。 無遠行戒心之事,是 ○尹氏曰:「言君子之辭受取予 謂其大夫曰:「子之持戟之 未有所 處 也。 取 當於 無予 唯 猶

兵也。士,戰士也。伍,行列也。去之,殺平陸,齊下邑也。大夫,邑宰也。戟,有枝

心,大夫名。對言此乃王之失政使然,非子之失伍,言其失職,猶士之失伍也。距民,老羸轉於溝壑,壯者散而之四方者,幾千民,老羸轉於溝壑,壯者散而之四方者,幾千

陳

氏

曰:「孟子一言而齊之君臣舉知其罪,

夫姓

也。

爲

王誦

其語

欲

以風

曉王

也。

我所得專爲也。

之求牧與芻矣。求牧與芻而 心之罪也。」爲,去聲。 人乎? 曰:「今有受人之牛羊而爲之牧之者,則 抑亦立而 視其 死與之與,平聲 死 與?」曰:「此 不得,則 反 則 諸 必 其 距 爲

子言若不得自專,何不致其事而去。 牧之,養之也。牧,牧地也。芻,草也。孟

休,都無那自訟自責之意。

如

此

則何緣會改。」

則寡人之罪也。」見,音現。爲王之爲,去聲。知其罪者,惟孔距心。爲王誦之。」王曰:「此他日,見於王曰:「王之爲都者,臣知五人焉。

曲 廟在豐。 爲 曰:「古之王者嘗爲都處,便自有廟,如大王廟在岐,文王 沃入晉,而 二王之廟。 都,治邑也。 武王祭大王,則於岐; 其先君之廟,則乃在 又如 晉獻 邑有先君之廟曰都。 公使申 生 祭文王,則於豐; 曲沃而不徙。」孔 祭于曲沃。 武 語 公雖 鎬京却 · ; 大 録 Á 蚔鼃

元不曾 雖知 理明 三山 贵 古 非 足 其罪 辭達,長於譬喻,而能感發於人故 人。○輔氏曰:「孟子一言而齊之君 以 説 有 興 大底規 而終不能 而 邦矣。 不釋,從 模。 改繹者,志小氣輕。 然 氣 而 輕 而 則 不改故邪?」陳氏,名暘。 齊卒不得 多率,多 也。 率 志小則易定,蓋 則 臣舉知其 爲 然齊之君 凡 善國 事 説 罪者 過 者, 臣 便

與?」蚳,音遲。鼃,烏花反。爲,去聲。與,平聲。也,爲其可以言也。今既數月矣,未可以言心。孟子謂蚳鼃曰:「子之辭靈丘而請士師,似

以諫刑罰之不中者。
所爲近似有理。可以言,謂士師近王,得
蚔鼃,齊大夫也。靈丘,齊下邑。似也,言

致,猶還也。

諫於王

而

不用,致爲臣

而

去。

則吾不知也。」爲,去聲。 齊人曰:「所以爲蚳鼃,則善矣,所以自爲,

譏孟子道不行而不能去也。

公都子以告。

公都子,孟子弟子也。

言責也,則吾進退,豈不綽綽然有餘裕哉?」 有言責者,不得其言則去。 曰"「吾聞之也"有官守者,不得其職則去; 也。 自以爲罪 是有言責者,孔距 孟子處實師之位,又未嘗受禄乎? 之,凡始進未受命者,苟上未見信,猶可以寬裕自守,況 若有官守,不信於上而 曰: 『夫子恐後人不達寬裕之意,居位者廢職失守以爲 輔氏曰:「在《易・晉》之初六曰:『罔孚,裕無咎。』程子 位,未嘗受禄。 綽綽,寬貌。裕,寬意也。孟子居賓師之 官守,以官爲守者。 ,故特云初六『裕則無咎』者,始進未受命當職任故也。 一有官守言責,則當自盡其職,不可如 ,然遂諫於王,而不用致爲臣 心是 故其進退之際,寬裕如 有官守者,蚳 失其職 言責,以言爲責者。 我 日不可 電開 宜 無官 而去。 其進 孟子之言 居也。」由 退寬 此 守 孔距心雖 矣。 裕 我 ,雖不 無鼃 是觀 如 此 無 此

> 省。 曰 : 之事,然懷是心以事君,則不恭甚矣。」 諫君,故其迹露,如 然耳,故其所爲無迹。 其如此也,則曰 之説,與上章「君子之辭受取予,唯當於理 學者須當學蚔 適莫於其間也,一 知其爲罪,却只説過了便休。 孟子之辭受、取予、進退、久速雖有不同,然非有所愛憎 嘗謂聖賢之曉人,常寬裕委曲 進退久速,當於理 鼃,則改過 聖賢之術也,而 當乎天理而 魏徵望 後世妄意聖人之所爲,而 勇 獻陵之事可 而進 已矣。 **電之資質賢** 不知聖賢 而 德當日新 己。」輔氏曰: 而無迫切之意,人見 玩 見。 味其 初 而已 於距 無 雖 也。」尹氏 心 能 同 也,理 心 可 挾 濟 「尹氏 多矣。 意,言 術 時 以

與之言行事也。蓋,古盍反。見,音現。 職爲輔行。王驩朝暮見,反齊滕之路,未嘗職子爲卿於齊,出弔於滕,王使蓋大夫王

公孫丑曰:「齊卿之位,不爲小矣,齊滕之曰:「使事,謂弔祭之禮,邦交之儀,凡禮文制數皆是也。」使也。反,往而還也。行事,使事也。輔氏蓋,齊下邑也。王驩,王嬖臣也。輔行,副

也?」曰:「夫既或治之,予何言哉?」夫,音扶。 路,不爲近矣。 反之而 已能治辨 之而不足與之言矣。 偂 有 不足與之言則忽,隘與忽,孟子無是心也。 孟子之不與驩言,不以爲惡之而不欲與之言,則以爲 則便有徇之之意,而不可謂之嚴矣。然自常情觀之,則 非 儀制數有曠闕不齊整處,而孟子固不與驩言而正之,則 『未嘗與之言行事』一 惡而嚴如此 孟子之待小人不惡而嚴之意。 治之而得其宜矣,自不須更與王驩言 之,言有司已治之矣。 王 無屈意,有容德 不惡而嚴之意耳。 所謂不惡矣。 蓋 其 攝 事 卿 而 今有司既已能治辦 不與之言 以行,故 而 輔氏曰:「『夫既或治之』,正答公孫丑 無過 夫惡之而不欲與之言則隘,易之而 句 故愚嘗謂,君子之待小人,有 也。 禮 ,則亦是順理 ,惡惡之心雖不能無,然亦 孟子言所謂使事,有司既已 日 未嘗與言行事, 使 孟子之待小人,不 齊 有司 卿。 其事,而 不能 也。 之事 只 夫既或治 治其事 但 而 猶與之言, 此句,便見 言 其 有 ,於禮 正 中 司 何 不 己 É 既

○孟子自齊葬於魯,反於齊,止於嬴。 充虞請

爲已甚之疾也。」

不敢請。今願竊有請也,木若以美然。」曰:「前日不知虞之不肖,使虞敦匠事。嚴,虞

也。嚴,急也。木,棺木也。以、已通。以邑。充虞,孟子弟子,嘗董治作棺之事者孟子仕於齊,喪母,歸葬於魯。嬴,齊南

人心。稱,去聲。 自天子達於庶人。非直爲觀美也,然後盡於曰:「古者棺椁無度,中古棺七寸,椁稱之。

美,太美也。

後於人心爲盡耳。 厚以歷久遠而已,非是欲爲人觀視之美也,蓋必如此,然 릲 取之《大過》可見。 度,厚薄尺寸也。中古,周公制禮時 七寸。」欲其堅厚久遠、非特爲 氏曰:「古者棺椁無度者,想只是過於厚,觀十三卦 稱之,與棺相 輔氏曰:「人子之喪親,所以爲之棺椁者,蓋欲其堅 稱也。 「盡於人心」此一句,須 至周公制禮時,始爲七寸之制也。」椁 輔 氏曰:「謂棺七寸,則椁 人觀 當自體之。 視 之美 也。 喪 若 而 亦 輔

後世之厚葬,却只是欲爲人觀美之故也。」

不得 爲有財,古之人皆用之,吾何爲獨不然? 不可 以 爲 悦 無財,不可 以 爲悦。 得 之

則尤分曉。 有財」,又是總説,必竟是兩意。 指棺椁言之也。 累之數,墻翣之飾 之故耳』。 文『得之爲有財』兩句礙,故解云『所以 輔氏曰: 得之而又爲有財也。 不得,謂法制 「先儒多以『七寸之棺,自天子達於庶人』,與下 《集註》不從者,此蓋 爲作 盖孟 而,是字誤也 所不當得。 既有 子 自 定制 做 兩 或曰: 則 句,❶分説下 孟子因 或者又以『爲當作而』, 不可得 得之爲有財,言 不得者,正謂 「爲當作而。」 而泛説葬禮 以爲悦」,非 來,『得之爲 無財 如 重 獨

墨子之葬以薄爲道

者

即

是此

意。」

比,必二反。 且. 比 化者,無使 恔,音效 土 親 膚,於人心獨 無 饺乎?

不快然 爲 比 死者 2,猶爲 不使 無 也。 所 土近 恨 化者,死者也。 乎? 其 肌 輔 膚 氏 日: ,於人子之心,豈 「謂厚其棺椁者, 恔,快也。 言 Œ

爲死者不欲使土近其肌

膚

耳。

惟

如

此

則人子之心始以

爲快而無所 慊恨 也。 有 所 か、恨, 則是有所不快處, 有 不 快

吾聞之也,君子不以天下儉其親。」 處 则 则 是其心有不盡 也。

是倒行逆施,不順 愛惜此物,而 送終之禮,所當得爲而不自盡 薄 理 於吾親 底。 於所 也。 厚 者 薄, 輔氏 則 \Box 無 是爲天下 所 如如 不 此 薄 則便

可。 噲。 下伐與、殺與同。 之吾子之禄爵 於子,則可乎? 沈同以其 有仕於此 子噲不得與 (私問 夫,音扶 而 夫士 何以 日 子悦之,不告 人燕,子之不得 「燕 異於是?」伐與之與,平 也,亦無 可伐與?」孟 王 於 命 王 受燕於子 而 私 而 子 受之 私 Ė 與

同問 沈同 命 來問 燕可 齊臣。 孟子必當詳告之,不但 伐否耳 ,固不問以 以 私 問,非王 齊伐 Ξ 八燕爲 可 一命也。 如 而 何 已也。一子噲 也。 輔 氏 若是以王 E : 沈

0 盖」,原誤作「兼」,今據四庫本改

違之事,不可以罪言矣。」仕,爲官也。 噲、子之之徒者。 皆有罪 天子,傅之先 子之,事 也。 見前 輔氏曰: 由其 君。 篇 (道,則 此 私 諸 以 侯、 謂不由其道,妄取妄予,如 三聖之授受,乃先天而天弗 與人,則與者受者 土地、人民,受之 士,即從仕

何爲 之?』則將應之曰: 之曰:『爲士師 之曰『可』。 日 齊 今有殺人者,或問之曰『人可殺與?』 『可』,彼然 :「未也。 人 伐 勸之哉?」 燕。 彼如 而 沈 或 伐之也。 問 同 則 日 問 日 可 二孰 『爲 : 以 燕 天 吏, 殺之。」今以 可以殺之?』則 勸 彼 可 齊 伐 如 伐 則 與』,吾 日 燕, 口 孰 以 燕伐 有 應之 可 則 伐 諸? 將 以 將 之。 燕 應 伐 \vdash 應

蓋 以 天 吏,解見上篇。 傳 燕伐燕也。 聞 此 説 之誤。 《史記》亦 言 《語録 齊無 謂 $\tilde{\exists}$ 道 孟 一,與 「孟子居 子 勸 燕 齊 無 齊許久,伐 伐 異, 燕 如

> 此,固 必伐,但曰『爲天吏,則可以伐之』。」○楊 子豈 子之言 虜 君 古 燕之事必親見之,齊王乃無 又曰:「孟子言伐燕有四,須合而觀之。 云:「此 師之暴虐耳。 語 其子弟,而後燕人畔之。 , 弔其民, 何不可之有? 可 可更居 諫 有可 伐 之,何 湯武之舉 矣,故 伐之理。 則誤矣。」 齊邪? 也? 不然,齊有一大事 也。」』想承此誤,然亦 孟 想得 《史記 然孟 子 孟 子不曾教齊不伐,亦不曾 日 子 * : 亦 可。 語 必以伐之爲 如此,而 「鄒 謀 於孟 使 乃以 人 乃殺 齊 有 孟 燕之父子 子, 齊 軻 不 氏 是歸 王. 王不 勸 可曉 而 其父兄, 日 : 「 能 齊 但 孟 相謀, 君 者。二〇 \pm 子 咎孟 不 誅 教 伐 臣 亦 燕 其 孟 齊 無

之人也。

公使管 不仁也; 且. 陳 智?」王 賈 燕人畔。 齊 破 日 叔監 燕 不知 王 後二年,燕人共立太子平爲 日 王曰:「吾甚慙於孟子。」 殷,管叔 無 而使之,是不 、患焉。 「悪! 以 王自以 是 殷 何言 畔。 智也。 爲 也?」曰:「 知 與 周 而 仁智,周公 使之,是 公,孰仁 王 周

七九四

惡、監,皆平聲。 未之盡也,而況於王乎? 賈請見而解之。」

所覬 使管 公兄 而誅戮之。」 王 討 成 陳賈,齊 悟 而 王 観,故流言 迎 誅之。 也。 幼 叔 周 與弟 公歸 周 大夫也。 武 公攝 蔡氏曰: 公將 蔡 \pm 叔 勝 叔 懼 不 政。 利 商 遂 一周 霍 管叔,名鮮, 於孺 殺 與 管 公攝政,管叔於周公爲兄,尤 叔 武 紂 子。 叔 監 庚 叛 與 立 周 其 公避 紂 武 或 成 子 武 E 庚 位 命 畔 武 武 王 居 周 東,後成 弟 庚, 王 公征 周 崩, 公 而 周 討

亦宜 也。」 曰 : 諸 見 與?」曰: ? 孟 乎? 子問 日 周公,弟也; 日 \exists 與,平聲 「不知也。」「然則 「然。」 使 : 管 周 叔 日 管叔,兄也。 公何 監 : 殷, 周 公知 管 也 聖人且 叔 ? 曰 : 其 以 周公之過,不 將 殷 有 畔 「古聖 畔 過 而 與?! 也, 使 之 有 人

言周公乃管叔之弟,管叔乃周公之兄,然

0

情

原誤作「盡」,今據四

庫本改

兄,宜 矣。 是《集 也。 惡則 此 詎忍 富貴 以爲 則周 也?」游氏 故,不忍料其兄之惡而使之,故不免有過。 知 是怕武庚叛,故遺管、蔡、 不免矣。 曰 他反去與那武 天 『周公之過,不亦宜 註 舜 理 舜 未 公不知管叔之將 而已,故 逆 周公之處 無 》採 與 著, 人 誠 探 周 不 **《**語 程 信 倫之至,其 其 公皆 盡者。 曰:「象之惡已著, 一子、游 而 録 而 庚同 兄之惡 舜 其 是 \mathbb{H} 喜 得 志 管 處 氏 作 管 象, 周 聖 兩説 以 其 叔,不 霍 乎」,不 黨。」○輔 人之不幸,使 公當 用 是而 叔去監他,爲其 周 叔 而 才 合 畔 心 公誠 棄 皆 之事,聖人之不 而 初 愐 説 全之; 如 成 之邪? 非 也 周 使之,其 氏 之,可 也。 看那 舜 公爲 象 信 \exists 其 而 之 比 而 兄弟不 易 若管叔之 無過 至親 其 謂 輔 周 是以 處 也, 任管叔, 地 周 氏曰: 曲 志 過 公以親之 也。」或 而 象 可恃,不 孟子 盡 公愛 過 周 處 不 有 人 此 公 调 何 所 亦 情 則 本

然也。 此乃是以天理 處人倫之極至處

之,又從爲之辭。」更,平聲。 之,及其更也,民皆仰之。 且古之君子,過 古之君子,其 則改 過也,如 之。 今之君子, 今之君子,豈徒 日月之食,民 過 と皆見 則 順 順

則 篇 故 矣。 其臣 後之次,故其説 沮其遷善改過之心,長其 慙於孟子,蓋羞惡之心有不能自已者。 而 過 無損於明,故民仰之。 順,猶遂也。 + 孟 孟子深責之。 教之以 愈深矣。 子之意,不待論説 章十一章,置於前 有能 而 陳 賈 因是心而將順之,則義不可勝 遂非文過 責賈不能勉 鄙 更,改也。 夫,方且爲 必參考而 然此書記 也。 章之後,此章之前 而 順而 辭,辯也。 其君以遷善改過 〇林氏 後 自明 之曲 飾 事,散出 通。 非 爲之辭,則 矣。」輔氏日 拒 爲 曰 : 若以第二 諫 辯 更之 而 説, 齊 之惡 無先 其 而 用 使 Ŧ 則

所

能因 之言深切 是心而將順之者 ,皆甚分明 則 有 如 以 孟子因 啟 發萬世之爲 一齊王見牛不忍之心 君 臣 有

林氏説得齊王之心發處,與陳賈之意邪處,孟

子貴

陳

賈

孟 子 致爲 臣 而 歸

引之使保民者是

也。」

孟子久於齊而道不行,故去也。

孟子 王就見 朝,音潮。 而 口 矜式。 得 朝 室,養弟子以萬鍾,使諸大夫國 甚 見乎?」對 喜。 孟 他日,王謂 子盍爲 子,曰:「前 今又棄寡 曰 : 我言之?」爲,去聲 時子 示不 日願見而不 人 而 敢 曰:「我 請 歸 耳 不 欲 識 古 可得,得侍, 中 所 口 人皆 或 願 以 而 也 繼 有 授 此

案: 盍 + 穀 時子,齊臣 釜 一,何不 禄 四豆爲區,區受斗六升。 爲 之數 鍾 ,受六斛四 也 也。 也。 鍾,量 中 斗。 國、當國之中 矜, 名,受六 四區爲釜,釜受六斗四 敬也。 斛 式,法 也 四 斗。 萬 也。 鍾 升。 愚

貴 ?

而

獨

於富貴之中,

有

私

龍

斷

馬。」

龍

亦已

矣,又使其子弟

爲

卿。

人亦

孰

不

欲

富

音壟。

陳子,即陳臻也。

之饋 較中 日: 設使我誠欲其富 去,乃爲道之不行,而於義不可不去耳。 欲 辭 言。」故但言設使我欲富,則我前日 留 孟子既以道不行而去, 富 十萬之禄,今乃受此 來。 則豈 顯言之,則計揚齊王之失,而有戾於我『固所願』之 而 ,亦不爲 若孟子之意,則道合 時子不知,則 欲富者乎? 則 此 前日 也。 齊王、時子之事,是 方辭 輔 又 則從,不可 氏 萬 十萬之禄,今日乃 有 則 日 鍾之饋 難 以其義 顯言 謂 則去,惡 今乃以是誘我, 時 不 皆就 子不 爲 者。 可 是我 卿, 人欲計 受萬鍾 知我之 用 以 輔 是多 雖 嘗 復 氏

> 異 卿。 下文。 此 不得於此、 不敢效此之意。 子引此以 彼,如下文賤丈夫登龍斷者之所爲 知 此 何 孟子引季孫之語也。 市者, 矣。 時 季孫譏 蓋子 人。 而又求得於彼 輔氏 明道既 以其 其既不得於此 叔 龍 辭 \Box 疑 禄 斷 舉 所有易 人者嘗 而 不行,復受其禄 受饋, 也。 尚 季 孫所譏子 壟之斷 不 雖 其 用 季孫、子叔疑,不 多寡之不同 所 而 而 叔 而 無 疑之事,以 又 使 者,有 高 其 欲 也, - 等 則 求 子 也 竟是 弟 司 無 義 得 見 者 以 孟 於 爲 見 以

之。 治之耳。 古之爲 左右望 征 商 而 有賤 自 图 市 此 丈夫焉, 利。 践 丈夫始矣。 人 皆以 必 求 爲 龍 賤, 斷 而 故 登之, 從 而 征

季

孫

日

『異哉子叔疑!

使己爲政,不

甪

則

孟

子

釋

龍

斷

之説

如

此。

治之,

謂

治

其

争

:

端也

哉?

辨明之。」 受。」輔氏曰: 尊 亦非 氏曰: 利 謂 訟 图 孟 「齊王 子, 不肯爲 「文王關譏不征 左右望者,欲得 羅 就征 取 乃 之也。 所以 其 欲 國 程 税 子恐讀 以 人矜 處孟子者,未爲不可,孟 後 ,是三代之初皆如是也。」○程 利 從 世緣 、式者。 誘 書者不察,誤認 而征之,謂人惡 此 之, 而 此 又取 故 遂 但 征 孟 一齊王 商 彼 子 孟子之意,故 人也。 也。 拒 實 其 非 而 罔, 不 欲 子 子 專 輔

獲。」下同 孟子去齊,宿於晝。 晝,如 字, ,或曰: 「當作畫 音

有欲爲王留 書,齊西南 行者,坐而 近邑 也 言。 不應 隱 几 ௱

团

爲,去聲,下同。

隱,於靳反

聽 客不悦曰:「弟子齊 隱,憑也。 請 勿 復敢見矣。」曰"「坐! 客坐而言,孟子不應而 宿 而 後敢言,夫子 我明 卧 卧 也。 語 而 子。 不

事

身。 思; 昔者魯繆公無人乎子思之側, 泄 齊,側皆反。 柳、申詳無人乎繆公之側 復,扶又反。 語,去聲 則不能 則 不 能 安子 安其

出於此 柳嘗閉門以避繆公,豈既 乎?」○輔氏曰:「此李先生説也,謂 如此 曰 : 也。 其身』,恐繆公不察己之誠 之譽己者是也。 能 人譽己於君側乃能 有賢者在其君之左右維持調 繆公尊之不 齊宿,齊戒越宿 君,義不苟 安其 候 「非謂二子之心爲然也,語其勢則然耳。 ,則與世之垢面汙行而事君側、便嬖之人者,何 輔氏曰:「好賢之心切,唯恐有不當其意,故 何道達誠意於其側,乃 也。」泄 (身矣。 合,非 柳,魯人。 如子思,然二子義 「泄柳、申 或問: 二子之賢,其 有賢 自 安,則 也。 者 仕 詳無人乎繆公之側,則不能 也。 爲之主側,必不見容, 是奸道 而若 繆公尊禮 申詳,子 「繆公無人乎子思之側 此乎? 也,豈 若謂二人必欲常 護之,則亦不 能 心固 足爲賢 張 子 蓋二子 不苟容,非 安 若二子之心 之子 思, 如是乎? 而 直 其計 常 留 道 況 以 欲 也 之 使

詳,則又只得如此耳。 影之相似也。 子固不若子思矣,然子思之與二子,事 之弗察其誠 弗察其誠 則不能安子思」,恐子思弗察己之誠也。 ,則其 則 德若子思,則亦應有此,若只及得泄 其合也易,其行 合也難 下是,則 其 行道 道也不難。 也 不易。 皆其所自取 使 臣 君也。」 繆公之待一 其 而 惟 君 唯 恐君之 柳、申 恐己 如 形

者絶子乎?」長,上聲 子爲長者慮,而不及子思,子絕長者乎? 長

荷容以徇君

也。 在子思之下,故意或人之爲我謀,不及繆公留子思之事 不應,豈爲先絶子乎? 繆公留子思之事,而先絶我也。我之卧 子自欲爲王留我; 是所以 長者,孟子自 蓋有欲爲王留行者,雖有愛賢之意,而不知待賢之 稱 也。 言 齊 輔氏曰:「孟子之自處不 爲我謀者,不 王不使子 來, 及 而 而

以 則 爲湯 是干澤也。 孟子去齊。 武,則 千 是不 尹士語人曰:「不識王之不可 里 明 而 也; 見王,不遇故去。 識 其 不 可 ,然且至, 三宿

禮,故

孟子告之如此。」

而後出畫,是何 濡 滯 也? 士則 兹不悦。」語

去聲。

尹 士,齊人也。 干,求也 澤, 恩澤 也。 濡

滯 遲留 也。

高子以告。

高子,亦齊人,孟子弟子 也。

曰:「夫尹士惡知予哉?

千里

而

見王,

是予

所欲也,不遇故去,豈予所欲哉? 予不 得已

也。夫,音扶,下同。惡,平聲

見王,欲以 而 去,非 本欲 行 如 道 此 也。 也。 今道不行,故不 得已

之。王如改諸,則必反予。

予三宿

而

出畫,於予心猶以爲速。

王庶

幾改

當時 曰 : 所 改 然孟子不言其事,故不可考。 「度孟子之於齊王,必有爲之兆者,王 人自知之也。」 必指 事 而言, 然今不 其所以 -可考 不能 不言者,或 矣。 用 故 輔 去 氏

夫出晝而王不予追也,予然後浩然有歸志。| 尹士

用 子 雖 子 ', 則 豊 豈 徒 舍王 齊民安,天下之民舉安。 一哉? 王由 足用 爲 善。 王 王 庶 如

幾改之,予日望之。

氏曰: 欺,又與 若乃其 樂,皆以直告 然以爲足用 終不可與 浩然,如水之流不可 天資朴實,如好勇、好貨、好色、好 孟子不 「齊宣王資質大略與齊桓公、漢高 (孟子問答不忍之心時 心不 爲善。 (入堯舜之道矣,何善之能爲?]輔 得已而 然,而謬 而 然終是志 去之。」 不隱於孟子,故足以爲善。 止也。 爲 亦 不足以帥 大言以欺 有所 楊氏 發 氣,道不足以 祖相 明 曰:「齊 故 人,是人 似,樸實不 世俗之 孟 子 拳拳 Ŧ. 勝

則怒,悻悻然見於其面。去則窮日之力而後予豈若是小丈夫然哉? 諫於其君而不受,

悻悻,怒意也。窮,盡也。

宿

哉?」悻,形頂

反。

見,音現

尹士聞之曰:「士誠小人也。」

릲 三王庶 若荷蕢之果於去也。」 蓋得時 皆是憂則 聖賢之心。 也。 民 此 而 意1°]李氏曰:「於此見君子憂則違之之情 之民舉安』,此其『行道濟時汲汲之本心』。『三宿出 荷 惓惓之餘 章見聖賢 此與孔子去魯之心同。 餘 . 蕢者所以 幾改之,予日望之』,此其『愛君澤 行道者,聖人之本心,不遇而去者,聖人之不得 意,則後來不得已之意耳。 違之,但荷蕢果於去,不若孟子之『遲 『千里見王』、『王如用 行道 意。 爲果也。」《語 輔氏曰:「本心,謂其 濟時汲汲之本心,愛君 蓋聖 賢憂世濟時之誠心,非 子, 豈 録》曰: 詳 玩 特 此 齊民 兩句 「孟子與荷 民 初 惓 遲吾 本欲 安,天下 倦之餘 便 行。 可 如 澤 普 見 此

尤人。』」 ○孟子去齊。充虞路問曰:「夫子若有不豫

此二句實孔子之言,蓋孟子嘗稱之以教路問,於路中問也。豫,悦也。尤,過也。

八〇〇

耳。

曰:「彼 一時,此一時也。

彼,前日。 此,今日。

五百年必有王者興,其間必有名世者。 而 自堯、舜至湯,自湯至文、武,皆五百餘年 聖人出。 名世,謂其 人德業聞望 可

尹、萊朱、太公望、散宜生之屬。 於一世者,爲之輔佐。 若臯陶、稷、契、伊

由周 以其時考之則可矣。 而來,七百有餘歲矣。 以其數則過矣,

夫天,未欲平治天下 得 時,謂亂極思治可以有爲之日。於是而不 周,謂文、武之間。 有所爲,此孟子所以不能無不豫也 也,如欲平治天下,當今 數,謂五百年之期。

言當此之時,而使我不遇於齊,是天未欲

之世,舍我其

誰

也?

吾何爲不豫哉?」夫,音

則並行而不悖也。 天爲一之誠也。 與民同患之仁也。 此見矣。輔氏曰:「不能無不豫者,憂世之心也,所謂 未欲平治」以下觀之,則孟子實未嘗不豫也。」蓋聖賢 年」至『則可矣」觀之,則孟子不能無不豫然也。 我,我何爲不 平治天下也。 憂世之志,樂天之誠,有並 豫然者,而實未嘗不豫 憂樂,自常情觀之則 豫哉? 即此章之事,則可見矣。」 然天意未可知,而其具又在 實未嘗不豫者,樂天之事也,所謂 然則 也 行 孟 相反,自聖賢言之 輔 而 氏 子 EI: 不悖者,於 雖若有不 「自己五百 自『夫天

名

禄,古之道乎?」 孟子去齊,居休。 公孫 丑問曰:「仕而不受

休,地名。

不欲變,故不受也 曰:「非也。於崇,吾得見王。 退而有去志,

故有去志。 崇,亦地名。 變,謂變其去志 孟子 始見 齊 王,必有所不合,

志也。」 繼 而 有 師 命,不可 以 請。 久於齊,非 我

造此 《語録》曰:「或謂師友之師、非師旅之師。 否則變,如此,然後得乎時措之宜也。公孫丑之學,未能 變也。蓋禮則一定,義則權其禮之可否者也。 齊禄,禮之變也。君子以義起禮,故義之所在,禮有時而 子室,乃孟子辭去時。 亦誤乎?」輔氏曰:「仕受禄,禮之常也。 孟子之不受 在,禮有時而變,公孫丑欲以一端裁之,不 王時事。 師命,師旅之命也。 而受禄,禮也;不受齊禄,義也。義之所 故欲以 以此考之,則師旅爲當。二〇孔氏 端裁之,此其所以誤也。」 所謂「於崇,吾得見王」,則初見齊 國既 被兵,難請 曰:「欲授孟 曰:「仕 可則 去也 行,

後學 成德 孟

子卷第

四

校訂

孟子卷第五

朱子集註 後學趙順 孫纂 疏

滕文公章句上

凡五章。

滕文公爲世子,將之楚,過宋而見孟子。

世子,太子也

孟子道性善,言必稱堯舜。

言,每道性善,而 欲之蔽,而 異,但衆人汩於私欲而失之,堯 渾然至善,未嘗有惡。人與 道,言也。性者,人所稟於天以生之理也, 能 充其 必 性 稱堯舜以實之。 爾 故 堯 孟 舜 子與 舜 則 初 欲其 世 無 無 子 私 少

得盡,須是日日認

過。」〇又曰:「性善,故人皆可爲堯

强爲。 舜以實之也。」〇《語録》曰"「七篇論性處,只 其勢至順而 吾日用之間 益於性分之外也。 但以其氣稟清明,自無物欲之蔽,故爲堯舜,初非有所增 所蔽而不能去,則爲愚爲不肖。 累,而能克以正之,則爲賢; 而性之善未嘗不同 累,則爲聖; 爲物,有清濁昬明之不同,稟其清明之氣, 性善也,信之益篤,而守之益固矣。」○《文集》曰:「天之 欲生此物,必須有氣,然後此物有以聚而成質。 生此人,無不與之以仁義禮智之理,亦何嘗有不善? 善,則有以知堯舜之必可爲矣。 堯舜者,質其事以實之,所以互相發也。 知仁義不假外求, 於用力也。 識得堯舜做處,則便識得性善底規模樣子。 無難,此孟子所以首爲文公言之,而又稱堯 ,所以去人欲復天理者,皆吾分内當然之事· 稟其氣清明而未純全,則未免微有物欲之 或問此 也。 故學者知性善,則知堯舜之聖,非 堯舜之生,所受之性,亦 節。 聖人可學 稟其昬濁之氣,又爲物欲之 曰: 是皆氣稟物欲之所爲 知堯舜之可 「性善者,以理言之,稱 而 其言蓋曰:知性 至,而 而 此 爲,則 無 如是耳 處較説 物 而氣之 不 耐 欲 其 懈

然獨立乎萬物之表,而天下之至貴,無以復加矣。 舉天下之人汩没於利欲之中,貪夫殉財, 何。」〇黄氏曰:「性者,人之所得於天之理 「性」字上,今且合思量如 無物欲之蔽而充其性。 ,品庶馮生,天之所以與我而堯舜可 能深思孟子之言 改得。」程子 無雲, 「不蔽於彼 ,然也只是本分事。」〇 處。 柰何。 表裏。 驗性善之實。二〇又曰 而 性,堯舜可爲也。 爲 充不能充? 豈 撮 孟子自 何 曰 : 而厲之以 物 應 人蓋有恬 是性? 其大旨 欲亦 然人須當以 蓋人所以不至於堯 不見? 则 则 [著,則 有 性 一蔽於 自 必 多少般,如 在 即 然此 於嗜慾 如 論 彊之志,則將 我爲 此; 似 理 道之不明久矣 烈士殉名,夸者 堯 此處皆 此。 爲者,懵然莫覺 堯舜爲法 問: 等 不 也。 如 也。 何物? 「「道性善」與 脯 處 「惟堯 何,舜又如 蔽 白 輔 不 當當 堯舜者 於 舜者,是 緊 門人 能 天下 氏 H 改,此 此 有 反求 方做 要 須 充其 日 舜 則 超 在 是 爲 理, 基。 撲不 也?」曰:「先有理而後有氣也。」〇真氏曰: 失了性,却不是壞了着修。」〇又曰: 心唤做性,在事唤做理。」〇又曰:「「性 道 與爲對矣。 哉? 語 皆先善而 天之下,莫非王土,率土之濱,莫非王 本無對,然既有惡,即善便不得 對,然既有人欲,即 言是非,皆先是而 善,發不中節,然後爲不善。 未 之 ○《語録》曰:「性只是此理。」○又曰:「性是天生成許 理。」〇又曰: 理 發, 無有不善者。」〇 直自孔子後,惟 玾 破,實自己上見得 至於晉有五胡, 京原 是箇公共 何 但其 其 嘗 後惡;言吉凶,皆先吉而後 所自,未有 不 「性是許多理散 (初則 底 善。 是伊 物 天理便不得不與人欲爲消 問: 唐 事 有善而無惡,有 出 不 ĴΠ 有 後非。」《文集》曰:「天理 發 「凡言善惡,必 來。」〇又曰

死權

盡

此

性者也。

苟

盡此

吾

心,有蔽

無赦?

能

蔽於彼,畢竟

須有

蔽

遮方不

見,若

性 能 得 他

者,何

.故?」曰:

箇人,無所欠闕

力量不至,

固

無可

堯舜」二句,正

相

而

中

節

即

無

往

而

不

故凡言善惡

M

固

無

不

善。

喜、

怒、哀、

舜 「稱

必

稱

堯舜,所以

也。

誠

不能

悉

記其

辭,

説得

盡。

是千萬世

一説性

之根 自

「如「性即

理

也」

即理

也」四字,攧

解會

不善。

不是,

是

性

即理 人做

也,當然之

先

善

而

後惡,何

「性即

理

也

朱子既斷孟子之書以

後來不曾

八〇三

三鎮,則華夷逆順,不

得 贵

相 料

天理

而無

人欲

耳 不 有

名

在處爲性。」〇又曰:「在

不與惡爲盛衰

譬

如

普

長。

善

亦

臣」,此

本

言乎? 世子自楚反,復見孟子。 往亦不復 來,迎而謂 有所疑矣,是其可與進善之萌芽也。 不知己性之本善 之,而實喜其能 復來,則豈其思之未得,而不舍於心與? 時所常聞 性,前言已盡,無復有他說也。 之,故但告之如此,以明古今聖愚 求見,蓋恐别有卑近易行之説也。 及,故世子於孟子之言不能無疑, 時 乃自昔聖賢之所未言,萬世言性之標準。」 孟子之言,而孟子之不拒,何也?」曰: 當戰國之時 人不知性之本善, 夫道 致疑於其間。 也,故聞者非 之日 ,聖學不明,天下之人但 思, 『世子疑吾言乎』,而又告之曰『夫道 ,聖賢之可學。 而已矣。 而 將 徒不之信,而亦莫之疑也。 若文公,則雖 有 以進乎此 愐 復,扶又反。 孟子曰:「世子疑吾 聞是説者,非 以 聖 故孟子於其 也。」〇《文集 未能 知功利 一賢爲 「孟子之言、非當 或問:「世子疑 故孟子雖若 夫,音扶 盡 之可 信 惟 本同 孟子知 不 而 不 去 而 可 求, 復 \mathbb{H} 而 E 世 企 來 而 復 能 怪 子 往 耐

也?

有爲者亦若是。』公明儀曰: 『文王我

師

也,周公豈欺我哉?』眼,古莧反

何畏彼哉?』顏淵

티 :

『舜何人也?'予

何人

成

覸

謂

齊景公曰:

『彼

丈夫也,我

丈夫

也

吾

則言世子比當時之人,則尚 其義始備。 相 乃人之所本有,而爲之不難乎?」○輔氏曰: 但 礙。 |在篤信力行,則天下之理雖 《集註》則言世子所以致疑者,其意如 性本一理 丁則道 無二致 能致疑於其間 有 至難,猶 以故也。 」 必可 二説 此 至。 相須 説 《講義 自 況 善 不

若是」,言人能有爲,則皆如 欲世子篤信力行 世子以道無 周公之言。 姓,儀,名,魯賢人也。 「文王我師也」,蓋 成覸,人姓名。 誦周公之言,而歎 公明儀 二致,而 彼,謂聖賢也。 其不我欺也。 以 亦以 師 復引此 聖賢,不當復求他 文王爲 舜也。 三言以明之, 必可師 有 孟子既告 爲者亦 公明, 故

●「二」,原誤作「三」,今據四庫本改。

蓋古今聖愚,同此一性,則天下固不容有二道,

勇猛 外更無別 説 也。 一向前,日用之間,不得存留一豪人欲之私在這 《文集》曰:「孟子引三段説話,教 法 若如 此 有箇奮 迅興起處,方有 人如此 田地可 漫裏,此 發 下 憤, T.

^{莫甸反。眩,音縣。}國。《書》曰:『若藥不瞑眩,厥疾不瘳。』」與,今滕,絶長補短,將五十里也,猶可以爲善

夫,不然,即是畫脂

鏤冰,無真實得力處也。」

《告子》之篇。 愚案: 孟子之言性善,始見於此,而詳具於 能自克,則不足以去惡而 言滕國雖小,猶足爲治,但恐安於卑近,不 蔡氏曰:「《方言》曰:「飲藥而毒,海岱之間謂之瞑眩。」」 眩之藥相似,教他麻了,❶一上及其定疊,病自退了。」○ 病,直是不可悠悠。」〇又曰:「大要爲聖賢,須是猛 眩,憒亂。《文集》曰 絶,猶截 此可見孟子之所謂性與道 也。 然默識 書 如如 商 非外 而旁通之,則七篇之 服瞑眩之藥,以除深錮之 書 事與物而言之也。」〇 爲善也。輔氏曰: 説命》篇。 喫瞑 瞑

> 外者。 端,蓋其大者,至於因齊王之愛牛而勸之以行王 也。」〇真氏曰:「七篇之中無非此意者,如言仁義,言 故知得孟子此説真能擴前聖所未發,而有功於聖人之門 風旨,凡孟子所説許多義理,皆自此流 有功於聖人之門,程子之言信矣。 「性善是那義理之綱領,識得性 因人不識其性善,故言不及。 盡、則凡出處語默、言 惟程子學已至 出,無有一事 輔 氏 政, 日 四

○滕定公薨。世子謂然友曰:「昔者孟子嘗與我言於宋,於心終不忘。今也不幸至於大與我言於宋,於心終不忘。今也不幸至於大與我言於宋,於心終不忘。今也不幸至於大

因其性善而引之當道也。

以此推之,他可識矣。」

死,葬之以禮,祭之以禮,可謂孝矣。』諸侯之親喪固所自盡也。曾子曰:『生,事之以禮,然友之鄒問於孟子。孟子曰:「不亦善乎!故,大喪也。事,謂喪禮。

「教他」上,原衍「服」字,據《朱子語類》卷一百十八删。

0

中,無非此理。其所以擴前聖之未發,而

三代共之。」齊,音資。疏,所居反。飦,諸延反。喪,齊疏之服,飦粥之食,自天子達於庶人,禮,吾未之學也,雖然,吾嘗聞之矣。三年之

不及也。」齊,衣下縫也。 母之懷也,故爲之立中制節,使賢者不得過,不肖者不得 曰:「人子之心無窮也,聖人以爲子生三年,而後免於父 之喪者,子生三年,然後免於父母之懷,故 H 父母之喪,必以三年 者,豈曾子嘗誦之以告其門人歟? 三年 已也。但所引曾子之言,本孔子告樊遲 子之心所自盡 當時諸侯莫能行古喪禮,而文公獨能以此 意,非自外至,宜乎文公於此有所不 孟子答滕文公喪禮,不説到細碎上,只説『齊疏之服,飦 「齊衰。 ?問,故孟子善之。又言父母之喪, 三日 疏,麤 始 食粥。 者。 也,麤 既葬,乃 蓋悲哀之情,痛 布 也。或問:「三年之喪。」 不緝 也。 疏 飦,糜也 日斬衰,緝之 食。 《語録 能 疾 古 ₩ ⊟ : 之 喪 自 人

是無貴賤之别。三代共之,是無古今之異。 古今貴賤通行之禮也。愚謂:自天子達於庶人, 年之 粥之食,自天子達於庶人』這二項,便是大原大本。」此

之行也,至於子之身而反之,不可。'且《志 欲,曰:「吾宗國 然友反命,定爲三年之喪。 曰:『喪祭從先祖。』」曰:「吾有所受之也。」 《志》之言而釋其意。 傳,禮文小異而 也。 宗國也。《語録》曰:「古宗法: 爲上世以來,有所傳受; 失,非周公之法本然也。 者,則皆以魯國爲宗。 然謂二國不行三年之喪 而魯祖周公爲長。 父兄,同姓老臣也。 然《志》所言,本謂 魯先君莫之行,吾先君 可以通行者耳,不謂後 至戦 兄弟宗之,故滕謂魯爲 國時, 滕與魯俱文王之後 以爲 雖 先 者,乃 滕 父兄 如周公兄弟之爲諸 《志》,記也,引 所以 王 或 猶稱魯爲宗 之 不同,不可 如此者,蓋 世 其後世之 百官皆不 舊 國也。 俗 亦莫 # 所 改

失禮之甚者也。

聲。 草 子 有 官有司 薨,聽於冢宰。 事,子爲我問孟 今也父兄百 謂 也。 甚 然友 曰:「然。 復,扶又反。 馬 者矣。 草尚之風必偃。」是在世子。」好、爲,皆去 ,莫敢不哀,先之也。』上 曰:「吾他 不可以 官 歌,川 『君子之德,風 不 歐粥 子。」然 悦反 我 日 他 足 未嘗學問 面 求者也。 也、恐 友 深 復之鄒 墨。 也 其 '; 好 有 即 孔子曰:『 不 問 小人之德, 好者,下必 位 馳 能 孟 而哭,百 馬 子。 盡 試 於 劍 君 孟 大 大悦

也。 即 卿 而 其不我足之言。 E 之長 就也。 我足,謂不以 輔氏曰 偃,仆 輔 也。 氏曰: 也。 尚,加 「是應 歠, 「是應上句『不可他求』之意。 孟子言但 前 我 飲 不 也。 面 滿足其 也。 可 固 他 所 論 自 |求者,言當責之於 深 在 語 盡之說。」冢宰,六 意也。 墨,甚 世子 》作上,古字 自 然者, 黑色也 盡 其 哀 通 然

> 葬,四 居 然友反命。 廬 未有 方 來 命戒。 觀之,顏色之戚,哭泣之哀, 世子 曰:「然。 百官族人 可 是 謂 誠 在 我。」五 知 及 至 月

信 行 不自 哀 説 也。惟其溺 若作「可」字,則 疾之意,出於人心之所固 時 也。」輔氏曰: 知 居 諸 喪禮既 疑 喪不 痛之誠心發焉。 則 侯五月 則 而 知 不 固 有闕 亦 耳。 言, 敢 反 有 而葬,未葬,居倚廬於中門之外。 有非其父兄百官之心。 躬 以 誤。 壞,然三年之喪,惻 於流俗之弊,是以 「若如或者之説 故 不成文理。」〇林氏 文公見孟 自 啟發其 未有 [責,悼: 或 曰 : 命 及其父兄 良心 其 子 **令** ,則「可」字當作「皆」字 皆 教 前 而 矣,是 有 聞 謂 戒 行 者 曰:「孟子之 之不 百官 世 性 喪 也 隱之心 以 其 初 子 善 足 皆 未 之 雖 至 堯 良 口 嘗 以 謂 其 此 知 不 舜 心 取 欲 之 而 而 痛 禮 日

意矣。」 者苟能熟玩而深繹之,則必有所發於己,而知性善之旨 增益以成之,然辭順 以 質 大凡學者,必 有非其父兄百官之心,以爲學問之力,則尤有益於學者。 悦 善,豈不信哉?」輔氏曰: 及其斷然行之,而遠近見聞 誠 人心之所 (有過人者,而學問之力,亦不 至論文公反躬自責,悼其前行之不足取信, 服, 亦有 須知此理,然後有進而識古人爲己之學之 同然者,自我發之,而 所 義精, 不 · 期 説 得 然 人心事 「林氏之説雖 而 然者。 無不 理 坦 《集註 悦 然 彼之心 人性之 明 服 白 而 》翦截 不敢 則 學

滕文公問爲國

位,固 但言滕文公問,則 公問之也。」 文公以禮聘孟 輔氏曰: 不可越國 「前則云使然友問,後 往 見 知是文公親問 一子,故 孟子,則必 孟 是以 子 孟子也。 至滕,而文 禮 則云使畢戰 聘 孟子至滕, 蓋文公既 公問 問,此 而 文 即

民事之不可緩,則於爲國

也,思過半矣。」

然熟玩之,便見得民事真不可緩之意。

人君者若能真知

事不可緩」之説

功,自然如此其亟,孟子引之以證其『民

穀,而不暇爲此也。

輔氏

E:

「《詩》言民之趨於農

孟子曰:「民

事不可緩也。

詩》云:『晝爾于

可 誣 也。 陶。 茅,宵爾索綯; 于,往 也。 言治屋之急如此者,蓋以 至重,人君不可以爲緩 繩之絞也,所用蓋野廬之屋者。 之,不待督責而自相警戒,不敢休息如此。」〇愚謂 民 亟,紀力反 事 《詩傳》曰 取 謂 農 也。 事。 亟其乘屋,其始播百穀。』 綯 「晝往取茅,夜而絞索,亟升其 綯 詩 絞 也。 嫲 而忽之。 播

亟,

急也。

乘,升

屋 而

治

風

七月》之篇。

恒心。 人在 陷乎 民之爲道也,有恒 霏 位,罔民 *,然後 苟無恒 而 從 心,放僻 可爲也? 而 産者 刑 之, 邪侈,無 有恒心,無 是罔 音義並見前篇 民 也。 不 爲 恒 焉有 己。 産者 及 無

百

來春將復始播

故引《

布

也。

言農事

綯

是故賢君必恭儉禮下,取於民有制。

開 以 恭 制 制 君 則 民 纔 能 恭敬 常産及貢助徹之法也 禮下,所以 以 則 禮 自然能以禮接下; 接下,儉則 開世禄及學校之事也; 能 纔節 取 民 儉 以 取民以制 則 制 自然 能 愚謂 所以 取 民

陽虎曰:『爲富不仁矣,爲仁不富矣。』

之公心。 孟 陽 人,每相反而已者,其説尤爲的當 於並立。 人,每相反而 容並立。虎之言此,恐爲仁之害於富也, 子引之,恐爲富之害於仁也。君子小 虎,陽貨,魯季氏家臣 然先儒多以爲孟子取陽貨之言,是不以 惟 《集 註 已矣。 议 爲 所言 輔氏曰: 雖 同 也。 而所取各異,君子 「天理人欲,固不 天理人欲,不 人廢

也。 而 夏后氏 徹 徹,較列反。 ,其實皆 Ŧi. + 而 什 藉,子夜反 貢,殷人七十 也。 徹 者,徹 而 助 也 周 助者,藉 人百 畝

夏 此 時 以 下,乃言 一夫受田 制 Ŧi. 民 + 常 畝 産 一與其 而每夫計其五畝 取之之制 也 Ź

之徹。 井。 八家同 公田 洫 用 公田之什 中抽十之一以供貢。 有公田 七十畝爲公田。 九,其中五十畝爲 折除一家,各得一畝若千步爲廬 中,八家各助 法: 貢則直計其五畝之人, 自賦於官, 公田,而 田 十 之類,大段是費 貢 以 ,其外八 畝之地,畫 七畝也。」〇永嘉陳氏曰: 、爲貢。 法, 耕 爲一井,但 ,貢則什取其 《語 則 不 以 録 通 七畝,只得 家 輸官。」周 夫 復 》曰:「先王疆理 力 商 此以周井 公田 人力了。 有 税 各 爲 \mathbb{H} 人始爲 而 即即 分多寡耳。 商之助則井,却於七十畝之外 其 溝 授 九 作 五十 ; 時 私 區 商之井則 是夏之貢不井,但 田 若是 收 都 品 區 田 井田之制,以 法約之。 六畝 夏、 天下之初 夫 則 鄙 自 但 七 夏之井則 舍,方成。 , 則 計 授 用 爲 Ŧi. 商若同 語 借 十 + 七十 十四 録 畝 助 \mathbb{H} 但 助 畝。 其 而 做許多畎溝 孟 法 而 則須 百 $\dot{\exists}$ 增 畝 是 畝 力 爲 子言 於 八家各 分,故 爲 畝 者 井 須 Ŧi. 「貢、 計 中 Ŧī. 以 六 七十, 九 田 依 唯 + 家 + 公 鄉 爲 百 古 助 助耕 田之 别 畝 其 畝 則 助 助 謂 百 遂 法 公 耕 自 澮 取 之 爲 者 皆 異

氏 中百 説,只 問: 收,大率什 爲 七十 畿,役次必簡,故 遂 立 司 有 口 之説推之耳。 之也?」曰: ○陳氏曰: 畝 孟 都鄙以四 二子當時 日 溝 ·用貢法,十夫有溝」,鄉遂所以不爲井者,何故?」曰 法必不如此也。」〇問: 實難稽考,民間易生弊病,公私煩擾不可 田之家一處受田 知 而分」,永嘉諸 渔, 畝爲公田,八家各私外百畝, 而 也 八教畫 鄉遂用 鄉 增 未必 鄉 爲 遂用貢法、《遂人》是也。 起 夫受田 而 在 周 百 遂 賦財 此 紙上, 數,五六家始出一人,故甸出甲士三人, 鄉 貢 或 親 畝 制 都 遂以 亦不 但 法 人皆謂 見,只 周 鄙 則 百 耕則 國中 亦 禮 都 \mathbb{H} \mathbb{H} 畝,與 叮 畫 Ŧī. 野 制 鄙 處應役,彼此交互,難 、是傳 間 惟挽匶則用之,此役之最輕者。 詳 鄉遂都鄙初 不成 鄉 通 外都 起數,家出 用助 「『都鄙用助法,八家同井」、『鄉 不 許 知, 力而 同 遂之地 同,《 聞 多 , 如 鄙 但 法 溝之人通 疆 如此, 耕, 之地 周 因 何行得去? 理 耕 同 洛陽 用 禮 ,收則 都 都鄙 無二 則 貢 恐 養公田。」○永嘉 用 合更改,恐無 人爲兵,以守 通 分 亦難 法 議 助 力合作,計 各得 用助 制,不 力 明 法 論 田 而 勝言。 中 盡信也。」〇 其 不井 相統 若如此 H 法、《匠 作 如 通 知 畝, 以 近 何 徹 收 授 井 是 畝 衛 聖 年 亦 以 則 官 而 人》 授 理 但 則 均 步 人 未 王 新 耕 考 計

陵麓 在· 是平原 故? 計 畝 乃是九一 包溝 萬夫者九,故以 溝 鄙之地,謂之甸、稍、縣、都,乃公卿大夫之采地,包 之,止有九分之一,故以徑法攤算,逐一見其子 員可以如圖。 助法八家同井,其言簡而盡矣。 九百夫。 溝洫却在内, 是 匠人》,兩處各是一 也。 洫,不能如圖, 者,貢 十畝。 ,中以二十 蓋又輕於十 洫 竊意鄉遂之地在近郊遠郊之間,六軍之所從出,必 内,難用 廣野,可畫爲萬夫之田,有溝有洫,又有 在内,若是在内,當云百夫十夫之間 案《遂人》云:『百夫有洫,十夫有溝。』 方百里者,以開 法固 通 故皆以間言。 蓋萬夫之地,所占不多,以井田 而 徑 溝洫 私 故但言在 畝 商 以 法紐 田 法 制 法,朱子總其説 爲 十分之一 整齊 算 百 不 廬 矣。 方法計之爲九萬夫。《遂人》 但 畝 其間。 ·可考。 分畫,故逐 舍, 方十里 止 爲 言 但 竊 其母 爲常 其 不 者, 料 + 夫 地縣 唐 知其必分二法者何 謂貢法十 一處畫 數。」其 以 _ 商 所 制 數 亘 開 分 耕 一爲井 制 則 矣。 方法計之爲 一溝即 亦 而 公 實 同 數。 一同 公 惟 田 途路,方 夫有溝 之地 皆 不 當 取 H \mathbf{H} 助 雖 若都 見得 Ш 法 似 其 實 法 什 百 約 爲 有 林

徹 如 畝 而 此 助知 分 周 了,是亦 一』者,是 則 制 通 而 而 亦 取其 也, 其然也。 以 與什 則 不 + 以 一也,與 均 夫實耕公田 一之制 「文王治岐、耕 過 四 也。 什 畝 而 商制實無可考,其曰 九一之制亦不合。 爲 輔 不争多,故曰 也。 氏 廬 七畝 舍, 者九一』及下 輔 謂 通 氏曰 徹法 私田田 其 夫實 其 實皆什 七十 然十 「竊料 耕 ·文『請 日 耕公田 則通 畝 助助 商 而 力而 亦 野 制 法 也。 取 爲 亦 九 乃 七 共 其 當 是

作,收則計畝而均分」也。一藉,借也。

惡 終歲 使老稚轉乎 校數 足,則必 之而不爲 龍子曰 平聲 **盻**,五 勤 歲之中以爲常。 一、『治・ 動 禮 取 不得以 虐, 反 盈 ,溝壑,惡在其爲民父母也?』樂,音 從目 地莫善於助,莫不善於貢。 焉。 則 寡 [從兮。 爲 養其父母,又稱貸 取之; 民 樂歲,粒米狼戾,多 或音 父母,使民盻盻 凶 普 莧 年,糞其 反者 非。 而 養,去聲。 田 益之。 然,將 貢者 而 不 取

龍子,古賢人。狼戾,猶狼藉,言多也。

米狼 糞, 息 也。 之中以爲常」之意也。 之年,糞其田 以 藉饒多,雖多取之,而不爲暴 擁 稱, 償 也。 之 舉 尚不足,則以取滿其 也。 盈,滿 也。 貨,借· 益之, 盻, 也。 恨 愚謂: 也。 以 視 足 常數焉。 虐,則以 也。 取 此言 取 物 盈之 豐樂之歲,其 於 勤 寡 是 取之。 人,而 動 則 數 ",勞苦 「校數歲 凶 也 出 荒 粒

稚,幼子也。

夫世禄,滕固行之矣。 夫·音扶

相爲 上下相安者也,故下文遂言助 授之土田,使之食 法未行,故取於民者 二者王政之本也。 孟子嘗言文王治岐 表 裹,所以 使 君 其公田之人,實 今世禄滕 ,耕者九 子 無 野 制 人各有 耳。 一,仕 已行 法 蓋 定業, 者 世禄者 之,惟 與助 世 禄 法 助 而

田。由此觀之,雖周亦助也。雨,于付反。《詩》云:『雨我公田,遂及我私。』惟助爲有公

《詩・小雅・大田》之篇。雨,降雨也。言

法 也。 有公田,行貢法處,無公田。」〇又曰: 助,故引之也。 願 》,只據《詩》裏説,用詩意帶將去。」 天雨 盡 『天其 廢,典籍不 於公田 傳》曰: 雨 我公田 「言農夫之心,先公後私, 《語録》 ,而遂及私田,先公而後 存,惟有 , 而 遂及我之私田 曰:「考之《周禮 此詩,可 「孟子不曾 乎?二當 見周 故 》行助 望此 亦 時 見 法 雨 處, 用 周 助 私 而

上,小民親於下。 則三代共之,皆所以明人倫也。人倫明於也,序者,射也。夏曰校,殷曰序,周曰庠,學也,序者,射也。夏曰校,殷曰序,周曰庠,勢設爲庠序學校以教之:庠者,養也,校者,教

名也。 也。 婦有别,長幼有序,朋友有信,此人之大倫 爲義,皆鄉學也。 庠以養老爲義,校以 問: 『鄉學如何?』 庠序學校,皆 倫,序也。 티 : 學,國 父子有親,君臣有義,夫 以 『皆於 明 教民爲義,序以習 農隙 此 學 而 也。 而學。」曰 共之,無 《語録》曰: 「孰 與 射 異 教

> 有異 同 取義不同耳。 日 : 則但同謂 之?]曰: 也。 「養老序射,皆學校教人之事,特三代欲異其 名, 或 之學而已。 『鄉大夫有 學 然此三者,皆鄉學也,故異名。 雖 無 異 言學則庠校序皆舉之矣。 德 名, 行 然其明 而 致 其 人倫以教之之事 仕者教之。こ〇 至 於國學, 鄉 名,故 學雖 輔 則 氏

有王者起,必來取法,是爲王 滕國編 者猶疑孟子不當勸齊 足以及於天下矣。 舉,本末始終有序,爲國之道備 徹 王業之興,然有王 而言之也。 師」,是亦要國大,方做得,小底亦不奈何。」〇輔氏 天下矣。 王者師, 《語録》 所謂聖賢 法度也 ₩ ⊟ : 小,雖 則 「孟子只説『有王者起,必 恭儉,德也; 則總五帝三王 聖賢至公無我之心,於此 學校,教也,所以 雖不有天下, 行仁政,未必 者作,必 於此可 主 禮: 行 見 來 及 王道 下 輔 聖賢至公無我之心 取 成 法, 矣。 取民 終 佐之賢、與 者 而其 也 者 能 爲 何哉? 或 有制 來取 Ŧ 興 師 一雖褊 内外 澤亦足以及 者 ,政事 王業 也。 夫孔子、 法,是爲 師 兩盡 小,勢不 齊 梁 則 也; 可見。 政 地 德 然爲 王者 廣 而 澤 能 教具 貢 孟 E: 助 民 或 亦 致 子

者 小,雖 衆,其 師。 不王者,不爲耳,故 行仁政,未必 以 此見孟子之道能大能 能 興 王 孟子勸以 也 小,無不可爲之事也。」 故 行 教以 王 政。 彊 爲 滕 善以 或 壤 爲 地 Ŧ. 褊

子力行之,亦以新子之國。」《詩》云『周雖舊邦,其命惟新』,文王之謂也。

始。 選 可 暴 使 君 擇 畢 坐 《詩·大雅 王 來,舊爲諸侯,其受天命而 而 汙 經 戰 始也。子,指文公,諸侯未踰年之稱 而 界 問 定 吏必慢其經界。 使 也。 不 井 子,子必勉之! 地。 正,井 夫,音扶 文王》之篇。 孟子曰:「子之君將行仁政, 地不 均,穀禄不 經界既正,分田 夫仁政,必自經界 有天下,則 言周 平。 雖 后 是 制 自文 稷 也 故 禄 以

來問 曰 : 畢 主 爲 戰 「因其使畢戰來問,故知是使畢戰主爲其事 其 井地之事 詳 滕臣。 也 度孟子之來滕國不久便去,故使畢 文公因 ,故又使之來問其詳 孟子之言, 而 也 使 而 戰 因 畢 使 輔 往 戰 問 之 氏

暴得 得以 之田 耳。 地,即 差,則必從經界之事做 輔氏曰: 從此始, 之少,故 取,得以裒斂其 無定法,則不特 所占者既多,則人之所得者或少,故於井地有不均。 而民之豪强者惟 以爲界止也。」此 之,若孟子尚 止之法不脩,則田 地 治地 分田 井 也 兼并 謂 以 田 井 於穀禄有不平。」此 開開辟 田側 經經 多 若有仁君,欲行 則 而 田 放井 取 因 留 其方里 有溝, 暴 畫 也。 其田 私 故 取公田十 滕 其 法不修,則 無定 君 其 田之所人。 國, 所 壑 既已成 穀 地 愚謂 取 汙 爲井之地 溝 起 上有 則 制。 有 禄 ,得以兼并其 塗 吏 文公亦必親與之商 不 有 而暴 井 政 不定爲一 塗。 封 井 則 欲 之賦,而 均 不平。 此或得禄之多,此 而 地 ,使彼此均平,田 也。 植 行仁政者之所以必 必 君汙吏,貪得務多,只 田 言之也。 封 ; , 則 之界 欲 賦 無定 植 分田 言 他 暴 夫授田 則 慢 輔 無定法,而 其 人之所 君 封 謂 氏曰: 也。 始 而 經 貪 其 分爲九 以 廢 吏, 百 (所植 略矣。」井 有。 無多少之 而 輔 地 畝之制 經 之也 或得 惟 氏 而 謂 之木 我之 百畝 其 畫 畫 日: 含 强 治 禄 界 所 賦 井

之也。 也。」有以 有 我,不知有民,只知爲己,不知 凡 事須是敬則能立,才有 正之, 則 分田 制 慢心,事 爲 人者, 禄, 便日 則 可 必 不 趨 欲 於 勞 慢 而 而 壞 廢

定矣。

養,去聲。 無君子莫治野人,無野人莫養君子。夫,音扶。 夫滕壤地褊小,將爲君子焉,將爲野人焉。

慢 田 子,則孰治 之法,不可 言 亦有仕於朝爲君子者,亦 者,亦必有 也。」 制 滕 禄 地 之法不 雖 小人? 小,然其 偏 爲 可 偏廢, 廢 野 無 也 人而 野 人 丽 必 間 輔 有國者之於經 則 有耕於野 耕 亦必 氏 孰養君 者 日 : 有爲君子 是 或 一而爲野 子? 以 無 畫 大小, 分 言 人者。 誠 此 \mathbb{H} 不 以 雖 制 而 可 見 無 小 仕 禄 以 分 君 或

請 野 公田 也 此 分 九 野 而 H 而 郊 制禄之常法 行 助 助 外都 ,國中什 法 也。 鄙 之地 1,所以 或 使自 中 也。 治 郊 賦 野 門 九 人使養君 之内 而 助 鄉 爲 子 遂

外者矣。」

曰 : 之禄 氏曰: 中 周之所 時 此。 之地 充國家之所用。 井牧之法,次第是三十家方出得士十人,徒十人。」〇 次第是一家出一人兵,且如五家爲比,比便有一箇長了。 故只得什 師、五師 又如五人爲伍,五 賦其 如 徹」字之義。 什一 以 五家爲比,五 非 「以其 食。 一使自 惟 在王城,豐凶 也。 謂 語 「郊外都鄙用助 爲軍。 或 徹 助法不行,其貢亦不 録》曰: 一使 「請野 蓋用 [賦],則 中鄉 法也 田 自賦。 此則正言其法是如 皆五 比爲間 九 其遠 不井授, 遂 「野 貢 伍 當時之貢法,亦有彊取其賦 前 用 易 Ŧi. 爲 謂甸 而 法 所 近之所以 貢 如 法、則收其公田之所人、以爲君 察。」〇 四四 相 助」,則 兩 謂 鄉 法 也 連屬,所以行不得那九一之法 一間爲 四 一个 遂却 稍 則 但爲 兩 又曰: 者 使 縣、都 知助 周 族,四 不同者,詳已見前 行井牧之法,鄉 爲卒,五 耕 此。」以: 通也,均 所 溝 者 法之不行。 止什 族爲黨, 行 謂 國 什 洫 九 卒爲 中 而 徹 也」者 一矣。 此推之,當 行 自 使什 法。 法 鄉 賦 旅 $\overline{\mathcal{H}}$ 於什一之 者 又云『國 其 遂之法 黨 遂之法 ,所以 Ŧi. 或 段,此 蓋 而 爲 輔 旅爲 中 , 以 州 如 自 氏 釋 什

卿以下必有圭田,圭田五十畝。

外又 也 故 爲之屬,如「有田 及詳考。 在 有 世 此 $\widehat{\Xi}$ 民者,如 耕之者, 世 有 制》云「圭田 不言世禄者,滕 禄 主田 田 語 大抵古者 常 并九 豈 Ŧi. 制 亦 日 + 百 有 一成,有衆一 之外,又有圭田 畝 畝 「卿受田 無征 耕 田 也。」〇問: 屬 禄 而 」。」 圭,潔也,所 可 当, 百 耕 畝爲公田之類。」曰 六十邑,乃 已行之,但 是助 乎? 旅』是也。 卿 法之公田 恐 士大夫之有 主田田 當 三百 所 圭 此 只 充,而 田 以 以 未備 是 恐 四 厚 奉 給 + 「其 亦 # 公田 八 祭祀 君 如 井, 耳。 \mathbb{H} 家 制 此 · 必 子 因 未 之 此

餘夫二十五畝。

外 外,又有餘夫之田 年 程 餘 也 後更受百畝之田。」 十六,别受田二十五畝,俟其壯 爲 子 夫二十 率,受 日 Ŧi. 一夫上父 畝 田 乃是十 百 畝 以以 六歲以 母 愚案: 厚 如 ,下妻子,以 野 前 有 所受,在 人 弟, 此百 也。 是餘 畝常制之 而 語 夫百 Ŧi. 録 夫 有 П 畝 Ě 室 也 八 之

> 助 死 疾 徙 無 病 出 相 鄉, 扶 持 鄉 則 田 同 百 井。 姓 親 出 睦 人 相 友,守 望

> > 相

爲伴, 睦 謂 同 死而葬者,徙而居者,皆不可 曰:「鄉 家 死 也。 鄉之人,則 井 也 謂 防禦寇盜則自 田、救災恤患之事」也。 此又言助法之善也。」 謂「萬二千五百 葬 友,猶 也 八家 伴 徙, 百 相 爲 也。 爲助,疾 謂 人爲鄉」之鄉。 井。 徙 守望, 出 其 如 一井 病則 其 此 居 鄉 之中,其 防寇 自 也。 則 也 朝 相 『死徙 「鄉 b 扶 盜 司 持 同 出 田 無 井 處, 也。 此 出 人 百 者, 自 張 則 井」者 鄉」者 然親 輔氏 子 自 所 相

所 私 方 以 百 里 别 畝 耐 野 井, 同 人也。 井九 養公田 百 養,去聲。 畝,其 公事畢,然後 别,彼列反。 中 爲 公田 敢 治 八家皆 私

曰 : 公田 此 先公後私 而井,井九百畝,其中爲公田」,便是井田 詳 Ē 言 以 既言 井田 爲 所以 助 君子之禄 法之善,故此 形體之制,乃周之助法 别君子野 而 下遂 私 言周 人之分也。不言 \mathbb{H} 之助 野 形 人之所受。 法 體之制也。」 也。 也 方 輔氏 里

已行,但取之過於什一爾。中二法,此獨詳於治野者,國中貢法,當世君子,據野人而言,省文耳。上言野及國

夫,音扶。 此其大略也,若夫潤澤之,則在君與子矣。」

爲急。 悦之者衆。 始不以 後可謂之潤澤也。」〇吕氏 是解此二字之義,乃就井田之法上言,必 土俗 井 雖欲言治,皆苟而已。 于今,如有用 意三代之治。論治人先務,未始不以 『仁政必自經界始。 地之法 潤澤, ,而不失 講求法 亟奪富人之田 諸諸 謂 苟處之有術, 因 我者 乎先王之意也。 侯皆 制 時 ,粲然備具。 制 舉 去其 貧富不均,教養無 宜,使合於人情,宜 爲辭。 曰:「子張子慨 而 世之病 籍、此特 措之耳。 期以數年,不刑 然兹 要之可 輔 能 難 其大 如 氏曰:「此 法 行 此 嘗 公之行, 者,未 V. 經界 然 以行 略 法 法; 日 於 有 而 然 非

亞聖之才矣。

輔氏曰:

常常

人而欲法古先哲

王之事

當禮法 得行 往 能 界兩章, 曰: 以 之者衆,苟行之有術 務,必當以經界爲急。 法,明當今之可 救菑恤患,厚本抑 分宅里,立斂法,廣儲 上不失公家之賦役。 言曰:『縱不能行之天下,猶可驗之一 方與學者議古之法,買 一人而可復。 之迹 待後之君子。 因略 「張子之學,已到古聖人之心事,故見得治天下 ,則又欲私爲而小驗之,以明先王之法無 以致詳 廢壞之後,制 而能 見孟子之學,識 嗚呼仁哉!」〇愚 合乎 推 所病者,特上之未行耳。』乃 ,期以數年,不刑 行。 於是力攷詳 先 舊 末。 而 王. 度節文不可復考,而 有 蓄,興學校,成 退 田 一之意, 爲 志 足以 其 以 新 一方,畫 未 究,知 (大者。 其 案 就 人而可 推先王 真 不屑屑於既 私 其法之行,「悦 而 Œ, 可 卒。」輔 爲 喪 不可行者 是以 謂 復。」既 禮 一經 界, 禮 數井。 一之遺 鄉。 命 世 雖 經 先 不

大體 迹,到 聖 於後世 之制,雖 壞之後,制度 一賢同 其大者,謂 之意背馳 者至於嚴 而詳其節目,「推 行不得 2者,往 不屑 心 刑峻 事,同 非 節文不可 處,則 屑於已往之迹,而 先得古先哲王之心也。 往不曾先得古人之心,屑 徒 (法,以 無益 反 軌 出其 舊以 箝人之議, 彊民之從。 復考,而 ,而又害之者多矣。 轍,信 私意,穿鑿杜撰,以 爲 新」, 非 能 能 命世 合於 謂 因 推 略 豆聖之大才,不 是以「雖當禮 先 其既 屑然泥其 耐 王之意。 致 唯 往以 詳 求 孟子之學 於是與 一,謂 其 爲 既 必 法廢 往之 此 今 因 濟 能 H 先 與 其

捆 告文公曰:「遠方之人聞君行仁政,願受 而 屨 爲 有爲神農之言者許行,自楚之滕,踵 織織 氓。」文公與之處,其徒數十人,皆衣褐 席以爲食。衣、去聲。 捆 音閩 門 廛 而

爲

也。

者 上 許,姓,行,名也。 神農,炎帝神農氏。 也。 章所言井地之法也。 爲其言者,史遷 踵門,足至門 始 輔 所 爲耒耜,教民 氏曰: 謂 農家者 「此可見人心之 也。 流 仁政, 稼 也。 穡

問

之言, 也。」廛 也。 日: 孔孟豈得 時乎?」〇輔氏曰: 不容固守其舊 移,至於唐虞之際,則雖神 之宅,此但言廛 行爲神農之言,而 耳,猶陰陽、醫、 食,賣以 也。 褐,毛布,賤 所同,不獨孟子以爲仁 》、《靈 當時民淳事簡、容或有如許行之説者。 愚謂 程子之言盡矣。 乃後 樞 民 而不稱述之哉?」 》之類 供 織 所 矣, 況許 世 食 屨必扣 則 者之服 居 是 也。 有 稱 也。 爲民 也 「陰陽、醫、 君民並耕、市不二賈之説,何 方稱黄帝之説 述上古之事,失 然以《易》考之,二者皆神農之所爲 政,而當時 行之妄,乃欲 拯 便 程子曰 所居 輔 也。 者, 真 農復生,亦當 氏 有 ൬ 蓋擊之使堅實 \exists 方 神農、 捆, 已。」氓,野 : 所 之人亦莫不以 产許 前言 以 稱 扣 黄 黄 是 也。」或問:「許 帝之言傳於 隨 拯之欲其 行 市廛 帝之説,如《素 而 其 時 所 行 及乎世 也 人之 以 則 義 於 謂 立政, 八爲仁 戰 爲 理 耶? 神 以 變風 或 稱 市 者 堅 爲 之 而 政

滕,曰: 陳 良之徒 聞 陳 君行聖人之政,是亦聖 相 與 其弟辛,負 耒 耜 人 而 (也,願 自 宋之 爲

聖人氓。」

柄也。 陳良,楚之儒者。耜,所以起土。耒,其

飧而 自 也 見 陳 養也、惡得賢?」響、音雍。 孟 相 治。 雖然,未聞道 子, 見許行 道許行之言 今也滕有倉 而 大悦,盡棄其學而學焉。 也。 廩府 賢者 曰 : 庫,則 飧,音孫。 與民並 滕 君 是厲 耕 惡,平 則 而 誠 民 -聲 食 賢 陳 而 以 饔 君 相

耕 炊爨 君 説,亦皆欲 法。 許 國皆知之,而 告之當以經界 饔飧,熟 而食 子 行 野 輔氏曰:「文公既有意於爲國 此言、蓋欲陰壞 以 人相反,故 ,則爲君子 爲 來售 食也 有志之士各欲 食, 爲始,而 其説,如 ,而仕 知許行欲陰壞其 而 朝 者可知 兼 文公又使畢戰 許 日 治 行是 孟子分别 以 饔, 矣。 民 其 也。 所學來 事 夕 法 是其 而 也。 許 也。 日 主 問 説 行 飧。 告,至 爲其事矣, 於孟子,孟子既 君子野 謂 īE. 厲 與 君 一於異 言當 民 孟 病 子分 尚 人之 故 端 也 當 自 别 鄰 並 邪

> 粟易之。」衣,去聲。 乎?」曰:「然。」「自 曰 : 子衣 孟子 否。 冠?」曰: 然。」「許 褐。」「許子冠乎?」曰:「冠。」 日 害於耕。」曰:「許子 以粟易之。」曰:「許子 : 子必 「冠素。」曰: 許 織 子 布 必 與,平聲 而 種 爲之與?」曰: 後 粟 一自 衣 而 以 乎 ? 奚爲 織 後 釜 之與?」 甑 食乎?」 爨 不 否 自織?」 티 : 以 否。 티 : 鐵 奚 耕 以

釜,所 鐵 耜 屬 以 也。 煑。 此 甑 語 八 所 反,皆 以 炊。 孟 爨, 子 問 然 而 火 陳 也。 相

對也。

然與百工交易? 陶冶,舍皆取 器易粟者,豈 以粟易械 百工之事,固 器者,不 諸 爲 不可 其 厲 何 宫 農 耕 爲 許 中 夫 厲 Ħ. 爲 子 而 哉 陶 也。」舍,去聲 之不憚 ? 冶 用之? 且 陶 許 冶 . 煩? _ 何 子 亦 爲 何 以 其 紛 不 \Box 紛 爲 械

此孟子言而

陳

相

對

也。

械器,釜

甑

之屬

或讀屬上句,舍,謂作陶冶之處也。也。陶,爲甑者。冶,爲釜鐵者,舍,止也。

故 備。 下之通義 治於人; 有小人之事。 然則治天下 É 如必自 或 勞心,或勞力,勞心者治人,勞力者 也。 治於人者食人,治人者食於人:天 爲 獨 與,平聲。食,音嗣 且 而後用之,是率天下而路也。 口 一人之身,而百工之所爲 耕 且. 爲 與? 有大人之事

子則 械 時 於人者,見食於人也。 於人也。 此 孟子引之也 走 於道 而 休 以 欲 相 亂 息 下 路 自爲百工 - 皆孟| 易 而 也 無時 ~, 乃 以 食人 此 輔氏曰:「此但 休息也 子言也。 之事,以足其用 所 君 者 相 以 易,正 子 出賦 其 相 無 司 濟 小人則 路, 哉。三治於人者,見 猶 税以給公上也 言其勞耳。 此 而 農 則譬如率天下之人奔 謂 非 四 夫 所 句皆古語 飢 奔 陶 以 走 若曰以一 冶 小人無 相 道 路, 病 粟 人之 也 治 與 君 而 食 無

> 夫與 輔 而 食 氏 陶 ☐ : 人,此理 冶 君 相 與 子勞心以治人而食於人,野 天實爲之,天下萬世 易 事 而 以 相 濟 相 之所 成 也 共 人勞力以治 岢 由 有 也 相 病 Œ 之理 於 猶 人

乎?」治天下

者,

贵

必

耕

Ħ.

爲

哉

人。 漯 門 得 海; 之, 舉舜 下。 當堯之時,天下猶 ,他合反 而 而 禽獸 決汝漢 獸蹄 草木 食 不入,雖欲耕, 而 也。 敷 逃 治 鳥 暢茂,禽獸 , 排 匿。 焉 當是時 跡之道,交於中 淮 禹 舜使益掌 泗 未 得乎? 疏 也,禹八年於外,三 繁 平 而 九 **殖**,五 注 洪 河 之江 火,益 水 瀹,音 瀹 · 國。 穀 横 濟 一、然後 不 藥。 流 烈 漯 堯 · 登 氾 濟,子 Ш 獨 中 而 澤 濫 憂之, 過 或 注 獸 禮 於 而 其 諸 焚 偪 天 口

氾 洪,大也 聖人迭 天下猶未平者,洪荒之世,生民之害多矣; 濫 ,横流之貌。 興, 横 漸 流 次 不 除治,至 暢茂,長 由 其 道 此 盛 而 尚 散 也 未 溢 盡 繁 妄 殖 平. 行 也 也

決、排 江 皆 異。 郡 簡 盤 馬 也。 至 疏 知 日 疏 禽獸 熟 多 琅 垣 河 潔 徒 耳。 水名 通 一**,** 曰 通之意。 頰, 也 也 之經 槐 駭,二 縣 書傳》實經朱子晚年所訂正,當以爲定也。」瀹 七 多 禽 入海。 王屋 也,分也。 \Box 鬲 日 汝、 也。 也。 皆 流,遂分簡 獸 道 Ŧi. 鉤 曰太史,三曰 津。 覆 Ш 去 穀**,** 盤 逃 漯 東 泗 路 金, 據《禹 敷, 濟、漯,二水名。 其 水 南 蔡氏曰 八 匿 則 也。 稻、 日 出 至武 壅 潔 曰 布 人 東 鬲 九河: 然 爲二。 寒 黍、稷、麥、 貢》及 郡 馬 胡 津 淮 也 獸 德人河 「《書傳 後 頰 也 東 其 蘇 蹄 八武陽 而 《書 四 禹 益,舜 曰 鳥 今水 , 軼出 則 日 汝、 曰 淮 縣 傳 》案《爾 徒 得 河 覆 跡 簡 自 東北 影 之經 鬴, 愚 施 漢、 駭 路 祭陽 交 菽 臣 案: 人 此,與 了, 曰 雅 治水 Ŧi. 曰 於中 流 也。 名。 淮 至千乘 惟 北 海 日 濟 也。」 潔 太 九 地 胡 漢 水 集 蘇, 泗 中 之 史, 或 烈 登 先 出 此 河 水 註 人 六日 又 河 儒 功 海 謂 人 》少 熾 亦 亦 鉤 日 成 東 東 不 0

> 於派 不能 人,有 高郵,不得爲「沿」,有 二字,似 有『白淮 有 埭,置閘儲閉 不應言東入于海 其 出 因 括引李翱《來南 欲强爲之説, 云耳 汝、漢、淮 四 謂 禹 能專達于海耳。』若 桐 水 迹,故 何似於沿京 柏,會泗、 至高郵 淮 ,若以水路之實論之,便 而 皆 汽泗 順潮 亦未 察之不審 人 道 泗 人江,乃禹之舊迹,故 耳。 于江, 入新 當。 意 可 潮 然亦徒爲穿鑿 而 沂以 沙 通 録》云『自 注 其 此 0 之江, 舟楫 浦」之言 蓋古今 而 致 過 入于 説 高郵 淮亦不得 此謬誤。 以 高 記者之誤 甚似, 如 通漕 海,故 郵 則 此 此 往 淮沿流 以入江、不得爲「泝」。 不須 後 ··; 則 説 但 其 來 運 有 作文取 而卒不 淮 是 又 爲 則 以 實 今人以 不通。 更 非 迎 南 人運 道宛然,但今江淮 瀆矣。 至于 非 《禹 小 開 也。 也。 流 江 只 江 貢 運 其 能使之通 水 河 是 潮 而 高郵,乃 説者見其不 行 字 河 也 且 當 列 時 案《禹貢》『淮水 而 而 邗 矣。 數 語 於四 出 説 翱 [沿]、[泝 云 溝 偶 若 以 録 南 隨 故 派于 孟 故 使 運 也 足 人于 瀆, 日 當 子 復 淮 而 自 河 對 已深 通 江, 皆 時 Œ 有 潮 翶 淮 如 偶 江 似 又 É Щ 至 便 而 決

❶ 「閉」,原誤作「閑」,今據四庫全書《朱子語類》卷五十

FI

改

水、泗 心力也。」 之言,只是行文之失,無害於義理,不必曲 泗 蓋 淮 世 以 不相 陽, 泗 以 則 汝水入淮 又 誤 下,至於潛 有 而 水,以 南 汝 干涉,不待 然 益 V 流至 水 説以 誤 後 亦 入于 也。 能 泗 漢 見 爲 決 霍 排 陽軍 水亦入 海。 淮 今案《來南 排退 汝、漢以 退 泗 地 ,乃入于 淮、漢之間 勢 而 本不 淮,三水合 隔 水 愈不得人江 人江。 驀 入江 録 前 江。 後 》中無 雖 漢 自 此語 使 當 得 淮 淮 而 有 洪 此 矣。 入江 爲 自 大 水 語 尤 泗 桐 Щ 横 漢 巧, 横 未詳 也。 栢, 「爲之説,閒 流 水自 流 若 自 而 之時 東 大抵 其故。 排 尤 亦 唐 流 嶓 與 鄧 退 不 會 排 孟 冢 通 江 淮 費 子 光 汝 過 近 退

别 以 則近 育。 之。」聖人之憂民 之直之,輔之翼之, 后 , 彼 人 稷 **M**列反 教民 倫:父子有親,君臣 序,朋友有信。 於禽獸。 人之有 長、放,皆上 稼 道 穡 聖人有憂之,使契爲 也 如 樹 聲。 飽 此, 使自 藝五 放 食、 勞、來 勲 而 煖衣、 立穀,五 有義,夫婦 得 曰:『勞之來之, 暇 ,皆去聲 之, 耕 逸 乎? 又 穀 居 從 熟 有 司 而 契,音 而 而 别,長 徒,教 無 振 民 教, 薛 德 王 人

德,猶 勲,本 哉。」 焉,不使其放逸怠惰 使 也。 言水 者正之,枉者直之,輔以 「天叙」 無也。」《書》 自 親、君臣之義、夫婦之別、長幼之序、朋友之信、皆人性 教民 得 倫,亦因 亦放逸怠惰 之有道,言其皆有秉彝之性 有。 自 以 得其 契,亦 此之謂 則 土平,然 施 即 舜之命官 惠 史臣贊 教 所 也 其 亦 謂 性 化。 Ē 固 舜 非 古 而失之,故 也。 矣,又 敷 : 堯言勞者勞之,來者來之,邪 堯之辭,孟 有者而 後 有 臣 並 教,亦 后稷,官名,棄爲之。 及得以 也, 耕 天 名 輔 勑 矣。 叙 也。 從 氏 因 而 道 教稼穑; 而 曰 : 其 Ŧi. 而 厚 之耳。 有 樹, 或失之。 聖人設官 典, 之, 司 子 提 而導之耳, 立之,翼以 舉 徒, 大 即 亦 撕警 書 勑 也。 所 以 真 種 衣食足, 官名 日 我 謂 氏曰: 爲 也。 以 覺 蓋 道 Ŧi. 然 非 而 堯 之也。」 以 命契之 爲 典 强 也。 教 無 行之, 「父子之 號 證,者 之以 然 加 Ŧi. 然 以 教 也。 惠 放 惇 殖 則 後 所

是也。 如此方見聖人之用。 只大綱提過,都無意味,至《集註》而後,字字研究其理, 學》新民之功也 之,來者來之』,所以安其生也。「邪者正之,枉者直之」, 辭 所以正其德也。 不是財惠之惠,只是施之以教化,上文匡、直、輔、翼等 「自得」,謂自得其 也 彼既自得之,復從而教之。」」〇輔氏曰:「『勞者勞 語 録 ¥ E 『輔以立之,翼以行之』,所以助其行 性也。 「德」,謂 又斷以爲堯命契之辭,始得允當。」 問 「振」,謂 振 加 惠也。 流德是 提撕警省也。 施 此數句,先儒 惠否?」 三 此乃《大 註解 是 ~,然 也 皆

憂。夫以百畝之不易爲己憂者,農夫也。夫,堯以不得舜爲己憂,舜以不得禹、皋陶爲己

易,去聲

農者之所憂以並堯舜之憂,見其小大廣狹之不倫, 易,治也。 則不惟不暇 也,急先務 耕與不必耕者可知矣。」 而 堯、舜之憂民,非 耕,而 른 亦不 所以 必耕矣。 憂民者其大如 事 輔氏曰: 事 而 憂 則不 此, 早 之

得人者謂之仁。是故以天下與人易,爲天下分人以財謂之惠,教人以善謂之忠,爲天下

得人難。爲、易,並去聲

之仁。」 乃所謂 分人以 舜、舜之得禹、皋陶、則能廣吾力之所 大,繼吾身之所有而俾教化推於無 化無窮矣,此其所以爲仁也。 其所及,亦止於吾力之所能,與吾身之所及而已,故有限 而難久也。」惟若堯之得 「以己之善而教人,使民皆爲善,則是有愛民之實矣。 民之實,然其 爲天下得人者,而其恩 財, 小 所及亦有 惠 而 릲 舜,舜之得 限 教 而 人 窮 能 難 以 輔氏曰: 矣, 而 惠 善, 俾 然後 禹、 恩 廣 雖 惠 輔 人大,教 「堯之得 臯 可 極 氏日 以 於 陶 伙 謂 廣

孔子曰: 『大哉堯之爲君! 則之,蕩蕩乎民 無所用其心哉? 巍乎有天下 關,言其不以位爲樂也。 道 則,法也。 也。 巍 魏,高 ·而不 蕩 蕩 無能 與焉!』堯舜之治天下,豈 亦不用於耕耳。 大之貌。 廣大之貌。 名 焉 ! 不 君哉 惟天爲大,惟 與,猶言 君哉,言盡 與,去聲 舜 也 不 相 君 巍 堯

也。 楚産 吾聞 方之學者,未能或之先也。 子之兄弟事之數十年,師 也,悦周公、仲尼之道,北學於中國。 用 夏變夷者,未聞變於夷者也。 彼所謂 死 而 遂倍之。 豪傑之士 陳 良, 北

楚人而 言 乃爲許 於 禮義之教也。 此 良 中 陳 其能 . 或 用 良 夷,反見變化於蠻 以下責陳相倍師 夏 也 生於楚,在中國之南,故北 :行所變,則是變於夷也。」 北學於中國 (變夷、陳相 自 先,過 拔 於流俗 變夷,變化蠻夷之人也。 ,則是用夏變夷。 也。 變於 也。 而學許 豪傑,才德出衆之稱 夷之人也。 夷 倍,與背同。 也。 行也。 陳相 輔 氏曰: 素學於陳良 遊 産,生也。 夏,諸夏 而學於 言陳 「陳良, 變

夏、子張、子游以有若似聖人,欲以所事孔子反,築室於場,獨居三年,然後歸。他日,子於子貢,相嚮而哭,皆失聲,然後歸。子貢昔者孔子没,三年之外,門人治任將歸,入揖

彊,上聲。暴,蒲木反。皜,音杲。 之,秋陽以暴之,皜皜乎不可尚已。』任,平聲。事之,彊曾子。曾子曰:『不可。 江漢以濯

氏曰: 德明 也。 也。 似聖 須是深思而熟玩之,直到曾子見處,方知其味。」或 弓》所記 《皇覽》云: 也。任,檐也。 水多,言濯之潔 三年,古者爲 所事孔子 著,光輝潔白,非有若所能 「此自是曾子見得 皜 人,蓋 皜,潔 子 「孔子冢前,以瓴 游 其言 白貌。 師心喪三年,若 謂 場,冢上之壇場 所以事夫子之禮也。江 也。 有若之言似夫子之類 行 如 氣 此, 尚, 秋 甓爲祠,壇方六尺。」有 象 他 日燥 有 加 人不 似 也。 烈,言暴 知 之者,如《 喪 其味 仿彿 言夫子 父而 也 也。 也。 愚 之乾 無 學者 道 漢 是 檀 若 服 輔

師而學之,亦異於曾子矣。鴃,亦作鵙,古役反。今也南蠻鴃舌之人,非先王之道,子倍子之

此三語者,孟子贊美曾子之辭

也。

許 鴃 行 博勞也 也 惡聲之鳥。 南蠻之聲似 之, 指

於幽谷者。 吾聞出於幽谷遷于喬木者,未聞下喬木而入

嚶; 伐木聲。 小雅・伐木》之詩云:「伐木丁丁,鳥 出自 幽 深。 嚶嚶,鳥聲之和也。 幽 遷,升。 谷,遷于喬木。」《詩傳》曰:「丁丁, 喬,高也。」 以伐木之丁丁,興鳥鳴之 鳴 嚶

膺之,子是之學,亦爲不善變矣。」 魯頌》曰:「戎狄是膺,荆舒是懲。」周公方且

僖公之頌, 註: 日 本號也。 魯頌 楚。 「舒國,今廬江舒縣。」懲,艾也。 舒,國名,近楚者也。愚案:《春秋傳》杜氏 閟宫》之篇也。 愚謂: 而孟子以周公言之,亦斷章取 荆本州名,春秋初以州舉 膺,擊 案今此 也。 日 荆,後乃 荆 詩 楚 爲

從許子之道,則市賈不貳,國中無僞。 也。 雖使

倍,一倍也。蓰,五倍也。

什伯千萬,皆倍

多寡同,則賈相若,屢大小同,則賈相若。」 賈,音價,下同 賈 五尺之童 (相若; 麻 滴 縷 市 絲 莫之或 絮輕 重 欺。 同 則 布 賈相若; 短 五穀 則

帛

長

司

子來,無人看得出,至《集註》而後,其義始明。」 惡,但以 曰:「若不着得精粗好惡來說,則無由説 許行欲使 退,各得其所也。二五尺之童,言幼 曰:「下《繫》謂: 『神農取噬嗑之象,日中爲市,交易 井,故許行又託於神農,而 陳相又言許子之道如此。 長短 市 中 輕 所粥之物,皆不 重多寡大小爲 有是説 蓋神農始爲 得 小無 通 價 . 論 也。 也。 精 此義 知 粗 輔 也。 輔 自 美 市 Œ ൬ 氏

也。 扶。 之道,相率 相什伯,或相千萬。 曰:「夫物之不齊,物之情也; 蓰,音師,又山綺反。 巨屨 小屨同賈,人豈爲之哉? ·而爲 僞者也,惡能治國家?」夫,音 比,必二反。 子比 而同 恶,平聲 或相倍蓰,或 之,是亂 從 許子 天下

數 小 然之理,其 屨 也。 粗 同價 ,使之同價,是使天下之人皆不肯爲 比,次也。 川則 有 人豈肯爲其大者哉? 精 粗 孟子言物之不齊,乃 ,猶其有大小也。 若大 今不 其 其 論 屨 自

子不來。辟,音壁,又音闢。 ||「吾固願見,今吾尚病,病愈,我且往見。」夷「吾固願見,今吾尚病,病愈,我且往見。」夷||◎墨者夷之,因徐辟而求見孟子。孟子曰:|

精者,而

1.競爲濫惡之物以相欺耳。

辟,孟子弟子。 墨者,治墨翟之道者。 『今吾尚病,病愈,我且 其意之誠否。 不屑之教誨也 輔 孟子 氏曰:「初不言孟子有 往見」,則孟子之意可 稱疾,疑亦託 夷,姓,之,名。 見。 疾, 辭 此 而 以 亦 忽 觀 徐 言 所

墨者。 以 矣。不直,則道不見,我且直之。 他日又求見孟子。 易天下,豈以爲 墨之治喪 也 非 以 孟 是而 子曰:「吾今則 薄 爲 不貴 其道也。 也? 吾 聞 然 夷 可 而 子 夷 以 夷 思 子 見

> 音現。 子葬其親厚,則是以所賤事親也。」不見之見,

説本是 子雖以 其 子雖受其教,而 子實嘗厚葬其親,不從墨子薄 學於墨氏 也。 辨,以 者有以 問夷子,蓋於其事親至切處感發之。今《集註 葬其親厚,則 者,故孟子 桐 如 又 相 之,然豈肯 師之説者 求 此。 棺三寸而 Œ 屈吾道之尊 易天下,謂 也。 ·見,則其意已誠矣,故因徐辟以質之 發 失於兼愛二本 闢邪説爲己任,然不過講明其説,傳之當世 或問: 寤 被 ,故不用其 莊 於 是以所賤 而 甲) 因以 心 至於葬親之時,天理自 子曰 「夷之請 無椁。」是墨之治喪,以薄 執 不從 而 也 兵, 話之。 自 移易天下之風 耳 得 事親也」兩句爲孟子設爲此 制 而 譬 其 ,若薄 見而孟子不許 之耳。 親與之角哉?」直,盡 「墨子生不歌,死 如 而 教,其心必有 蠻 凡 輔氏曰:「先儒皆以『夷子 葬 棺無柩之制者,蓋 夷寇賊之害,聖人固 事 固不 則 從 厚 特 輕 然發 其 也 ,何也?」曰: 接其 俗 教 動, 也 此 中 人,交 》斷以 所 於 有 無 人情 不得 事。 墨子之 不安 夷子 爲 言 言,以 П 使 爲 欲 道 夷 夷 如 聞 去

本,而夷子二本故也。夫,音扶,下同。 井,非赤子之罪也。 鄰之赤子乎? 差等,施由親始。」徐子以告孟子。 徐子以告夷子。 『若保赤子』,此言何謂 ,夫夷子,信以爲人之親其兄之子爲若親 之説以發其意,此政夷子之天理 宜有之,故孟子因舉 彼有 夷子曰:「儒者之道,古之人 此 取 且 事以詰之。 爾 天之生物也,使之一 也? 也。 一點明處也。 之則以爲 赤子 而下文又專舉 孟子 匍 匍,音 匐 將 愛無 E 喪 蒲。 人 其 葬

曰: 附 己也。」又曰 以「此言何謂 以拒 之言也。 「若保赤子」一句有似於墨子愛無差等之説,故舉之而 若保赤子」、《周書 於儒 「「施由親始」一句,乃是夷子臨時撰出來湊孟子意, 孟子之非 夷子引之,蓋欲援 也」,是其意欲 「愛無差等,施由 釋己 Ë 所以 輔氏曰: •康誥》篇文,此儒者 厚葬其親之意 援 儒 以歸墨,以 「夷子蓋以 親 儒 始」則推 而 拒 入於墨 孟子之非 儒 ◎ 語 者 墨 所 而 問 謂

氏曰: 母 即與己之子無異 儒。 却不 弟之子一般也。 犯法,正 先儒説皆不明白,今斷 之心,是他於理已去不得,故彊爲此 所謂 子無知而入井耳。 子言人之愛其兄子 與鄰之子, 所施則當自 等」之説,有似於儒者『若保赤子』之言,是欲彊 親,是甚道理!」○輔氏曰:「夷子蓋以墨子所謂 「若」則是取譬也明矣。 始」,便是把「愛無差等」之心施之,然把愛人之心 (書》之取譬,本爲小民 而 又言『施由親始』,謂『愛無差等』則皆 ·知『愛無差等』一句,已自不是了。 無二,乃自然之理,若天使之然也。 遁辭也。 「此理乃自 遊赤子 親始,以釋己之所以 無知 言兄弟之子而不言己子者,蓋兄弟之子 也。」且人物之生,必各本於父 然而然,故若天使之若此。」故其愛 輔氏曰:「蓋孟子之問 而 以爲《書 入井耳,非謂愛凡人之赤 蓋 輔氏曰:「『彼有取爾也』一句 《書》之取譬,本爲小民 無知而 》之取譬, 厚葬其 辭 説 他 親 與説,已得 以 方説 犯 本 當致厚, 所謂 避 之意也。」皆 法 有 免也。」孟 推 得 「愛 差 子 通 推 施 如 知 無 但 以 來 由 赤 云 其 丽 差 親

匐,蒲北反

先以 處。

Q

哉 ? 夷子但以 之施焉,則亦不知愛之所由立矣。 異於路人也 之親疎遠近,而所以爲愛者有差焉,此儒者之道,所 『愛無差等』,則是不知此身之所從出 親仁民,以至於愛物,而無不各得其所也。 情,自不能已,固非他人之可比也。 夷子之言,則是視其父母本 以立其愛, 「《書》云:『立愛自親始。』蓋人之愛皆始於事 ,故其愛亦主於一焉。 血氣者本於根荄,皆出 語 其施之之序,姑自此始耳。 自 此 一愛爲 人之有愛,本由親立,推而及物,自有等級。今夷子 有等差輕 立 或問:「此一節曰天之生物,有血氣者本於父母, 》曰:「人多疑其知所先後,而 此 無 即 解厚葬 差等, 而 所謂 雖其施之先後稍不悖於正理,然於親 推 重,此仁義之道所以相爲用 而 其親 孝弟爲仁之本也。 以 施 及 之則 Ż 於一 蓋 人,自 言 由 體而 而無二者 親 而 始,此 不知 有 分,血 是非二本而何哉?」 自是之外,則因 不 差 無異於路人, ,而視其父母 然後 『愛無差等』爲二 知此正是夷子錯 也。 夷子所 非二本而 等。 氣連屬,眷 今夷之乃 推 惟其本出 也。一今如 親 以 輔 以二本。 及民 因 氏 無以 戀之 而 以 其 事 티 : 何 謂 謂 親 分 於 及 親 其顙 蚋 蓋 心達於面 之於壑。 音 所謂

但

由

是也,則孝子仁人之掩其親 上世嘗有不葬其 子之言得以因 故其先親後踈之際,猶知 而其天理 覺其非 有終不得而 己之親,則是兩箇一 等」,何止二本,蓋千萬本也!」〇又曰:「事他人之親 二本,則二者並立,無差等矣。」〇又曰: 於先後之間 本也。」〇又曰: 汭。 有 泚 本。 嘬, 他日過之,狐狸食之,蠅 睨 也。 昌。 楚怪反。 點之明終有 蓋親親、仁民、愛物,具 其明 而 輔氏曰:「此段言夷子雖陷於墨子之教 蓋歸反虆梩 息者,此其所 猶 「既 不視。 而人之,夷子亦得因 是一 様重了。 泚,此 知 (親者。 不可 本,其 有所擇而 所 夫泚 禮反。 擇, 息滅者,此蓋秉彝之心也 如一木有 其 中 則 而 以 也 便 亦 不至妄行錯 親 睨,音詣 有本末也。 自 掩 又 卒能受命 非 然有 死 其明 之。 其 必有道矣。 「「愛有差等」,此 兩 則 爲 蚋 根也。」然其 本 許多差等,若 而受之也。」 人泚 姑嘬之。 爲,去聲 掩之誠 、舉而 施。 心 『愛無 之 而 中 故 委 自 明 孟 如 差

纍,力追反。 梩,力知反

尸,此 視也。 説爲 若 也。 姑, 意。 切,不至若此之甚矣。 此,在他 者,於此見之,尤爲親切。 正視,哀痛迫 也。 委, 必信、勿之有悔者,固皆自然之理。 非他人之所可得者,而 有不容已處深 因 人泚,言非 所當然, 夷 杜 語 棄 輔氏日 梩,土 顙 子 葬埋之禮 撰 助聲,或 也 視, 厚 妄 額 人,則雖有不忍之心,而其哀 作 葬 爲 Œ 也。 則孝子仁人所以 明夫人惟 「此又孟子略其遁 壑, 而 其 一視 他人見之而 也。 切,不能爲心之甚也。非 不 日 泚, 親 也。 山 所 可 因以是先王 行 螻 而 於是 水 由 一本,故其 泚 也。 蛄 不能不視,而 言 所 起 然汗出之貌。 反,覆 此, 也。 也 歸 趨 E 辭, 然也。 一所制 蓋惟至親, 世, 於親之喪哀 而 也。 而墨子二本,薄 以 嘬, 攢共食之 而 掩 此 也。 掩 專以其良心之發 深 葬埋之禮 謂 其親 掩 所謂 覆 蚋 明 太古 其 虆, 土 其 又不 睨, 邪 者,必 親者, 蚊 痛 本之 親 痛 故 迫 必必 葬之 屬 也。 爲 切, 本 之 忍 如 迫 誠

> 矣。」燻,音武。 子 有 以 其 道, 告夷子。 而 間,如 不 以 字。 薄 夷 爲 子 貴矣。 憮 然爲 間 曰:「命之

徐

氏曰: 也。 自牖之義,是以力不勞而功自倍 蔽,是以吾之言易入,而彼之惑易解也 不成句法。」 蓋因其本心之明,以攻其所學之 曰:「「命之矣」,之字作夷之名,方成句法。 憮然,茫然自失之貌。 「此贊孟子之善於教人,能因其明而 命,猶教也。 言孟子已教我 爲 也。」 間 者, 矣。 人之,得 有頃 若作虚字,則 令文 之 納 集 間

孟 子卷第五

後學 成德 校訂

孟子卷第六

朱子集註 後學趙順孫纂疏

招而往,何哉? 喪,去聲。

滕文公章句下

凡十章。

枉尺直尋,猶屈己一見諸侯,而可以致王又爲小也。」枉,屈也。直,伸也。八尺曰尋。王,小則以霸」而言之也。言不見諸侯,比「小則以霸」,「謂自局於小節也。此正對下文所謂「今一見之,大則以陳代,孟子弟子也。小,謂小節也。輔氏曰:陳代,孟子弟子也。小,謂小節也。輔氏曰:

孔子奚取焉? 取非其招不往也,如不待其殺之。志士不忘在溝壑,勇士不忘喪其元。孟子曰:「昔齊景公田,招虞人以旌,不至,將霸,所屈者小,所伸者大也。

方可玩索。」 輔氏曰:「讀 氣不餒,如何强得!」夫虞人招之不以其物,尚 以 見之邪? 守死而不往,況君子豈可不待其招而自往 二句,乃孔子歎美虞人之言。《語録》曰: 生,常念戰鬪 田 窮,常念死無棺槨,棄溝壑而不恨,勇士 旌,招虞 獵 也。 《孟子》須是就一章之中又斷置得如此分明 此以上告之以不可往見之意。 人以 虞人,守苑囿之吏也。 而死,喪其首而不顧也。 皮冠。元,首也。 志 招 大 ± 「非其 此 夫 輕 古

枉尋直尺而利,亦可爲與? 夫,音扶。與,平聲。且夫枉尺而直尋者,以利言也。如以利,則

也。 則見 利,必 不至於滅天理而壞人紀,不止 直大之辨,浸浸不已,殆 夫人一有計利之心,則 不 理上求之。 言之,甚言其 事,不可顧 爲之邪? 有 枉 此 可二 小而 計 以 利,私 危 有害。 利之心 用,喻 死事 下,正其所稱枉尺直尋之非。 所伸者大則爲之者,計其利耳。 欲 利 者,反不 且 不可 於義 吾雖處 也。 害。 如臨 甚 也 則 言 則 天 凡 難 味於 得十 如 理 人做事,多要趨 致死,義也,若不明 其 雖 偷生苟免之人。」〇 惟 有 其 利,喻於利則昧於義。 不 分利,有害隨在 枉多伸少 利 則 終 是 而 可 也,則 也。 務。 不 也 流, 此 0 方其 併 孟子所以 人 《語 利 而 與 小 始 欲 避害,不 其 背後,不)輔氏 録 有 也,猶 横 大皆不復 理 ₩ ⊟ : 利, 流 日 : 而 極其 夫所 義,天理 耐 顧 知 有 如 天天下 亦 「人心 利害 不 枉小 纔有 流而 且. 啃 將 謂 在

王良。 禽。 昔者趙簡子 禽。 嬖奚反 嬖奚 良 使 反命曰: 『天下之良工也。』簡子 :『請復之。』彊 命曰:『天下之賤 王 良 與嬖奚乘,終日 而 後 工也。」或 可, 而 朝 不 以 獲 而 告 獲

> 女,音汝。❶ 破。」我不貫與 『吾爲之範我 曰:『我使掌與女乘。』謂 而後中 也。 朝 力,今嬖奚不 御者不失其馳驅 言奚不善射,以 後肯也。 之,再乘 嬖奚,簡 趙簡子,晉大夫趙 而 範,法度也。 獲 爲,去聲。 也。 十。 也。 子 一朝,自 幸 馳 《詩》云:「不失其 《詩 、小人乘,請辭。』乘,去聲。 能 彊 臣。 驅,終日 舍,上聲 也。 而 法 • 之法,而射者發矢皆 鞅 詭 | 長至 後 小 馳 與之 貫 遇,不 也。 可,嬖奚不肯,彊之而 雅 驅 不獲; 八習也 王 食時 乘,爲 則 • 良。 王良,善御 車 不 Ē. 獲 也。 攻》之篇 而 一爲之詭遇 良不 之御 與 馳,舍矢如 廢 掌,專主 禽 可, 法 彊,上 也。 遇 者 中 詭 티 : 也。 也 言 復 而 遇

御者且羞與射者比。比而得禽獸,雖若丘

矣,枉己者,未有能直人者也。」比,必二反。陵,弗爲也。如枉道而從彼,何也? 且子過

仁義並 者知所法 比,阿 寧道之不行,而不輕其 枉己從人,無所不至。 得他是有諸己者。 哉?」輔氏曰: 行 孔、孟當先爲之矣。孔、孟豈不欲道之行 春秋戰國之時,而 道之不行,而不輕其去就,是以孔、孟雖在 不自重也,枉己其能直人乎? 古之人寧 一一中節,則道不得行矣。」楊氏曰:「何其 居今之世,出處去就不必 而 死 行 黨也。 而不悖,此其所以爲聖賢 也。 也。 欲道之行者,仁也。 使不卹其去就 「楊氏只説『何其不自重也』一句,便見 若丘陵,❶言多也。 凡人不知立己,故不自重,徇利忘義 唯君子明道 (去就 進必 也。 以 其以孔 也。」 正義,知所重在己,故 正,以至終不得 一一中節 進 而可 必以正者,義也 孟爲言者,欲學 ○或 以行道, 欲其 Ê :

○景春曰:「公孫衍、張儀豈不誠大丈夫哉?

一怒而諸侯懼,安居而天下熄。」

也。 景春,人姓名。公孫衍、張儀,皆魏人。 者,則用其險譎之術交鬬六國之君,使相攻伐 則説諸侯使相攻伐,故諸 「儀、衍二子,皆破六國之從以爲横者也,故或 若安居不出,則天下熄然無事 也。 侯懼 也 , 故 有 輔氏 觸 其 日 怒

以順 權勢,乃妾婦順從之道耳,黄氏曰:「衍、儀,戰 家,以嫁爲歸也。夫子,夫也。 國之遊 加冠於首曰冠。女家,夫家也。 爲正道也。 士也 _ 怒 而諸 蓋言二子阿諛苟容,竊取 侯懼,安居而 天下熄』,則 女子從人, 婦人内夫 其

❶ 「丘」,原誤作「血」,今據四庫本改。

爲正。其或夫有過失,亦當委曲 其意耳,是乃妾婦 侯,亦非能彊其所不欲也,不過阿諛苟容,以逢其惡 也。 順於人者非有他也,以其威福之權足以生殺榮辱乎 孟子以 義可也。 也, 豈但妾婦之可羞而已哉。」〇輔氏曰: 夫順於人者,人之所喜也,不順於人者,人之所惡 亦 有 即 足 稱者 是心而充之、則貪得嗜利、背君賣國者、皆若人 妾婦目之,況於學不及古人,才不及衍、 然亦或 矣。 以 有疆矯其夫而得 順從之道也。 其 無學 耐 不 知 巽 婦人之事夫,唯 正者,要之非常道。」非 道 順以 也, 開導之,使得於 「二子之説諸 切求 順 當當 儀 也 於人, 哉! 以 而 我 順 順 然

丈夫。」

丈夫。」

丈夫。」

丈夫之事也。

丈夫之事也。

意,直與天地同量,這箇便是居天下之廣居,便是居仁。録》曰:「大概只是無些子偏曲,且如此心廓然無一豪私廣居,仁也。正位,禮也。大道,義也。《語

成,地道平,萬物各得其所,則斯民也,當安然自適於泰 心。 德業之盛』者 曰:「他説得當時風俗 爲大丈夫。不知由君子觀之,是乃妾婦之 但見姦巧之徒,得志横行,氣焰可畏,遂以 之時,聖賢道否,天下不復見其德業之盛 隕穫震懼,故多挫攝其志氣。 道耳,何足道哉?」叔京,名鎬,昭武人。 屈,挫其志也。 不行於己也。」 淫,蕩 道於一己而已。守其道於己,則雖不得志,而其 也。『獨行其道』,則是其道有不容推之於人,故但 輔氏曰:「『與民由之』,則是推己之所得 箇便是行天下之大道,便是由義。」與 到得自家立身,更無些子不當於理,這 所得於人也,獨行其道,守其所得於己也 正位,便是守禮。 貧賤則居約處困,故多致變其節。 1 尤好。 及推而見於事,更無些子不合於義,這 愚謂: 使聖賢之道 人情, 其 心 富貴則求得欲從,故多致蕩其 出謂『聖賢道否,天下不見其 也。 〇何 得 叔京 移,變 行,而 民由之,推其 箇便是立天下之 遇威武則又易 而與民共由之 人道 日 其 立,天道 〇輔 節 道 戰 未嘗 守 也 或 氏 致 其

業,宜乎以 和 也 之域, 豈復以 孟子力辨而深詆之,其所以正人心之功大矣。」 是 姦巧之人得行 是區 品 者爲夸哉。 其 志 氣 既不復見聖賢之德 焰可 畏之爲大丈夫

則 出 仕。 〇周 疆 弔。』傳,直戀反。 霄問 必 《傳》曰 載質。』公明儀曰:『古之人,三月無君 曰:「古之君子仕乎?」孟子曰: 『孔子三月無君,則皇皇如 質,與贄同 下同 也

事 皇皇, 雉 而 周 之也 去國 霄,魏 也 如 出 也。 有 人。 疆 求 質, 載之者 而 無 所執 弗 君,謂不得仕而 得 ,將以見所適 之意 以 見人 者 出 疆 如 國之君 事 謂 ± 君 則 失 也 位 而 執

三月無君 則 弔,不以急乎?」

曰 周霄問也。 「士之失位 以、已通、太也。 也 ,猶諸侯之失國家也。 後章放此 禮

衣 曰:『諸侯耕 服 犧牲不成,粢盛不潔,衣服 助,以供 粢 盛; 夫人蠶 不備 繅 11,不敢 以 爲

> 不備, 以 乎?」盛,音成。 祭。 不 惟士 敢 無 以祭, 繅,素刀反。 田, 則 則 亦不祭。」牲殺器 不敢 皿、武 以 永反 宴, 亦 不 Ш. 足 衣 弔 服

黍 祀也如此。」又曰:「士有田則祭,無 祭祀,則祀不容以自安,而 以爲黼黻文章,而 廩,以供宗廟之粢盛。 曰:「此先王之制必如是,然後能自盡其心。 褘受之,繅三盆手,遂布 室,奉繭以 耒以耕,而 禮》曰: 稷曰粢,在 「諸侯爲 示 庶 器 于君,遂獻 人 日 助 藉 盛 服 以 人亦以爲弔焉。 百 以 終 使世 牲殺,牲 畝 祀先王先公。」輔 于三宫世 畝 于夫人。 冕 婦 而 收 蠶 必 青 而 田 于公桑 古人之重祭 至於不得 特 婦, 紘 夫 藏 則 殺 薦。 使 人 之 躬 也。 繅 副 蠶 御 秉

Ш. 所 以 覆器者

出疆必載質 何也?」

周 門 霄間· 也

曰:「士之仕也,猶農 夫之耕也,農 夫豈爲出

道而 亦仕國 隙,去逆反。 疆 之人未嘗不欲仕也,又惡 隙相窺,踰牆 之有室,女子生 人皆有之。不待父母之命、媒妁之言,鑚穴 也,君子之難仕 |舍其耒耜哉?」爲,去聲。 往 1者,與 也,未 惡,去聲 、鑚穴隙之類也。」爲,去聲。 嘗聞: 相 何 從, 耐 仕如 願爲之有家。 也?」曰:「丈夫生 則父母國人皆賤之。 此其急。 不 舍,上聲。 由 其道。 仕如: 父母之心, 曰 : 二 妁,音酌。 不由 此 而 其 晉 願 古 急 其 爲 或

爲家。 但直 其男女之有室家,而 君子仕否,然後言此以風切之也。 霄意以孟子不見諸侯爲 晉 一周霄 國 述其義理以告之而已。」男以女爲室,女 亦頗 ,解見首篇。 妁,亦媒也。 有策士之風,但 仕國,謂 孟子據道之極,不爲其 亦惡其不 言爲父母者,非 難仕、故先問古之 君子游宦之國。 由道。 輔 氏曰: 不 以 蓋 所 動 君 願 男

> 也。 也。 忘義,而屈道以信身也。」 君子之於仕,未嘗潔身以亂 爲聖賢之學者皆賤之,直與兒女子相窺相 天理之正,不俟人君之招,屈己以徇利,枉 相 窺,踰牆相從,則父母國 至於爲人男女而不待父母之命,媒妁之言, 輔氏曰: 「士之仕,猶男女之願有 人皆賤之。 倫, 而長往不顧 爲士而 室家者, 從者 道以 亦 仕 未嘗 1無異。 求 者,不循 鑚 此 À, 徇 Œ 故 則 利 理

從、皆去聲。傳、直戀反。簞、音丹。食、音嗣 傳食於諸侯,不以 則 天下,不以爲泰。子以爲泰乎?」更,平聲。 彭 簞食不可受於人"如其道,則舜受堯之 更問 曰:「後車 泰 乎?」孟子曰 數 十乘,從者數 非 百 其 道

曰:「否。士無事而食,不可也。」彭更,孟子弟子也。泰,侈也。

士之無事,固不可虚食也。食,則不可也。愚謂:彭更之意,不以舜爲泰,蓋以言不以舜爲泰,但謂今之士無功而食人之

曰:「子不通功易事,以羡補不足,則農有餘士之無事,固不可處食也。

子雖

不

潔身以

亂

倫,

而

亦不徇利而

忘義

於子。 粟,女 尊梓匠 之道,以 へ有餘· 於此 輪 待後之學者,而不得食於子。 輿 布 有 而輕爲仁義者哉?」羨,延 人焉,入則孝,出 子如 通之,則 梓 匠 則 輪 悌,守先 輿 面 皆 反 子 得 何 Ŧ 食

梓人匠人,木工也。 餘 通 也 功 易 有餘,言 事 謂 通 無 人之功 所貿 輪人輿 易 而 而 交易 人,車工也 積 於 其 無 事。 用 羡, 也。

食矣。」

可 子食志乎? 志爲 道 曰 食而食、食志、食功之食、皆音嗣、下同 也 「梓匠 哉? 其 志 輪 其 亦 興, 將 食功乎?」曰:「食志。」與,平聲。 有 功 以 其志將以求食也,君子之爲 (於子,可 求食 與?」曰:「子何以 食而 食之矣。 其 且

有功者則當食之。 孟子言自我而言,固不求食,自彼而言,凡

志也,食功也。」墁,武安反。子食之食,亦音嗣。則子食之乎?」曰:「否。」曰:「然則子非食曰:「有人於此,毀瓦畫墁,其志將以求食也,

墁,牆 而可 功,「則 更至此,其辨已 害 真尊梓匠 也 與 之食。 以士爲 壁 既 之 輪 \Box 「輕爲仁義者」,以 無事而食者,是真 飾 窮,不復有説,則 輿 食 也 而 功 輕 則 毁 爲仁義者矣。 以 瓦 畫 士 (尊梓 既以爲食功矣。 慢,言 爲 爲 匠 無 無 輪 事 事 輿」,以 而 輔氏 無 而 不 功 El: 可 食 以 爲 而 與之 有 爲 有 事 食

無 饋食。 祀。 犧 湯使人問之曰:『何爲不祀?』曰:『無 孟子曰:「湯居亳,與葛爲鄰,葛伯 楚惡而伐之,則如之何?」惡,去聲 ○萬章問曰:「宋,小國 牲 齊、楚、魏之兵,欲霸天下,疑 萬章,孟子弟子。 以 湯 也。』湯使遺之牛羊。 供粢盛 葛伯率其民,要其 又 使 人問 也。』湯使毫衆往 之曰: 宋王 也。 一何 偃 葛伯食之,又不 有 今將行王 嘗 爲 酒 即 滅 爲之耕,老弱 食黍 不祀? 此 滕 放 時 伐 而 稻者 政, 也 薛, 不 以 日 祀。 奪 以 供 敗

要,平聲。 之,不授者殺之。 之。《書》曰:『葛伯仇餉。』此之謂 盛,音 餉,式亮反 成。 往爲之爲,去聲。 有童子 以 饋食、酒食之食, 黍 内 餉, 也。 殺 遺 音 耐 "唯季 嗣。 奪

饋 餉,言與餉者爲仇也。 湯之民。 放而不祀,放縱無道,不祀先祖 葛,國名。愚案: 也。《書》,《商 其民,葛民 葛國在梁國寧陵縣。 書 也。 • 仲 授,與 虺》之誥 也。 也。 伯, 也。 亳衆, 銄 爵 亦 也。 仇

天下也,爲匹夫匹婦復讎也。』爲,去聲。 爲其殺是童子而征之,四海之内皆曰:『非富

東面 湯始 有所爲,則天下信之,如雨暘寒暑,無不感、無不通也。」 天下,何也?」曰: 之也。或問:「湯爲童子復讎,而四海之內皆知其非 非富天下,言湯之心非以天下爲富 而征,西 征 自 葛載」,十 夷 怨; 「聖人之心,廓然大公,表裏洞達 南 面 征 而 征,北狄怨,曰: 而 無 敵 於天下。 而欲得 故 富

時雨降。民大悦。《書》曰:『徯我后,后來其歸市者弗止,芸者不變,誅其君,弔其民,如『奚爲後我?』民之望之,若大旱之望雨也。

無罰。』

載,亦始也。

征

,所征十一

或

也。

餘

已見前篇

音嗣。
『有攸不爲臣,東征,緩厥士女,匪厥玄黄,紹明在爲臣,東征,緩厥士女,匪厥玄黄,紹而已矣。食,我周王見休,惟臣附于大邑周。』其君子實玄

案《周書·武成》篇載武王之言,孟 黄之幣,迎武王而事之也。商 依此文解之。 文如此。 紹、繼也,猶 而 不爲周 臣 然其辭特與今《書》文不類,今姑 者。 言 有所不爲 事 匪 也。 與 言其 篚 臣,謂 司 士: 女以 人而 玄黄 助紂爲惡, 子約 日 匪 幣 我 盛玄 也 周 其

虐耳。 附,歸 於水火之中, 師 武 \pm 之來 猶 \pm 能 服也。 个,各以 順 商 君子,謂 天休命 書》 取 其 孟子 所 其殘民者誅之, 類 謂 在 而 相 又釋其意,言商 我 位之人。 事之者皆見 迎 后 者,以武 也 休, 小人,謂 而 王 休 美 不 能 人 也 也 爲 聞 救 細 暴 民 唐 臣 言

殘,殺伐用張。于湯有光。』《太誓》曰:『我武惟揚,侵于之疆。則取于

民

也

在我而已。」

光焉,引此以證上文取其殘之義。而殺伐之功因以張大,比於湯之伐桀又有武王威武奮揚,侵彼紂之疆界,取其殘賊,武王威武奮揚,侵彼紂之疆界,取其殘賊,

不 而 行 望之,欲以 Ξ 〇尹氏曰:「爲國者能自治而得民心, 不能 政云爾,苟行王政,四 行 爲 王政,後果爲齊所滅,王偃 君。 齊、楚雖大,何畏焉?」 海之内皆 舉 走 首

> 説盡後 是道而求之於己,則知仁者之果無 尚 弱之勢言之,是可畏 則 何 天下 强 世爲國而不自 皆將 或 之足畏哉? 歸 往 彊 之, 但 以 而 恨 彊大爲畏 已矣。 苟 其 不 征 敵,而 自 伐 者之病, 輔氏 之不 帝 治 王之道 日 : 而 早 誠 一尹 以 是 能 也 强 氏 反

與 嶽之間 雖 齊人傅之。」曰:「一齊人傅之,衆楚人咻之, 我明告子。 也,則使齊人傅諸? 八,平聲。 日 孟 撻 子謂戴 數年,雖 而求 咻,音休。 其 不勝 有 齊 楚大 日 也,不 曰:「子欲子之王之善 . 撻 夫於此,欲其子之齊語 而 使楚人傅諸?」曰:「使 可 求其楚,亦不可 得 矣;引而 置之莊 得矣。 與 ?

子謂薛 名也。 也。 戴 不 咻,灌. 居 勝、宋臣 楚,楚 州,善士也,使之居於王所。在於 也。 也。 語 齊,齊 也。 齊 此 語 語 先設 也 齊 人 譬以 莊 語 嶽 也 曉 齊街 之也。 傅,教 里

上聲 善 ? 王誰 王 所 與爲 者 在 · 長 王所 善? 幼 者, 卑 尊,皆 長 薛居州 幼 薛 卑尊, 居 獨 州 皆 如 也 宋王 非 王 薛 誰 一何?」長 居 與 州 爲不 也

居 其 獨 然後可以 忠賢之士 取 成正君之功。 居 州 君 欲 辦於一人一己而已哉? 州 使 趨 而 (,亦宋人。 Ŧ 敗 事 爲善 走 薫陶 畢集于朝,在君之左右 其 類 功 況 愐 漸染,以變化其氣質,成 贵 已 可 於長幼卑 輔氏曰 哉 得 言小人衆 哉? 置 必 尊皆 「古之大臣 也 小 前後者,無非 兼收並蓄,旁求 非 人 於其 而 君子,而 君子獨, 欲 就其 間 正其 獨 則 德 正人端士 君 欲 便 性)廣使, 者 以 足 無 是贵 以 贵 以 薛 惑 取 特

曰:「古者不爲臣不見。 〇公孫丑問曰:「不見諸侯,何義?」孟子

之義也。 不爲臣,謂未仕於其國者也,此不見諸侯

段 甚 干 木 踰 迫 一,斯可 垣 而 辟 以見矣。 之,泄 柳 辟、去聲。 閉 門 而 内與 不内, 納 司 是 皆

> 之切 措 知 蓋未爲臣也。 段干木,魏文 至於文侯、 文侯、繆公欲 聖賢 亦 爲過甚 也。 於 繆公屈 此 輔 而 則 非 氏 必 曰 : 見此二人,而二人不肯見之, 侯 義 己求見,其 矣。」 見之矣。 已甚,過甚也。 時 士 人。 固 當 意已切 至 泄 守 於 義, 柳, 踰 垣閉 雖 而 魯繆 能 不可 迫,謂 户 聽 用 公 輕 則 與 往 時 不 否 求見 . 見君 成 未 可

現。 之。 也, 陽貨 得受於其家,則 惡,去聲。 而饋孔子 當是時 欲 見孔 矙, 音勘 陽 子 蒸 而 往 豚 貨先,豈 惡 ", 孔 拜 無禮, 其門。 子 得 亦 大夫有 不 矙 陽貨 · 見 ? 其 亡 矙 賜於士,不 也 欲 孔 見之見,音 而 子之亡 往 拜

貨 孔 家 以 此 於魯 也 己 子, 欲召 又引孔子之事 爲 爲 其 無 門,大 大夫,孔子爲士,故以 禮 孔子 也。 夫之門 來 受於其 以 見 明 己 可 也。 也。 家, 見 之節 對 矙 惡 使 無 此 窺 人 也 禮 物及 拜 也。 受於 畏 欲 其 陽 見 人

答之? 先 其人,是亦不屑之教誨也。 不 小人秉彝 來 在 加 而 然貨之意 禮 饋 不可 之,欲 也 殄,貨 則 輔 其 非誠 氏 既 \Box 來 先 矣,故但 天地之施與 來 拜 陽 加 而見之也。 貨 禮 (欲見孔子,而 於己, 往 答 萬物者, 其 則 禮 己 而 烏 悪 先, 豈 不 得 無 ·欲見 有 而 禮 謂 差 不

反。 曾子曰: 由是觀之,則君子之所養可 『未同而言,觀 赧, 奴簡 一脅肩 其色赧 諂笑,病于夏 赧 然, 非 ·知已矣。」 脅,虚業 畦。」子 由之所 知 路 也。」 日

己 赧 也。 此 病 態 脅 勞 所 清,竦 赧 也。 者,其勞過於夏 未 知 也。 慙 同 愚 ,甚惡之之辭 調: 體。 而 而 夏 面 言,與人未 竦 畦 赤之貌。 諂笑,强笑。 體 夏 者,竦 畦之人 月 也。 縮其身。 治 合 由,子路名。 畦 孟 也。 而 皆小人側媚之 之人也。 强 子言由此二言 强 愚謂: 笑者,强 與之言 治 容 言非 畦 言 而 也 灌 笑 爲 袁

> 污穢 洪。 仁之誠也。 輔氏曰: 於迫切而不洪,不 憐所惡者如此 所就也。」〇又曰:「言,心聲也。 深惡之,知猶不知,況爲之乎? 觀之,則二子之所養 不及之失也。 矣。」〇此章言聖人禮義之中正,過之者 路剛果勇決,故以 實,故視小人側媚之態, 禮之至,而 干木、泄柳,則過乎禮義之中正矣,故傷於迫切 曾子、子路之所言 而 可 「孔子之事,禮義之中 恥。 二子所守如此,雖 然與 此君子之行己,所以戰 輒 ,則二子所養,決不肯枉道以徇 未同 往 其 見之也。 污 ,則不及乎禮 耐 賤 - 及者 如 言赧赧其 之可 病于夏畦 可 各因 知, Ē 淪 恥 此子路守己之嚴 輔氏 觀二子之言,而 也, 寧 於 其資質,然亦 色者、爲 義之中 必不 之人 戰兢兢 失於 差以豪 污 賤 耐 肯不 Ė 一曾 迫 非 愐 深 而 切 人者,可 唯恐 :己所 憐 子 則 ൬ 可 故 之。 是 厚 知 而 俟 不 有過 失之 學 而 恥 其 知 重 淪 惡 洪 傷 其 力 子 不 知 所 不 而

段干、泄柳,猶爲狷者也。」

請輕之,以待來年,然後已,何如?」去,上聲。○戴盈之曰:「什一,去關市之征,今兹未能

盈 之,亦宋大夫也。 什 一, 井田之法 也

去聲

弱

市之征,商賈之税也。

已,止

也

雞 孟 曰: 『是非君子之道。』曰: 以以 子曰:「今有人日攘 待來年,然後已。』攘,如羊反。 其 鄰 『請損 之雞者,或 之,月攘 告之

之 ,物自來而取之也。 則 非 盗竊 者 之比。 若盜 輔氏曰:「因物 竊之爲, 則 又 大大不 自來 可 而 也。 掩 取

如知其非義,斯 損 也 速已矣,何待來年。」

新矣。」 以 吝惜之意,不肯速改 便以利言也,焉有兩存之理? 知 異 義 八哉? 理之不 輔氏曰:「天下事,只有義利兩端 可 而 則 不能 亦終歸於悠悠 速 若知 改, 義理之不可 與 ·必 月 不能 攘 纔 自 而 拔 雞 出 猶 而 義, 何 H 有

好,去聲,下同。 也?」孟子曰:「予 公都子曰: 天下之生久矣,一治一 「外人皆 豈 好 辩 稱 哉? 夫子 好辯, 予不 得已也。 亂。 敢 問 治, 何

> 生,謂 生民 也。 治 亂,氣化盛衰,人事

有欲,順 過。 後,遽有吕、武之禍,皆是也。 理,則雖氣化之盛,亦可以 失,此理之常也。 言其理之常者耳。」 庭之賢佐有 有 氣化而轉移之,若堯舜與賢之事是 尋,然人欲不行而唯理是順,則 故盛則必衰,衰則必盛,猶晝夜反覆之相尋。 氣化,而使之遽衰者, 氣化,而使之常盛者,亦有氣化盛,而人事之失有以 説『天下之生久矣,一治一亂」,便見他 得失,反覆相尋,理之常也。 :虞之世,三監弗靖於成周之時 先言氣化,後言人事者,氣化有盛衰,然後人事 乎理 以平之,則 則 事得 然亦有氣化衰, ,從乎欲則 此理之變也。 贵 不至 戕賊之,使遽衰。 向非舜、禹、周 於衰敗乎? 其事常得 事失,其得 ,而漢、唐之世 而人事之得 也。 蓋氣化無 輔氏曰: 胸 若肆 而無失,可 失雖 中 三苗 包 人欲 公之聖 集 欲 人則 可 亦 括 觀 註 而 再 以 以 弗 得 反 有 战 一及漢 格 孟 則 傳 有 有 宇 滅 併 轉 覆 理 之 但 于 天 與 理 敗 移 得 宙 子 相

民 當 無 堯之時,水逆行 所定。 下者爲巢,上者 氾 濫 于 中 爲 或 誉 蛇 窟 龍 居 ^

胡賈、胡工二反。曰:『洚水警余。』洚水者,洪水也。洚,音降,又

下,下地。 水逆行,下 流 上,高 壅塞,故水 地 也。 倒 誉 流 窟 而 穴 旁 處 溢 也。 也

《書》,《虞書 涯之水也。 警,戒 大禹 也。 , 謨》也 此一 亂 洚水 也。 輔 洚 氏 洞 曰 : 無

「此一亂,純由乎氣化也。」

之, 菹 菹 既遠,鳥獸之害人者消,然後人得平土 使 禹 治之, 水由 側魚反 地 禹 中行、江、淮、河、 掘 地 而 注之海 漢 驅 是 蛇 也 龍 而 而 險 放 居 阻 之

聖人於其間 同 中 遠,去也。 掘 稟於氣故 治,氣化人事相參者 ', 兩 地, 涯 掘 之間 有造化之用,亦時 去 也 消,除 壅 繁 塞 也。 氣盛 也。 也。 也 則 險 夫人與 Œ 菹, 此一治 阳 焉而 氣 衰,正 澤生草者也。 謂 己。 鳥獸,亦 也。 水之氾 氣多,則繁氣 相爲多寡、蓋 輔氏 濫 日 也。 此 少, 地

堯舜既没,聖人之道衰。暴君代作,壞宫室

怪。 以 多 不 得 爲汙 而 行,去聲,下同。 衣食。 禽 獸 池,民無所安息, 至。 邪 説暴行又作,園 及紂之身,天下又大亂 沛,蒲内反。 棄 田 以 囿、汙池 爲 袁 有 沛澤 使 民

等暴君不一,難以 暴 等惡人與 矣,故直推 相符者也。 澤,水所鍾 也。 及紂而又一大亂 君,謂夏太康、孔 宫室,民 夫虎豹犀象之害也 至 自堯舜没,其中夏太康、孔 紂時言之。 也。 屢數, 居 自堯舜没 也。 也。 至 想見夏桀之時,亦未必 甲、 紂 輔氏曰: 沛, 則大敗 履癸、商武乙之類 至此,治亂 草木之 此 極 甲、 亂 履 亂 而 所 癸、 **氣** 無 生 有 非 商 以 化 飛 復 武 人 廉 加 Z

王謨! 以 象 於 周公相武王,誅紂伐奄,三年討其君 Œ 海 而 遠之。 無 隅 缺。」相、去聲。 而 丕承哉,武 戮 天下大悦。 之。 滅國 王 奄,平聲 烈! 者五 《書》曰 + 佑啟 驅 丕 我 虎、 後 顯 豹、犀、 驅 《哉,文 飛 廉

奄,東方之國,助紂爲虐者也。愚案:奄國在

丕,大 僞 樂 以 舉《書》之説者,此言文王、武王謀謨之大,功業之光 此 烈,光也。 虐 材 淮 立 至 而 佑助 夷之北 豪壞缺之失也。 春秋時 力事紂。 刑 禁邪、正慝之法,無 民 不偏 治也。 政四 者 開迪夫後人者,莫非大正之道,周 也。 ,則道墜 凡所以 也 達 周 飛 而 佑, 武 顯 輔 廉 不悖,三千三百之儀與 E 正德 于 氏 蓋 書 伐 , 紂幸臣 助 明 日: 地 正可 (紂,并 也。 也 利用、厚生之具,無 而無復有存者矣。 一之或隳,夫然後 此 爲 殺之。 周 也, 謨,謀 啟,開也。 治 也。 書 無缺爲 又氣化 五 愚案: 也。 + 君 至誠 難 全盡 人事相參者 國,皆 可 牙》之 飛 缺,壞 承,繼 無缺 無倚之道 以 之不備 美,而 廉 爲 善 紂 謂 走 無 也。 也。 篇 無 缺 禮 也 , 黨 防 並 有

子 世 衰 弑 獸繁殖 亂 此 周 道 又氣化人事相符者也。 其父者有之。 室 微 ,有以戕民之生, 東遷之後,又一 邪 説暴 行 有作之有,讀爲又,古字 有 而猶未至賊人之性。 作, 前乎此 亂 臣 者, 也。 弑 雖 其 日 輔 君 世 氏 者有之, 至 通 亂 H 此以後, 然但 此

以 者其 是故 孔子懼,作《 之權 則 天理 庸 胡 此 子者,以謂 知孔子者,謂 一亂,又甚於前日,是亦氣化人事之使然也。 遂 禮、命德、討 氏 惟《春秋》乎 孔 至傷 使 於既 子曰 曰:「仲尼作《春秋》以寓 壞人倫, 亂 滅、爲 春 無 臣 「知 秋》。 其 此書之作,遏人欲於横 將 賊 罪, 我者其惟《春秋 使斯人 位 子 後 而 禁 世 其大要皆天子 春秋》,天子之 託二百四十二 盡 其 慮,至深 爲 欲 禽獸之歸 而 不 王法。 遠 学 得 其 也。 肆 之 禍 年 事 又 惇 罪 慘矣。

典、

也

我

懼? 發明 日: 致 行事,與天子無異。 人以王法繩 矣。」胡氏,名安國,建安人。 治之法 問: 備矣。」愚 恐未足以爲春秋之一治。』曰: 『孔子作《春秋》,特載之空言 諸 垂 侯,所 謂 於 孔 萬 襃所貶,皆是 此聖人大用,非 子作《春 世, 是 ○永嘉 亦 奉行 秋 非 孟 王法 陳氏 以 子不 亂 治 説當時 討 臣 也 日 賊 既 能 亂 空言 子 知 便 事 流 賊 何 此 罪 則 南 語 胡 緣便 謂 以 也。 治 録 孔 存 則 戚 面 Æ 寓

垂 使 輔 削 不 只 H 之,而 是 致治之法于萬世之下,則其功又大於舜禹矣。」 夫子得 氏 觀 日 : 存 者 得 知 其 位,以 箇 此 時 所懲 義 治 中 大明。 書 法, 治,又純乎人事者 撥 勸 掌 使 亂 故 於史官 道 而 如今之史書 亂 理 反之正。 臣賊子 光 , 想 明粲 人不 有 爛 直 然作《春 也。 所 書 得 懼而 有 其 見, 能 雖 氣化不 事 不 舉 秋 及 敢 前 》以 善 孔 行之, 犯 悪 子 應 討 爾。 瞭 取 亂 ,面 爲 然 IIII 賊, 治 不 在 筆

潤 聖王 是 無父 楊氏 肉 而 食 邪 食人也。』楊、墨之道不息,孔子之道不著 楊 廐 一不作, 朱 人,人將相食。 説 無 爲 盈. 有 我, 但知愛身,而 誣 君 天 肥 民,充 下。 馬、民 諸 是 是 無 侯放恣,處士 禽 天下之言, 塞 君 獣 有 二仁義 也 也。 横、爲,皆去聲。 飢 ; 不 色,野 墨氏兼愛,是無 復知 也。 公明 不歸 一横 仁 有致身之義,故 有 儀 議, 義 餓 티 : 楊, 莩,皮表反 充塞, 楊 『庖 朱、 則 父 歸 則 率 墨 有 也 墨。 鬻 翟 率 肥

無 君 ,故無父。 墨子愛無 無父無君 差等, 而 則 視 人道滅絶, 其 至親 無 是 異 亦 衆

己。 之道 無父。 事 君,以 義 氏兼愛,又弄得没合殺 深究其弊 若君親與他人不分先後, 不 人自私自利,不 高,則天下 自 仁義 世 儀 禽 人而人又相食也。 楊、墨只是差些子,其 高 相 知或有 間人營營於名利,埋 之言, 有殺身成仁之時,故不至 獸 符者 非率獸 便 如 此二者之所以 而 陷於禽獸, 謂 荷費、 能 Ë 也 而極言之,非 事 如 食人 邪 患 以 此 教誰 聖 難,在君 接輿之徒是 説 能 明 公明 而 人之道, 楊氏是箇退步愛身,不 及人,故 理 徧 何?」〇 楊 會? 爲禽獸 滿 八末流 親則當先救之,在他 而 儀 ,使天下倀 一没其 真 墨 非 則 大亂 有 此 之言,義 欲兼 妨 此 也 輔 是待 遂至於 道 一於無君 不 身 此 又一 也。」〇 便 氏 愛身也 於仁義 事 而不自知 行 是 然 天下之人而 將 曰 君親猶 也。」 倀 使 無 無 亂 起,是 然,必至於夫亂 則 問: 「 人皆 君 父無 見 此 **=** 非 然 也。 也 人 不愛 也。 理 他 故 首 有 如 君。 亂,又 率 會事 「不然。 皆 人 致 人則後救之。 亦 盡愛 墨 此 獨 物 也 鬥 分身事 語 氏 潔 潔 蓋 率 無 孟 也 底 食 此 之。 録 楊 氣 見 身 其 人, 獸 父 子 充 人 便 君 即 化 侕 世 而 身 氏 日 引 食 無 寒 之 是 伙 以 後 墨 他 亦 間 白 見

不曾 兩句 # 矣。 之誣,不有聖賢之教,左右扶翼之,則幾何 於人心,而爲邪説 拘,其少長 充之以全其量 至於充盛窒塞人心固有之仁義,使不能發也。 將起,是以與公明 遂行,則 則 親 充塞仁義也。 哉。」 人 無父,則 而 『邪説徧滿,妨於仁義』者,是解『邪 解『誣 也。 而反與 仁民,仁民而愛物,有自然之序,故不至於無父。 楊、墨之道不息,則 人皆無父無 以 也,又 民』兩字耳。 人道 禽獸無異也。 「徧滿」字解「充」字,以「妨」字解「塞」字,但 乎? 此四句,只是説天理人欲不並立而已。 滅 有物欲之蔽,其既 所 儀 絶,又將視弑父與君 誣 所謂 嗚 君 而充塞之,使不得達於外,況 呼 其實謂邪説誣罔天下之人,其勢 安爲亂賊 邪説 『率獸食人』、『人將相食』者 故引公明儀之説,以言楊、 人之始生也, 誣民。 以以 長 説 也 陷於禽獸 孔子之道不著 而冥然不覺矣 誣民,充塞仁義. 又 而 既 有異 能 有 夫仁義具 有所 , 而 端 氣稟之 立於 能 大亂 邪 , 則 所 説 廣 類 是 墨 無

説 事 吾 者 ,害於其政。 爲此懼,閉先聖之道,距楊、墨,放 不得 作。 作於其心,害於其 聖人復起,不易吾言矣。 事,作 淫辭 爲,去 於 其 邪

聲。復,扶又反。

墨之比,所以 之害,甚於申、韓; 所以不在禹下,而亞於孔子也。」程子曰:「楊、 墜。 政者,事之綱。」孟子 事 閑 兼愛、疑於仁,此易見。 其惑世之甚也。 申、韓則淺陋 蓋楊氏爲我,疑於義。 墨之説滅息,君臣父子之道至今得以不墜,此孟子之功 也,故氣化不應,而孟子亦不得志於時。 之害,自是滅息, 楊朱看來不似義,他全是老子之學,只是箇 ,所行。 衛 是亦一治也。 政,大體 放, 易見。 爲害尤 驅 雖 而 佛氏之言近 楊氏爲我,何 輔氏曰:「此一治,又純乎人事 佛氏之害,甚於楊、墨。 君 而 也。 不 故 甚 遠 臣父子之道,賴以不 . 得 ○」《語録 墨氏 孟子 真氏曰: 之也。 志於時,然楊、 止 兼愛,疑於仁。 以 Ĭ 理, 疑 闢 「事者,政之目 然因其言而 作, 於義?』曰: 楊、墨,爲 問: 又非楊、 逍遥 起 物外外 「墨氏 也。 楊 墨

説

見

上篇。

承,當也

之理 翟一於兼愛,則昧乎分之殊。 有序,則非 心無不溥 墨翟於親踈之間無乎不愛,故其迹似乎仁。 只是硬恁地做,佛氏最有精微動得人處。 不相侵越,微似 僅足其身,不屑世 身之外截然弗 ·無不陷焉。」○真氏曰: 本 而 兼愛矣。 而 分則 其 施 義。 卹, 殊,故君子親親 有 故其 楊朱專於爲我,則 序。 自然終不似也。」二〇又曰: 心 迹似乎義。 「義者、任 無不溥,則 若是而曰仁義,乃 而 仁. 仁者 理 八非爲 昧乎理 民,仁民 而 本朝許多極好 尚恩 無情, 殊不知天下 我 矣; 之 而 而愛物 所以 楊朱自 「楊、墨 主愛 其 賊 墨 施

昔者禹抑洪水而天下平,周公兼 而 曰:「三聖 抑 白 姓 11: 寧 也。 ·, 孔 事 雖不 子成《春秋》 兼 ,并之也, 同, 而 其捄天下之患,立生民 而 總結 亂 臣 上文 賊 夷狄 子 也。 驅 猛 之極 真 潤 氏

乎仁義也。」

承。』無父無君 詩》云:『 戎狄是膺, ,是周公所 荆 膺 舒 也 是懲, 則莫我 敢

則

務之人。 只是他 自愛其身,界限 齊整, 皆去聲 我 承三聖者 亦欲 正人心,

息邪説

距

詖

行,放淫

一辭,以

티 : 流 繼 詖、淫, 狄篡弑之禍,故孟子深懼 也。 壞人心術,甚於洪水猛 三聖,禹、周 解見前篇。 豈 好辯 哉 ? 公、孔子也。 辭 者,説之詳也。 予不得已也。 ៣ 獸之災,慘 力救之。 蓋 邪

乎孟子之深排力詆而不少置也。」再言「豈好辯哉, 故曰 以深致其意者,欲人之察其 之性耳。 息,故知邪説之言特爲深切, 予不得已也」,所以深致 壞,將胥而爲夷狄禽獸之歸矣。 身,或專出於氣化,故曰災。 一禍 「洪水猛獸,害人之身,夷狄篡弑 至於邪説横 然人而爲夷狄之行,篡弒之事者,但自賊 輔氏曰: 知 流不能救 道者 能 真 心而知邪説之真可 ,而真 備 賊人之性,則實出於人爲 意焉。 知 人物 止,則天下之心皆爲之蠱 此其所以 有 其 不得 於一身,通古今於 ,賊人之性。害人之 所 輔氏曰: 以 耐 爲害愈慘。 不救之者也 不 畏也。」 得已之 「重言此 於 説 輔 夫己 承, 然 夷 横 宜 氏

故哉? 非知道之君子,孰

真知其 學者苟能考三聖之心,味孟子之説,詳朱子之註,則非 則聖人將無所爲矣,豈獨孟子之辯哉?」 之重也。 孟 子爲 分所以 兀 且歷代聖人之所爲,皆不得已而爲之者也 夫耳,而不知其所憂者如 不得已之故,亦將併與斯道而得之矣。 是之大,所任 人徒見 得已, 如是 徒 能

能言 得 然後 意 言 賊子,人人得 類不淪胥於禽獸也。」孟子既答公都子之問 正 此 所以勉天下學者 有 荷 而 矣,雖未 距楊、墨者,聖人之徒也。 此可見孟子自任之重而 司 謂 自 有能 攻之,不必聖賢; 未 以 [朱子發之,若朱子,則真可 自今以 繼 盡 聖 , 故 爲 必 人之事,但 後,不待有知道者真 此 而討之,不必士 知 ,皆以闢異 復言此。 距楊、墨之説者,則 道 一, 是 能爲説以 (端扶王道爲心,庶幾生人之 望人之切也。」〇真 亦聖人之徒 如《春秋》之法,亂 蓋 邪 謂以 距 能 師 説 則 息滅楊、 是 也。 害正 是 道 亦 自 也 聖 輔氏 其 任 人人人 墨之害 人之徒 氏 所 者,故 輔 臣 而 趨 氏

> 及於後世者,其亦真知孟子不得已之故矣。」 尹氏曰 聖賢之心 時,方且以 害流於生民,禍及於後世,故 者,其爲 之,則不能 如是之嚴,而 救 世立 1 法之意, 邪詖之徒, 學 也。」輔氏 好 攻討,而 者於是非 自以 辯 目 其 爲承三聖之功也。 之,是以常人之心 切 又 亂 一尹 唱 如 賊 之原,豪氂 氏 爲 此。 之 所 不 黨 謂 孟 必 若 害流 口 子 攻 以 知 於生 有 辩 討 此 當 之 邪 民 而 意 度 是 説 則 説 推 禍

曹。 然後耳有聞 李,螬食實者過 陵,三日 王 咽 章 曰 : 音 不 食, 目 陳 耳 有見。」於,音 半 仲 無 矣, 子 聞 贵 匍 不 目 匐 誠 往 無 鳥 廉 將 見 下 - 於陵同 也。 食之,三咽, 哉 井 上 居 有 於

言 取 王 也。 章、 無 力不能 陳仲子,皆齊人。 於陵, 行 地 也。 名。 咽,吞 螬 蠐 廉, 也 螬 有 蟲 分辨, 也 匍

容,而聖人之道不復有蔽蝕之者矣。

豈

小補

哉

聖人

言此以詔

天下。

使天下人人存是心

,則異端之説將

無

所

焉。 孟 子 雖 日 然 : 仲 於 子 齊 惡 或 之 能 士,吾 廉 ? 充仲子之操 必 以 仲 子 爲 則 巨 蚓 擘

而

後

可

者也。

擘,薄

厄反。

惡

平聲。

蚓, 音引

守之志 丘 者」相似。」充,推 而 時, 指 巨 孟子亦以 蚓 中 擘 士之傷廉者,必多有之,此匡章之所以推仲子之廉,**❶** 也。 ,大指 有 大指 則 言仲子 爲 惟 也。 齊人之巨 也 丘 而 蚓 言 未 滿之也。 輔 之無 擘 氏 齊 得爲廉 日 也。 人 中 求 「齊俗奢侈放 其 操,所守也。 於世 語 有 也,必若滿 意與 仲 子, 子 然後 縱, 誠 如 當戰 齊 可 衆 其 人也 蚓 所 以 小 國

與? 伯 夫蚓,上食槁 食之粟,伯夷之 夷之所築與 爲 廉耳 是未 可 知 壤,下飲黄泉。 ? 也。」夫,音扶。 所 樹 抑 亦盜 與 ? 跖 抑 與,平 之所 仲子所居之室, 亦 盜 築 跖 與 之所 ? 所 樹

也 槁 壤,乾 言 蚓 土 無求 也。 於人而自足,而 黄泉,濁 水 也。 仲子未 抑,發 免居 語 辭

室食粟,若所從來或有非義,則是未能如

蚓之廉

也

曰:「是何傷哉? 彼身織屨,妻辟纑,以易之

辟,績也。纑,練麻也也。」辟,音璧。纑,音盧。

他 同,子六反。 出 不義 之食之。 用是鶃鶃者爲哉?』他 以兄之禄爲不義之禄而 曰:「仲子,齊之世 而 日 歸,則 哇之。 之室 其兄自外至,曰:『是鶃鶃之肉 惡,平聲。 而 有 蓋 不 饋 音 居 其 閣。 鶃, 兄 也 家 辟, 魚一 生 辟 也。 日 音 島我 反。 不食也,以兄之室爲 兄 避 「, 其 者 離 兄 哇,音蛙 頻,與 ¨, 己 母殺 戴, 母, 頫 顰 是 處 蓋 顣 同 於於 鶣 禄 \Box 顣 也 萬 也 與 悪 陵 鍾 與 醛

萬 世 宣家,世 鍾 也。 卿之家。 歸, 自 於陵 兄名戴,食采於蓋 歸 也 己, 仲 子也 一,其人

「匡」,原避宋太祖諱作「康」,今回改。下文不再出校

0

不義也。哇,吐之也。

仲子者 以 以 於陵 母 言仲 則 不 :子以母之食、兄之室,爲不義 則居之。 ,蚓而後充其操者也。」 食 以 妻則食之,以兄之室 是尚爲能充其 類 也 乎? 則 而 弗 不 居, 若 食

子所以 乎? 也。 氏曰: 古 「不得於言,勿求於心」,以 其 而 則食之居之, 豈爲 義 陵所居之室,既未必伯夷之所爲,則亦不 不居 以道 固 志 之 況如匡章者,既已稱仲子爲誠 執)類耳。 而得爲廉耳 ,其操守如此。 自任 「以仲子之孤介自守,足以高於一世之俗矣, 力闢之者,蓋世 必其無求自足,如丘蚓然,乃爲 説,力行以取名,初 者之所憂也 今仲子於此 衰道 ,然豈人之所可爲哉 則孟 能充滿 至許行 微,學者大抵因 至於妻所易之粟,於 不 子烏得 顧 則不食不居,於彼 廉 義理之如 陳仲子之徒 其 而不與之辯哉?」 而 操守之類 傾向之矣。 其資 何。 皆 質 如 能 告子 是 而 滿 者 此 輔 物 孟

> 畏哉! 所以爲 彝也。 〇又曰 行,適足以 有無人倫 之所以爲大者,以其有人倫 之所能爲,則是邪説詖行,又豈可不深辯 其操焉者斥之,則仲子之行,是豈人之所 之,則已有不能自滿其志者,故孟子直以 離母,無親戚君臣上下,是 曰:「天之所生,地之所養,惟人爲大。 道充之,則至於與丘蚓同操。 〇又曰: 大也。 人唯有· 聖 「仲子之所守,不必驗之他人也,只自 夸 而 一賢之道充之,則至於與 於 人倫 避 亂 可 兄離 世 以 然後可 而 母, 爲 惑 則 夫 廉哉?」輔 人 以與天地 是 心 是贵 無 也。 人 倫 人理也 天 無 也。 並 可 矣。 地 氏曰:「人倫,天 人 不 立 能 而力攻之耶! 爲 同 謹 而 雖 倫 仲子避兄 哉 爲 蚓 功。 爲三,此 哉 哉? ! 范氏 有 也。 而 其 仲子之 小 身 後 廉 非人 可 能 而 人 不 僻 其 充 推

孟子卷第六

學 成德 校訂

後

孟子卷第七

朱子集註 後學趙順孫纂疏

離婁章句上

凡二十八章。

不能成方員,師曠之聰,不以六律,不能正五孟子曰:「離婁之明,公輸子之巧,不以規矩,

音,堯舜之道,不以仁政,不能平治天下。

離婁,古之明目者。愚案:離婁,黄帝時人,能視

人見。愚案: 班,一年段,天下之五工,掌作雲弟之戒於百步之外見秋毫之末。 公輸子,名班,魯之巧

方之器也。愚案"規者,所以規圖器械令得其類也。以攻城。規,所以爲員之器也。矩,所以爲人也。愚案"班,一作般,天下之巧工,當作雲梯之械

陰陽。

黄鍾爲陽,大吕爲陰,太蔟爲陽,夾鍾爲陰,每

律,陰六爲吕,言六律不言六吕者,陽統陰也。 空生竅厚大均者斷兩節,間而吹之,以爲黄鍾之宫。 案: 黄帝使伶倫自大夏之西、崑崙之陰取竹於解谷,❶以 知音之不調。 딘 : 師也,其聽至聰。平公鑄鍾,使工聽之,皆以爲調。 師 矩者,所以矩方器械令不失其形也。 十二筩,比黄鍾之宫而皆可以生之,是爲律本。 ,知音者也。 「後世有知音者,將知不調,臣竊爲恥之。」至師涓,果 六律,截竹爲筩,陰陽各六,愚 愚案:師曠,字子野,晉平公之樂太 師 曠,晉之樂 以節 陽六爲 師 Ŧi. 制 曠

鍾至仲吕,皆屬陽,自蕤賓至應鍾,皆屬陰,此是一箇大 以括之,又制十二律以節。五聲中又各有高下,每聲又 以括之,又制十二律以節。五聲中又各有高下,每聲又 以括之,又制十二律以節。五聲中又各有高下,每聲又 以括之,又制十二律以節。五聲中又各有高下,每聲又 以話之,又制十二律以節。五聲中又各有高下,與人制五聲

■「解谷」,原誤置「於」前,今據四庫本移正。

八四九

徴、羽· 天下 度 陽 爲尊卑,故曰宫、 二,角數六十 間 也。」 不 陰,又是 也 可 四、徵數 愚案: 無 商、角、徵、羽。 法 箇小陰陽。」五音: 五音始於宫,宫數八十一,商數七十 度,仁政者,治天下之法 五十四,羽數四十八,以數之多少 范氏曰:「此言治 宫、 商、 角、

者,不行先王之道也。聞,去聲。 | 今有仁心仁聞而民不被其澤,不可法於後世 |

也。 也 以 謂專恃 者,初不足恃, 子告齊宣王,曰『是心足以王矣』,則仁心者,固王政之本 聞於人也。 之道,如其篇末所論 曰:「是心足以 仁心,愛人之心也。 爲法耳 盡天理,合人心,雖聖 今曰『有仁心仁聞而不行先王之道』,則 此 但 心 而 其盡 直 而所 先王之道,仁政是 王」者 可 心 以 謂 知 『制民之産』云者。 王 ,言有是心 先王之道者,又在此 性 也 人 而 仁聞者,有愛人之 復 無 先王之道 起 私意小智之累,故其 而 而 能 有所不能易者 擴 古 司 也。 充之,以 亦 心之外 以 是所謂 由 或問: \pm 是 車 而 行 為法 一, 非 先 推之 也。 仁心 孟 聲 後 \pm

> 學無 而不能保,武帝有仁聞而 異 先王之道則同 帝之末,江 謂 牲 心。 制方員,其器之不至於苦窳也幾希矣。」范氏 仁聞,而未免於徇私妄作之失。 而不能 固有者,非謂心外有法而俟於它求也。 之人君,當以吾心而廣之,以盡夫法制之善,而 王、梁武帝爲有仁心仁聞之證,甚當。 宣王不忍一牛之死,以羊易之,可 端 断 聞 有仁聞。 避罪 術,奪於功利,而不能行先王之道者也, 而 梁武帝終日一食蔬 無私意小智之累,苟不循 死刑必爲之涕泣,天下知其慈仁,可 不行先王之道故 要 福 若論 南 然而宣王之時,齊國不治; 而 大 不 其所以 亂。 肯 非其真。 行先王之道 不能行之故 其 故 譬之蔑弃規矩而 素,宗廟 也。」輔氏曰:「引齊 是而之焉,則 何 者 哉? 然論 也。 後人雖有是心 則 以 武帝 異。 宣 曰:「齊 王有 謂 雖有 君 有仁 麫 充吾心之 一欲以手 則 宣 不 爲 有 能 惑於 王不 仁心 . انار 武 犧 行 宣

徒,猶空也。有其心,無其政,是謂徒善,故曰,徒善不足以爲政,徒法不能以自行。

有 爲政 其 政 須 要 無 有 其 綱 心,是 紀 文章 謂 徒 謹權、審量、讀法、 法。 程子 · 嘗 言

平價,皆不可闕。」而又曰:「必有《關雎》、

正謂此也。《語録》曰:「所謂文章者,便是文飾那謹《麟趾》之意,然後可以行《周官》之法度。」

權、審 文帝近於徒善,如 前 法不能以自行」。 之微,積累到薰蒸洋溢,天下無 周 官》之法度。 説 量、讀法、平價之類耳。」〇又曰: ,所以證 『徒善不足以爲政』; 不然,則爲王莽矣。」○輔氏曰: 漢武帝近於徒法。 政須要詳備,心須要 一不被其化,然後 後 (誠實。 「須是自閨門 説 , 所以 後世 引程 口 證 如 以 袵 一徒 漢 子 行 席

《詩》云:『不愆不忘,率由舊章。』遵先王之法

而

過者、未之有也

也。」所? 昭 故 循也。 顧 也 不及處。 大雅 行不過差不遺忘 章,典 輔氏 「遵用 法也。《詩傳》曰 「『過差』,謂用 假樂》之篇。 舊典」, 則有 者,以 所循 意過 :「先王之禮樂刑 愆,過 當 故不過差; 其 處。 循 一遺 也。 用 忘」,謂 舊 有 率, 典 所 政

據,故不遺忘。」

律,正五音,不 聖人既竭 以不忍人之政,而仁覆天下矣。 員平直,不可勝用也;既竭 目力焉,繼之以規矩準 可 勝 用 也; 既竭 耳力 心 焉,繼之以 繩 思焉,繼之 以 爲 方

廣矣。 也。 也。 度以繼 也。 天下則能及後世矣。 天下者,皆用是而不得違之,所謂不 爲法度以繼續之,使天下後世之爲方員平 止於聖人之身而已,固不能徧天下與後世 以仁覆天下之法度也。 以揆平取正也。 準,所以爲平。 然猶以爲未足以徧天下及後 止言覆天下 六律六吕,所以正五音之法度也。 此言古之聖人,既竭 輔氏曰:「規 續之,則其 耐 繩者,上下端直 不言及後 繩,所以爲直。 白 矩 不爲之法度,則聖人之耳目 工之事皆聖 用不窮,而 準 繩, 世 所 者,舉 經緯 以 耳 可勝 爲方員平直 人作,故 大以 世、故制 目 74 仁之所被 不忍人之政,所 愚謂 通 用 直、 也。 心 該 也。 而仁 思 規 遠 正 故聖人制 矩 也,能 之力, 五音、仁 覆,被 準者,所 立法度 覆天下 準 爲 心思 者 法 覆

六律 言思者,耳目之視聽以力,而心之官則思也。」 Ŧī. 音,并 與不忍人之政 作 統 説 了。 耳 目言 力、 心

故曰 ,爲高必因 丘陵,爲下必因 Ш 澤。 爲 政

不因 先 王之道,可 謂智乎?

論 力少而成功多矣。 丘 陵 以仁心仁聞行先王之道。」 本高 ,川澤本下,爲高下者因之,則用 鄒氏曰:「自章首至此

是以 其惡於衆也 惟 仁者宜 在 高 位。 不仁 一而在 高位 一,是 播

之道者也。 仁者,有仁心仁聞而能擴而充之以行先王 播惡於衆,謂 貽 患於下也

朝,音潮 度,君子 上 無道揆也,下無法守 犯義,小人犯刑,國 也 朝 之所存者幸 不信道,工不 也 · 信

揆,度 量事物 此言不仁 也 而 制其宜。 而 法 在 制 高 度 位 也。 法守,謂以法度自守。 之禍 道 也。 揆, 道,義 謂 以 義 理 理 也 度

以

責其

君。」

分明知得條法,只是冒法以爲姦,便是不信度也。」 自然依那箇行,不敢 信如憑信之信。 揆,則 工,官 則下無法守,雖有奉法守 亡,其不亡者僥倖 不信度而 言 也。 朝不 也。 由 小人 ·信道 上 度, 這箇道理只是要人信得及,若信得及 無 即 逾 犯 而 道 越。 法 刑。 而 揆,故 君子犯義; 也。 른 惟其不信,所以妄作,如 官者,亦將不能 有此六者,其 《語録》曰:「上無 君子小人, 下 無 無法守, 法 用 守。 而 以 去之矣。 或 則 無 位 道 胥 必 道 而

野 故曰:城郭不完,兵甲不多,非國之災也, 無學,賊民興,喪無 爲亂。 不 上不知禮 辟,貨財不聚,非 鄒氏曰:「自『是以惟仁者』至此,所 則 無以教民; 日 矣。 或 之害也; 辟,與闢同。 下不 知學,則易 上無禮,下 喪,去聲 與 田

泄,戈制反 詩 日 『天之方 蹶, 無 然泄 泄。 蹶, 居 衛

反。

自 苟從,故戒群 티 : 責 蹶 無 詩 非 前 ¥ 得 泄 陳 君臣上下力加振作,於此奮發有爲,則何能救正 國家有 泄 善 「蹶,動 大雅 泄,蓋弛緩之意。」言天欲顛覆周室,群 泄 便是振發底意,不然,則淪胥以亡而已。」 傾覆之勢,常情處此,消索震懾,易得怠緩 臣 然,不急救正之。 也。」泄泄,怠緩悦從之貌。《詩 • 以無得泄泄 板》之篇 然不急救正之。 蹶,顛 輔氏曰:「天之方 覆之意。 當此之際 《詩 傳 也 臣

范

氏曰

:「人臣以

難

事

責

於君,使

其

君

爲

堯

舜之君者

,尊君之大也;

開陳

善道

以

禁閉

泄泄,猶沓沓也。沓,徒合反。

沓解 輔氏 者釋之也。」 沓沓,即 E: 泄泄,蓋以 泄 泄 泄,東 泄之意。 泄 泄 周時 古語 語。 難曉, 蓋孟 沓 沓, 而以當時之言人所易曉 戰 子時人語 國 時 語 孟 如 子以沓 此。

事君無義,進退無禮,言則非先王之道者,猶

非、诋毁也。

沓沓也。

故曰:責難於君謂之恭,陳善閉邪謂之敬,吾

能謂之賊

義,此皆是賊 邪,蓋不徒責之以難,凡事有善則陳之,邪則閉之,使其 之事望其君。 以致小康而不足以致大治,或導之以功利而 堯、舜,若度其君不足與爲善而不之諫,或 志,以先王之道爲可必信,可必行。 君不陷於惡,便是敬。 其君,不敢謂 只是恭意思較闊大,敬意思較細 功夫去照管,務引其君於當道。」〇問:「人臣固當望君以 者,亦不難乎閉之矣。」〇《語録 敬君之至也" 謂其 故必爲之開陳善道,使之曉然知善道之所 之道而逆閉之,則動 者,奈何?」曰:「君有邪心,所當閉也,然不 者,贼害其君之甚 君之邪心,唯恐 其君否?」曰 其不能,便 責以十分事,臨了只做得二三分, 有 其 責難之恭,是尊君之辭, 矯拂之患,其 也。」或問: 君 是 君 然。 責 或陷: 不能行善道而不以告 難 Ĭ 於君, 密。 人臣之道, 於有過之地者 陳善閉 「恭敬,大概也 言 如以 「所謂 便是 不 謂 在 堯、舜三 可 邪,是子細 是恭。 不輔 但 知 君 『陳善閉 一則所 得 當 先立箇大 爲 所以閉之 耐 陳 若只責 以 之以仁 中 人矣。 極等 才 善 代 謂 般 邪 可 着 閉 望 邪

《詩》云『天之方蹶』至此,所以責其臣。」○高下優劣,但當以堯、舜之道望之。」鄒氏曰:「自之高下,固有不同,然吾所以導之者,則不可問其才志之以二三分,少間做不得一分矣。若論才質之優劣,志趣以二三分,少間做不得一分矣。若論才質之優劣,志趣

者也。

鄒氏曰:「此章言爲治者,當有仁心仁聞以 鄒氏曰:「此章言爲治者,當各任其責,則 世界, 以仁心仁聞而行先王之政,然非君臣同心,各任其責,則 以仁心仁聞而行先王之政,而君臣又當各任其責也。」輔 知氏曰:「此章言爲治者,當有仁心仁聞以

○孟子曰:「規矩,方員之至也,聖人,人倫

之至也

都盡,無一豪之不盡,故爲人倫之至。」 爲之便見,於人倫有未盡處,以聖人觀之便見。 方員,聖人便盡得 曰:「規矩是方員之極,聖人是人倫之極。 方員之理,猶聖人 至,極也。 人倫説 人倫,故物之方員者有 盡 見前篇。 所以爲人之道。 規矩 未盡 蓋規矩便 盡所 處 《語 惟 以 以 聖人 盡得 規 録 爲 矩

> 舜而 君者 欲 爲 已矣。 也,不以堯之所以治民治民,賊其民 君 盡 君道,欲 不以舜之所以 爲臣 盡 事 臣 堯事 道,二者皆 , 君,不 敬 法 其 堯

員。 君臣,所以各盡其道,而爲萬世之法,猶規矩之盡夫方 故均有是倫; 或問此章之説。 員之極,此孟子所以道性善 性,故爲人倫之至,而所由莫不盡其道焉。 法堯、舜以 而天下之爲方員者,莫不出乎此也。」 均有是倫,故均有是道。 盡君臣之道,猶 曰:「人之生也,均有是性,均 用規 而 然惟 稱 矩以 此堯、舜之爲 堯、舜也。 聖 人能 有是性 盡方 盡其

孔子曰:『道二:仁與不仁而已矣。』 舜,則 只是 説有 哉 ? 法堯、舜,則盡君臣之道而仁矣,不法 無 他 小路,有大路,何疑之有。」」〇輔 道。 箇天理與人欲而已。 《語録》曰: 慢君 出 賊 乎此,則入乎 民 「問:「不仁何以亦曰道?」曰: 而 不仁矣。 纔出天理,便人人欲也,豈 彼矣,可 氏曰 二端之外,更 「仁與不仁 不謹

名之曰『幽厲』,雖孝子慈孫,百世不能改也。暴其民甚,則身弑國亡;不甚,則身危國削。

幽,暗。厲,虐。皆惡諡也。苟得其實,則

懼之甚也。輔氏曰:「不仁有淺深,而其禍有大小。廢公義而改之。言不仁之禍必至於此,可

諡,遺臭後來,孝子慈孫欲改不可。不仁之禍循致如此,以幽、厲視桀、紂,則幽、厲雖未至於身弒國亡,然死蒙惡

《詩》云:『殷鑒不遠,在夏后之世。』此之

豈不可懼之甚哉。」

謂也。」

亦至切矣。」
《詩・大雅・蕩》之篇。言商紂之所當鑒學人以幽、厲爲鑒也。輔氏曰:「孟子雖是平説將去,不以幽、厲爲鑒也。輔氏曰:「孟子雖是平説將去,不以幽、厲爲鑒也。輔氏曰:「孟子雖是平説將去,不以善、

| 也以不仁。 | ○孟子曰:「三代之得天下也以仁,其失天下

得之。桀、紂、幽、厲,以不仁失之。三代,謂夏、商、周也。禹、湯、文、武,以仁

國之所以廢興存亡者亦然。

國,謂諸侯之國。

卿大夫不仁,不保宗廟,士庶人不仁,不保天子不仁,不保四海,諸侯不仁,不保社稷,

門體。

言必死亡。

今惡死亡而樂不仁,是猶惡醉而强酒。」惡,去

皆當佩服以自警也。然所謂不仁者非他,縱人欲以滅天此承上章之意而推言之也。輔氏曰:「此章明白峻厲,自天子以至庶人,三道二,仁與不仁,與桀、紂、幽、厲之事而已。此章又因言道二,仁與不仁,與桀、紂、幽、厲之事而已。此章又因聲。樂音洛。强,上聲。

八五六

而 틴 人欲縱而天理滅 ,其禍至於如此,可不畏哉。」

智,禮人不答反其敬。 孟 子曰: 「愛人不親反其仁,治人不治反其 治人之治,平聲。 不治之治

去聲。

是趲向上去,更無退下來。 也 我愛人而人不親我,則反求諸己,恐我之 不解恁地得,大家做箇鶻突底人也。」 人不答,更不反求諸己,教你不親、不治、不答也休,我 .未至也。 智、敬放 此。 如今人愛人不親,治人不治. 《語録》曰: 「孟子説 都 登反。

歸之。 行 有不 得者,皆反求諸己,其身正 而天下

敬也。 矣。 不得, 亦必然之理 則身無不正,身無不正則天下無不歸 是 也。 天下歸之,極言其效也。 謂不得 如此 反求諸己,謂反其仁、反其智、 也。 則 爲治本乎自反,多福本乎自求,治國者 其 其自治益詳 所欲,如 不親、不治、 ,而身無 輔氏曰: 雖 極言其效,是 「自治 反 不 不 IE. 其 答

詩》云:『永言配命,自求多福。』」

解見前篇。 〇亦承 上章而 言。 輔 氏 日: 一此

承上章得天下以仁而言之也。」

下之本在國,國之本在家,家之本在身。」恒,胡 ○孟子曰:「人有恒言,皆曰『天下國家』。 天

誣矣。」 序也。 於《大學》之言, 必究其本而無有或遺,得其本,則末可舉矣。 輔氏曰:「人之常言雖曰有序,而但及其外。 恒 於庶人,壹是皆以脩身爲本」,爲是故 亦承上章而言之、《大學》所謂「自天子至 一,常 也。 故推言之,而又以家 雖常言之,而未必知 則曾子、子思、孟子相傳之學,不可 本乎 身 其言之有 君子之論則 以 也 是而 也。 此

故沛 之所慕,一 孟子曰:「爲政不難,不得罪於巨室。 然德教 國慕之; 一 溢 乎 辺 .. 海。 _ 國之所慕,天下慕之,

巨室,世臣大家也。 得罪,謂身不正

能

玩

ル此

,則知所本矣。」

以

取

者

不

#

先 致 服

之不 之所 之謂 『家之本在身』而言 及羣臣,而 人怨怒,其 言諸 而 罪者,謂 心怒也。 言 信 白 邑 「, 蓋 蓋巨 禍 脩 施 脩 也 姓 人 侯失德,巨 無 其 今既 祝 合 可 君子不 故 本 **外**勢必自 永 室 吾身 後及百 沛 意 齊 正 人之不 以 嘉 孟 而 之心, 理 悦 然 蓋 桓 無 陳 而 子 澽 也。 服 氏曰: 世 既 如 公曰 姓 遠 盛 不 患 臣 推 欲 室 致 也。」 此 服 脩 君 而 大家 人 則 難 大 勝 怨 本 擅 : 人者不正其 矣。 於 不至矣。 心之不服, 或 以 流 得 之, 則 而 權 而 慕 人,非 願 罪 力 行 爲 林氏 人 言 始 人心之 輔 則 主 皆 謂 服 之貌。 ,故麥丘邑人之言 向 氏 曲 惟 未 患 非 君 一,而 服 티 : 也 日 身, 法 理 甚 此 務 必 無 以 致 所 難 矣。 脩 能 而 或 心 亦 而 此 得 奉之也。」 怨。 「戦 溢 爲乖 服 人 悦 德 勝 亦 患 吾 承 罪 承 素 所 然 或 者 充 吾 以 F. 德 誠 mi 戾 於 F. 謂 服 或 之 身 章 先 所 滿 滴 亦 教 服 羣 麥 則 章 不 0 孟 不下 今也 賊 愐 命, 可 其 言 吾 正 有

而

也。

臣

F:

得

怨

取

利之而彼自 大公至正之道,可 以係戀之私恩 窒礙之者矣。 之意,如此則其爲留礙也大矣,安能有胥然胥效之應 甚易,苟其德不 也。」●輔氏 爾。 承宗 心。 以 之德教無 特以 則 内 不肯奉行之心 及乎天下 『未必 而 德 巨 彼 行 處置 斂 不庸可 室 如置 日 既 能 所 四 養 手 外 足以 留 勝 悦 其 海 殺 「林氏謂 得 郵之速,令下 而 削 礙』者,大凡人君 而 也。 -, 遠 家, · 矣。 服 則 極 天下,無 服 宜 適 地 八殺,可 而羣黎百姓 夫人,則近 如 其 以 夫然後能 則 遯 遠 能 取 可或 非 裴 ~禍」者, 之九三,「畜 而 吾 不 生則 服 者不脩其本』者,亦 度 朝 言 如 之德 傾 其 之。 沛然德教溢乎 廷 所 流 心 生 而 必生 心故 施 如 水之源 向 公卿 之力 謂 殺之而 裴度之言、 教令於下,其 魯 慕 教 怨 韓 昭 臣 唯 大夫必懷 無 誹 爾 妾」然 無復 公之事 能 弘 恐其 而公肆 所 彼 ,四海。」 制 輿 正 自 留 也。 亦 有 德 指 不怨 疾 此 其 是 ハ勢本 教 非 遮 疑 沮 身 礙 哉 也 類 討 行 死 之 謂 留 而

子 日 天下 有 道 小 德役 大德, 小 賢 役

原 作 政一今據四 庫 一本改。 以 下不 再 出

也,順天者存,逆天者亡。 大賢, 天下無道,小役大,弱役强。 斯二者天

小。 爲强弱,二者皆理勢之所當然也。 道也」之意同。 如此。」〇輔氏曰:「理無形,勢有形也,與夫【專言之則 役强,亦曰天,何也?」曰: 只是以力論,全不睹是。」〇問:「天下無道,小役大,弱 德役大德,小賢役大賢,是以賢德 而已。天者,理勢之當然也。 有道之世,人皆脩德,而位必稱其德之大 一勢則亡,必然之理也。」 天下無道,人不脩 天下有道 ,則以 「到那時不得不然,亦是 德, 德 論。 爲大小,無道,則 順其理勢則存 則 小役大,弱 語 但 以 録》曰: 力 相 役强 逆其 理當 以 小 役 力 受命於先師

既不能强於自治以昌其國而出令以使人,又不能因 之宜屈己自下以聽人之命,是與物暌絶也。 引 「『既不能令』,是不能强也, 『又不受命』,是不 此 以言 小役大弱役强之事 也。 絶於物則 輔 能弱 氏 時 **⊟** 也。 絶 勢

> 哉 ! 其强,故涕泣而以 也。吴,蠻夷之國也。景公羞與爲昬而畏 棄之罪,未暇議也。」令,出令以使人也。 於天也。 聽命於人也。 新之,獨不在我乎? 桓公所以正天下、霸諸侯者也,雖時勢下衰,然振 孟子獨取此説以證小役大、弱役强之事,其 景公之言,宜若可 物,猶人也。女,以女與人 而顧爲是 女與之。 取也。 巽言,横 然景公所用之國, 涕 以 受命, 自 萎蘭自 起 蓋 而 乃 何

受命於先師也。 今也小國師大國而恥受命焉,是猶弟子而恥

國七年,必爲政於天下矣。如恥之,莫若師文王。師文王,大國五年,小

國師大國而恥受命焉,是不當恥而恥者也。然亦良心之此因其愧恥之心而勉以脩德也。輔氏曰:「小

能殄滅者,故孟子因其幾而曉之。」文王之

去聲

苗

商所

不

可矣。 道 何,乃有益 何畏焉。」程子曰:「五年七年,聖人度其 自 方策,是必有道矣。 政 吾役矣。 Ŧi. П ,然脩德之至,則道 布 年七年,以其 一,而 「所乘之勢,指國之大小而言也。」蓋 小 在 然凡此 可 方策 輔氏曰:「文王自百 大、弱 耳。 學 可强,大國反爲吾役矣。 類,學者皆當思其 輔氏曰: 師其人,行其政, 所乘之勢不 而 行之, 自 「程子之言,所以 我 里 所 行,而 耐 則 興王業,其政 同 謂 人心自悦,氣數 . 為 師文王 天下 大 敵國 差。 作 啟 國 發 爲 時 反 雖 雖 輔 學 布 也 大 如 則 爲 無 者 在 氏

侯于 或 敏,裸將 詩 || 云: 君 周 好仁,天下無 服。 于京。』孔子曰:『仁不可 『商之孫 侯 服 于 子,其麗 敵。」裸,音灌。 周,天命靡 不 · 億。 常 爲 夫,音 上 衆 一帝既 殷 也。 扶。 士: 命, 好, 膚 夫

至矣。

惟聖人能

知時,故曰『聖人度其時可矣』。

學者

燭

理

既

明

而

經歷之久,思慮之深,則自然見得

《詩 敵於天下也。 萬之衆,不能 周。孔子因 之京 十萬 章。 其仁也,故 商之美士而奔走周 而敏 之孫子,皆臣 鬯之酒灌 膚,大也。 命不常,歸于有德故也。 萬曰億。侯、維也。 孔子之言,以言文王之事 將,助 ・大雅・文王》之篇。 師 達 而 己。 者,皆執 也 天命歸 地 也。 讀 敏,達也。 真氏曰: 上帝既 而 當之。 此詩, 服 不可 于 廟之祭,天命何常之有 言商 降 裸 商。 于 . 神 以 獻 周 爲衆, 之孫 也。 命 紂 故國 而言有仁者 商士,商 之禮 矣。 商之孫子而爲 周 惟 裸,宗廟之祭,以 其不 説見《論 子衆 以 猶所 是以商士之膚大 君 所以 天下 -仁,故 助 孟子引此 好仁, 麗,數 多,其 孫 謂 王 語》一稀 ·, 則 然者,以 子之臣 則 哉? 周之諸侯,以 祭 難 天 則 命 事 雖 也。 爲 凡 數 自 成湯 詩 兄 必 有 于 此 不 既 而 也 難 無 + 灌 周 鬱 天 商 及 旧 歸 惟

爲弟 偂 天下無敵也。」 則難於爲衆者 云 爾 輔 也。 氏 日 : 道之大,無物不體 「我賢則 難 於 爲兄爲弟者 故難 於爲 也,我 衆

今也 以 分事,且做得 在我。 不能 雅 濯 强大所役使。 天所命』者 地做,天下 分底事,只如 持熱物,而 大國 恥受命於大國,是欲無敵於天下 可 也。 一欲無敵於天下而不以仁,是猶 • 强 自 而 桑柔》之篇。 昔 《詩》云:『誰 强 不 語 也。」〇輔氏曰: 也 之强大者,反爲役於我矣。 了,則聽 治。 此 録》曰: 師文王,是不 一二分也得。 脩德行仁如 不以水自濯其手乎。 隨風俗做便得,不必須欲 爲學者則 「今之爲國者論爲治 天 所命,脩德行仁,則天命 逝,語辭 文王,則與天爲 能 「不能 盡 日 是這般苟且之學,所謂 做 執熱,逝不 以仁也。 自 人也不須 强 也。 則 豈 聽 如堯、舜、只 ,則曰不消 一,而小可大、 言 非 做得孔 〇此 命于天,而 也。 執 以 《 詩 天命 誰 濯 熱 章言 乃師 能 ? 而 一之在 孟 得 一聽 大 執 不 爲 + 恁 +

我乎?」

反易至此者,私欲蔽障而失其本心故爾。」

亡國敗家之有? 其 菑 取亡之道爲可樂也。 者,蓋其心既不仁,故顛倒迷繆,以 言。 可以救藥者也。」〇真氏曰: 若本心尚 爲利,雖陷於其 安利 孟 此,故不可告語而敗亡隨之。 知,頑然無覺。 之固有,惟不 以忠言,而卒至於敗亡也。 心,故其 亡之道也。 安其危利其菑者,不知其爲危菑 ,樂其所以亡者。 子曰:「不仁者可 祖伊嘗諫紂矣,召穆公嘗諫厲 也。 有 顛 所 知存養體認,故爲私 點之明 倒錯亂至於如 雖處 所 不仁之人, 以亡者,謂 以 菑,與災同。 Ľ 於危而反以爲安,雖 夫人君 , 可 而反以 以 與言哉? 不仁 爲受言之地 孰不欲安存而惡危亡 「自昔危 自 爲 私 荒 樂,其 樂,音洛 古危亂之君 危爲安,以菑爲利,以 欲 欲 此 淫 而 王 輔氏曰:「仁本吾 矣, 亂 所 , 所以 固 暴 可 顛 障 之世 安其 而二 與言 則 倒 淪 蔽, 虐 蔽 於菑 而 其 惑 未 同 君 禍 愐 不 失 所 亂 反 危 出 誉 無 而 不之聽 亂 冥 至 可 其 以 以 則 而 而 然 於如 反以 猶 轍 告 本 致 爲 何 利 其 忠 有 無

滄浪之水濁兮,可以濯我足。]浪,音郎。

其地,因以名之。纓,冠系也。洲,曰滄浪洲,水曰滄浪水。」○愚謂:滄浪,地名,漢水至滄浪,水名。蔡氏曰:「武當縣北四十里,漢水中有

毁之,國必自伐,而後人伐之。 夫,音扶。 夫人必自侮,然後人侮之,家必自毁,而後人

所謂自取之者。

《太甲》曰:『天作孽,猶可違;自作孽,不可

活。」此之謂也。」

仁與不仁,所取之不同也。」

仁與不仁,所取之不同也。」

此章言心存則有以審夫得解見前篇。○此章言心存則有以審決之養。此亦承上章而言,得失之幾也。亡國敗家,存亡之實也。禍福之來,皆其則不仁。得失之幾至微也,存亡之實至著也。安利樂則不仁。得失之幾至微也,存亡之實至著也。安利樂則不仁。得失之幾至微也,存亡之實至著也。安利樂則不仁。得失之幾至微也,存亡之著。 禍福 化與不仁,所取之不同也。」

爾也。惡,去聲。 矣。得其心有道:所欲與之聚之,所惡勿施斯得天下矣。得其民有道:得其心,斯得民失其民者,失其心也。得天下有道:得其民,

晁錯所謂「人情莫不欲壽,三王生之而不氏曰:「此章之要,在於「所欲與聚,所惡勿施」之二言。」 做,則便是天理也。」民之所惡,則勿施於民。 真理人欲,同行異情,聚斂雖是人欲,若能如此聚民之所民之所欲,皆爲致之,如聚斂然。輔氏曰:「天

情莫不欲安,三王扶之而不危;人情莫不傷;人情莫不欲富,三王厚之而不困;人

欲逸,三王節其力而不盡」,輔氏曰:「晁錯説此

幾句,真能得三王之用心。」此類之謂也。

民之歸仁也,猶水之就下、獸之走擴也。 走,

音奏。

湯、武殿民者,桀與紂也。爲,去聲。殿,與驅同。故爲淵殿魚者,獺也,爲叢殿爵者,鸇也,爲

獺,音闥。爵,與雀同。

鸇,諸延反

鸇,食雀者也。言民之所以去此,以其所淵,深水也。獺,食魚者也。叢,茂林也。

容自已者矣。」

欲在彼而所畏在此也

王者,猶七年之病,求三年之艾也。苟爲不雖欲無王,不可得已。好、爲、王,皆去聲。今之欲今天下之君有好仁者,則諸侯皆爲之毆矣。

畜,終身不得。苟不志於仁,終身憂辱,以陷

則猶或可及。不然,則病日益深,死日益而欲求乾久之艾,固難卒辦,然自今畜之,艾,草名,所以灸者,乾久益善。夫病已深於死亡。王,去聲。

《詩・大雅・桑柔》之篇。淑,善也。載,《詩》云『其何能淑,載胥及溺』,此之謂也。」

迫,而艾終不可得矣。

聖人,亦末如之何矣。詳味此詩,則令人惕然警省,有不則相引以陷於亂亡而已。輔氏曰:「至此,則雖則也。胥,相也。言今之所爲,其何能善,

吾身不能居仁由義,謂之自棄也。者,不可與有爲也。言非禮義,謂之自暴也,〇孟子曰:「自暴者,不可與有言也,自棄

與今註「暴、害也」不同。」曰:「害底是如暴其民甚。」」暴,猶害也。《語録》曰:「問:「向説自暴,作自粗暴,

非,猶 必不肯聽,是不足與有言也。」自棄其 言必非詆禮義之説爲非道,是失之暴戾。 之非。」自害其身者,不知禮義之爲 之,雖與之言,必不見信也。《語録》曰: 毁 也。 《 語 録 曰:「非,如「言則非 八身者 我雖言, 美而 先 猶 王之道」 一謂 知 非 而 禮 毁 彼 所 上聲。

彼以爲我必不能居仁由義,是不足有爲也。」程子曰 志趣凡陋,甘心自絶,以爲不能。 之有爲必不能勉也。 《語録》曰: 我雖言其仁義之美,而 「謂其意氣卑 帮弱,

義之爲美,但溺

於怠惰,自謂

必

不能

行,

與

信,自棄者絶之以不爲,雖聖人與居,不能 至,皆可漸 「人苟以善自治,則無不可移者,雖昬愚之 而入也。 磨 而 進也。 惟自暴者拒之以不 字通。

知 曰:「拒之以不信,只是説道没這道理。 化 有道 理, 自割 斷 此所謂下愚之不 了 不肯做。 自暴者,有强鋭意。 移也。」《語録 絶之以不爲,是 自 棄

仁,人之安宅也。義,人之正路也。

者,有懦弱意。」

者,天理之當然,無人欲之邪曲 仁宅已見前篇。 行,無人欲之邪 曲 義者,宜也,乃 故 日 又當常行於此而不可有 Œ 路 輔 天理之當 氏 \Box

曠安宅而 弗 居,舍正 路 而 不 由,哀哉!」舍

適莫之意,故曰正路。」

曠 學者所當猛省也。 而 人自絶之,是可哀 空也。 由,行也。 也。 此章言道本固有 此聖賢之深

戒

難。 ○孟子曰:「道在爾而求諸遠,事在易而 人人親其親、長其長而天下平。」爾、邇,古 求之

用、易,去聲。

長,上聲

親 説,以親親長長而天下平爲邇與易之事,獨朱子直以 則 而 而 道 天下自平矣。 反失之。 長在人爲 初不外是也。 但人人各親其 甚邇,親之長之在人爲甚易, 輔氏曰:「先儒皆以遠 舍此而他求,則遠且難 親、各長其長, 近難易爲泛

信於友 治也 有道: 反身不誠,不悦於親矣。 孟子曰:「居下位而不獲於上,民不可得而 之也。 長,則天下自平矣。 唯在我者有以倡率之,而使天下之人皆各親其親、長其 事言、『求諸遠』指在事者言之也、『求之難』指 長 《爲邇,親之長之爲易,極 有道: 獲於上有道:不信於友,弗獲於上矣。 爲人上者獨自親其親,長其長,亦未能得天下平。 事親弗悦,弗信於友矣。 此又可見孟子之説周密無滲漏處。」 一爲切 當。 道指 誠身有道 道 理 言 在 悦親 事 人者言 指 所

之知識,則 事 不實也。 獲 身不誠,反求諸身,而其 人孰不知善之可爲,然不能即夫事以窮其 豪自欺之意,則其心便不實。」不明乎善,不 以 於上,得其上之信任也。 窮 河理,無 所 輔氏曰: 知 以 或未必 真 「人孰無爲善之心,然隱微之際 知善之所在 真。」游氏 所以爲善之心 誠,實 日 也。 : 一理 欲 而 也。 輔氏曰: 推極 誠 能即 有 其 反 吾 有

> 是故誠者,天之道也,思誠者,人之道也 然也。 了。 强 命,於穆不已』,至誠之理,天道之本然也。 二字解天道,『當 實之,始得。」〇輔氏曰: 時恐猶有不仁處,説義時恐猶 仁便真箇是仁,義真箇是義,更無不實處。 天無不實,寒便是寒,暑便是暑,更不待使他 僞,人道之當然也。 誠 則《大學》之次序,終則《中庸》之極功也。」 至於 君,以下則可以得民矣。」輔氏白: 則 不息 順 者,理之在我者皆實而無偽,天道之本 思誠者,恐有不實處,便思去實他。 乎親 誠 思誠 思誠者,欲此理之在我者皆實 身, 之事,人道之當然也。」 以 則 然』二字解人道, 外 安往 則 「以『欲』字解『思」字,以『本然 信 而 《語録》曰 乎 不 有不義 友,以 致其 自 然分曉。 處,便須着思 極 誠 上 『誠者天之道』 哉 ? 「游氏之説 者,都 在常人,説仁 審思明辨,自 則 恁地 可 『維天之 是 而 以 以 聖人 有 實 無 得 内 以 理

不明

乎善,不誠其身矣。

者也。」至誠而不動者、未之有也、不誠、未有能

動

,先致其知,不明乎善,不誠乎身矣。

學

必有應,驗便是應處。 動,只在誠不誠之間,此是孟子以其徵驗處喫緊以告人。 應皆非自外也,此其所以無有不動也。」○蔡氏曰:「動不 至,極也。 上、信乎友、悦於親之類是也。」輔氏曰:「有感 楊氏曰:「動便是驗處,若獲乎 極其誠,則合内外,平物我,感 與 去聲。

有力。 著動變,而孟子止於動者,以思出於心,於學者用功尤爲 而動者,正指上文獲上、信友、悦親而言也。」 ()

然子思以誠之言人之道,而孟子易之以思誠;子思言形

曾子,而孟子所受乎子思者,亦與《大學》 此 本,而明善又爲思誠之本。 章述《中庸》孔子之言,見思誠 乃子 思所聞於 脩身之

學》之相爲表裏,曾子、子思、孟子之相爲授受者,益不可 學》之本。 相表裏,學者宜潛心焉。輔氏曰:「明善者、《大 誠身者,《中庸》之要。 於此可見《中庸》、《大

身即誠 意。」

異道,而明善、誠身,實傳道之要決也。

明善即致知,誠

誣矣。」○蔡氏曰:「此章見孔子、曾子、子思、孟子相傳無

○孟子曰:「伯夷辟紂,居北海之濵,聞文王

作,興曰:『盍歸乎來! 曰:『盍歸乎來! 者。』太公辟紂,居 東海 吾聞 之濵 西 吾聞 伯善養老者。」辟 , 聞 西伯善養老 文王作,興

王也。 作、興,皆起也。 公與伯夷並説,亦自可見。」 意,故明辨之。太公之初來,于周無是意也,故孟子將太 曰:「恐人見太公後來佐武王伐商,遂以作興爲有求仕之 發政,必先鰥寡孤獨,庶人之老,皆無 故稱西伯。太公,姜姓,吕氏,名尚。文王 餒,故伯夷、太公來就其養,非求仕也。 紂 命爲西 方諸侯之長,得專 盍,何不也。 西伯, ?征伐, 即文 輔 凍

爲

虔反。 歸之也。天下之父歸之,其子焉往?焉,於 一老者,天下之大老也,而歸之,是天下之父

者。天下之父,言齒德皆尊,如衆父然。 二老,伯夷、太公也。 大老,言非常人之老

爲,所 已,所 此,而以文王之事與蕭何 也 其 謂 耳。 既 衆父二字出《老子》、《集註》借用之,其義則謂 (意則 得 父子同氣至親,父既歸之,則其子焉往?」蕭 養民致賢,以圖天下」者,暗 謂公也。 謂私也。 輔氏曰: 其 有 心 公私 則天下之心 「蕭何之説,是欲爲此以圖天下,有爲而 二老之歸 文王之爲此, 之辨,學者又不 乃 般看,則不可也。」 其 則 示 自然之應耳 初 能 無所 外 爲 矣。 與 也,行 可 此合,但 學 以 衆人之父 輔 者 吾 氏 不 何 義 不 E 察 所 察 耐

天下矣。| 諸侯有行文王之政者,七年之内,必爲政於|

矣。輔氏曰:「舉小國緩期言之,則大國之五年,固在其七年,以小國而言也。大國五年,在其中

中矣。」

鳴 而 鼓 賦 孟子曰: 粟 而攻之可 倍 他 求 日。 也。」 也爲 孔子曰: 季氏 『求非 宰, 無 能 我徒也,小子 改 於其 德

> 野; 者也。 由 此觀之,君不行仁政而富之,皆棄 臣。 求, 之。夫子蓋用此意,以責冉求也。」 之也。輔氏曰:「王者征伐,必鳴鼓以聲其罪 小子,弟子 争城以戰,殺人盈城。 孔 賦,猶 況於爲之强戰? 子 弟 也。 取 子 也, 冉 鳴 求。 取 鼓 民 而 季 之粟 争地 攻之,聲其 氏, 此所謂 倍 以戰,殺 魯 於 卿 率 他 土 於 而 罪 宰, 日 顯 人盈 孔 地 而 也 子 而 責

塗地, 刑不足以容其罪也。」 大,雖 林氏 罪之大,雖至於死,猶不足以容之』者,言罪 殺人,而使之肝腦塗地 猶惡之。 率,猶循也 曰:「富其君者,奪民之財耳,而 則 至 於死 是率 沉爲土地之故而殺人,使其 由 也。 土地 猶 「率土 則是 不 而 一地而食人肉」, 足 由 食人之肉。 以 土 一地而 容之也 食人之肉 謂 大而 以 其罪之 土. 輔 刑小,是 也。『其 一地之故 氏 肝 夫子 日 腦

食人肉,罪不容於死。

爲,去聲

故 土 地 善 者次之。」辟 戰 者 服 F. 刑 與 連 **光闢同** 諸 侯 者次之,辟 草 萊 任

之洫 涂,這 閑 商於之地 商 \exists 占土地開 亦次於刑?』曰: 『只爲他是欲富國,不是欲爲民,但 除 魏文侯臣、作盡地力之教。 類。 益 土 人,爲魏文侯將。 在那裏,先王所以 盡 三升,不勤 Ш 鞅 一授民,使任耕稼之責,如李悝 戰 阡 地力之類,不過 澤邑居三分去 涂便是陌。 開 秦,洛陽人。 洫 陌 如 上有路 阡 墾,將去欲 號 便 孫臏、吴起之徒。 陌 则 则 Е 是 之類 這 商 損亦如之。」○《語録》曰: 井 若十涂恁地 君。 連結諸侯, 田 辟, 一,爲田 要如此者,乃是要正其 爲 便 欲教民 是 也。 己物耳。 始 横 開 阡。 廢 以爲 六百 鞅,衛 而已,孟 墾 井 直 直,在横頭又作 自 也 田 皆爲 地方百里,提封 1萬晦。 阡 如 人,爲秦孝公相,封 如 陌 開 臏,齊威 子何以 百 之外 君 蘇 任 阡 夫 治田 聚斂之徒 陌 秦、 盡 土 問: 有 、疆界、恐人相 有空地 謂 遂, 地 地 王臣 勤 一大溝, ○《語 張 任 一若如 謹 力, 九萬頃, 遂 ± 謂 儀 一,起 也。」 則 Ŀ 地 則 録 悝 之 分 只 謂 有 以 强 者 李 畮 衛

> 其流。 整。 侵占。 以 引六人者,當之是矣。 「破壞井田 自任者,不過有此 這 今商 開字 雖是救時之言,然士而以此三者得名,則 , 決裂阡 非 鞅 却 開 破 創 陌。」觀 開 之開,乃 三等,故孟子因列之而言其 了,遇 戰國之時,人君之所求與 此可 可 開闢 做 見。二〇輔 田 之開 處 便 做 氏 蔡 \mathbb{H} \exists · 更 「《集註 傳 世 不 士之所 要齊 以 日

衰可知

矣。」

則 能 掩 惕掩覆,故神之見於目者涣散 神 孟子曰: 安裕完固 雖 其神在目,輔氏曰:「自體察之可見。 良 眸 者,蒙蒙,目不明之貌。 見物,猶 其惡。 精 子眊 ,善也。 而明,不正 焉。 ,故其神之見於目者精 無見 「存乎人者,莫良於眸子。 胸中正,則眸子瞭焉,胸中不正 眸子,目 也,都 眸,音牟。 則 不 神 能 瞳 瞭,音了。 有 散 所識別矣。」故 子 而唇 而 也。 聚 蓋人與物接之時 唇 不而明 暗 眊,音耄 瞭 輔 Á 此 神若不在,則 氏 其 日 : 明 胸 (所謂 心不 也。 中 眸子不 心 正 不 Ē 能 則 Œ 眊 則

驚

則

者也。」

聽其言也,觀其眸子,人焉廋哉?」焉,於虔反。

廋,音搜。

以察其神,則人之邪正有不可得而隱者也。」○真氏曰: 窮,亦皆因 正,驗其目之明昧,而其人之賢否不可掩焉。 可以僞爲,然有德者必有言,如所謂多寡、 子則有不容僞者。 廋,匿也。言亦心之所發,故并此以觀 人之邪正不可匿 目者,精神之所發,而言者,心術之所形,故審其言之邪 法也。」 言而 後可 得。 矣。 聽其 輔氏曰:「言亦心之所發,雖 然言猶可 言 一解以 驗其 游 以 藴 屈 ,觀其 僞 此觀人之 、蔽陷、 爲 (眸子 則 眸 離 或

曰 : 淳 僞 惟 一禮 于髡曰 爲 恐不順,言恐人之不順己。 於 也。」曰:「 外 也 男女授受不親 嫂 溺 則 援之以手乎?」 禮 聲音笑貌, 與 ? 孟 子

也,嫂溺援之以手者,權也。」與,平聲。援:「嫂溺不援,是豺狼也。男女授受不親,

音爰。

禮

 \exists

中,權 淳于, 儒權 度事 平。 變也。 禮 義。 也。 後得中。 得中,是乃禮 往來以取中者也。 受,取也。 更 理而取 術 秤錘之爲物 亦猶人之用 而得 何須權? 援,救之也。 在衡有 權變之域矣,豈可便謂權只是經乎? 中者, 姓 中,則 ; 其當然無過 星,兩之不齊, 古禮, 髡,名。 理 是乃 唯 能權 也 權 所 是那 度 當 禮 揆度 輕 然而 陳氏曰: 也。 經 權,稱錘 男 不及者也。」○ 重 陳氏曰: 禮 女不 齊之辯 事 一以取 無 若權 有行 權 物 過 「知中 便移 平,故名之曰權 以 不及者 而 不 親 取 也,稱 「權字乃就 · 得 不得乎中 ± 來 其 授受, 處,故 輔 然後 移 中 也。 氏 相 去 授, 日 能 物 須 似 隨 權 權 則 秤 以 用 邨 「若是 者 與 物 錘 陷 權 由 權 遠 重 權 以 所 Ŀ 乎 以 權 也 者 别 而 而 漢 取 經 以 然 取 取

言今天下大亂,民遭陷溺,亦當從權以"「今天下溺矣,夫子之不援,何也?」

援

日

之,不可守先王之正道也。

曰:「天下溺,援之以道,嫂溺,援之以手。

子欲手援天下乎?」

以手援天下乎?《語録》曰:「吾人所以救世者,以一古合,則先失其所以援之之具矣。是欲使我援也。今子欲援天下,乃欲使我枉道求言天下溺,惟道可以救之,非若嫂溺可手

其有道也。既自放倒矣,天下豈一手可援哉?」○此以手援天下乎?《語録》曰:「吾人所以救世者,以

章言直己守道,所以濟時,枉道徇人,徒爲

則規模自我,所向有成。不然枉道徇人,未有能自立失己。輔氏曰:「必如此斷置得分曉,然後出來做事,

者也。」

〇公孫丑曰:「君子之不教子,何也?」

不親教也。輔氏曰:「易子而教,則非不教也,但不親

教耳。」

行,繼之以怒;繼之以怒,則反夷矣。『夫子孟子曰:「勢不行也。教者必以正,以正不

也。父子相夷,則惡矣。教我以正,夫子未出於正也。』則是父子相

夷

一也。父子相夷,則惡矣。

身未必自行正道。」則是子又傷其父也。又責其父曰:「夫子教我以正道,而夫子之怒,則反傷其子矣。父既傷其子,子之心夷,傷也。教子者,本爲愛其子也,繼之以夷,傷也。教子者,本爲愛其子也,繼之以

古者易子而教之。

易子而教,所以全父子之恩,而亦不失其

爲教。

大焉。」

文子之間不責善。責善則離,離則不祥莫

善,則便有使之捐其所能、强其所劣之意,故必 則争之而已矣。父之於子也 子,何也? 責 孟子之正 當不義,則亦戒之而已矣。」輔氏曰:「王氏最得 善,朋友之道也。 意。 責善,謂責之使必爲 所謂 争者,非責 〇王氏 善 善 曰:「父有 也。 如 也 何 ? 責 當當 之使 至於相 不義 必 争

傷。 至 其所 爲或 背 理 而 害義 則豈 可 坐視 而 不 管? 故

在子則當争,在父則亦當戒切之也。」

大 ? 吾聞之矣; 孟子曰:「事孰爲大? 守身爲大。 失其身而 不失其 能 事親 事 争而 其 爲大。 親 能 者,吾未之 事 其親者 守孰 爲

聞

也。

守身,持守其身,使不 足以爲孝矣。 其身,則 枝葉茂盛,則得以 其身者, 豈可有一 能事親,更做甚人? 虧體 辱親, 豪一息之不謹哉。 庇其 輔氏曰: 本根,枝葉傷 不能守身,更説甚道義?」 雖 「味《集註》之言,則人之持守 日 陷於不義 用 残,則 且身者,親之枝也 性之養,亦 本根殄瘁 也。 矣 失 不

守身,守之本也 孰不爲事? 事親,事之本也。 孰不爲守?

不

事親孝,則忠 正 ,則家齊、國治 可移 而 於君,順 天下平。 可 移於長。 身

曾子

養曾晳,必有酒

肉。

將徹,必請所

與。

矣』。 問 有酒 曾子,則 有 肉。 餘,必曰『有』。 將以復 可謂 將 徹,不請所 養志也。 進 也,此所謂 曾皙 養,去聲。 與。 死, 養 曾 問 口 復,扶又反。 元養曾子,必 有餘,日『亡 體 者 也

也。 릲 請所 此承上文事親言之。 也。 餘者與誰?」或父問:「此物尚 必有酒肉。 其親之欲,惟口體是養而不恤其心志之虧乎。」 至。 事之者當 不欲其與人也。 必曰:「有」。 心志者,其思深。 若必待其言而後從,固已不可,況於先立 輔氏 與,雖 曾元,曾子子也。 曾子則 先意承 日 : 「養父母之口體 有言無。 食畢將徹去,必請於父曰:「此 能 事,必能 夫子之於父,異體同 恐親意更欲與 承 此 順 父母之志,而 但能養父母之口 聽 其意將以 於 曾皙,名點,曾子 曾子養其父,每食 者,其事淺; 無 聲 人也。 視 氣 於 復進於親 有 無 至親至 不 承 餘否?」 形 曾元不 其 順父母之 忍 意以 然 傷之 體 密,故 後 文 耐

事親若曾子者,可也。」

意思出。」 讀書者,不可不熟讀玩味,若但略綽地看過,何緣見得他 曾子可也」,至程子,方看得『可也』二字有深意。 其分耳, 豈復有過分之事哉。 能爲者、皆所當 體。 言 矣,而孟子 爲,無過分之事也。 餘哉?」輔氏曰:「子之身即親之身也,故凡子之身所 . 當 程子曰:「子之身所能爲者,皆 如曾子之養志,不 止日 爲也。 可也,豈以曾子之孝 但人爲物欲所昬蝕,多不能 故 孟子只平説去,日 事 可如曾元 親若曾子可 但 事 以 爲 謂 所 養 此 親 自 當 有 至 П 若 知

滴。間,去聲。 一正君而國定矣。」適,音大人爲能格君心之非。君仁莫不仁,君義莫大人爲能格君心之非。君仁莫不仁,君義莫

『格其非心。』」徐氏,名度,睢陽人。○《語録》曰:徐氏曰:「格者,物之所取正也。《書》曰:趙氏曰:「適,過也。間,非也。格,正也。」

政,不待乎發之於外也。昔者孟子三見齊 字。 直者能 也。』夫政事之失,用人之非,知者能更之, 其邪心,心既正,而後天下之事 繫乎人君之仁與不仁耳。 則又不可以是藉口。」〇程子曰:「天下之治亂 間、諌争之際而已也。 王 足以弭其邪心,容色足以 失,不足非間。 IE. 人者,大德之人,正己而物 君心之不正以歸於正,而國無不治矣。 心,是説得深者,大人格君心之非,是説得淺者。」○蔡氏 「《集註》解得格字義分曉。 格其非心,與格君心之非,格如合格之格,謂使 也。」〇又曰: 而不言事,門人疑之。 「非心,非僻之心也。」愚謂 言人君用人之非,不足過 諫之。然非心存焉, 「只是將此 惟有大人之德 然無大人之德與學而 消其逸志,非但取辦 所謂大人者,道全德備,譽望 物 孟子曰:『我 格其 間字上亦 心之非,即害於 IE. 者 不正 則 謪 也。 事 可 則 者, 有言責者 事 從 能 當 如 於頰舌之 行 輔氏曰: 格其 之歸 而 格 而理 先 政之 有 大 更 攻 其 與 于

知。 君者之大節目 子》書,以此章觀之,必是孟子有此事。 國定,猶形影然也。」〇又曰:「孟子三見齊王事,見 之治亂擊乎人君之仁與不仁」者,言仁則該乎義與正 莫不義,君正莫不正,一正君而國定矣』,程子但言『天下 曰仁、曰義、而又曰正者,仁義乃所以正之也。 一正君 亦莫之能也。」輔氏曰:「孟子言「君仁莫不仁,君 正,而欲格君心之非者,非有大人之德,則 之,後復用其 之,後復有其事,將不勝其更矣,人人而 相之職,必在乎格君心之非,然後無所不 程子發明其説已盡。」 , ❶觀孟子之言如 人,將不勝其去矣。 (此,則 孟子自任之重 此一義,最是事 是以 也 《荀 輔 去 可 而 義 去聲。

是輕爲進退。」輔氏曰:「毀譽出於公則固可信,出於譽,是謂求全之毀。言毀譽之言,未必皆實,是謂求全之毀。言毀譽之言,未必皆實,是謂不虞之譽。求免於毀而反致毀,處,度也。吕氏曰:「行不足以致譽而偶得

《集註》既得孟子之本意,而又於人己兩有所益焉。」私則固不可信。然公私之外又有是二者焉,不可不察

○孟子曰:「人之易其言也,無責耳矣。」易

與? 故耳。 而後。 警於後。 不敢易其言也。 人之所以輕易其言者,以其未遭失言之責 然孟子此言,必有所爲而發。」 輔氏曰:「謹言語,自是君子之庸行,何待於有 蓋常人之情,無所懲於前 非以爲君子之學,必俟有責 然此豈亦有爲而言之 則 無 而 後 所

○孟子曰:「人之患,在好爲人師。」好,去聲。
「無矣,此人之大患也。」輔氏曰:「先儒多以好爲應之可也。若好爲人師,則自足而不復有
「是問曰:「學問有餘,人資於己,不得已而
五子曰:「人之患,在好爲人師。」好,去聲。

○樂正子從於子敖之齊。

● 「目」,原誤作「自」,今據四庫本改。

子敖,王驩字。

矣?」曰:「昔者。」曰:「昔者,則我出 樂正子見孟子。孟子曰:「子亦來見我乎?」 也,不亦宜乎?」曰:「舍館未定。」曰:「子聞 曰"「先生何爲出此言也?」曰"「子來幾 此言 日

之也,舍館定,然後求見長者乎?」長,上聲。

行 罪又有甚者焉。故孟子姑以此責之。 不與言者,則其人可知矣。 昔者,前日也。館,客舍也。 王驩,孟子所 ',其失身之罪大矣',又不早見長者,則其 樂正子乃從 之

曰:「克有罪。」

受責 子之罪人也。」●輔氏曰:「人之心一有偏係之私 乎? 世有强辯飾 且遲回,以至於浸淫而不覺其非。 於其所當爲者,必不能勇於決爲,而於其所不當爲者,或 陳氏曰:「樂正子固不能無罪矣,然其勇於 如此,非好 善 非、聞諫愈甚者,又樂正 而篤 信之,其能若是 雖以樂正子之好善篤 則

> 背義、 信,猶 强 有所不免,必待孟子言之,然後知其 辩 飾 非 者 乎? 孟子可謂 善教,樂正子可 有罪,況 徇 謂 私

善學。」

啜也。 博孤反。 〇孟子謂樂正子曰:「子之從於子敖來,徒餔 啜,昌悦反。 我不意子學古之道,而以餔啜也。」餔

孟子正其罪而切責之,所謂可與言而後與之言者也 故孟子以餔啜罪之。」〇愚謂: 此,而輕身以從之,意者特藉其資糧輿馬以見孟子而已 家,又不與之言焉,則所以絶之者深矣。樂正子不察乎 王必以驩爲介,孟子未嘗與言行 驩,齊王之幸臣,蓋欲自託孟子以取重。 或問:「樂正子從子敖,何也?」曰:「嘗攷孟子之書,王 所從,但求食耳。此乃正其 徒,但也。餔,食也。啜,飲也。 樂正子能勇於受責,然後 事。 罪 至弔於公行子之 故孟子使滕,則 而切責之。 言其不擇

○孟子曰:「不孝有三,無後爲大。

趙氏曰:「於禮有不孝者三事: 謂 阿意曲

0 「也」,原誤作「乎」,今據四庫本改。

之中,最爲不孝之大者 先祖祀、則因循苟且、亂常咈理、不仁之甚也。 者,懦也。 其書尚存,故引之,今則不復存矣。 中,無後爲大。」輔氏曰: 二也,不娶無子,絶先祖祀,三也。 從,陷親不義,一 家貧親老,不爲禄仕者,惰也。 也,家貧親老,不爲禄仕 「此必見於古傳記,趙氏 阿意曲從,陷親不 不娶無子, 三者之 故於三者 絶 時

無之爲,去聲。 舜不告而娶,爲無後也,君子以爲猶告也。」爲

瞽 不能用 者一時之用。 猶告,蓋 禮 蓋 禮也,不告者,權也。 舜告焉則不得娶,而終於無後矣。 「天下之道,有 也。 . 瞍,子非大舜,而欲不告而娶,則天下之 權 而得 不告者,權也。 權 也。 耐 中,則 得 蓋權 中,則 常道 正 不離 出 有 不離 則禮與權固爲二矣。 於不 權。 人皆可守,權非體道 於正 於 正故也。」○范氏 猶告,言與告同 得已者也,若父非 IE. 矣。 |者萬世之常,權 輔 氏曰: 至以不告爲 告者, 「告者 티 : 也。 者

罪人也。」

○孟子曰:「仁之實,事親是也,義之實,從

其光華枝 見於日用 ○《語録》曰:「且如愛親、仁民、愛物,無非仁也,但是 之實也。」然謂孝弟爲不僞可矣,謂 非仁義也,惟孝弟發於人心之不僞,此孝弟 虚 此孝弟所以爲仁義之實也。」然以事爲 以實對虚而言者,曰『仁義理也,孝弟事也, 者,有以實對華 發,最爲切 敬莫先於從兄。 人之所僞爲可乎? 曰:「是有數義: 而 仁主於愛,而愛莫切於 則理豈 其實不越於事親從兄之間。 者 葉,有 虚 惟 而 近 此爲本根精 無物之謂乎? 以發見於事業之間。」此説爲得 而言者。 而 有以實對 惟以 精 故仁義之道,其用至 實者。 實 此 對華 實之所 虚而言者,有以 所 事親;義主 謂 以 ·而言 或問: 實 實, 在 凡 對 惻隱、 則 ,必先立乎此 ,則以爲『凡仁義之 僞 實 以 「實之爲精實。」 而 可 對 蓋良心之 理 羞惡之發,皆 所以 言 實 矣,謂 華 於敬,而 虚 對 而 而 之耳。 爲仁義 僞 事 言 而後 理 而言 廣, 『莫 實 爲

則 事 事 所謂專言之仁也,孟子所言仁 實 親 而朱子乃以爲其意亦猶此也。 仁之本,孟子乃以事親屬之仁,從兄屬之義,若不同矣, 之本,其意亦猶此也。蔡氏曰:「有子以孝弟爲爲 然、汎汎然,非 真,於焉發見。 爲 亦未有知敬而不始於兄者,故事親從兄,是良心所 於敬,及少長,便先知敬其兄。 處止 事親而孝,從兄而弟,所以爲仁義之實也。」 親者以從其兄,此孝弟所以爲爲仁之本也, 親主乎愛而已,義則愛之宜者也。 、切近而精實者也。」○真氏曰:「仁義之道大矣,而)輔氏曰:「仁主於愛,然人之生,便先知愛其親 乃是切 在於事親從兄。 近 而真實者,乃是仁最先發處。 可據之實地矣。」有子以孝弟爲 欲爲仁義者,惟致力乎此而已,否則悠悠 蓋二者人之良知良能,天性之 義,即 未有知愛而不始於親者 何邪? 所謂偏言之仁 合而言之,則推其 蓋有子言仁,即 義之實亦然。」 分而言之, 爲仁 義主 其切 發最 也。

舞之。」樂斯、樂則之樂,音洛。惡,平聲。 則惡可已也,惡可已,則不知足之蹈之、手之二者是也,樂之實,樂斯二者,樂則生矣,生智之實,知斯二者弗去是也,禮之實,節文斯

樂則 實。 曰:「草木既有生意,則日長月茂,無 條達,自有不 如草木之有生意,是樂之實。」既 輔氏曰:「和順從容,不待勉强,事親從兄之意油然而 從兄之意油 後長、兄先弟從是也。 唇定晨省是也。 節文,謂品節 其兄者,蓋其智爲物 兄之當敬,則孰肯舍其兄而不敬。 心真切、然事親自有事親之道理、粗言之、如冬温夏 德之貞也,非是固爲弗去也,知既明 斯二者, 心,便是知之不明 見之明而守之固 人知水火之不可蹈 且如人既知親之當愛,則孰肯舍其親而 、生矣。 指 事親 然自 謂 從兄自有從兄之道理,粗言之,如徐行 可 文章。 ,便不謂之智也。 和 ,則自然不蹈也 欲所 遏者,所謂 從 矣。 各自品節,其文理便是禮之實。」 生,如草木之有生意 順 ト ト 兄 從容, 輔氏曰: 輔氏曰: 而 而遂 言。 有生意,則 忘其 無 其有不愛其親,不敬 惡 故知 事 則 息之停,孰能 所 知 知 若 可 當愛當敬 自然弗去也。 親從兄,雖 而弗去,是智之 而弗去,所謂 有 勉 而 已也。 不愛。 强 弗 豪 其 · 事 去, 勉 故 暢茂 輔氏 也。」 强 遏 是 既 清 生 親 則 而 知 之 如 四

兄,是良心之真切。 地。 不自 意,自 冷暖自知,非言語之能盡 明而守之固,然後節之密而樂之深者,此正如魚之飲水, 地說過,亦只是說話 古 謂至孝矣。」〇此章言事 脉自然動盪,手舞足蹈,皆自 樂之之意至於充盛之極,則不假言說,心意自然形見 得 下之道,皆原 不自知矣。 止 而 之哉? ,然後節之密而樂之深也。 倘有一 知也。 遏止之哉?」其又盛,則至於手舞足蹈 然日 事親從兄之意油然自生,則亦 日 豪勉强之意,則便有變遷止息之時矣,非 在上如大舜、武王,在下如曾子,方是 暢 輔氏曰: 滿茂盛, 於 ,須是以人體之,方可。 曰仁與義,是斯道之統 此。 條理 「此聖人之作樂,所以必有舞 也。 親從兄,良心真切,天 然 通 然而然,不待心使之然 達, 必知 白 無 之明 輔氏曰:「事親從 如草木之有 息之停,又 所謂 會。 而 若便 必知 到 守 此 故 也。 之 而 之 恁 所 血 鳥 \mathbb{H} 生

可以爲人,不順乎親,不可以爲子。 一而歸己,猶草芥也,惟舜爲然。不得乎親,不〇孟子曰:「天下大悦而將歸己。視天下悦

舜盡事親之道 得重。 逆其 始有 而已。 心皆順乎理,必 子則愈密矣。 言舜視天下之歸己如草芥,而 而 順之也。 念。 違、尤人 固 這是得親之心,然猶是淺事。 有人承顔順色,看父母做事,不問 順則有以 如此而後可以爲子。」 而 得者,曲爲承順 《語録》曰:「人字只説大綱,子字却 所 瞽瞍 難 諭之於道,心與之一而 也。 底豫 爲人蓋泛言之,爲 ,瞽瞍底 以 惟 得 惟 順乎 是非,一 豫 其 欲 心心之 ,親則 得 而 天下 其 親之 向 未 悦 親 不

大孝。」底,之爾反。 化,瞽瞍底豫而天下之爲父子者定,此之謂舜盡事務之道而雚瞍底豫 雚瞍底豫而天下

耳。 有以 下 瞍 所謂「不格姦亦 瞽瞍,舜父名。 至 無 不 順乎親矣。 於是莫不勉而爲孝,至於其親 頑,嘗欲殺 可事之親,顧吾所以事之者 底,致 舜,至 是以天下之爲子者,知 允若」是 也。 是 也。 而 豫,悦 底 蓋 豫 舜至 焉 樂 未 亦底豫 也。 若 此 書》 天 而

也。 焉, 此所謂天下化也。」子孝父慈,各止其所,而 而天下之爲人子者,皆知無不可事之親,而各勉於爲孝, 動,猶能使之底豫,況其不如瞽瞍者乎? 則天下之爲父者,亦莫不慈,所 真氏曰:「舜之所值者,至難事之親也,然積 故瞽 瞍 謂 底 誠 無 豫, 化 感

所以 미 不安其位之意,所謂定也。 傳 爲 於後世,非 大孝也。 止一身一家之孝而已,此 〇李氏曰:「舜之所以 爲法於天下, 能

見父母之非而已。昔羅仲素語此云:『只 使瞽瞍底豫者,盡事親之道,共爲子職,不

爲天下無不是底父母。』了翁聞

而善之日

其君、子弑其父者,常始於見其有不是處 『唯如此 而後天下之爲父子者定。 彼臣 弑

瓘。 耳。』」仲素,名從彦,豫章人,後居延平。了翁,姓陳,名 李氏名侗,皆延平人。 〇輔氏曰:「孝子之心,與 親

故人子自不見父母有不是處。 爲 一,凡親之過,皆己之過,舜之所以 羅氏此 負罪引 語甚有力,蓋凡父 慝者此

> 哉? 딩 : 母之不是,皆子之不是也,己既是,則父母 諸己者,亂 罪己而不非其親者,仁人孝子之心也。 陳氏則又推其極而言之,亦事理之實也。」〇真 臣 賊子之志也。 後之事難事之親者,其必以 岢 怨親而不反 有 不 是 氏 者

孟子卷第七

舜爲法。」

後學

成德 校訂

文王生於岐周,卒於畢郢,西夷之人也。

孟子卷第八

朱子集註 後學趙順孫纂疏

離婁章句下

凡三十三章。

孟子曰:「舜生於諸馮,遷於負夏,卒於鳴條,

東夷之人也。

可也。」〇愚案: 條,則湯與桀戰之地也。 記》有『葬於蒼梧』之説,何邪?」曰:「孟子之言,必有所 諸馮、負夏、鳴條、皆地名。 二書駁雜,恐難盡信。 諸 馮 在冀州之分。 而 然無他考驗,則 《竹書》有『南廵不反』、《禮 負夏,春秋 或問:「舜卒於鳴 亦論而 時 衛地 闕之

鳴條在安邑之西。

在東方夷服之地

《書》云:「周公薨,成王葬于畢。」《史記》云:「文、武葬于 者,誤也。 畢。」《皇覽》云:「文王、周公冢皆在鎬,聚東杜中。」則畢 豐,文王所都。 豐、鎬,今有文王墓。愚案:畢、豐、鎬,俱在長安。 岐周,岐山下周舊邑,近畎夷。 在鎬東矣。 舊疏謂: 鎬,武王所都。 郢,故楚都,在 豐、鎬相去二十五 南郡。 畢在 畢郢,近 郢之地 里。

地之相去也,千有餘里,世之相後也,千有餘

歲。

得志行乎中國,若合符節

得元,所使郡守用之。凡符節,右留君所,左以與其為文字而中分之,彼此各藏其半,有故則 一一人,有故則君以爲信也。《語録》曰:「古人符節多以左右相合以爲信也。《語録》曰:「古人符節多以左右相合以爲信也。《語録》曰:「古人符節多以左右相合以爲信也。《語録》曰:「古人符節多以上爲之,如牙璋,以起軍旅。又有竹符,又有英蕩符。 以起兵,竹使郡守用之。凡符節,以玉爲之,纂 八有故則君以爲行,也。符節,以玉爲之,纂

百世之已往,後乎千百世之未來,只是此箇道理。」 録》曰:「古人所爲,恰與我相合,只此便是至善。 召 田 地 皆以 者執右契。」右 右取之也。」若合符節,言其 者,取物之券也。 如 發兵、 司 也 取 前乎千 物、 語 徵

先聖後聖,其揆一也。」

後言。 相 不同,然其道則一也。」輔氏曰:「先後,以世之相 司 揆,度也。 後千有餘歲,然揆度其道,則 也。 |范氏曰:「言聖人之生,雖有先後遠近之 遠近,以地之相去言。 輔氏 其揆一者,言度之而 曰:「不曾説着道字,言行則便是道了。 地 一而已矣。」 雖 相 去千 有餘 其 道 里, 無 世 不 雖

乘,去聲。溱,音臻。洧,榮美反。 〇子産聽鄭國之政,以其乘輿濟人於溱、洧。

後又名汜水關,子産以乘輿濟人之所也。 車載 也。 之水,其深不可以施梁柱,其淺不可涉,豈 子 産,鄭 而 子産見人 渡之。 大夫公孫僑 《語録》曰:「虎牢之下,即溱、洧之水、 有徒涉 此水者,以其 也。 溱、洧,二水名 可以 或以爲溱、洧 濟乘輿 、所乘之

> 以渡人。 른 蓋溱、 李先生以爲,疑或是偶然橋梁 洧之水皆是沙, 然此類亦何必深考。」 故 不 可 以 施 壞 梁 柱 故 但 子 産 可 因 用 用 舟 渡 其

> > 車 而

孟子曰:「惠而不知爲政。

大,其用之有法度紀綱也。」 月徒杠成,十二月輿梁成」,這箇便可見其體之爲公平正 言體則知施之爲用,言施則知體之爲本。下云『歲十一 故其利之及者小,此正指乘興濟人之事而言也。」政 乎巨細,故不害其爲君子之道。 之道,而子以私恩小利言之,何也?」曰:「孔子之言, 曰:「公平正大之體,以理言。 有公平正大之體,綱紀法度之施焉。 言,則私恩小利而已矣。」〇輔氏 惠,謂私恩小 利。 或問:「孔子以子産之惠爲君 紀綱法度之施, 曰:「唯其恩之出於私 此承上文乘輿濟 以 事 輔 河則 人而 言 子

也。在,音江。 歲十一月徒杠成,十二月輿梁成,民未病涉

也。輿梁,可通車輿者。周十一月,夏九杠,方橋也。徒杠,可通徒行者。梁,亦橋

月也。 施、雖纖悉之間、亦無遺恨如此。」 無事不合民心、順天理,故其公平正大之體 王政之一事也。文集曰:「先王之政,細大具舉,而 將寒沍,水有橋 一十月成梁。」蓋農功已畢 周十二月,夏十 梁,則民不患於徒 Ĥ 也。 可用民力,又時 《夏令》 ,綱紀法度之 涉 少,●亦 三 :

之?辟,與闢同。焉,於虔反。君子平其政,行辟人可也,焉得人人而濟

知己出 使之避己,亦上下之分,固所宜然。 反也。」〇又曰:「君子能行先王之政,使細大之務無不畢 乃趙氏本説,與上下文意正相發明,蓋與舍車濟人正相 豈能悉以乘輿濟之哉?《文集》曰:「辟除之辟, 避己,亦不爲過。 言能平其政,則出 辟,辟除也,如《周 ,則惠之所及,亦已廣矣。 後 爲惠。 又況人民之衆,亦安得 況國中之水,當涉者衆, 行之際,辟除行人,使之 禮》「閽人爲之辟」之辟。 是其出人之際,雖 何必曲意行私 人人而 辟 ,使人 除人, 濟

> 故爲政者,每人而 二句,誠得孟子之意,而真有王佐之心。」 繕理,而民不告勞。其亦庶幾知爲政矣。」○輔氏曰:「此 惠」,得孟子之意矣。 也。」諸葛武 心錯處也。夫子産固賢,但以不知聖人之學,是 言每人皆欲致 ○《文集》曰:「武侯之治蜀也,官府次舍、橋梁道路,莫不 而内交要譽之私萌而不可 少,亦不足於用矣。 侯嘗言,「治世以 私 悦之,日亦不足矣。」 恩 輔氏曰:「此則正説子産之用 以 揜。 悦其 武侯,名亮,漢琅琊人。 孟子明辨之,所以立 意,則人多日 大德,不以小 以 有 教 時

國人,,君之視臣如土芥,則臣視君如寇 視君如腹心, 君之視臣如犬馬,則臣 孟子告齊宣王曰:「君之視臣如手足,則 謂 昔者所進,今日不知其亡,則 孔氏曰:「宣王之遇臣 邈 然無敬矣。 故孟子告之以此。 下, 恩禮 其於羣 衰薄 視君如 一臣,可 至於 手足 讎 臣

❶ 「民」,原誤作「氏」,今據四庫本改

之哉。」

孟子之言雖是爲宣王而發,然臣之報君,視君之所施,常 爲宣王發,所謂有爲之言也。 輕 腹 加 寇讎之報,不亦宜乎?」輔氏 已矣,斬 路人、言無 類視犬馬爲尊,土芥視寇讎爲甚,其言雖若有迹,然亦 厚 賤 心, 之, 等。 相 手足之於 艾之 然 待 怨 猶 無 體,恩義之至也。 有 而 德 豢 腹 己 心, 也。)矣,其 養之恩焉。 雖 爲同 孔氏之説,正解 土芥,則踐踏之而 賤 體, 悪 曰:「孟子此説,特 然有大小之辨。 之又甚 或 如 犬 着 猶 馬 此 矣。 意。 則

所以

示拳拳屬望之恩義也。」

理

勢之實然也

反,然 此 君使人導之出 曰:「諫行言聽,膏澤下於民 , 則 月。」王疑孟子之言太甚,故以 儀禮》曰:「以道去君 爲之服矣。 後 收 其田 疆,又先於其所 里。 此之謂三有 而 未絕者,服齊衰 往, 有 此禮爲問 故 禮 去三年 而 焉。 去, 不 則 如

> 所以 禄仕之地 里居 導之 其賢,欲 盡防衛之道 前前 出 於所往之國。 疆 其 此 猶望其歸也。 收 防 於在我之境。 用 剽 之也。 掠 『去三年不反,然後收其 也 三年 『先於其 先於 輔氏曰 而 其 所 :「『導之出 後 所 往 收 二,所 往 其 田里 以 稱 \mathbf{H} 爲其 疆, 道 禄

往; 民; 讎 今也爲臣,諫則不行,言則不聽,膏澤不 何 有故 去之日 服之有?」 而 遂收 去, 則 其 君 \mathbb{H} 搏 里。 執 之,又極之於其 此之謂 寇 讎 下於 寇 所

也。 分。 勉强爲哉?」○真氏 孔子對定公之意 子之渾然 盈 極 也。 , 窮也。 千里 雖 ○輔氏曰: 然孟 見 王,不遇 子爲齊 潘 也。 窮之於其 興嗣 「就聖賢言上觀之,誠 蓋聖賢之別 王言則 ☐ : 故 日 去, 也,而其言有迹,不若 孔 而 然 、所往之國,如晉 「孟子告齊王之言,猶 孟之言 也 宿 而 出 , 可 如 所 書,未嘗 有 以 以 此。」興嗣、豫章 差别 自 見聖 處 有 賢 者 然 悻悻之 則 氣象之 此 錮 不 贵 孔 欒 然 容

豈有視以爲寇讎之心哉? 此意尤分明。 乎 遇其 王深 楊 子之言蓋如此。」輔氏曰:「楊氏發明得孟子所爲言 心,猶幸王之一寤而 ? 氏 日 臣耳。 言報施之道,使知爲君者不 孟子曰『王庶幾改之,予日望之』, 觀孟子於齊王,其言如此,則其視齊王也, 君臣以 若君子之自處,則豈 追己也。 義合者 君子固 曷嘗以 也。 自 示 寇讎 故 肯處其薄 ·可不 視其君 孟 處 子 其 以 爲 哉? 然君 薄 君 禮 齊

罪而戮民,則士可以徙。」○孟子曰:「無罪而殺士,則大夫可以去。無

人者,則自不可不以禮遇其臣耳。」

其間更 知轉 異。 厲之戒; 能者矣。 輔氏曰: 言君子當見幾 若執 身 有多少 路,此 而孔子往趙,所以及河而復。 「可以者,在時義爲可也,失此幾,則有欲去而不 此明夷之初,所以不食而行; 此 義理 説 孟子 以爲 在。 而 所 臣 以致 作,禍已迫,則不能去矣。 時與位之不同,則所以處之者亦 則凡苟免自私之徒者,得以藉 戒 也。 然此特言其常理耳, 彼昬不仁,猶或莫 遯之初,所以有尾

口矣。」

當以正 張氏 孟 以 耳。」輔氏曰: 正 子曰 君爲急,此章直 曰:「此章重出 己爲先,亦《大學》所謂『其機如此』之説也。」 :「君仁莫不仁,君義莫不義。」 「上篇言人臣當以正君爲 戒人君,義亦 然上篇主言人臣 急,此章言人君 小 異 當

)孟子曰:「非禮之禮,非義之義,大人

弗爲。」

精,以爲善而爲之。」大人則隨事 處宜,豈爲是哉? 察理不精,故有二者之蔽。 輔氏 E : 「如此 《文集 而 順 則 理,因 * E 能 盡 「擇焉不 時 時 中之 而

道矣。」

音洛 才,則賢不肖之相去,其間不能 樂有賢父兄也。 ○孟子曰:「中也養不中,才也 如 中 也 棄 不 中,才 養 不才,故 以寸。」 也 棄 不

無過不及之謂中,足以有爲之謂才。輔氏

以「其 類,而不賢者至於棄子弟而不之教,天理人欲之相 之道,則是亦違乎中,傷乎德,而自陷於不才耳。 賢之相去爲甚遠而不可教 其 謂 兄之賢者,棄子弟之不賢者而不教,是其 才矣。 其相去之間,能 賢,遂遽絶之而不能教,則 其終能成己也。 自 地之生物言也,薰陶以工冶之成物言也, 在 成其形焉,無心也。 涵 我者,使之自化而已。」賢,謂中 間 育 「賢,則 不 薰 能以寸」曉之,使之自省也。 陶 兼有才德者也。」樂有賢父兄者,樂 ,俟其自化 爲父兄者,若以子弟之不 蓋父子兄弟之間,皆難於責善,正 也,而不知其自悖於教育 幾 也。 何 哉? 輔氏曰: 吾亦過中而 而 夫聖人 ,此循 心 才者也。 輔 古 涵 氏曰: 以 其 有 故 爲 育以天 理 教 孟 賢 反 成 而 父 不 無 輔 也 就 子 不 彼

爲 孟子曰:「人有不爲 程子曰:「有不 一是以 可以有 -爲,知 爲。 也,而後 無 所擇 所 不爲 也。 可 以有 者,安能 惟 能 爲。」 有 有 不

如

此,哀哉!

所爲 多,苟專於爲善 爲其所當爲矣。 邪?」輔氏 則 蓋 日 : 必 人心 無 「人能 暇 不 於爲惡,苟 可二用, 不爲 其 而 (所不 溺 精 於好 神 當 氣 利 爲 力只 則 則 有 必 必 不 許 能

能徇乎義矣。

中

以

德言,才以才言。

德本於性,才出

於氣。」養,

人邪? 哉? 默也,豈計後患哉 君子語默,惟 人或訐人陰私,公肆 孟子曰:「言人之不善,當如 警之。或是此等人既已被禍,故孟子嘆之,以警後人也 善,掩人之惡,自是君子忠厚之心,豈爲 言必有爲而發,今不可知其 此亦有爲而言。 今言『如後患何』,故知 抑恐其亦言己之不善邪?」曰: 其 時與義 紙誣 或問: 而 已。 而無所忌憚 、所指矣。」() 「所謂 其 義所當言,是是非非,不苟 有 所 後 爲 後 者,故孟 患 輔 有後 耐 「是皆有之,然斯 者,謂 患 言 氏 何?」 患然後如 也。 子言此 得 揚 此 罪 於其 必 人之 以 有 此

以是稱之。」或問:「楊氏之説。」曰:「所謂本分者,乃之外,不加毫末。非孟子真知孔子,不能已,猶太也。楊氏曰:「言聖人所爲,本分

○孟子曰:「仲尼不爲已甚者。」

行耳。」 聖人用 處 小差,則流而入於鄉原之亂德矣。」○輔氏曰:「楊氏説 義 2 雖日 理之至當,非苟然而已 高 世 聖人雖有過物之行,而無過禮之爲。 絕俗,非人所能及,不過盡吾之性,由仁義 也。 學者於此,宜深察之,一 其 作用 有

義所在。」行,去聲。 ○孟子曰:「大人者,言不必信,行不必果,惟|

得此章之指,而《集註》又述其意而著明之。 於信果,則未必合義。」王勉曰:「若不合於 必 尤更有功,不然,則 義之所在,則必從之,卒亦未嘗不信果 生之信,徒狄之果,皆是物也。」 『不合於義而必信必果,則爲妄人』之説,尤盡其 ○尹氏曰:「主於義,則信果在其中矣。 ,猶期也。大人言行,不先期於信果,但 必信必果,●則妄人爾。」輔氏曰:「尹氏最 無忌憚者或得以藉口。 王氏則又 以必爲期, 敝 也 主 尾 有

大人之心,通達萬變,赤子之心,則純一無)孟子曰:「大人者,不失其赤子之心者也。」

無偽,而大人之心亦純一無偽,但赤子是無知覺底 能,却是不失其無所知、無所能 所知,無所能。 僞而已。 由 者,正以其不爲物欲 人之通達萬變也,純 變無窮。 會得,只是無許多巧僞曲折,便是赤子之心。」○輔氏 無偽,大人是有知覺底純 同處。」○《語録》曰:「大人無所不知,無所不能,赤子無 功,而無巧僞安排之鑿,故曰不失。 未能知覺,渾然赤子之心而已。 其大也。《文集》曰:「赤子之心,固無巧僞,但於理義 以擴而充之,則無所不 爲物誘,而有以 「大人之心通乎動静,體用兼全,譬如明鏡,萬物畢照,應 是而致 知 赤子之心雖已發 然大人之所以 、格物、擴而充之、至於無所不 此兩句 所誘, 全其純 無僞 正 一無僞。」〇又曰:「大人事事理 相拗,如 而 動, 有 而已。 知,無所不能,而 而去本未遠,固不 以全 做 一無僞之本然。 爲大人,正 出? 大人則 何 其純 着箇不失字,便是不 然大人之所以 無 蓋赤子之心純 所不知、無所不 有知 知,無所不能 無僞之本然 覺 以 能 擴 其 爲大 如大 充 純 E 是 極 不 之

[」] 二「必」,原皆誤作「不」,今據四庫本改

人之事也。」
大人之事也。溺於巧僞之末而遂失其純一之本然者,細以極其德之大耳。夫不失其本之一而能極其用之妙者,

○孟子曰:「養生者不足以當大事,惟送死可

之誠心而言之也。」

「大樓少有後日之悔也。輔氏曰:「此指孝子院,不使少有後日之悔也。輔氏曰:「此指孝子以用其力矣。故尤以爲大事,而必誠必以用其力矣。故尤以爲大事,而必誠必事生固當愛敬,然亦人道之常耳。至於送

● (日本)● (日本)

工夫,又下工夫,直是深造。」道,則其進爲之方淺迫所可致。若欲淺迫求之,便是强探力取。只是既下録》曰:「是日日恁地做。」〇又曰:「所謂深造者,當知非造,詣也。深造之者,進而不已之意。《語

於日月之間。 曰:「且以求仁言之,君子而深造乎仁,必自求仁之道,然 不期於必得 必也多致其力而不急其功,必務其 言意之表。 然得之也。 探而力取也,必其深造之以道,然後有以默識心通, 得於身也,不得於身,則 之於己也。或問此一節。 其有所持循,以俟夫默識 易竭矣。」言君子務於深 也。 資給、資助一般。」左右,身之兩旁,言至近 也。 道,求仁則有求仁之道,爲義則有爲義之道。」資,猶 也。 道猶道路之道,適 處也。 《語録 《語録》曰:「若源頭深,則源源來不竭。若淺時,則 《語録 蓋 **∀** ⊟ ₩ El 而 是皆不足以 逢,猶值 不以其道者,從事於虚無之中,而妄意於 造道之不深者,用 其 「資有資藉之意。」〇又曰:「資字恰似 「是事事 自然得之,將 燕則有適燕之道,適 也。 致 П 耳 皆 夫默 造 焉 要得合道 原,本也,水之來 曰:「學是理,則必是理之 而 有不可 識 而 力於皮 已矣。 心 心 方而 必 通之妙 通,自 '禦者矣。」○輔 以 理。」〇 不躐 膚之外,而 越則 然又不 其道者, 而 其等,則 然而 有 輔 自 可 適 氏 而 得 越之 責 而 以 曰 得 欲 藉 處 非 雖 効 强 自

藉以 爲用 值 所 竭 既安,則所藉以爲用者深遠浩博,取之而無盡,酌之而 摇。 獲,見其出 古 無 則道已爲我所有矣,故處之安而無臲 種 後 在 而 不 「無所資者,固 未得其所居 L 或 不 值 我者 不出 也。」所藉 摇 便適,自 假思惟 有 也。」自 一者淺迫 爲 則 奪 而不值其所資之本也。 用 ,吾皆得以居之。 於自然,則 持 之患,外 所 問 也。 循 而 而 [眷戀而不去也。]○輔氏曰:「 此 而不見其盡 藉 得 自 無 而 進 者深 則 惟資之深者,不待遠求而所取 無本之可 者 易 於己, 窮, 然得之於己。 節。 進不已,乃可 無所藉以爲用。 物 窮。 雖有 深 如 不 ···, 則 Ξ. 富 遠 惟 能移、横議 也。」〇輔氏曰: 所居 則 求。 人蓄積之多,金珠穀帛,無 居 而 「未得之,則固無可居之地 如人有室廬之安,動作起居 日 所 之安,則 無 而 資之淺 用 俟其工 此 以 不安。 之間 盡 Œ 居而未安,則其所藉 不 處 所謂「亦在乎熟之而 理之在我 夫至 能惑矣。」處 者, 之者安固 或問 惟 或問此一 取之至近,無 「所得在我而 取之艱 既能自 自得之,則理 到 此 耐 者, 無不得, 默 節。 節 遠 得於己 識 吾 之安 而 心 處之 求 而 티: 皆 \Box 1,種 通, 不 如 不 不 得 以 之 或 而 得

哉。 又 曰: 得也。 理 所謂「德性之知不萌於聞見」者也,豈 曾子唯吾道一貫之語,此何 之,則是起意去趕趁他,只是私意而已,安足以入道。」〇 得者,乃自 既 者,安能言此以覺人也。 ○輔氏曰:「此纂集程子 大,只是潛心積 已,終不足以得之也。」《語録》曰:「道 然後可以有得。 無所往 谷滿谷,在坑滿坑。 深遠而 舍晝夜,或泝或沿 值其所資之本。 之中,及其真積力久, 取諸其身之左,而值其所資之本,又取 蓋其平日 「必須以道 而不相值矣。] 〇程子曰: 無盡,則日 然必潛 潛心積 得 慮,緩緩養將 以水譬之,苟其源之盛,則滔 方可。 也。 用常行之處,頭 ,無不值其來處。」○輔氏 心積 雖取之至近 慮,優 若急迫求之,則 理 潛心積 自得如子貢,悟性天之不可 三説合而爲一,非親到自得之境 有安排 慮,優 與 而游 ?待於言語 心融,物與 去,自然透 之,厭 慮,優 而 頭 游 非 布 Ŀ 容更有所安排 游厭 一,而其所資之本 而飫之,全身 耐 厭 置者,皆非 「學不言 明,物物 後見? 性會,然後可 其 熟。 飫 飫做甚底? ,身之右, 是私 EI: 於其 滔 若 理本自 Ŀ 所 汩 IE. 急 己而 而 一顯,在 汩,不 迫 間 在 布 張 藉 而 聞 白 自 子 求

有 得。 若有 一豪急迫之意,便是 私、己 與 道 便 自 間 斷 更

如 何 到 得自得田 地。

詳,然後約可 説到 誇 言 孟 文,詳説其理者,蓋欲其心理融會,貫 理 説 欲以夸多 謂 子曰: 多 所 到 詩書 至 至 而 以 約 鬬 鬭 六藝所載許多道理也。 約之地 之地。 博學於文,而詳説 靡耳。 「博學而詳説之,將以 説,雖 靡 也,欲其 蓋 耳。 能如 若夫爲己之學則不然,所以 必極 此, 其 輔氏曰 大,然後 融 然後可説 會 常人之博學詳説者,則 「文謂 貫通,有以 其 中 通事物, 理 可 以貫之也。」蓋 反説約 詩書六藝之文 者,非 求; 然後 盡 博 其 反 欲 也。 學於 反 博 而 以 與 而

章以知言,知與行、蓋 之意也。 承上章之意 反説約 而言 ,則是自 互相發也。」學非 輔氏曰: 得 之事 也。 「博學詳 但 - 欲其 上 一章以 説,則是深造 行言,此 徒 博,

而 亦 不可以徑約也。 寡陋 輔氏曰: 「徒博則泛而 荒唐

徑約則

亟

而

以善養人,然後 孟 子曰:「以善服 能 服 天下。天下不心服 人者,未有能服人者也。 而王

> 者,未之有 也。」

以善養人者,以善爲天下之公也,樂與人爲善者也 人,以善養人,以心言也。 此則愈密矣。 於以善服人,以善養人,其不同 也。」〇輔氏曰:「以力服人,以德服人,其 服人者,惟恐人之進於善,如張華之對晉武帝,恐吴人更 之不入於善,若湯之事葛,遺之牛羊,又使人往爲之耕是 立令主,則江南不可 殊,學者於此不可以不審也。《文集》曰 歸於善。蓋心之公私小異,而人之嚮背頓 服人者,欲以取勝於人。養人者,欲其 以德服人,以力服 取之類是 以善服人者,以善爲己私 也。 則 人,以事言 難見也。 以 善養人者,惟恐人 不同易見。 孟子之言,至 也。 以 以 善 也 司 服 至 善

當之。」 C 孟子曰:「言無實不祥。不祥之實,蔽賢者

賢爲不祥之實。」二説不同,未知孰是,疑 或有闕文焉。 愚謂: 不祥之實。」或曰:「言而 或曰:「天下之言無有實不祥者,惟蔽 「祥」下若有「者 無實者不祥,故蔽 」字,則當從 賢爲 前

祥之實」,則一也。說。「言」下若有「而」字,則當從後説。至於「蔽賢爲不

哉!』何取於水也?」亟,去吏反。 《徐子曰:「仲尼亟稱於水,曰:『水哉,水

進,放乎四海,有本者如是,是之取爾。 孟 子 哑 一,數 Ė. 也 原 水哉. 泉 混混,不舍晝夜。 水哉,歎美之辭。 盈科 舍、 而 放 後

亦 也。言其進以 舍晝夜,言常出 原泉,有原之水 本,不已而 不已而 漸 漸進 進以至于極 漸 以至 不竭 也。 也。 于海, 也。 混 放、至也。 混, 也 盈 如 湧出之貌。 滿 人有實行 也。 言水有 科, 則 坎 原 不

澮,古外反。涸,下各反。聞,去聲。 也,可立而待也。故聲聞過情,君子恥之。」 苟爲無本,七八月之間雨集,溝澮皆盈,其涸

集,聚也。澮,田間水道也。涸,乾也。如

○孟子曰:「人之所以異於禽獸者幾希,庶民 無盡 氏曰: 心 將何所不至哉。 仁而行違 然由是觀之,雖一 是,則既 欲救徐子蠟等干譽之病耳,孔子之稱水,固 實行爲言,而引林氏、鄒氏之説以明之。 之謂也。然則學者其可以不 達告子張矣,達者有本之謂 者,自徐子之所急者言之也。 等干譽之病,故孟子以是答之。」 將不繼也。 聞,名譽也。 人無實行, 曰:「孔子之稱水,其旨微矣。 此 也。 正是聲聞過情,羞惡之心發 「此章指意,都結在後兩句 知本 耻。 達者有 而 其無實而將不繼者,羞惡之良心也 能務 林氏 而暴得虚譽,不能 本,謂 今人每見人來獻 物具 情,實 實矣; 曰:「徐子之爲人,必 質 理,然亦随 直 也。 不以 而 好 是爲 恥 處,最 上,故《 義。 諂 者,恥 人所取 恥 諛,則 聞 也,聞 好 《集註 務本乎?」輔 孔子 則 孟子 長 蓋孟子之意,專 者 失其 無本, 如 不 其 久 必 何 專 》只 有 則 嘗 獨 也 無 耳 在 謂 以 鄒 心,亦 理 無 以 取 有 實 此 愧之 能 虚 色 也 氏 此 躐 本 聞 聲 而 固 如 名

去之、君子存之。

之所以 子知此 不同者 以 有 飢 以全其所受之理也。 物,相去亦遠矣,而孟子以爲幾希者,蓋人物均有一心, 之,則名雖 以全其性,爲少異耳。 幾希,少也。庶,衆也。 地之理以爲性,同得天 異 凡民者,亦有 人能存而 食渴飲之類,皆其與禽獸同者耳。」〇真氏曰:「人之與 於禽獸之道理。 於物耳。 而存之,是以 獨 分,實在 物不能 爲人,而實 人於其 是心而不能存,是即禽獸也。 今自謂 存,所 於此。 間 不 能 《語録》曰:「存是,存其所以 同 戰兢惕 得 存,只是存其與禽獸同 無 者, 地之氣以爲 形氣之正,而 雖 衆 人物之生,同得 以 惟 日 人不 異 此 厲, 少異,然 而 介於 르 知 禽 而卒能 惟存之,所 人類之中 此 獸 形 人 能 而 者 物 有 君 其 去 有 天

物,事物也。明,則有以識其理也。人倫

無不 義,則身與理二。」此則聖人之事,不待存之,而 民,仁民而愛物,此則行之詳略也。」在 氏曰: 存者,聖人也。 行自安行。」○真氏曰:「由仁義行,則身與 而 於心,而 知之事也。」由仁義行,非行仁義,則仁義已根 知之也。 與略之異。 意思,故以盡其詳言之。]物 録》曰:「察深於明,明只是大概明得這 説 倫,則又是吾身至親切事,故其所知 「由仁義行,非行仁義,所以 尤切於身,故 「天下無性外之物,故凡物之理,皆非在吾度外。 後 見前篇。 存矣。○尹氏曰:「存之者,君子也 勉强 「明只是知,故以識字解之。 所行皆從 然非特知之如此,至於行 輔氏曰:「此言舜乃是生知之聖人,所以 行之,所 察,則 其 君子所存,存天理也。 知之有 謂 有以 此 安 言行之事 出 理 盡 而 詳 古 其理之詳 非 略 行之也。 非 至於察,則便帶行 自 也。 亦如此。 之異。 以 度外 箇道 舜 仁義 然有明與察、詳 知既 則 理 理 皆 輔氏曰: 親 爾。二〇 輔 而 也。 生 至於人 親而 氏 知,則 生 人倫 行仁 語 日 由 而 言 底 輔

用力。」
用力。」
解問身即理,理即身,渾然無間,而不待於易,辨君子聖人之分量,尤爲明切。」○真氏曰:「存之者,易,辨君子聖人之分量,尤爲明切。」○真氏曰:「存之者,仁義行,存者能之。」輔氏曰:「尹氏説精確而平

去聲。○孟子曰:「禹惡旨酒而好善言。惡、好,皆

酒,則物欲不行。 旨酒。」《書》曰: 「後世必有以酒亡 戰國策》曰:「儀狄作酒,禹飲而甘之, 好善言 馬 其國者』,遂疏 則天理昭著。」 拜 昌言。」輔氏 儀 日 : 狄 而 「悪旨 絶 曰

湯執中,立賢無方。

方,猶 不問其類也。 執 消謂 類 守 也。 而 不失。 立賢無方,惟賢則立之於位 輔氏曰: 中者,無 「執中,則處義精審。 過 不 及之名。 立 賢無

通用。 文王視民如傷,望道而未之見。而,讀爲如,古字

方,則用人無間

民已安矣,而視之猶若有傷。道已至矣,

與道無窮。」 之猶若有傷,則愛民深切。 爲一,亦何害其望之如未見哉。」○輔氏曰:「民已安而視 固已無凍餒者矣,而視之猶若有傷,則 且子胡不以『視民如傷』者例而觀之乎? 德爲聖人,而心不自足如此,是乃所以 恐非所以言聖人之心也,奈何?」曰:「爲是説者,正以其 耐 如雨。』左氏曰:「與雨偕也。」此以如爲而 厲。』鄭箋云:『而亦如也。』此以而爲如也。 問:「以 切如 而望之猶若未見。聖人之愛民深,而求 互用之久矣。」曰: 此 而 爲 不自滿足,終日乾乾之心也。或 如,亦有據乎?」曰:「《詩》曰:『垂 「是則然矣,然其曰『求道之切』者 道已至而 望之猶若未見, 深明聖人之心也 其 於道雖已與之 也。 夫文王之民 《春秋 則 八其混 帶 道 隕 脯

武王不泄邇,不忘遠。

也。聖人之心所以異於衆人者,以其大公至正,周流貫乎?」曰:「此以世俗計較利害之私心,窺度聖人者之言所易忘而不忌,德之盛,仁之至也。或問:所易它而不忌,德之盛,仁之至也。或問:一世,狎也。 邇者人所易狎而不泄,遠者人

忌,則誠心不息。」 딩 : 視聖人之心爲如 摩 以 徹,無所偏 爲德之盛而仁之至也。 而 「於人所易狎而 抑搔 是以其於人之痾癢疾痛,無有不知,而 之者,無有不及,此 倚,雖以天下之大,萬物之多,而視之無 何 不 而 泄 指 ,則敬心常存於人。 所謂仁 今日 武王之不泄 迫於勢而非仁,則不知 者爲何物哉?」○ 邇、不忘遠 所易忘而 所以 輔 異 不 Æ 其 所 按 於

周 而 思之,夜以繼 公思兼三王,以 三王:禹也,湯也,文、武 日 幸而 施 四 事。 得之,坐以 也。 其有不合者, 四 事 待 `,上四條 日 仰

然盡誠 者。 及人。 於事 宜 急 思 之事也。 於行 而 而 也 以 蓋 其 得之,則其 以思, 且 周,所以及 施四事,則其於事也周矣。 以 理 時 聖人之事,同 也。 亦 異勢殊,故 時異 思之而通,慮之而得, 初 輔 無 人。 有 氏 勢殊,故其 異 日 理初 有道 其施之或有未宜,行之或有未當, 坐以 軌 「周公思兼三王 轍、安得 然後能 不異矣。 待 旦 於道也備,所以成己, 事或有所不合 則 則 有 制 事 可 其 異 見其 ,則其於道 坐以 事 而 雖 成己,然後能 云其有 知無不行 有 待旦, 時措從 不合 也 備

> 遠 言,非 者是矣。 也。 幾者也。」〇此承上章言舜,因 道互相得失,故發明如 不盛。」輔氏曰: 矣。」〇程子曰:「孟子所稱,各因 之,則聖人之心與理昭昭,常存 濟時,皇皇汲汲,不已之誠 輔氏曰: 行無不時,舉而措之天下之民,謂之事業者,有 有所爲,無不各極其至,豈容更以盛不盛言哉。」 蓋天理之所以常 之,而各舉其 也。 《語録》曰: 謂武王不 人謂 「《集註》謂『各舉其 而於其末,又言周 各舉 讀此 一事,以見其憂勤惕厲之意 「程子恐後人執孟子之言,而疑聖人於 能 其盛, 此。」〇又曰:「聖人造道之極,凡 存, 二 篇 執 如此。 公所 中 一事,以見其憂勤惕厲之意 ,使人心惕 而 亦非 立 不死,而 人心之所 以 學者苟 一賢,湯 備 歷 道 也 然而常存也。」〇 以 叙 在 能 聖 制 其 却 吾 群聖以繼 深 事 心 以不死 泄 人 體 不可失其 遭變以 目 而 亦 事 邇 一之間 默 忌 無 而 識

後《春秋》作。 ○孟子曰:「王者之迹熄而《詩》亡,《詩》亡然

王者之迹熄,謂平王東遷,而政教號令不

秋》,魯史記之名,孔子因而筆削之。 雅 是自二南進而爲二雅,自二雅退 之時,其詩爲二南,後來在洛邑之時,其詩爲 時 國風。」〇問: 樂征伐不自天子出,故雅之詩不復作於上,而詩 魯隱公之元年,實平王之四十九年也。 天子出 及於天下也。 而 譬 自如此。 雅亡也。 如 ,故雅之詩自作於上,以教天下。 登 Щ 要識此詩,便如《周南》、《召南》,當 「恐是孔子删詩之時降之。」曰 《語録》曰:「王者之政存,則禮樂征 到 得 《詩》亡,謂《黍離 《黍 離 》時 節,便 而爲王風。 是下坡了。」《 Ŧ. 》降 迹滅 二南之於二 《黍 「亦是 爲 如 熄 離 在 降 始於 或 》, 只 則 鎬 他 耐 伐 春 風 曹 當 爲 禮 自

乘、去聲。檮、音逃。杌、音兀。晉之《乘》、楚之《檮杌》、魯之《春秋》、一也。

記載,以惡爲反常,故特記之。 《檮杌》,惡獸名,古者因 事。 《乘》義未詳。趙氏以 記惡垂戒之義也。 或曰:「取記載 輔氏曰: 當 爲 時 如《堯典》之末,只載胤、 以 興於田賦乘馬之 行 「古人以善爲常,多不 爲凶人之號,取 事 而 名之也。」

《春秋》,不過以史之文,載當時之事而已,而其竊取之

册書之名也。 國皆有史官,掌記 有四時,故錯 已。《春秋》者,記事者必表年以 愧 蠻,猶有古人遺意。 朱、兜、共、鯀數子而已。 ·恥,及一有小善,則沾沾自喜,以爲莫己若者,亦 舉 後世之人,負大罪惡於身, 以 時 爲 以楚史記之名觀之,則 事。 所記 之名也。 此三者皆其 首 古者 事。 而 所記 初 楚 可哀 雖 不 列 年 夷

義則丘竊取之矣。」」 其事則齊桓、晉文,其文則史。 孔子曰: 贊 一辭者也。 春 下之邪正,爲百王之大法。」輔氏曰:「夫子之作 亦以史之文載當時之事也,而其義 之在己,所謂 史官也。 其辭則丘有罪焉爾」,意亦 1秋之時,五霸迭興,而 竊取者,謙 筆則筆、削則削 尹 氏 曰:「言孔子作《春 辭 也。 桓、文爲 如此。 《公羊傳》作 游、 盛。 夏不能 蓋言 則定天 秋 『其 史, 斷

之後也。」○此 此,略無自居其功之意,此孟子所以因 之法程。 善善惡惡 義,則在於定天下之邪正,爲百王之大法也。夫《春 之事繼之。 聖人之用,備見此書,而夫子之言,則又謙 ,撥亂世而反之正,上明四代之禮樂,下示百王 又承 而孔子之事莫大於《春秋》,故 上章歷 叙 群聖,因 而述之,以 以 繼 孔 群 抑 秋》 子 聖 如

〇孟子曰:「君子之澤五世而斬,小人之澤五

特言之。

世

而

斬

斬 世 年,則君子小人之遺澤,皆當絕也。」楊氏 澤,五世 也。 澤,猶言流風餘韻也。輔氏曰:「流風,以風喻之 年亦爲一 而 親 緦,服之窮也; 餘韻,以聲喻之也。」父子相繼爲一世,三十 輔 屬竭矣。 氏曰: 而 世。 絶 也 世 服 斬,絶也。 則親 窮 五世袒免,殺同 輔氏曰: 則 盡服窮,其澤亦當斬絶矣。 遺澤寖微 「父子五世,經歷百五 大約君子小人之 故故 日 姓 Ŧi. 也 四四 世 ; 六 世 而 蓋

予未得爲孔子徒也,予私淑諸人也。」親也、服也、澤也,實相因也。」

者矣。 老。 孔子而自謙之辭也。 孔 至孟 時方言俗語耳。」人,謂子思之徒也。 也。 私 雖 叙舜、禹,至於周、孔,而以 人之澤尚存,猶有 孟子言予雖未得親受業於孔子之門,然 而辭者。 子之道於 謙,然其所以自任之重,亦有不得 猶 輔氏曰: 然則孟子之生,去孔子未百年也。 子遊梁時,方百 竊也。 愚謂: 是非孟子之私言也,實天下之公論也 「獨孟子用此二字,而他無所見 雖是謙辭,然其所以自任之重,亦 人,而 淑,善也。 能傳其學者。 私 竊以 四 〇此又承上三章, + 李氏 善其 餘 是終之。其 年, 以 (身,蓋) 故我 爲 而 自 方言 ,故知是當 孟 孔 有不得 推 子 子 得 而 辭 歷 聞 聖 卒 是 尊 故 E

以 與, 孟子曰 可 以 無 可 與, 以 取,可 與 傷 惠。 以 無 可 取 以 取 死 傷 可 廉。 以 無 口

死,死傷勇。」

是 取之傷 怯也。 死 下二聯 取是其 者,是亦孔子過猶不及之意耳。」○《語録》曰: 易見,而 之傷勇,過 爲傷勇矣。 蓋 廉 廉之屬,猶與之爲惠,不與之爲嗇, 以 先言可以者,略 孔門高弟,亦或陷於過當之域矣。 事 傷 於衛,是傷勇也。」輔氏曰: 過猶不及之意也。 ,然過與亦 無者、深察 使 廉 初略見 廉 倣 今以過取者爲傷於廉,則 心 病乎此 也 此。 過 粗 於此 而 不得 於 反以 林氏 得 此而 冉子與之,是傷惠也。 脯 如此 反害其 而 須 「, 其 反 與爲傷惠 病 侵奪於彼者 思慮 曰 自 見 失爲 ,可以無取是子細審察見得如此 乎 疑 而 此 入於精微 「公西華受五 難 惠 之辭 自許之辭 者也 或問: ,死爲傷勇,何哉?」曰 知,故孟 過 宜以 也。 也 「取者貪之屬,不取者 蓋奪乎彼者,其 死之爲勇,不死之爲 死 方 「大凡擇善執中最爲 可 過與之傷 不與爲傷惠,不死 子舉傷 亦反害其 也。 過 取 秉之粟 有 看 廉 子路之 後言 古 不審 惠 以例二 來可以 害於 失爲 過死 勇, 過 口 則

> 公明 惡得無罪? 愈己,於是殺羿。 逄蒙學射於羿,盡羿之道,思天下惟 儀 曰 : 宜 逄,薄江反。 若 無罪 孟子曰:「是亦羿有 惡,平聲 焉 : 薄 乎 罪 \overline{Z} 羿 爾 爲

之名也。」逢蒙,羿之家衆 羿,有窮后羿 其罪差薄耳。 自立,後爲家衆所殺。 也。 蔡氏曰: 愈,猶 也。 「窮,國名。 羿 勝 善 也 射 羿, 薄,言 窮 或 夏 君

子濯 其 鄭 不執弓?』日 尹公之他學射於我。 何謂也?』曰:『庾公之斯學射於尹公之他 『庾公之斯,衛之善射者 曰:『庾公之斯也。』曰:『吾生矣。』其僕曰 死矣夫!』問其僕 取 人使子濯 孺 友必端矣。』庾公之斯至,曰: 『夫子 子 曰:『今日 孺 子 『今日我疾作,不可 侵衛,衛 H 我 『追我 夫尹公之他,端人也, 疾作,不 也, 夫子 使 者 庾公之斯 誰 可 日「吾 以 也?」其僕 以執弓。 執 追之。 弓,吾 生,

其金、發乘矢而後反。」他、徒何反。矣夫、夫尹之夫, 惡今日之事、君事也、我不敢廢。』抽矢扣輪、去 皆反。 我不忍以夫子之道反害夫子。 雖然, 雖有曰:『小人學射於尹公之他,尹公之他學射於 物

之,語助也。僕,御也。尹公他亦衛人也。並音扶。去,上聲。乘,去聲。

端,正 特以 也。 恩,亦廢公義。 孺 射 然夷羿篡弑之賊,蒙乃逆儔。 Œ 子得尹公他而教之,則必 也 ,故度庾公必不害己。 取友而 金、鏃也。 也。 助 乘矢,四 也。 孺 言耳 僕,御也。 子 其事 矢 叩輪出鏃,令不害人,乃以 以 也。 尹 公正 皆無足論者,孟 孟子言使羿 尹 小人, 庾公自 人,知 公他 無逢蒙之禍。 庾斯 亦 其 衛 取 如子濯 雖全私 人也。 子蓋 友 必 稱

過之。 ○孟子曰:「西子蒙不潔,則人皆掩鼻而

西子,美婦人。蒙,猶冒也。不潔,污穢之

物也。掩鼻、惡其臭也。

有惡人,齊戒沐浴,則可以祀上帝。」齊,側

者以 所以 孟子曰:「天下之言性也,則故而 浴 惡人,醜貌者也。 改過自新。 美,而蒙以不潔,則自喪其 喪善,而 而 利 至誠自潔,則 戒人之喪其本有之善。 爲 本。 勉 深玩尹氏之言,令人惕然而懼,聳然而作。」 人以自 可以祀上帝。 新 ○尹氏曰:「此章戒人之 、美而反致人之惡。 也。」輔氏曰:「西子之質本 惡人之質本醜,而 孟子言此,所以 已矣,故 孟子言此 能齊戒沐 勉人以

故也。 性 者,乃可得 然之跡,若所謂 ○又曰:「故只是已然之迹,如水之潤下、火之炎上,便是 迹。字。10又曰: 性自是箇難言底 者,人物 父子之所以親,君臣之所以義,夫婦之别,長幼 而 言。 所得 只看 物事,惟惻 「故是箇已發見底物事,便 天 以 這 下之故者 生之理 箇,便見 隱 羞惡之類,却 得 也。 性, 也。《語 故《集註 故 分明易見。」 者,其已 是 録 E デ 發

矣。」然其所謂故者,又必本其自然之勢,如 而爲人。 天字指天道而言。 猶 仁,但言其發見而爲怵惕惻隱之迹,則仁之理自 發而形見於外,是則有迹而易見也。」故天下之言性 見。 者,但言其故 曰:「如仁之性雖難知,然其見赤子入井時,則怵惕惻隱 發而形見於外。 理,不假人爲,順之而行。」言事物之理,雖若無形 非人,無羞惡之心非人,皆是自然而然。 若激之在山,是不順其性而以人爲之也。 之迹」言之,則下文「荷求其故」之言如何可推?」利,猶 序然,皆有箇已然之迹。」〇又曰: 而 人爲而自然者,如水之就下,是其性本就下,只得 順也,語其自然之勢也。《語録》曰:「利是不假 所謂 難 輔氏曰: 知,然其發見之已然,則 即其 善言天者必有驗於人也。 所 理即 以以爲 既已形見,則必有迹而易見也。」〇又 而 天道 性也,雖曰無形而難知 理 人者 無形而 自明,輔氏曰:「如言人性之 而 驗 難知,而 之,則 「『故』字若不將『已然 知其 必 其發 惟 如無惻隱之心 有迹而 所 輔氏曰:「此 智者知 ,然不能不感 動 以 處,則 爲 明 順他 天者 也。」 得此 易 形

> 故矣。 不下者,水之本也,若夫搏之使過顙,激之使 又當以順利爲本。 作而然,如人之爲惡、水之在山者,逆也。 本也哉?」 迹,但順者爲本,則善者其初也,惡者非其初 惡、水性爲上者有矣。」○永嘉陳氏曰: 自然而然。 也。若人之爲惡、水之在 人之善、水之下,非有所矯揉 輔氏曰:「所謂發見已然之迹,然亦有遂有順 如人之善、水之下者,順也。 言其故而不本於自然,則以人性爲 Щ 則 造作 「善惡皆已 凡有所矯揉 故言其故者、 非 也。 在 自 而 Ш 水無 然者 然之 贵 然 之 其 有 造

惡、爲,皆去聲。 事也。如智者亦行其所無事,則智亦大矣。也,則無惡於智矣。禹之行水也,行其所無所惡於智者,爲其鑿也。如智者若禹之行水

私意爲智,於是每事務爲穿鑿而失其順利之理。」○歐陽無待於矯揉造作於其間,却緣世人不明吾性之智,而以鑿,所以失之。輔氏曰:「人物所得之理,本皆順理,娶下之理,本皆順利,小智之人,務爲穿

天下順 見夫理之自然者爲不可易,而其穿鑿造作者非徒 氏曰:「言天下事物之理必自夫發見已然之迹者,蓋本於 之行水,順夫水性之自然,而不敢行夫己意之使然,此其 得其潤下之性而不爲 導之,未嘗以私智穿鑿 而又害之也。」禹之治水, 之勢,又莫不有迹之可驗,自其已然之迹而驗之,然後實 利自然之勢也。 天下事物之理莫不有順 害也。 則因 而有 其自然之勢 歐陽氏曰: 所 事,是以 利 「若禹 無 自 益 水 而 然

至,可坐而致也。」天之高也,星辰之遠也,苟求其故,千歲之日

所以行其所無事也。」

豈有 度 録 運 差錯,只爲有此已然之迹可以推測耳。 而 天雖高,星辰雖遠,然求其已然之跡,則 (有少差錯,久之自復其常,以利爲本,亦猶天與星 š 三有常 得。 不得 曆家自今日推算,而上極於太古開闢之時,更無 況 於事 其理者,而 雖 千歲之久,其日至 物之近,若因 何以 穿 其 鑿 天與星辰間 故 爲哉? 之度,可 而求之, 辰 或 《語 其 循 躔

> 旨矣。 而常在 之理而求之,則反害其性也。」○歐陽氏曰:「天下之大 造曆者以上古十一 常度而行。 智,無所自爲而常因天下之理。 前「水得潤下之性」而言也。 則害於性 循之,則爲 其義可明。」 上説,故皆失之鑿。 五星皆會於子,謂之上 曆元也。 此章專爲智而 己之私。」程子之言,可謂深 愚案: 苟不如 愚 ,而反爲不智。 大智。 謂 事 古者必 此,皆鑿之謂 唯程子以爲此章專爲智 發。」輔氏曰:「此章先儒多只就 物 元,以 若用 之理 月甲子 得甲子朔旦 蓋性本 爲曆始。 小 , 莫 輔氏曰: 天下之小智,不知循 也。」必言日至者, 智 順利,若不順其 朔夜半冬至爲 非 而 夜半冬至而 自 鑿 「害於性者,應 得 然。 程 以 而 此 子 設,然後 自 章之 順 日 本然 日 私 而 理

○公行子,齊大夫。右師,王驩也。 與右師言者,有就右師之位而與右師言者。 ○公行子有子之喪,右師往弔,入門,有進而

八九七

驩言,孟子 孟子不與 (右師 獨 不與 言,右師不悦曰 、驩言, 是簡 騹 : 也 「諸君 子 皆與

簡 略也

不亦異 踰 孟子聞之曰:「禮,朝廷不歷位 階 而 乎?」朝,音 相 揖 也。 我欲 潮 行 禮 ,子敖以 而 相 我 與言,不 爲 簡

之位 己歷 其 禮 是 歷己之位矣。 (事,故 ,凡有爵者之喪禮,則 時 右師之位矣。 也。 齊 卿 云朝 右師 大夫以君命弔,各有位次。 廷也。 右師 未就 已就 位 孟子 歷,更 而 位 進 職 右師之位又不 與 涉 喪涖其禁,令序 而 之言 就與之言, 也。 位,他人 則 右 若周 同 則 師

也。 孟 学曰: 君子以仁存心,以禮存心。 ,孟子不敢失此禮 君 子 ,所以 異 於人 不 者 右 師 以 其 也 存 心

階

故

與

言

去聲,下同

録 以 仁 $\check{\exists}$ 禮 問: 存 心,言以是存於心 『是本有 此仁禮,只要常 而 存 不 而不忘否?』 忘 也 語

放此。

禮也。」 티 : 養其性底不同。」」〇 顛 小人則以不仁不 人者,以其存心不同 沛 非 必 於 也。 是 他這 也 ·禮而· 箇從存心上説下來,言君 以 輔氏曰: 耳。 禮 存之於心。 存 君子則以仁以 心 而 「以仁存心 不 忘, 這 箇 如 存 禮 耐 視 心 子所以 而存之於心 不 聽 忘,如 與 言 存 動 異 其 造 必 於小 心 次 以

仁者愛人,有禮 者 敬 人。

此仁禮之施 輔氏 日: 「由乎内以施外 也。」

愛人者人恒愛之,敬人者人恒敬之。

此仁禮之驗。

輔氏曰:「獲乎外以驗於内

也

我 有 必不仁 人 八於此 也,必 ,其待 我 無禮 以 也, 横 逆,則 此 物奚宜 君子必 至 自 哉 反 也 横

横逆, 謂 强 暴 不 順 理 也。 輔 氏 \Box 强 横 也

不順理,逆也。」物 事 也

也,君子 其自反 而 必自反 仁矣,自反 也 : 我 而 有禮矣, 必不 · 忠。 其 由 横 與 逆 猶 同,下 由 是

輔氏曰:「理 忠, 恐所 無窮 以 愛 湿盡,人 敬 賢之。 禹、 稷 當 平世, 過 其門 而 不

孔

有作輟,一息不存,一物不體,便是不盡其心。」 人者,有所不盡其心也。

忠者,

盡

己之謂。

我必

不

自反 妄人也已矣。 而忠矣,其横逆由是也,君子 如此 則與 禽獸奚擇哉? \Box 此 於禽 亦

校 奚 也 擇, 何異 也。 又何難焉,言不足與之 獸又何難焉?』難,去聲

子所患則亡矣。 可憂也。 天下,可傳於後世,我 所憂則有之:舜人也,我亦人也。 是故君子有終身之憂,無一朝之患也。乃若 憂之如 非仁 何? 由未免爲鄉 無爲也,非禮 如舜 而已矣。 人也,是則 舜爲法於 無行 若夫君 也。

鄉 無後憂。 人,鄉里之常人也。 愚謂:「不苟」二字不可 君子存心 淺看。 心一不仁 不苟,故 而

不自覺、不自强,便是苟且也

如有一朝之患,則君子不患矣。」夫,音扶

事見前篇。

似。 人不堪其憂,顏子不改其樂,孔子賢之。 顏子當亂 樂,音洛。 世,居於陋 孟子曰:「禹、稷、顔回同道。 巷。 簞食,一 瓢 食,音 飲。

聖賢之道,進則救民,退則脩己,其心一而 心則有是道,有是本則有是驗。」 言之也。救民者,脩己之驗。 已矣。輔氏曰:「道則以其所行言之也,心則以其 脩己者,救民之本。 有是 所存

猶同。 飢者,由己飢之也。 禹思天下有溺者,由己溺之也。 是以如是其急也。 稷思天下有

輔氏曰: 故視斯民之有飢溺者,猶己使之飢溺 禹、稷身任其職,故以爲己責而救之急也。 急,所以盡其職分也。」 「禹、稷既委質以事舜 ,而以 身任拯溺救飢之責 是 以 救之如是其

禹、稷、顔子易地則皆然。

九〇〇

憂也。 便應。 及,各盡其道。 之任,亦能憂禹、稷之憂。 使禹、稷居顏子之地,亦能樂顏子之樂。 退則便須脩己,皆吾大本中自然之禮,無或 然不能不感於物,故 上直下,無 故 賢 使禹、稷 之心無 使顔子居禹、稷之任,亦能憂禹、稷之 有可怒之事,感則怒心 輔氏曰:「聖賢之心,其本然之體,亭亭當當,直 所偏無所倚。 居 此其所謂和者、天下之達道也。 所 顏子之地 偏 随 倚 感 此其所謂中者,天下之大本也。 而 同一大本、同 隨 應。 便 感 應。 有可喜之事,感則喜心 則 而 亦 應,各 如 一達道故也。」 能 進 使顔子居 則便須救民 樂 過、 盡 顔 如是,故 其 無 禹、稷 子 ※或不 道 之

之,可也。 今有同室之人鬭者,救之,雖被髮纓冠而救

禹、稷。 不暇束髮,而結纓往救,言急也。以喻

閉 鄉 鄰 户 喻 口 有鬭 顔子也。 也 者 被髮 〇此章言聖賢心無不同,事則 纓 冠 而 往 |救之, 則惑 也, 雖

> 爲,皆達道也,皆時中也,豈復有不盡善者哉?」 之謂 善。」輔氏曰: 謂 或異,萬殊也。 同 所 萬殊 遭 也 時 或 本,吾 輔 前 異。 氏 日 聖後聖,其心 「事雖萬 道 然 然處之各當 處之各當其理,是乃 「聖賢之心無不同,一 以貫之也。」尹 殊,心一 以貫, 其 也,故 理, 氏 則 所以 曰 本也 是乃 凡 所以 所 為同 當 遇 事 所 語 列 者。 皆 其 以 默 所 盡 爲 可 所

三章,齊人。通國,盡一國之人也。豐稅,與之遊,又從而禮貌之,敢問何也。」○公都子曰:「匡章,通國皆稱不孝焉。夫子

文也。 敬之也。 匡章,齊人。 人心纔敬,則見 輔氏 **日** 通國,盡一 「禮貌,猶 人便自 有禮貌 所謂 國之人也。 文貌,謂其 也。」 容貌 禮 貌 有

戮,四不孝也,好勇 母 母 顧 孟子曰:「世俗所謂 之養,三不孝也 之養,二不孝也 父母之養,一不孝 ٠; ; 也; 不孝者五 好貨 鬭很,以危父母,五 從 耳 博弈好 財,私 自 之欲,以 情其 妻子,不 飲 酒,不顧 四支,不 爲 不 父 顧 13: 父

也。章子有一於是乎?好、養、從、皆去聲。很,胡

戮,羞辱也。很,忿戾也。

懇反。

夫章子,子父責善而不相遇也。 夫,音扶。

遇,合也。相責以善而不相合,故爲父所

逐也。

則害天性之恩也。 以,害也。朋友當相責以善。父子行之,責善,朋友之道也。父子責善,賊恩之大者。

去聲。 一大章之夫,音扶。爲,去聲。屏,必井反。養, 其設心以爲不若是,是則罪之大者,是則章 非於父,不得近。出妻屏子,終身不養焉。 非於父,不得近。出妻屏子,終身不養焉。

養,以自責罰。其心以爲不如此,則其罪屬,但爲身不得近於父,故不敢受妻子之言章子非不欲身有夫妻之配、子有子母之

處,然後可以見聖賢至公至仁之心矣。」 孝而以爲孝,此皆不公不正,倚於一偏。 誠在所絶耳。 絕之,故孟子舉世俗之不孝者五以曉之,若如此五者,則 孝之罪未至於可絶之地耳。 子之於匡章,蓋憐之耳,非取其孝也。 後能至公。]楊氏曰:「章子之行,孟子非取之 則不忍苛責於人。必能至公,然後能至仁,必能至仁,然 故可以見其至公至仁之心。至公則無有私蔽於己,至仁 益大也。〇此章之旨,於衆所惡 至如此出妻屏子,終身不養,則豈得 善於父而不相遇,遂爲父所逐。雖是父不是己是,然便 也,特哀其志而不與之絕耳。」《語録》 焉,可以見聖賢至公至仁之心矣。 『父子責善,賊恩之大者』,此便是責之以不孝也,但其不 「衆惡之必察焉,此孔子之明訓也,而孟子之意正如 後世因孟子不絶之,則又欲盡雪章子之不 然當時 人則遂以爲不孝而 爲孝? 據章之所爲,固 必若孟子之所 故孟 而 輔 》曰:「孟 氏曰: 必察 子言 此

諸?」曰:「無寓人於我室,毀傷其薪木。」窓○曾子居武城,有越窓。或曰:「寇至,盍去

沈猶 反。 退 至則先 則 左右 行 티 : 去以 曰:「是非 日 :「待先生,如此 脩 爲民望,寇 我 牆 汝 屋 所 知 退 我 也。 列 將 其忠且 反。 反, 殆於不可。」 昔沈猶 寇退 敬 有 也。 曾 負 子 寇 芻 皆然。」

之禍 氏,時 不同。 同。 其弟子去之,不與其 猶 誠 門人也。 武 者固 ·恭敬· 行, 城,魯邑名。 ,從先生者七十人,未有與 輔氏曰 父兄則當尊也,臣 異 有負芻者作亂, 弟子 也。 而三者之所以自 忠敬,言武城之大夫事曾子,忠 師 姓 爲民望,言使民望 則父行 名 盍,何不也。 也。 則比一 也,實則兄行 虚,亦 難。 言曾子嘗 來攻沈猶氏,曾 者爲微矣。 不同 言 焉。」與,去聲 也 也 左右,曾子之 師 而效之。 故與 賓 舍於沈 君之所以 不 八爲 與 子 臣 沈 臣 率 猶 待 者

諸 子 ?」子思曰:「如伋去,君誰 思 言所以不去之意如此 居 於 衛, 有 齊 寇。 或 曰 與守?」 : 寇 至, 盍 去

也。

學者知此,則

因所

遇

耐

應之。

若權

衡

賢,言行不同

1, 事業

亦異,而

其

道

未

始

不

同

也。 孟子 子 Ė 思, : 「曾子、子 臣 也, 微 思 也。 百 道 曾 子、 曾子, 子 思易 師 也 地 父兄 川

不繫於利 事 微,猶賤也。 不 同 者,所 害, 尹氏曰:「或遠害, 惟 處 「曾子率弟子而去之,是遠害也。 其 之 是 地 而 不 已,故 同 也。 易 君子之心, 或死難,其 地 則 皆能 子

若其心 至於倒 賓而遠 允。 之是者,則爲之耳。 地,有不同焉故 此不同者、蓋以曾子 雖無死難之事,然寇至不 爲之。」輔氏曰: 爲 害者 ·行逆施,而不自知也。」○ 臣 繫於利害 而 死 ,處爲臣 難者,處 也。 之地 則有 ,則處 故 君子之心,不論事之利 資師 6雖易 則或不能 隕穫 去,則 師 之地 地 賓之地, 而 而 有死 孔 則 處 無 或不 死 安 皆 氏 難之理 耐 於 裕 能 曰 : 子 難 能 爲 有 思 遠 其 與 荷 則 乎 也。 變 所 害 動 害; 且. 古之聖 處 當 唯 其 遷 而 爲 然 徙 爲 無 顧 臣 事 詳 理 之 如

各自 則 之稱物,低 隨所遇之時 「古人言行事業,皆就其所遇之時、所處之地爲之,故 不同。 至於道 昂 因 屢 所 則 遇之 變, 而已,惟歸于是耳。 地 而 耐 不害其 應 之。 如 爲 權 同 衡 學者 之稱 也 1知此, 物,物 輔 氏

口 乎?」孟 耳。」瞷,古莧反。 儲 子 子曰 三 王 使 何 人 以 瞷 異 於人哉? 夫子,果 有 堯、舜與人 以 異 於人

平焉,豈有不同者哉?」

有輕重之不同

則

衡有低昂之或異,

我

則進

退

其

必饜 富貴 齊 儲子,齊人也。 所 解之意愈明 解「堯、舜與人同」一 **豈有異於人哉**? 具之理 酒 人有 也 肉 其 而 則 白。 妻告其妾曰:「良人出 後 亦與 妻 反。 雖 人無異也。 然堯、舜不獨與 妾 句。 瞷,竊視也。 其 丽 輔氏曰: 妻問 然後却言 處 孟子之言,固兼舉之矣。」 室者,其 所 「謂聖人亦人耳,所以 與 人同其形,至於其 豊 飲 聖人亦人耳, 有異於人』,逆 食者 良 ,則必饜酒 人 出 ··; 則 則 盡 心 先 而

權以取 其良 從良人之所之, 偏國中無與立談者。 肉 燔。 施 人者,所仰望而終身 此其爲曆足之道也。 郭墦間,之祭者,乞其餘,不足,又顧而之他, 有 施 顯 而 施施 人,而 從外來,驕 者 後 反,問 如字。 來,吾將 相 其 泣 與 其妻妾。 瞷 於 飲食者,盡 中 良 也。 其妻歸,告其妾曰 庭。 人之所之也。」 施,音迤,又音易。 今若此。」與其妾訕 而 良人未之知也 富 貴 也 蚤 卒之東 而 起, 播,音 未 「良 嘗 施

由 妻妾不羞也,而 君 也。 也。 章首當有「孟 孟 而行,不使良人知也。 子 子言自君子 曆,飽 觀之,則人之所 訕 ,怨詈也。 也。 不 子曰」字,闕 而觀,今之求富貴者,皆若 顯 相泣者,幾希矣。 施 者,富貴人也。 施 以 · 喜悦· 求 墦, 文也。 富 自得、 冢也 貴 利 之貌 達 良 施,邪 ~者,其 顧 人,夫 望 施

而以驕人於白日,與斯人何以異哉?」富貴者,皆以枉曲之道,昬夜乞哀以求之,矣,言可羞之甚也。○趙氏曰:「言今之求矣,言可羞之甚也。○趙氏曰:「言今之求此人耳。使其妻妾見之,不羞而泣者少此人耳。使其妻妾見之,不羞而泣者少

後學 成德 校訂

孟子卷第八

孟子卷第九

其

在

我者有

何罪

戾而

致然。

又思慕其親,無頃

刻之忘

其遭事之變,故深惟其所以不得於親之故,而

自

怨自

咎

必欲得其歡心而後已,此舜之所以怨慕也。」

朱子集註 後學趙順孫纂疏

萬章章句上

凡九章。

天而泣 能 者,怨咎己之不得其親而不能自己,慕者,思慕其親而 慕,怨己之不得其 旻天。愚案:此説出《毛詩傳》。 舜往于田,耕歷 自 忘也。夫父慈子孝,理之常也 也。 事 見《 山時也。 親 虞 而 書 思慕 大禹 仁覆閔下,謂 ,何有於怨慕哉? 號泣于旻天,呼 也。 . 謨 輔氏曰: 》篇。 忽 之 怨 唯 不

母之不我愛,於我何哉?惡,去聲。夫,音扶。恕,勞而不怨。然則舜怨乎?」曰:「長息問於公明高曰:『舜往于田,則吾死知也。』公明高曰:不若是恝,我竭力耕田,共爲子職而已矣,號泣不若是恝,我竭力耕田,共爲子職而已矣,號泣不若是恝,我竭力耕田,共爲子職而已矣,號泣不若是恝,我竭力耕田,共爲子職而已矣,炎母惡之,

舜之心,不能爲 耳,非怨父母 于父母,亦《書》辭,言呼父母而泣也。 長息,公明 母、未嘗自以爲孝也、若自以爲孝、則非孝 無愁之貌。於我何哉,自責不知己有何罪 高弟子。公明高,曾子弟子。 也。 此言。 楊氏曰:「非孟 蓋舜惟恐 不 順 子 於父 深 知

與其心便自止息,且如人喫飯,纔覺飽,則便止矣。」與其心便自止息,且如人喫飯,纔覺飽,則便止矣。」矣。輔氏曰:「楊氏發明得舜之心。使舜自以是爲孝,

歸。爲去聲。 爲不順於父母,如窮人無所天下而遷之焉。爲不順於父母,如窮人無所舜於畎畝之中。天下之士多就之者,帝將胥帝使其子九男二女,百官牛羊倉廩備,以事

好色,人之所欲,妻帝之二女,而不足以解天下之士悦之,人之所欲也,而不足以解憂,

心焦然怵迫

而無所

底麗

也

父母,可以解憂。 人悦之、好色、富貴,無足以解憂者,惟順於憂,貴,人之所欲,貴爲天子,而不足以解憂。憂,富,人之所欲,富有天下,而不足以解憂。

而亦不可以不盡也。」

「大文欲,不足以解憂,而惟順於父母,可以下之欲,不足以解憂,而惟順於父母,可以不是心事實有如此者耳。舉天下之所欲不足以解憂者,所之心事實有如此者耳。舉天下之所欲不足以解憂者,所 之心事實有如此者耳。舉天下之所欲不足以解憂者,所 之心事實有如此者耳。舉天下之所欲不足以解憂者,所 之心事實有如此者耳。舉天下之所欲不足以解憂者,所 之心事質,如此,以解上文之意。極天而亦不可以不盡也。」

則慕 人少,則慕父母 矣。」少、好,皆去聲 孝終身慕父母。 妻子; 仕則慕 ,知好色,則慕少艾; Ŧi. 十而慕者,予於大舜見之 君,不得於君 則 熱 有 中。 妻子, 大

其本心也。 言常人之情, 艾,美好也。 大 物 而 遷 心,惟聖· \wedge 楚 人 詞 爲 × 能 《戦 不 失 或

年五 熱中 大舜於此,猶慕焉,聖人純孝之心,不以老而 策 所以爲終身之慕。□○此章言舜不以 矣。真氏曰:「五十始衰、禮 少所 十也。 躁 謂 急 幼 心熱 文,義 Ŧi. 十而 也 與 八此同。 慕 言五十者, 》所謂『不致毀』之時 則 其終身 不得,失意也。 得衆 舜攝 衰 慕 也。 人之 口 政 此其 也 時 知

失其 於吾固 所 所 曰:「心纔有一豪物欲之累,而於其親 非聖人之盡性,其孰能之? 欲者,皆外物 欲爲己樂,而 (本心,則 有之性便有 性不存矣,故《集註》有盡 也。 不盡處 順親者,人之本心也。 以 不 也。 順乎親之心爲己憂。 能盡其 性 有一豪之不順,則 蔡氏曰:「衆人之 性之言。」〇輔 則能不失其 溺於外 物 氏 而

父母,是以不告也。」懟,直類反 娶,何也?」孟子曰:「告則不得娶。男女居 告父母。』信斯言 室,人之大倫 萬 章 問問 曰:「《詩》云: 也。 也,宜莫如 如 告 ,則廢人之大倫,以 『娶妻 舜。 如之何? 舜之不告而 懟 必

心,而爲人倫之至矣。

大倫 嚚 不可廢,亦不容廢也。 誠如此詩之言也。 詩 常常欲 · 齊 國 ,以讎怨於父母 害舜。 風 ・南 告 若由父母而廢之,則是陷父母於 則 懟, 讎 山》之篇也。 也。 不 聽 輔氏曰:「人之大倫,固 怨 其 也。 娶,是廢 信,誠 舜父頑 人之 也 13:

則不得妻也。」妻,去聲。帝之妻舜而不告,何也?」曰:「帝亦知告焉萬章曰:「舜之不告而娶,則吾既得聞命矣。

過失而讎怨於父母也。」

聽也。 以 官司以法定使之如此耳。」 私者亦多。」輔氏曰: 告者,以君治之而 女爲人妻曰妻。 如今之官府 治 民之私 已,如今之官府 「謂以君命治之,不容瞽瞍之不 程子 · 或 日 : 有 牽 制 堯 而 不 妻 容 治 舜 聽 民之 而 不 則

使 萬章 我 績 浚 并 曰:「父母使舜完 出,從 牛羊父母,倉廩父母,干戈朕,琴朕 而 揜之。 廩, 象 曰 捐 : 階, 謨 瞽 蓋 瞍 都 焚 君咸 廩

兹臣 弤 己與?」曰:「奚 亦喜。」張,都禮反。 母 弤 象不 之都 也。 朕二 盾 完,治也。 火焚廩,舜乃以 案《史記 去。」即 後又使舜穿井,舜穿井爲匿空旁出。 深,瞽瞍 一庶,汝其 象 曰: 也 珊 而 君。 蓋 知 嫂 自 弓 舜已 · 蓋 其 戈, 取 ¥, ⊟ 使治朕棲。』象往 也。 『鬱陶 咸,皆 事 此 井 與 捐 于予治。」不識 戟 出 也。 物也。 也。 象 去也。 象 也。 而 忸,女六反。 「使舜 思君爾。」忸 也。 欲 共下 兩笠自 欲 不知也? 象, 舜 琴, 以 以 二嫂,堯二女也。 績, 所 舜 土 殺 階,梯 舜之牛羊倉 上 舜 捍 居 實 異 舜 塗廩 功 怩,音尼。 舜不 所 井,舜 而下去,得 三年 母 入舜 爲 也。 象憂 怩 也。 彈 弟 己 瞽瞍 知象之 Ŧi. 成 宫 功 舜 也 亦憂,象 舜 與,平聲 從 揜,蓋 弦 既 都 也 廩 曰 : 從 匿 舜 琴 謨 不死 舜既 與父 故 空 下 將 在 『惟 棲, 也 干, 井 也 謂 謀 出 縱 喜 殺 牀

過如 己,但 心, 同 情, 見爾。 孟子爲疑。 氏 惟恐發之不蚤, 謂: 豪芥蔕於其中。 甚,舜豈不知之? 之治其臣庶 象素憎舜,不至其宫,故舜 其宫也。 取 牀 量 所 也, 此言憤 (此,豈 則 也。」萬章所言 自有 有, 世 孟子有以 見 象 忸 並必真 儒以帝堯在上,二女嬪虞,象無殺舜之理 所不能 欲 不知孟子特論大舜之心,使其有是, 其 結積聚之意。 見 鬱 怩 舜 使爲 憂 有是哉。」程子曰:「象憂亦憂,象 陶, 除之不 也。 後 慙 生 則 世骨 然見其憂則 知之矣,它亦 已耳 色 思 在 己 憂, 「, 其有 亟。 孟子言舜非 肉 也 之甚 牀 妻 象言 之間 見 至此 彈 也 真氏曰: 臣 其 無 琴, 憂,見 而 小 己思 然後知聖人之心,與天 庶,謂 喜 有 氣不 不 象 見 蓋 疑 其 則 不 往 可 其 「象欲殺舜之迹明 君 隙 不 既 (喜則 喜, 得 足 之甚 舜 知,然舜之 來 其 則 知 出 伸 辨 喜, 宫 而 百 猜 其 兄 即 也 防 喜, 也 官 處之不 略 將 弟 故 潛 欲 ,故以 萬 無 也 端 之 殺 使 來 分 歸 真 愚

終有窮,舜之天理 喜亦喜,順 以 喜亦喜,人情天理,於是爲至。」輔氏曰: 殺舜爲事,肆人欲以絶兄弟之情者也。 天理以 則 盡 兄弟之情者也。 定而未嘗易卒之。 象之人欲雖 象不格 象憂亦 萬 姦 憂,象 象 變 而 源 而 H

源

以

來,則

舜之天理勝,而象之人欲消矣。」

之道 所哉 日: 校,音效,又音教。 而 饋 君子可欺以 焉,攸然而逝。]子産 烹之,反命曰:『始舍之,圉 食之? 生魚於鄭子産,子産使校人畜之池。 來,故 然 則 校人出,曰:『孰謂子産智? 舜 曰 : 誠 其方,難 僞 畜 信 得其 ·喜者與?」曰:「否。 ,許六反。 而 喜 罔 所哉 曰:『得 之, 以 ! 奚僞 非 其道。 圉 得 其 焉?」與,平聲 其 焉,少則 所 哉 所哉!」故 彼以 昔 予既 校 愛兄 洋 得 者 烹 人 其 洋 有 放焉

理之常

也

貌。 校人,主池 而 遠 洋洋 去 也。 則 沼 方, 稍 小 縱 亦 吏 道 矣。 也。 也 攸 幸 然 罔 幸 ';蒙蔽 一; 困 而 逝 而 者 未 也 自 舒 之 欺 得

> 也。 謂 哉?」〇此章又言舜遭人倫之變,而不失天 以 之道來,則舜以愛弟之道接,此皆誠實之事, 子猶或可 謂 之,何僞之有? 欺之以其 昧之以理之所無。 其方,謂誑之以理之所有, 象以愛兄之道來,正是欺之以其 欺也。 方也。 昧之以 輔 理之所 氏 舜 日 : 本 象以愛兄之道來,所 誑 無,在 不 之以 知 、方者。 君子 其 罔 理之所有,在 僞 以 則 然 非 ,故實喜 必不 何僞之有 彼 其 以愛兄 可 道 惑 君

則放之,何也?」孟子曰:「封之也,或曰〇萬章問曰:「象日以殺舜爲事,立爲天子,

者誤 章 放,猶置 疑 以 舜 何不 爲放也 也。 誅之,孟 置之於 子言舜 此,使不 實封 得 去也 之,而 或 萬

殺 萬 章 三苗于三危,殛 日 : 「舜流 共 Ι. 鯀 于 于 幽 羽 州 Ш 放 四 驩 罪 兜 而 于 天下 Ш 咸

庫,音鼻。 也。 其貴也,愛之欲其富 之人奚罪焉? 藏怒焉,不宿怨 誅之,在弟則封之。」曰:「仁人之於弟也,不 服,誅不仁也。 身爲天子,弟爲匹夫,可謂親愛之乎?」 仁人固 焉,親愛之而已矣。 象至不仁,封之有 也。 如是乎? 封之有庳,富貴之 在 庫。 親之欲 他 人 有 則 庳

也。 者,逆命 圮族,治水無功,蔡氏曰: 也。 荆揚之間 流 族也。」**驩兜**,人名。二人比周, 三苗,國名,負固不服。《文集》曰: 用,不從上令也。 ,徙也。 共工,官名。《文集》曰:「蓋古之世官 楚 鯀,禹 解》言「鯀悻直」,是 而不行,猶今言廢閣 ,恃險爲亂者也。」殺,殺其 父名、《文集》曰:「鯀,崇伯名。」方 圮敗族類也,言與衆不和,傷人害物 其方命圮族之證也。」皆不 詔 令也。 「圓則 行, 蓋 君 鯀之爲人,悻 相 方則 也。 三苗 與爲 止 殛 在 方命 江南 誅 黨 命 戾

> 留蓄其怨。 貢 》: 皆地 人之心也。 象,使彼有庳之民 今海州朐山 云:「有鼻在零陵,今鼻亭是也。」萬 之地也。」未知是否? 崇 Ш 「在雍州。」 南裔之山,在今澧州慈利縣。 名也。 縣。 愚案: 藏怒,謂 或以爲燉煌,未詳。 或曰:「今道州 幽州,北裔之地,舜分冀北爲 無 藏 罪 愚案: 若 而 其怒。 遭象之虐,非仁 羽 章疑 《漢書》 鼻亭,即 危,西裔之地,《禹 Ш 東裔之山 舜不 宿 顔 怨,謂 師古 當 有 出 州 封 庫

庳」,此之謂 見之,故源 謂之放。 於其國,天子使吏治其國,而納 敢問 或曰放者,何謂 豈得暴彼民哉? 雖然,欲常 源 也 而 來。 『不及貢,以 也?三曰 其 「象不得 貢税焉,故 政 接 于 常 有 有 爲 而

於象。 國,天子使吏代之治,而 孟子言象雖 有似於放,故或者以 封爲有庳之君,然不 納 其 爲 所 放 收之 也。 得 つ貢 蓋 治 象 税 其

仁之人也。

幽州、崇山、三危、羽山、有庳,

兩

盡

而

天理

人情

皆極其

至矣。

封之有庳,富貴之也,是仁之至。 「仁之至,自是仁之至。義之 舜之於象,仁之至, 不失吾親愛之心, 後世如景帝之於梁王 不及貢以 源,若水之 廢私恩, 已如此 孟 政接 子 以 使吏 引 政 瞍, 其 天子矣,又帥 音。』孔子曰:『天無二日,民無二王。』舜既 勲乃徂落,百姓如喪考妣,三年, 哉,岌岌乎!』不識 北 天子矣。」朝,音潮。岌,魚及反。 堯老而舜 曰:「否。此非君子之言,齊東野 而臣,父不得而子。』舜南 ○咸丘蒙問 面 而朝之, 瞽瞍 、容有蹙。 攝 也。 天下諸侯以爲 孔子 《堯典》曰:『二十有八 語 亦北 此 云: 日 語 「盛 『於 面 誠 面 而 然乎 堯三年喪,是二 斯 而 德之士 朝 立,堯 時 之。 四海 哉?」 孟 人之語也 也 天 君 舜 遏密 帥 載,放 見 下 諸 不 子 瞽 爲 侯 得

也

吴氏

曰:「言聖人不以公義

以

證

源

源

而

來之意,見其親愛之無

事

接

見

有

庳之君。

蓋古書之辭,而

于

有

庫

謂

不待及

諸

侯

朝貢之期

而

相

繼

也

來,

謂

來

朝覲

也。

而

彼

亦

不

得虐有庫之民

也。

源

至不仁,處之如

此

則

既

耳。 亂,天下將危 蹙不自安也。岌岌,不安貌也。 孟子言堯 咸丘蒙,孟子弟子。 面 而 堯在 朝 乎? 時 但 ,舜未嘗即 老不 又引《書》及孔子之言 也。 治事,而 齊東, 語者,古語 天子位,堯 齊國 舜 攝 之東 也。 天子之事 言人倫乖 何 鄙 以 由 也 明 北

私恩

則

情

其

流

必

至於不仁。

以

私恩害公義,則

不 廢

之,皆不足道。」〇輔氏曰:

「吴氏説盡聖人事。

以公義

始則

縱之太過,不得謂之仁,

後又窘治

之甚

峻,義又失

治其國,而

納其貢賦,是義之盡。

盡,自是義之盡。

義之盡

也。」《語録》曰:

927

亦不

以

私

恩

害公義。

也,是不以

公義 必 盡

廢

私

恩。

象不得

有

爲於其

國

使

吏

治其國

而納

其

(貢税焉,是不以私恩害公義)

如是則 一、天子

仁義

盡義,其

流 不

至

一於不義。

舜之於象,封之有庳,富貴之

魂,精 降 静 徂 攝 樂器之音 冷,所謂 日 之,《堯 舜典》,蓋 落。 也 也 位二 仙 便 是魂之升上, 魄降 是 《語 十八 典》,《虞書》篇名。 魄 音: 死 也 録》曰: 古書二篇,或合爲 到得 魂歸于天,魄降于地,而人死矣。」〇 則 年 金、 魂 前 將死, 「天地陰陽之氣交合便成人,氣 ,落是魄之降下。」遏 升 石、絲、竹、匏、 堯 而 熱 死 氣上 魄降,故 也。 出 徂,升 今此文乃見於 所 謂魂 耳。 古者謂 止, 止 土、革、木 升; 也。 也。 下 言舜 死 落 陳氏 便 密 體 爲 是

莫非 咸丘 辭 我 王 臣 詩》云:『普天之下,莫非 事,而 害志 獨 「如何?」曰:「是詩 賢 主臣 蒙 勞 曰:「舜之不 不得養父母 也。」 。」而舜 以意逆志,是爲得之。 故 既爲天子矣,敢問 説説 臣堯, 詩者,不 也。 也,非是之謂 曰:『此莫 王 則 以 吾既 土 文害 ; 如以辭 率 得 也。 瞽瞍之非 菲 辭 聞 土. 王事 之濵 命 勞於 不 而 矣 以 E

而

非真

無遺

民

也

《詩

傳

 $\stackrel{>}{\exists}$

所謂迎者,其至否

信斯言也,是周 矣、《雲漢》之詩曰 不可以 文,字 惟 則 作者之志,乃可 言説詩之法,不可以一字 《大雅》篇名也。 不臣 作詩者自言天下皆王臣,何 下文亦云:「大夫不均, 均,己勞於王事 率,循也。此詩今《毛氏序》云:「役 才而勞苦乎? 詩 以 如《雲漢》所言,是周 • 意 · 堯,不 也。 小雅 逆之, 句 辭, 而 以 無 則知 害設 語 北 堯 得之。 遺 :『周餘 耐 孑,獨立之貌。 非 也。 Ш ≫ 爲 民 作詩 不得養其父母 辭之志,當以己意 謂 也 臣, 之篇 逆, 天 若 之民 者之 黎民, 我 子 使 ,而害 但 迎 也。 從 爲 可 北 志 也。 真 以 事 獨 臣 面 靡有孑遺。』 其 在 無 一句之義 使我 獨 遺,脱也 焉。」其詩 其 遺 辭 而 於 雲漢》, 賢。」 父 憂 種 而 徧 朝 使不 以 迎 矣。 也 也。 取 腎 乃

文害辭,是泥 之,不來則已。 來。」〇又曰: 追迎之之意。 速遲不敢 自必 一字之文,而害 「譬如 若必去捉他來,則不可。」○輔氏曰"「以 而聽於彼也。」〇《語 蓋是將自家意思去前 有 客來,自 句之辭 家去迎 録 也。 \<u>\</u> 面等候詩 他 以 「逆,是 辭害意,是 他來 人之志 則 前 接 去

之謂也。養,去聲。 一之至也。《詩》曰:『永言孝思,孝思維則。』此天下養。爲天子父,尊之至也,以天下養,養孝子之至,莫大乎尊親,尊親之至,莫大乎以

意。

志,謂詩人之志。

以我之意迎取詩人之志,然後可

句之辭,而害詩人設辭之意也。」〇又曰:「意,謂己

父北面而朝之理乎?」

以得之。」

之感,此又言尊親養親之至以見舜無使父朝己之理。夫之篇。言人能長言孝思而不忘,則可以爲之北面而朝之理乎?《詩・大雅・下武》之篇。言人能長言孝思而不忘,則可以爲言瞽瞍既爲天子之父,則當享天下之養,

矣。舜盡事親之道而爲法於天下,即其事也。豈有使其如舜者,然後可謂能長言孝思而不忘,天下以爲法則者而舜爲尊親養親之至矣。故引《下武》詩以咏嘆之,以爲舜既爲天子,則瞽瞍實爲天子之父,備享四海九州之奉,舜既爲天子,則瞽瞍實爲天子之父,備享四海九州之奉,

若。』是爲父不得而子也。」見,音現。 書》曰:『祗載見瞽瞍,夔夔 《書·大禹謨》篇也。 蒙之説也 子,則是所謂父不得而子者, 瞍頑愚亦且信之,即孟子所謂底豫也。」孟子引 瞽瞍,往而見之,敬謹 戰栗之容也。」 允,信也。 之貌。蔡氏曰:「齊,莊敬也,栗,戰栗也。 蔡氏曰:「敬其子職之事也。」變變齊栗,敬謹恐懼 言瞽瞍不能以不善及其子,而 之也,蔡氏曰:「舜之敬畏小心而盡於事親者如 若,順· 祗,敬也。 如 此,瞽瞍 齊栗,瞽瞍 也。 而 反 齊,側皆反 非 見 言舜 亦 載,事也 夔夔,莊 如咸 化 信 於其 敬 此 亦允 此,瞽 而 丘 而 事 順

○萬章曰:「堯以天下與舜,有諸?」孟子

下同。

曰:「否。天子不能以天下與人。」

「然則舜有天下也,孰與之?」曰:「天與之。」天下者,天下之天下,非一人之私有故也。

萬章問而孟子答也。

「天與之者,諄諄然命之乎?」諄,之淳反。

萬章問也。諄諄,詳語之貌。

行,去聲,下同。 曰:「否。天不言,以行與事示之而已矣。」

曰天者,以天統乎人,人與天一也。」

天不言,以行與事示之而已矣。」暴,步下反, 舜於天而天受之,暴之於民 人於諸侯,不能 人於天子,不能使天子與之諸侯。大夫能 能薦人於天,不能使天與之天下。 曰:「以 行與 事示之者如之何?」曰:「天子 使諸 侯與之大夫。 而民受之,故曰, 諸侯 昔者 堯薦 能薦 薦

> 八載,此固天也。 言者,天人一理,而天實以民爲視聽也。 以與之之意也。 之之心,則便是私意矣。 舜爲天人所受,是因 無餘藴矣。 授之義明白 用之。輔氏曰:「下薦人於上,公心也,若有令上必用 暴,顯也。 能,上以必其君之用,下以示一己之恩者,皆私意也。」 彼竊位蔽賢之徒,固不足深責,而進 ,而於人臣薦賢達善之道,大公至正之心,亦 言下能薦人於上,不能令上必 至於朝覲、 輔氏曰:「上只言天,此又併民 孟子此數句,不 舜之行與事 訟獄、謳 歌 舜相 惟説得 則 人耳。 ·, 而 堯二十 示之 善、達 憪 有

之所能爲也,天也。堯崩,三年之喪畢,舜避受之,如何?」曰:「使之主祭而百神享之,是民受之。使之主事而事治,百姓安之,是民受之。使之主事而事治,百姓安之,是民民。使之主事而事治,百姓安之,是民

宫,逼堯之子,是篡也,非天與也。相,去聲。朝,起。夫然後之中國,踐天子位焉。而居堯之舜;謳歌者,不謳歌堯之子而謳歌舜,故曰天堯之子而之舜;訟獄者,不之堯之子而之堯之子於南河之南。天下諸侯朝覲者,不之堯之子於南河之南。天下諸侯朝覲者,不之

其 者,謂之西河; 南河在冀州之南,愚謂:冀州爲帝都。 南 即 豫 州 在 帝都 也。 之南者,謂 訟 獄, 之南 謂 獄 河 不決 其 在帝都之西 實 耐 河 也 訟

音潮。 夫, 音扶

此之謂也。」《太誓》曰:『天視自我民視,天聽自我民聽。』

間豪髮,故其視聽皆因民之視聽。此又以人兼天也。」曰:「天無形,則無耳目,安能有所視聽,而天人之理,不聽。 民之歸舜如此,則天與之可知矣。輔氏自,從也。天無形,其視聽皆從於民之視

)萬章問曰:「人有言:『至於禹而德衰,不

然也。 箕山之陰。 畢,禹避舜之子於陽城。天下之民從之,若 傳於賢而 『吾君之子也。』謳歌者不謳歌益 堯崩之後,不從堯之子而從舜 者舜薦禹於天,十有七年,舜崩。三年之喪 天,七年,禹崩。三年之喪畢,益避禹之子於 曰:『吾君之子也。』朝 天與賢,則與賢,天與子,則與子。 .傳於子。』有諸?」孟子曰:「否,不 朝覲訟獄者不之益 音潮 也。 而之啓,曰: 而謳歌啓 禹薦益 於

理,更無有一豪私意爲之間也。」 愚案:陽城山,在漢穎川 與子』兩句 私意也。」輔氏曰:「孟子發「天與賢則與賢,天與子則 則與子,可以見堯、舜、禹之心,皆 然不可考矣。 禹之子也。 陽城,箕山之陰,皆嵩山下深谷中可藏 峻 潔 楊氏 如 但云天與賢 此 便見 曰:「此語 郡。 得 箕山,在嵩高之北 三聖 人之心,渾是一 則 孟 與 子必有所受, 賢,天與子 無一豪 啓, 箇天 處

承繼禹 之相 者 肖 民 丹朱之不肖,舜之子亦不 , 天 也; ,皆天也,非人之所能爲 未久。舜、禹、益相 相去之相,如字。 舜也,歷 己道。 莫之致 年多,施澤於民 益之相禹 而 至者,命也。 去久遠,其子之賢 也,歷 · 肖。 也。 久。 舜 年少,施澤 莫之爲 之相 啓賢 之相之相 能能 堯, 而 去 不 於 爲 敬 禹

也。 爲而 天下 也。 也。 以 而 言之謂之天,自人言之謂之命, 堯、舜之子所以 堯、舜之子皆不肖,而舜、禹之爲相久,此 理言之謂之天」,此 事未有無故而致者,故非人力所致而自至者,命也。 「以人言之謂之命」,此所謂命,則天之命於人者是 禹之子賢,而 自爲,非人力所致而自至者。 而益不有天下也。 輔氏曰: 「天無爲,故非人力所爲而自爲者,天 不有天下, 所謂 益相不久,此 天,則天,專 然此皆 而舜、禹 言之,則 其 非 啓 實 蓋 所 人 有 道 則 以 力 以 天 者 理 所 有 下 是

> 也。 受來,如何見得是命?」 邊,而言其指歸爾。 福自天來到於人,然後爲命。 人言之謂之命」,命是天命,因 天」,是專就天之正面訓義言, 天以全體言,命以 言,有因而致,是人力,對 人,對此而反之,非人所爲,便是天。 命,只一理,就 所爲所致,故曰『其 理 則天 理之本體,命 其中 其 實則 却 若只就 中 微 妙用言。 有 則天 此而反之,非 分别。 而已」也。」〇 天 乃是於天理中截 人形之而後見。 却包命在其中。 理之命 邊 其曰 爲 説 至以吉 以 於 吉 以 N 力所 做 陳 人者, 禍福, 事 理言 氏 X 言 致 日 : 皆 斷 故 禍 其 便 之謂 做 未 命爲 吉凶 福 非 天 、日『自 是 有 地 事 人 之 禍 頭 力

薦之者,故仲尼不有天下。 兀 夫而 之。言仲尼之德,雖 孟子 因禹、益之事, 有天下者,德必若舜、禹, 歷舉 無 愧 此下兩條 於舜 而 禹 又有 以 而 推 無 天子 天 明

故益、伊尹、周公不有天下。 繼世以有天下,天之所廢,必若桀、紂者也,

子薦之者,故不有天下。

天下。 益、伊 賢聖,但 繼 民,故必 及太甲、成王 世 繼世 而 尹、周 輔氏曰:「無天子薦之者,在孔子之氣數有不完 有 有天下者,其 能 有大惡如桀、紂,則 賢君 嗣 者,在益、伊 公雖有舜、禹之德,而 守先 一,雖不 業,則 尹、周公之所遇 先 及 世皆有大功德 益 天亦不 伊 天乃廢之。 尹、 廢之。 有不同 亦不 周公之 也。 有 故 如 於 殷

于 丙 伊 桐 尹放之於桐。 處仁遷義, 三年,以聽伊尹之訓己也,復歸 尹 二年,仲 相 相、王,皆去聲。 湯 以 王: 王 四 三年,太甲悔 於天下。 年。 艾,音义 太甲 湯崩,太丁未 顛 過,自怨自艾,於 覆 湯 之典 刑 立 伊 外

也。」」禪,音擅

亦皆莫之爲而爲,莫之致而至者也。」

子 年,仲壬立四年,皆太丁 此承上文言伊尹不有天下之事。 太丁,湯之太子,未立 也。」程氏曰:「古人謂 弟也。 歲爲 而 死。 年。 外 太甲,太丁 趙氏 湯崩時 丙 立 二 三 三 :

> 典刑,常法 立之也。」二説 外丙方二歲,仲 説 文》云「芟草 也 未知孰 \pm 桐, 也 方 ۲, 湯 四 蓋 是。 墓 歲,惟太甲 所 斬 顛 在 絶 《覆,壞 自新 艾,治 差 之意。 長,故 亂 也。 也

周公之不有天下,猶益之於夏,伊尹之於

亳,商所

都也。

也。

禪,授 聖之心者,無如孔子,繼孔子者,孟子 『唐虞禪,夏后、商、周繼,其 曰:『天與賢則 有私意於其間 也。 或 禪 哉? 與賢,天與子則與子。』知 或 繼 皆 尹 氏 天 義 日 命 也。 一也。」孟 孔 聖 子 前 人豈 Ė 前 子

之也。」 之,尤更明白 矣。」輔氏 曰:「孔子之言, 可 謂 真 能得 前聖之心 固斷置得 者。 好, 又得 知, 即 孟 知 子 而 發 得 明

諸?」要,平聲,下同。 ○萬章問曰:「人有言『伊尹以割烹要湯」,有

名事業,以求其富貴利 遠,人不知有義理之學。 戰 氏之女。 而 要,求也。案《史記》:「伊尹欲行道以致君 國 ·無由,乃爲有莘氏之媵臣,愚案:湯妃,有莘 時 有爲此 負鼎俎以 **说**說者。 滋味説湯,致於王道。」 達,雖枉己辱身,有所不顧 稍有才識者,則汲汲然志於功 輔氏曰: 「戰國之時,去聖 故設 蓋 漸

也,非 以 樂堯、舜之道焉。 孟子曰:「否,不然。 天下,弗顧 樂,音洛 其道也,一 也; 介不以與人,一介不以取諸 繫馬千駟 非其義也、非其道也、禄之 伊尹耕於有莘之野,而 弗視 也。 非 其 義

爲此等議論,上以誣聖賢,下以便一己之私耳。」

與也。」 或謂耕田鑿井,便是堯舜之道。 也。 之大、一介之細, 則豈間於大細哉? 自其用處察之而見其體一 既曰義,又曰道者, 以道義而不苟 芥之芥同。 之道者,誦其 莘,國名。 「豈若吾身親見之哉」一句。」、駟,四匹 介,所謂細也。 《語録》曰: 愚案: 言其辭受取 而 物有 「問:『是指 詩, 也。 兼 此伊尹之辭受取與 莘 體 以道義斷之,不以 大細,而 讀 或 用言之也。 輔氏曰: 即今同 也。 其 書, 其實事而言?』曰: 『然 道義無大細, 此皆不實,不然,何以有 天下、千 與,無大無細,一 州邻 「道,體 而 先言義, 八所以 陽 欣 駠, 也。 微 縣。 也。 慕 細 無間 所謂 後言 苟 而 義, 愛 樂 介與草 害 苟 於 樂 堯 大 道 道 用 於 萬鍾 也 者 義 也 之 舜 取

自樂,故常無欲而自得。涵泳其言,則舉天下之物,果何囂囂,無欲自得之貌。輔氏曰:「伊尹以堯舜之道

哉 ? 之中, 湯三 堯舜 使往 之君哉? 吾豈若於吾身親見之哉? 由是以樂 聘之,既 堯 吾豈若使是民爲 而 舜之道,吾豈 幡 然改 日 : 若 與 堯舜 使 我 是 處 之民 君 畎 爲 畝

見於誦説向慕之而已也。」 民爲堯舜之民 道之行,不徒誦 動之貌。」於吾身親見之,言於我之身親 幡 此皆是樂道之事 然,變動之貌。 則 我之身親見 也。 説 言我能使是君爲堯舜之君 輔氏曰:「幡有反覆之意,故爲 向慕之而 其 道 之行 己 ,而其樂又不 也。 輔 氏曰 見其 一,使是 空 變

覺 斯 天之生此民也,使先 民 也。 也 予,天民之先覺 非予覺之,而 知 誰 者 覺 也? 也 後 一, 子 知, 將 使 先 以 覺 斯 覺 道 覺 後

是 此 知 亦 此 覺,謂 伊 事 尹之言也 ,覺是忽然自理 悟 其理之所以 知,謂 會得。」〇又曰 然。 識 語 其 事 録 知者因 之所 Ĭ. 知 事 當 因 只

孟子卷第九

分我 覺。 之事。 能 民,豈可不覺其未覺者。及彼之覺,亦 也。」言天使者,天理當然,若使之也 中,盡得 日 此説説得箇覺字極爲全備,謂覺之而已,非 人未覺而我先覺,以我先覺,故摇 0 呼寐者而使之寤也。 而覺深,知有 豁然貫通處。 此理。」〇又曰: 之所以仁、臣之所以敬、父之所以慈、子之所以孝,是 君 物)輔氏日 皆可 之仁、臣之敬、子之孝、父之慈,是 覺之而已。」輔氏曰: 及其已覺也,元無欠少,亦未嘗 「『予,天民之先覺』,謂 所 及至自 以知,覺則是自心中有所覺悟。」○又曰 有 「此述程子之意也。 民 以予之也,皆 界限,而 悟 今人知得 道 「覺是自悟之覺,如 ,則又自有箇 耐 先覺者 覺無偏 此 事,講 「既爲先覺之民,豈可不覺其 《語録 全。」 見解 彼 也。 程子云: 解得這 覺後 處。 自 ₩ ⊟ : 撼其未覺者,亦 有增 《大學》説 我 知 O 有 既 此 乃 「是 箇 加)輔氏 知後 此 「譬之人睡 事 爲 天 道 適 有所增益 我唤 理, 理 先 格 生 日 又 皆 覺 物 般 醒 覺 知 如 我 此 程 致 使 耳。」 他。」 知 知 得 知 非 之 但 民 如 之 他 覺 得 君

得 明 未覺 時與位 明 德 者? 則 心必在 此 亦 解 須 着如 新民 『非子覺之而 ŦĻ 到此 孟 著書 地位,則自然住 誰 立言 也」一句。 以 覺 萬世 不得。 蓋大學之道既 一始得 Œ 使不 此

去,歸潔其身而已矣。

行,

,去聲

皆是不容已者

若己 思天 此,故就湯 納。 推 下之民 説,音税 而 内 而 之溝中。 兀 説之以伐夏救民。 夫 兀 婦 其 有 自 不 任 被 以 堯、舜之澤者, 推,吐回反。 天下之重如 内,

之道 時 使湯伐夏以救之。 取 克 書》曰:「昔先正保衡作我先王,曰『予 之不 諸 俾厥 夫不獲,則曰『時予之辜。』」孟子之言蓋 此 同 堯、舜 后 義 是 爲堯舜,其心愧恥,若撻 時 揖 則 夏桀 遜 一,而 也。」輔氏 徐氏 無 伊 道,暴虐其民,故 尹 曰:「伊尹 説 ☐ : 湯以 「徐氏於時 伐夏者 樂 于市」。 堯 義上 舜 弗 欲

乎? 吾 未 聞枉己 聖人之行不同也,或遠或近,或去或不 而 IE. 人者也 ,況辱己 以 IE. 天 下 者

看得分明,故

《集註

》取之。

吾

聞

其

以

割

人。 紛亂而 耳。 遁也。 辱己 在於潔其身而 或隱遁而 人之行本無不同,其所以不同者,所遭之時 必同,然其要歸,在潔其身而已。 湯,辱己甚 古 辱己,則又有恥辱之事及於己矣。 未有不 不可 蓋身者,萬事之本也。 以其廣狹,故有難易之辨。 輔氏曰: 以堯舜之道要湯,未聞 甚於枉己,輔 無可爲者矣。」伊尹豈肯以 能 以 近,謂仕 遠去,或 Œ 爲 人而能 未 르 矣,何 「人則 甚 公留仕 而 所謂 正天下者也。」若伊 近君 有 有所 枉 以 以 氏 潔其身者,不使 近 於己也。」正 指 日 身之不潔 也。 正天下 君,雖 而言,至於天下, 杠 然正天下實 言聖人之行 己,謂 有 然辱 乎? 不同 割 則 天下 烹要湯 尹 己 事 枉 其身陷 然 烹也 無綱 實 其 以 不同 輔氏日 遠, 其 自 由 在 則 難 割 領 要 正 於 己 於不 耳。 所 雖 謂 烹 於 枉己, 之道 人始 該 平 隱 不 要 Œ 則 故

之也,道在 林 氏 日 以 此 堯舜之道要湯者 而湯之聘自來耳。 「, 非 猶 實 子 以 貢言 是 要

求也。 所問伊尹之要湯,謂 瞽叟所化,而反化於其子,此則所謂父不得而子。 論父不得而子,謂爲天子則可臣其父,故孟 乎人之求之與」,正與此意相似。」 愚謂: 求我,亦如聖人之求之耳。故子貢謂「夫子之求之也 前章所論父不得而子之意。輔氏曰: 夫子之求之,異乎人之求之也。」輔氏日 堯舜之道要湯,其意亦正同也。」 聖人本無求人之心,但道德充足於己,而 其 议 割烹,故 孟 子 謂 非以 此語 子謂舜 割烹而 前 人自 要, 亦 此 不 章 異 猶 爲 乃 章 所 來

端者。」

伊 訓 》曰:『天誅 造攻自牧宫,朕 載自亳。」」

順 任 民之事也。 伊訓 ·則雖犯天下之所甚疑,在聖賢則無掩覆之意也。」今 重之義 ,則其不肯 商書》篇名。 輔氏曰:「此伊尹之所自言於此,可見其 枉 道 以要君 孟子引以 者 必 矣。 事 證伐夏救 或 理 明 義

言始攻桀 無 道,由 我始 其事 於亳也

書》牧宫作鳴條。

造、載,皆始也。

伊

尹

侍人瘠環,有諸乎?」孟子曰:「否,不然也。 萬章問 曰 : 「或謂 孔子於衛主 癰疽,於齊主

> 好事者爲之也。癰,於容反。疽,七余反。 醫也。 之人 時君所近狎之人也。 主,謂舍於其家,以之爲主人也。 也。 侍人, 奄人也。 輔氏曰: 「謂其喜好 好事,謂喜造言生 瘠,姓; 撰造言説以 環,名。 癰 生 疽 起 事 皆 痬 事

好,去聲

禮,退以義,得之不得曰『有命』。 也。 與侍人瘠環,是無義 也。」子路以告。 於衛主顏讎由。彌子之妻與子路之妻,兄弟 顔 讎 彌子謂 由 ,衛之賢 子 路 孔子曰: 『有命。』孔 曰 : 大 無命也。 夫也、《史記》作顔 『孔子主我,衛 讎,如字,又音犨。 而 主 子 卿 濁 進 癰 可 鄒 疽 以 得

義。 已,得之不 主於辭遜,故進以禮,義主於制斷,故 彌子,衛靈公幸 難 進 而 . 得 易 則 退 有 臣彌子瑕也。 命存焉 者 也,在我 者 徐氏 有 禮義 曰 : 退 以 禮 而

孔子不悦於魯衛 遭 宋桓 司馬將要而殺之,

微服而過宋。是時孔子當阨,主司城貞子,

爲陳侯周臣。要,平聲。

之理。 至陳, 餘,去 禮,退以義,得 有 難 齊 陳 魋 不 主癰 也。 悦 人饋女樂以間之,孔子遂行。 侯,名周。 以 猶 主 衛 不樂居 疽侍 「孔子當阨,主 司 一於司 擇 適 城 之不 宋。 所主,況在 人之事乎? 貞 城 案《史記》:「孔子爲 其 · 得 子。 貞 司 \Box 或 子。 司 有 馬 也。 城貞子,爲陳侯周臣 命」觀之,則 魋欲 亦 齊、衛 孟 宋 桓 輔氏曰: 子言孔子 大夫之賢者 殺 司 無 孔 馬,宋大 必 子,孔 無 事之時 「以『孔子進以 主癰 魯司 適 雖 」觀之,則 疽 夫 衛 當 子 · 贵 寇, 瘠 也。 向 阨 去 月 環

孔子? 主。 吾聞 必 無主 若 觀 孔 近 疽瘠環之事 臣 子 主 以 癰 其所 疽 爲 與 主 侍 人 觀 瘠 遠 環, 臣 何 以 以 其 爲 所

近臣,在朝之臣。遠臣,遠方來仕者。君

子小人,各從其類,故觀其所爲主,與其所

主者,而其

人可

知

○萬章問曰:「或曰:『百里奚自鬻於秦養牲」○萬章問曰:「或曰:『百里奚自鬻於秦養牲」

秦穆公也。者之家,得五羊之皮而爲之食牛,因以干百里奚,虞之賢臣。人言其自賣於秦養牲

諫。 乘,假道於虞 百里奚,虞人也。 屈,求勿反。 以 乘,去聲 伐 晉人 號 以 宫 垂 之奇 棘 之 諫,百 壁 與 里 屈 産 之

虞、 號 派國,在 虢 漢河 皆 南 或 郡 名。 祭 陽 愚案: 縣 垂 虞國, 棘 之 在 璧 漢 河 垂 東 郡 棘 大 之 陽 地 縣

校。

^{●「}貞」,原避宋仁宗趙禎諱作「正」,今回改。以下不一

爲 以 虞之賢 也。 所 晉 此 出 所 物 乘 之璧也。 滅 四四 臣 借 道 兀 百 一,其 諫 也。 里 屈 虞公令勿許,虞公不用 實 奚 産之乘,屈 晉欲 欲并取虞。 知其不可 伐虢 道 地 諫 所生之良 宫之奇,亦 故 經 於虞, 不 諫 遂 故 而 馬

去之。

能 相 亡 而 穆公之 不 不 知 之乎 謂 秦 知 虞公之不 而 口 賢 先 諫 以 而 ? 去 者爲之乎 顯 可 食牛干 丽 之,不 其 不 與 自鬻以 可 · 諫 君於天下, 有 秦穆公之爲汙也,可 諫 行 可 可 ??」相,去聲 而 成其 也 謂 謂 去,之秦,年 而 不 不 君, 相 可 智 智乎? 之, 傳 也。 鄉 於後 黨 可 時 自 已七十矣, 謂 知 舉 世,不賢 好者不爲 虞公之 不智 謂智乎 於秦, 乎 ? 將 ? 而 知 曾

智 自 如 如 好,自 此 此,必知 ,必不肯 愛其身之人也。 自 食 牛以 灩 以 成 干主之爲汙 其 孟子言百 君 也 輔 氏 其 賢 里奚 日 自 又 之

論,以 氏曰: 説 風 皆聖賢 曰 : 然耳。 鬻 以 莊子之言深得百里奚之意。」伊 載百里奚食牛之事 與之政。」亦 也賤,故多能鄙 得 無 賤之事,不恥爲之。 據。 君 人於心,故 靡 足怪 於天下』者 詎 而 成成其 而 聖賢 詖 蠱 見。 「聖賢 孟 未知 行 敗戕傷之,使人心之義 出處之大節,故 也。 子直 君 ○范氏 未遇 放 底 出處之大節 豈 謂 是 淫 ΙĖ 飯 ,鄙賤之事不恥爲之。 可 事」。」莊 有 惟 自賣我之身以成彼之爲君,即 以 也。 辭 牛 謂 故 先 是 亦多,但 曰 事 以立人極,豈好 然 而 孟子不得 自 知 人 理 當 「古之聖賢未遇之時,鄙 4 此 百 周 汙 君 反 如 非 事 時好 肥, 辱 里奚矣。 日 不 覆 是固 孟 百里 不辯 當 理 以 致 推 尹、 事 使 愈昬,私 子 百百 要其 孟 欲 敬 之, 者以 辯 穆 ,所以 不 百 吾夫子猶曰 爲 哉? 奚爲 子 盡 公忘 里奚 此 輔氏 而 己度人,妄爲議 得不辨。」 里 君哉 時 禮 欲愈 正人心,息邪 以 不 知 奚 要君 , 則 人養牛, 所 曰:「傳 得已 其 爵 其 已 熾, 之事 謂 賤 耳,故 禄 不 必 無 吾 「顯 也。」 波 輔 輔 Щ 不 口 所 流 記 氏 少 其

四 疏

習俗移人之深如此,孟子安得不歷數而明辨之哉!」 湯,孔子主癰疽、瘠環,百里奚自鬻於秦,其見愈卑,其論 以其不正之心度聖賢也。」蔡氏曰:「戰國之時, 尹氏曰:「當時好事者之論,大率類此。 能甚者,敢自誣於聖賢,欲借以行其私。 人不知道,惟知以功利爲急。以枉尺直尋、詭遇獲禽爲 愈下。雖萬章之徒,亦不知其爲非,而復不免於疑問。 如伊尹割烹要 蓋

孟子卷第九

後學 成德 校訂

九二四

孟子卷第十

朱子集註 後學趙順孫纂疏

萬章章句下

其

自

任以天下之重也。

與,音預。

凡九章。

孟 夷之風者,頑夫廉,懦夫有立志。 時,居北海之濵,以待天下之清也。 鄉 横政之所出,横民之所止,不忍居 非其君不事,非其 子曰 人處,如以朝衣朝冠坐於塗炭 一:「伯夷,目不視惡色,耳不 民不使。 治則進,亂 也。 治,去聲,下同。 也 聽惡聲。 故 當紂之 則 聞 思 退。 伯 與

横,謂不循法度。頑者,無知覺。廉者,有

横,去聲。朝,音潮

將 亂 伊 有 知,使先覺覺後覺。予,天民之先覺者也,予 尹曰: 亦進。 不 以 分辨。 與被堯舜之澤者,若己推而内之溝中, 此道覺此民也。」思天下之民匹夫匹婦 『何事非君? 懦,柔弱 曰:『天之生斯民 也。 餘並 何使非民?』治亦進, 見前篇 也,使先知覺後

也。餘見前篇。 使即民。無不可事之君,無不可使之民何事非君,言所事即君。何使非民,言所

袒裼裸裎於我側,爾 下惠之風者,鄙夫寬,薄夫敦。 處,由由然不忍去也。 以其道。遺佚而不怨,阨 柳下惠,不羞汙君,不辭小官。 焉 「爾 能 窮而 浼 爲 我 爾、我爲我, 不憫。 哉?」故聞 進不 隱賢,必 與鄉 柳 雖

孔子之去齊,接淅而行,去魯,曰:『遲遲吾行鄙,狹陋也。敦,厚也。餘見前篇。

九二五

先歷反。 而 也。」去父母國之道 久,可以處 而處,可 也。 以 仕 可以 而 仕 速 . 孔 而速, 子 也 可 以 淅 久

也; 孟 極,勉 張子曰 子曰:「伯夷,聖之清者也,伊尹,聖之任者 微罪行矣,故不税冕而行,非速也。」 得爲遲?」楊氏曰:「孔子欲去之意久矣,不 也。 欲苟去,故遲遲其行 其可也。 欲去之速,故以 接,猶承也。 柳下惠,聖之和者也,孔子,聖之時者也。 舉此 而清,非聖人之清; 「無所雜者清之極,無所異 或曰:「孔子去魯,不稅冕而行,豈 端,以見其久、速、仕、止,各當 淅,漬米水也。 手 承 也。 水 取 膰肉不至,則得以 勉 米而 而 漬米將炊, 和非 行,不及 者和之 聖人 炊 而

所

勉,則

有時

而異。一孔氏

曰:「任者,以天下爲

輔氏曰:

張

子之説

盡矣。

清有所

勉

則

有

時

而

雜

和

有

所謂聖者,不勉不思而

至焉者

也。

地,也 在 大聖。 日 可 如 意者,其所以異伊尹者何也?」〇問: 之至,則 熟自見, 彊説不得。 否?』曰: 任底意思在。」《語録》 而 謂: 己責 而已耳。」曰:「得之。」」或疑伊尹 人名之。 子之所以聖者而 此着 以爲聖之時。」曰: ,謂他有擔當作爲底意思,只這些意思,便非夫子氣 德名 不得 「伊尹唯其任底意思在, 孔子仕、止、久、速,各當 如 也。」《語 意。」問 謂之時,則隨事 八孔、孟· 他任,如 但曰清、 爲聖之時 也。 「然。 皇皇、 《語録》曰: 「伊尹 然此 何?」曰: 録 日 若謂伊尹 「伊尹終是 汲 和 處 Ē. 治亦進,亂亦進,無可 時 制 汲、去齊、去魯、 極難 日 何也? ₩ ⊟ : 宜 出之,非如三子之可 任,則 「夫子若處 任 「問:『清、任、和、時,皆以 故未能與天爲一,而不得 看 而 問: 有 是 ,且放那裏,久之,看 可 有 自 猶倚 這 以兼數子之大全,如斯 任 此 任 出 程 「伊尹終有 底意 此地,自是不 一意思在,爲 於一 以 其 「聖人若處伊尹之 子 之梁、之滕 處合乎孔子, 天下之重。」 思 可, 偏,而 無不可,似 在。」〇 任底 蓋 非 未得 終是 同,不 非 非 兼 聖 道 意思 以 愚 理 象

聖之時。 而 可 行之道,然却 已可也」,『如有 若孔子,則 無伊 用 尹 雖 我者,吾其爲東周乎」,多少含蓄 這些 視 天下 意 思。 無 不 H 可 如如 爲之時, 有用 我者 在 己 *, 無 意 月 不

思

此

其所以與天爲

一,而謂之聖之時

也。

之也。 條理 之 孔 事 子之謂集大成。 也 也 金聲也者,始條理也 始 條 理者,智之事也; 集 大成也者,金聲 ; 玉振之也 終條 理者,聖 而 者 玉 終 振

條 言 聲。'玉' 磬也。 是也 成 此 猶作樂者,集衆音之小成,而 言脉絡,指衆音而 理 八 所 言 者,樂之一終,《書》所 脉絡 音 謂 孔子集三 克 一始 如如 諧 始,始之也 金,鍾 作, 不 翕如 把草從中縛之,上 相 屬。 奪 也 聖之事,而 倫 振 皦如 言 聲,宣 ,收也,如 各 終,終之也。 有 也。 也, 條 繹 也, 理 《語録》曰 謂 截爲始條理,下截爲 如 脉 爲 也,以 如 絡 振 爲 一大聖之事 簫 也 聲 河 一大成 成」之類否? 韶 罪 海 問 條 光 致討 而 | | | | | | | | | | 理 「不然。 不 一,猶 成 也 洩 之 理

> 到尾 耳。 莫是 下只見得任底 夷合下只見得清底 於 聲底,從頭 成 獨 箇 有 是差否?」 截亦不少,此之謂 條 《文集 理。 絲 八音 奏 只是金聲,是玉聲底,從頭 智者,知之所及; 頭,故許多條 猶 《語 Ĭ 一音,則其 若 而 條路相 録》曰: H 到尾 <u>∃</u> 其 「智是見得 截 金、 ,其終成 所 少 「始條理,猶 只是絲竹之聲。」猶三子之所 似,初間下步時纔差 如如 石、 就 絲都在這裏,三子者,則是各拈 始終條理。』○問 莖 其終 樂 一,則下 亦 就 絲、竹、匏、土、革、木。 徹之名,聖 一音自 器 成就 偏 亦 有 只成 截 箇 於 亦只 聖者,德之所 亦 絲 件 爲 就 到 少一 線 是行得徹之號 也。 相 成 尾 得 始終,而 頭 似,是 就 只 莖,上 任 便 相 「條理 底。 得 是 **《**語 似 行得雖力,終 清 玉. 金聲 孔 截不少 柳 聲; ",猶 底 録 爲 下 子 底,從 言 \Box 就 惠合 伊 是 是 得 蓋 知 一,則 脉 挈 尹 絲 也 偏 若 絡 樂 邊 合 伯 F 竹 得 久

音以金石爲首,故八音迭奏而以金石爲之始終。」又金 金 石 **I**爲重 一, 故 特 爲 衆音之綱 紀。 底。」八音之中, 輔 氏 曰:「八

只見得

和底,其終成

就

亦

只

人成就

得

和

全也。 成,輔 絡通 作。 收 鎛鍾 止其韻 氏曰: 始震 而共底於大成。」猶 以終之,謂擊特磬以終八音之韻也。二一者之間,脉 住,於衆樂之終,必以 般,初打恁地響,到住時也恁地響。 聲高,其後漸低,於衆樂之作,必以此聲之。 以玉振之,所以收合衆音在裏面。」〇又曰 震終細。 人之德,精粗大小無所不備。 以其韻。 又擊一 輔氏曰:「宣以始之、謂擊鎛鍾以始八音之聲。 貫, 以宣 「金始震動於始以作其聲,而玉於其終,又詘 而玉終詘然也、《語録》曰: 氏 也。」故並奏八音,則於其未作,而 日 無 《語録》曰:「古人作樂,擊 聲鍾,衆音又齊作。 其聲 「謂 所 自始及終,中間 不備,則合衆小成而 孔子之知 「聖人之知,精粗大小無所 此振之。」宣以始之,收以 俟其既闋,而後擊特磬以 其始卒相成蓋如此。」〇 故金所以發衆音。 無 八音之脉絡 但玉聲住時,截然便 不 「金聲有洪殺,始 盡 聲鐘,衆音遂 而 玉聲先後 「金聲初打 相與 爲一 此。」〇 不 德 周, 無 先 通 末則 然以 大 不 終 擊 收 聖 輔 貫 輔

> 曲中 言。 氏曰: 曰:「如兒寬亦引金聲玉振,是時未有孟子之書, 條貫,金聲 成也。」金聲玉振,始終條理,疑古《樂經》之 清、任、和之脉絡,亦無不通貫,故能時而出之,以集其大 有此語。」 故兒寬云:「惟天子建中和之極 「亦如孔子之智以始之、聖以終之、中間 而 玉 振之。」亦此 意 也。 一兼總 此必古 於三子 語 録

外也,其至,爾力也,其中,非爾力也。」中,去聲 智,譬則巧也, 聖,譬則力也。 有餘 下惠,力已至,但 見孔子巧力俱全,而 此復以射之巧力、發明智、聖二字之義 全,故孔子箭箭中的。 不足以及乎時中也。 而巧不足,是以 射 不 · 巧。 ① 三子皆中垛 《語録 聖智兼 孔 節 子 則既 **∀** 雖至 也。」〇輔氏 由射於百步之 備 聖 「伯夷、伊尹、柳 一於聖, ,三子則力 Ħ. 智,巧 E 而 力 智 兼

■「巧」,原誤作「親」,今據文淵閣四庫全書《朱子語類

闕 不 極。 知功夫,看得道理有偏,故其終之成也,亦各至於一偏之 則伊尹之學又密於夷、惠矣。」所 雖謂之聖,然於孔子則有不得而班者。 至,是以行之盡。《語録》曰:「問:「三子合下少致 於始,是以缺於終。 至乎不思不勉之地。 也?」曰:「三子之聖,因其氣質之偏而力行以造極,卒 於衆理。或問:「三子之偏如此,而孟子以聖名之,何 不難於行而難於知,猶射不難於力而難於巧。」()此 焉,均至於百步之外,而有中不中者,蓋巧者知得到,則 聖之時也。若孔子,則速、久、處、仕皆得乎時中,蓋由其 之中」者,謂其始之智但知其清、任、和,而不得如孔 節 言三子之行,各極其一偏,孔子之道,兼全 百發而百中,力者行得到 始之智足以及乎時 盡 雖至於聖』者,指清、任、和而 使三子合下工夫不倚於一偏,安知其不如孔子也。」 孔子合下盡得致知工夫,看得道理周徧 ,故其德之成 也 中故也。」〇永嘉陳 ,亦兼該畢 而表裏洞 ,則至而未必中。 所以全者,由其 言也。 然,無一 備 以 而 「智不足以及乎時 偏 無 豪人欲之私者: 就三子而論之. 者,由 氏 日: 德 由是觀之,學 精切,無所 一行之或 介知之 譬之射 其 子爲 蔽 章

> 不能 其偏 偏。 知有 不同者,皆可嘿識矣。」 孔子則太和元氣之流行於四時 不可以一節名。三子猶春夏秋冬之各 行有所闕於終也。此孔子之所以獨得其全,而三子僅得 理,四方八面周匝普徧,故 及於全,故行 亦無不至。」○永嘉陳氏曰: 知之至而行之盡。三子之不及孔子者,知有所蔽於始 曰:「然。 「學者於此熟玩而有得焉,則三子之聖與夫子之聖所以 邊道理,後來亦只於那一邊上做得透徹。 所偏 也。 孔子則知無不至,故其行亦無不至,而其德之成就 無愧於孔子,而況學者乎?」〇輔氏曰:「三子者, 知有不至,行有不盡,雖以伊尹、夷、惠之質,尚 更子細看。』二〇黄氏曰:「孔子之異於三子者 ,故其行亦有所偏,而 到 處亦只是 成就處兼總衆理,該貫萬善 偏之聖。 「三子始焉之所知,只見得 其德之所成就,亦有 夫子知得天下道 也。 此三子智 輔氏曰: 其時 而

錡·魚綺反。
○北宮錡問曰:「周室班爵禄也,如之何?」

孟子曰:「其詳不可得聞也。諸侯惡其害己北宫,姓,錡,名,衛人。班,列也。

也,而皆去其籍。然而軻也,嘗聞其略也。

惡,去聲。去,上聲。

位,上士一位,中士一位,下士一位,凡六等。一位,凡五等也。君一位,卿一位,大夫一天子一位,公一位,侯一位,伯一位,子、男同天也。輔氏曰:「兼并則其國日大,僭竊則其禄日侈。」當時諸侯兼并僭竊,故惡周制妨害己之所

此班爵之制也。輔氏曰:「位以爵定也。」五等通

於天下,六等施

於國中。

里,子、男五十里,凡四等。 不能五十里,不天子之制,地方千里,公侯皆方百里,伯七十

達於天子,附於諸侯,曰

附

庸

也。 天子 其租者,此又可見周制 君以下,所食之禄皆助法之公田 此以下,班禄之制也。 ,因大國以姓名通,謂之附庸,若春秋 小國之地不足五十里者,不能 都鄙用 輔氏曰: 助法也。」不能 ,藉農夫之力以 「田以禄分也 猶 自 達 耕 不足 耐 於 收 案

邾儀父之類是也

天子之卿受地視侯,大夫受地視伯,元士至

地視子、男。

下士者,蓋以視附庸 侯爲差也。 受地也 視,比也。 愚謂: 元士,上士 徐氏曰:「王畿之内,亦制 此言食采邑於畿内,禄之多少 也 也。 愚謂: 言上士而 不言 以 都 鄙

人在官者同禄,禄足以代其耕也。倍上士,上士倍中士,中十倍下士,下士與庶大國地方百里,君十卿禄,卿禄四大夫,大夫

也。 十,十倍之也。 庶人在官者田百畝,可食九人至五 七十二人。 可食二百八十八人。大夫田 可食二千八百八十人。 中士田 徐氏曰:「大國君田三萬三千畝 上士 二百 四,四倍之也。 畝 Ш 可 四 食十八人。 百 卿田三千三百畝 畝 可 八百畝, 倍,加 食三十 下士與 人。 了,其人 可食 倍 庶

爲之? 官,其實府史胥徒無許多。』〇問:「府史胥徒 古史,他疑三事,其 徒皆是庶人在官者,不知 在 然府 官 抑别募游手爲之?」曰:「不可 史胥徒各自 府 史胥 一謂府 徒 有禄以 也 如何 史胥 0 代耕 有 語 徒 許多?」日 太多。 録 則 又似 $\widecheck{\Box}$ 曉。 別募 當 問 想只 時 一當 游 却 不 是 看 府 知 手 矣。」 民爲 皆民 是 蘇 史 兼 E 胥

人在官者,則但受禄於官,如田之入而已。農夫之力以耕而收其租。 士之無田,與庶愚案:君以下所食之禄,皆助法之公田,藉

庶人在官者同禄,禄足以代其耕也。 ——夫倍上士,上士倍中士,中士倍下士,下士與次國地方七十里,君十卿禄,卿禄三大夫,大

三,謂 兀 四千畝 白 畝 三倍之也。 可 ,可食二千一百六十人。 食二百十六人。」 徐 氏 曰:「次國 卿 君 田 田 二千 二萬

庶 夫 小 倍 或 人在官者同 地 士 方 ,上士倍中 五十里,君 禄,禄足以代 土 + 一**,** 中 卿禄,卿 - 士倍| 其 耕 禄 下士,下士 也 二大夫, 與 大

> 薄,苟爲之殺,則臣之所養不能 苟不爲之殺,則地之所出不足以供。 國異,由 畝 畝 可 即 可食百 [大夫而下,三等之國同者 食千 倍 也。 四 兀 徐 十四人。」 百 氏 四 \Box + : 小 愚謂 自給也 蓋 或 卿 卿 君 大夫而下, 由卿 而 \mathbb{H} 田 Ŀ 而 其禄浸厚, 上,三等之 千 萬 其禄浸 六 Ŧ

食九 耕者之所獲,一夫百 食,音嗣 人,下食五人,庶人在官者,其 人,上次 食 八人,中 畝。 食 百畝 七人,中 禄 之糞, 以 是 次 上 爲 農 差。 食 夫

之説, 等之禄,故百畝所食,亦有此五等。」」(日 : 獲, 也?』曰:『皆人力之不同爾,然亦大約 官者,其受禄不同, 人。其次用力不齊,故 糞,糞多而力勤者爲上農,其 「問:「此等差别,是 得也。 與《周 一夫一婦, 禮》、《王 地有 亦 制》不同,蓋不 有 肥 佃 有 瘠 此 田 此 邪? Ŧī. 白 Ŧi. 如 等 等。 所 畝 愚案:此章 抑 此 收 也 糞 溉 庶人 緣 可 加 -可考, 有此 之不 供 之 語 録 在 九 以 百 Ti.

詳。 可復見矣。」 節目,推其既往以 存之,使千百世之後 輔氏曰: 之解乎? 度而說。」程子曰:「孟子之時,去先王未遠 闕之可 出於漢儒一時之傅會,奈何欲盡信而句爲 載籍未經秦火,然而班爵禄之制已不聞其 》不合。 今之禮書,皆掇拾 「此説足以救陋儒泥古之失。 也。《語録》 蓋孟子後出,不及見《王制 然則其事固不可一二追復矣。」 爲 時之制,而先代聖王之法,庶乎其 ě E 遇大聖,則必能因其大體 「《孟子》論三代制度,多與《周 於煨燼之餘,而多 》之詳,只是大綱約 但據其所 而詳 傳 7而姑 其

不可以有挾也。 一不挾貴,不挾兄弟而友。友也者,友其德也, 〇萬章問曰:「敢問友。」孟子曰:「不挾長,

之爲友哉?」

與恃二者之意,方謂之挾也。若但有之而不恃,則猶未一典與恃二者之意,方謂之挾也。若但有之而不恃,則猶未一典挾者,兼有而恃之之稱。輔氏曰:「謂其兼夫有一時

孟獻子,百乘之家也,有友五人焉:樂正裘、

牧仲,其三人,則予忘之矣。獻子之與此 有獻子之家,則不與之友矣。乘,去聲,下同 人者友也,無獻子之家者也。 有也。 子歷舉四人之事,自小至大,皆以見其不敢有所挾之意。 所挾,至於在下者爲上之所友,則亦不可資其勢以 而首於孟獻子之事詳之者,又以見上之友下,固不可有 之家者也。無獻子之家者,不資其勢而利其有者也。 勢而利其有,然後能忘人之勢。 孟獻子,魯之賢大夫仲孫蔑也。 曰:「獻子忘其勢,不挾貴也。 有獻子之家,則反爲獻子之所賤矣。」輔氏 獻子忘其勢,五人者忘人之勢。 有資之利之之意,則便爲人所賤矣,又豈 五人者忘人之勢,無獻子 此五人者,亦 若五 張子曰 不資其 人者 利 Ŧi. 孟 其.

也。事我者,所使也。 惠公,費邑之君也。師,所尊也。友,所敬

非惟 本多無之字,疑闕文也。 非王公之尊賢也。 飽 與治天職也,弗與食天禄也,士之尊賢者也 晉平公之於亥唐也,入云則入,坐云則坐,食 云則食。 也。 小國之君爲然也,雖大國之君亦有之。 然終於此而已矣。 雖疏 食菜羹,未嘗不 疏食之食,音嗣。 弗與共天位也,弗 飽,蓋不敢不 平公、王公下,諸

所以 治民以及於國也。」○真氏曰:「位者,天位,所以處賢 之共天位,治天職,食天禄,則是不能推廣是心以 也。」輔氏曰:「平公之於亥唐 티 : 也。 人。言坐乃坐,言食乃食也。 亥唐,晉賢人也。 平公造之,唐言入,公乃 位日 不敢 待賢人,使治天民,非人君所 不 天位,職曰天職,禄曰天禄,言天 飽,敬賢者之命 ,則知所敬 也。 疏 矣。 食, \bigcirc 得專者 然不能 體 糲 范 天 氏 飯 者 而 與

之於亥唐,特虚尊之而已,未嘗處之以位,命之以職,食者也。三者皆天所以待賢人,使治天民者也。而晉平公也。職者,天職,所以命賢者也。禄者,天禄,所以養賢

主,是天子而友匹夫也。舜尚見帝,帝館甥于貳室,亦饗舜,迭爲賓

之以禄也。

此豈王公尊賢之道哉?」

堯以女妻舜,故謂之甥。貳室,副宫也。禮,妻父曰外舅。謂我舅者,吾謂之甥。。。 此宫也。

貴貴、尊賢,其義一也。」 用下敬上,謂之貴貴,用上敬下,謂之尊賢。

也。 賤尊卑 夫而上友於堯不爲僭,以見朋友爲人倫之一,不可 推至於極,則以堯爲天子而下友於舜不爲屈 朋 堯、舜所以爲 夫 而 友人倫之一,所以輔仁,故以天子友匹 輔氏曰: 不爲 間 也。 詘 必至於堯、舜、然後能盡其道耳。」 「自天子至於匹夫,未有不須友以成者,故 以以 人倫之至,而 匹夫友天子 孟子言必 前 不 · 爲 以 僭 舜 稱 以貴 爲匹 之 此

○萬章問曰:「敢問交際何心也?」孟子曰:

恭也。」

接也。 交際,謂人以禮儀幣帛相交際,接也。交際,謂人以禮儀幣帛相交

之,以是爲不恭,故弗却也。」之,曰『其所取之者,義乎,不義乎』,而後受曰:「却之却之爲不恭,何哉?」曰:「尊者賜

哉? 孟子言尊者之賜,而心竊計其所以疑交際之間,有所却者,人便以爲不恭,何却,不受而還之也。再言之,未詳。萬章

之不義也」,而 曰:「請無以 其交也以道,其接也以禮,斯孔子受之矣。」 也。 失之過也。 之說,其視貪名耆利者固優矣,然其有意於却,如 之。若言其不義而直却之爲不恭,則但以心 萬章以爲 之物,其初得之合義與否,然後爲辭受哉? 在義理上行 義,而託爲他 其不義則遂却之矣。一有是心,則不可謂之恭也。」 輔氏曰:「孟子言尊者有所賜而既以禮矣,則是與之者恭 得此物者,未知合義與否,必其合義,然後 「萬章之意,言彼所餽我之物既得之不義,則我固 而託於他辭以却之,如此可 但無以言 可受,不然則却之矣,所以却之爲不恭也。 與之者既恭,則只當恭以受之,豈可竊計 過 由是而 語 辭以却之,不亦可邪? 彼既得之不義,則 辭却之,以心却之,曰『其取諸民 與不及皆非也。 間 以 極之,則必至爲於陵仲子 而 他辭無受,不可乎?」曰: 却之,直以 萬章交際之間以 否邪? 夫人之處 其餽 心 度其不義 不可受。 如 之爲而 度其爲不 其 輔氏日 事, 此, 辭 此 不 所 要只 却之 - 當受 則 與 則 後 亦 若 我

謂來交我之有道理也 接以禮,謂 已。」交以 道 一, 如 辭 命恭敬之節 餽 贐 接以禮,謂來接我之有禮節也。」 聞 戒、 周 輔氏 其 曰:「交以道 飢 餓之類

一子受之,如受陽貨烝豚之類

也

此

與,平聲。激、《書》作憝,徒對反 殷,所不辭也。 《康誥》曰:『殺 不譈。』是不待 道,其餽也以禮 萬章曰:「今有禦人於國門之外者,其交也以 教 越人 於今爲烈,如之何其受之?」 一,斯可受禦與?」曰:「不可 而 于貨,閔不畏死,凡民 誅 者 也。 殷受夏,周 受 图

之乎? 也。 禦人者,用其禦 物之所從來,而 門之外,無人之處 禦,止也。 言殺人而顛越之,因取其貨,愚謂: 今《書》閔 《 康 止 誥 人而 作 但 得 - 愍,無 也。 之 觀 殺之,且奪其 周 貨 其交接之禮,則 書 萬 凡 以 $\stackrel{\cdot}{\checkmark}$ 章 篇 民二字。 禮 以 名。 餽 爲 我, 貨 苟 越 則 不 也 譈, 顛 設 問問 叮 若今 怨 越 受 有 其 或

> 是三 可受其 之天下而不辭。 如何 意云爾。 於今爲烈,烈,明法。 也,於今爲烈」,趙氏謂三代相傳以此法,不須 考,姑闕之可也。 者近之,而 語 《康誥》之説以曉之。」「殷受」至「爲烈」十四字,1 此,萬章猶不能反其意之偏以味孟子之言, 劫人而 正所謂波辭。 意 一説者擇一 不倫。 而 孟 饋乎? 殺 或又以爲,烈,光也,三代相受而光烈至今也 可受之乎? 子言此乃不 傷 者。 而從之可也,何至闕而不爲之説乎?」 愚意 烈 李氏 今禦人者,乃爲暴烈不義如此, 蓋陷於却之之意而不覺也,故孟子又引 閔 如《詩序》所 或者又謂若 然 其 或問: 以 一待教 不 直 爲 輔 知 氏曰: 爲 「『殷受夏,周受殷,所不辭 此 謂 畏 戒 衍 「厲王之烈」者、暴 必 義在可受,則 死,凡 而 「孟子既已開 字 有 當 耳。 斷 即 簡 而復爲此 民 誅 然 或 無 三代受人 辭 如 院院之如 者 不 闕 不 問 虚之 何 也 也 問 口 文 怨 而

校。 殷」, 原避 宋先祖名而改作「商」,今回改。 以下不再

0

不若從李氏闕之之愈也。」 則『辭受』二字與上下文亦不相 熟讀 本文 此 + ·四字自與上下 -文不 似。 相 或 者二 屬。 説 如 亦覺費 趙氏 之説 力

以爲 受其賜乎?」比,去聲。夫,音扶。 之者盜也,充類至義之盡 其教之不改而後誅之乎? 禮際矣,斯君子受之,敢問 也,魯人獵 曰:「今之諸侯取之於民也 有王者作,將比今之諸侯而 較,孔子亦獵 較。 也。 何説 ,猶禦也 夫謂 較,音角。 獵 孔子 也 較 非 |?'||日:||子 猶 之仕 誅之乎? 其 可, 有 苟 於 善其 而 而 況 魯 取

推 其 不 而 然有王者起,必 比,連也。 人,乃爲 改 其 有 誅 類 而 者不同矣。 而 ,至於義之至精至密之處 取之,二 後 真盜 誅之,則 言今諸 不連 者 其 夫禦人於國門之外,與 侯之取 謂 固 其 合 非 皆 與 而 有 不 禦人之盜,不 盡 於民,固 而 義 誅之。 取 之類,然 爲 而極言之 盜 多不 必 者, . 待 必 教之 義 非 禦 乃 教

孰是。

改而 乎? 耳,非 氏 獸 哉?」獵較 哉 ? 義 至義之盡也,於此又可見孟子析理之精。 此可見孟子待人之恕。 禮來賜,何爲不可受乎? 所尚,猶未合禮,聖人猶或從之,以小 説,至此則氣愈戾,意愈刻,説 從,況受其賜, 矣。」又引孔子之事,以 故 之説而 孟 以 以 取 子復問 後誅之,則與 雖章之刻戾,亦必知 祭 爲 非 輔氏 便以 欲 其 獵 未詳。 孔 以 有 而 爲 概以繩 有王 子 較 一萬 而 真 不 何爲 不待 所 者作,將遂連合今之諸 章終不肯 贵 盗 違,所 人,幾 趙氏以 獲之多少 夫謂非 教而 可 也。 不 其教之不改而後誅之乎? 其不然 遽 可 何 明 誅 愈悖,而 以 其有 以 而不 乎? 置其偏見 然則今之諸 爲 世 之者, 同 小 也。 田 俗 而 也。 流於 同 於禦人之盜 取 同 獵 都 所 古 若必 輔 於 於 無輕 之者盜也, 於陵仲子之爲 夫執其 氏 而 不 尚 相 俗 俗 口 待 詳味孟子 \Box 侯 較, 重之差矣。 説未 猶 百 其 而 ൬ 也 侯, 教 充 況 世 日 盡 奪 或 之不 類 誅 充 於 俗 而 知 張 世 雖 於 口 盡 之 類 以 之 之 語

祭器 道 而 也?」曰:「爲之兆也。 \exists 實之。 聖人之心也。」若其端 説,與夫『著之空言,不如 也。 氏曰:「以孔子所謂『吾豈匏瓜也哉? 之端,以示於人,使知 也 矣,彼獵 道 此因孔子事而反覆辯論也。 後去,是以未嘗有所終三年淹也。 正其祭器,使有定數,不以四方難 猶縫罅也。」孔子所以 先簿正祭器 一爲事 ¨; 不 。」「事道奚獵較也?」曰:「孔子先 然則孔子之仕也,非 兆,猶卜之兆,蓋事之端也。 以 夫器有常數、實有常品, 也。 較者,將久 四 「事道奚 方之食供 」,未詳。 既 載之行事」之説而觀之,則是乃 不去者,亦欲小試行道 而自廢矣。」未知 獵 兆足以行矣,而不行, 可行,而人不能 海 吾道之果 徐氏曰:「先以 較 事道 正。二曰: 也, 焉能繫而不食』之 與?」曰:「 事道者,以行 可 萬章問 三奚 則 《語録 行 與,平聲。 其 繼之物 也 遂 是否 本正 簿書 不去 簿 ₩ E 也。 行 事 Œ 輔

> 輕,而 聖人同物之仁。 以見聖人處事之智。 之,然後不 人制行之勇。 國也 亦未 輔 嘗不 氏曰: 得已而 「簿正祭器,不以 「未嘗有所終三年之淹」, 于以見 「「魯人獵較,孔子亦獵較」,于以見 決,是以 必去之。 未嘗終三年 四方之食供簿正」,于 蓋其 去 留 雖 於 不

仕。 孔子 可之仕也,於衛孝公,公養之仕也。」 誤,或是所傳之誤,或是當時 行矣。」衛靈公,衛 主不起。孔子之相,皆 養之義也。」季桓子,魯卿 行可,庶乎道之行也。 禮 見行 「孔子仕於定公而言桓子,當時桓子執國 史記》皆無之,疑出 也。 於季桓子,見行可之仕也, 有見行可之仕,有際可之仕,有公養之 可,見其道之可行也。 公養,國君養賢之禮 侯元 際可,適其禮之宜也。 由 桓子。 公輒 人呼 也。 季孫 及桓子受女樂,孔子 也。 出 斯 公爲孝公,皆不可 孝公、《春秋》、 也。 際可,接 輔氏曰:「或是字 也 於衛靈公,際 柄,定公亦自 輔 《語 公養,受其 氏 Ξ: 録 遇 $\stackrel{>}{\exists}$ 見 以 攷 便

也。」因 爲於陵仲子 也。 之事 在。」愚案: 於魯則兆足以 〇尹氏 則 孔子仕魯,而言其仕有此三者。 又受其 此章文義多不可曉,不必 而 曰 : 已。 行矣而 「不聞孟子之義 文 際 聖賢 問 不行然後去, 辭受進 餽 而 不 7,則自 退,惟義 却 之 而 强 好 於 爲 者 所 驗 衛 故

下同。 妻非 孟子曰:「仕非爲貧也,而有時乎爲貧 爲 養 也, 而 有時乎爲養。 爲、 養, 並 去 ; 聲, 娶

反。

爲

之説

爲貧者,辭尊居卑,辭 違 亦有爲不能親 仕 一,而 本爲行道,而亦有家貧親老,或道與 但 爲 禄 仕 操井臼 者 如娶 ,而欲資其餽養者 妻 本 爲 繼 嗣 時 而

處 貧 之正 富,謂禄之厚 故其所處但 薄。 當 蓋 如 仕不 此 爲道, 已非 出

富居貧。

辭 尊居卑,辭富居貧, 惡乎 宜 一乎? 抱 觸 擊

> 柝。 惡,去聲。柝,音托

上聲 孔子嘗 乘田 也。 行道, 氏曰:「道不行矣,爲貧而 柝,行夜所擊 吏,位卑禄薄,其 會,工外反。 若不能然,則是貪位慕禄 矣,曰『牛羊茁 爲委吏矣,曰: 而 亦不可 當,丁浪反。 木 以 也。 職 荷 出長 易稱,爲所宜 『會計 禄。 乘,去聲。 蓋 爲 而已矣』。委,烏僞 故 貧者, 當 仕者,此其律令 惟 茁, 而 而已矣。」 抱 已矣』。 阻 雖不 關 居 刮 也。 擊 反。 主 柝 長 於 嘗 李

者,所 貌。 稱也 吏也 此孔子之爲貧而仕者也。 言以 以 乘 爲 田,主 孔 子大聖, 貧 而 苑 仕, 有 而嘗爲賤官不 芻牧 官 卑 之吏 委吏,主委積之 禄 薄 也 而 以 茁, 職 爲 易 辱 肥

行, 恥 位 卑 前 也。」朝,音 言 高 罪 潮 也 立 乎人之本朝,而 道不

以出位爲罪,則無行道之責。以廢道爲

尊富而寧處貧賤也。《語録》曰:「爲貧而仕,只要恥,則非竊禄之官,此爲貧者之所以必辭

人都不导言耳。告立乎人之本明,而道不亏,則论矣。在下位,不當言責之地,若是合言處,便須當說,非是教

故辭尊居卑,辭富居貧。」○尹氏曰:「言爲貧者人都不得言耳。若立乎人之本朝,而道不行,則恥矣。

不可以居尊,居尊者必欲以行道。」

也。士之託於諸侯,非禮也。」曰:「不敢也。諸侯失國,而後託於諸侯,禮〇萬章曰:「士之不託諸侯,何也?」孟子

皆國 比於諸侯,故必仕 君以廪餼之,是乃禮之所宜也,故可受而謂之寄公。 輔氏曰: 出 士之於諸侯,則 土,不得比諸侯。 託,寄也,謂不仕而食其禄也。古者諸侯 奔他國,食其廪餼,謂之寄公。 「諸侯之視諸侯,雖其爵有五等之殊,然其實則 且. 本有爵土,不幸出奔,而來適我國, 有尊卑貴賤之不同 而後當賦以禄。 不仕 而 食禄,則 爲士者若不仕而食其 ,又本無爵土,豈可 非 士無爵 禮 則 也。 其 若 國 自

禄,則非禮矣。」

周之。」「受之何義也?」曰:「君之於氓也,固萬章曰:「君餽之粟,則受之乎?」曰:「受

者則周救之,是亦禮也。」
君待民之禮也。輔氏曰:「天生民而立之君,所以君待民之禮也。輔氏曰:「天生民而立之君,所以問,救也。視其空乏,則周即之,無常數,

於上者,以爲不恭也。」關擊柝者,皆有常職以食於上。無常職而賜「不敢也。」曰:「敢問其不敢何也?」曰:「抱曰:「周之則受,賜之則不受,何也?」曰:

曰:「君餽之,則受之,不識可常繼乎?」曰:

養也 去聲。 伋。」蓋自是臺 再 悦,於卒也,摽使者 繆公之於子思也,亟問 拜 一,可謂悦賢乎?」亟,去聲,下同。 而 不受。 無 曰 : 餽 出諸 也。 『今而 悦賢 大門之外,北 ,亟餽鼎肉。 後 不能舉,又不能 知 君 摽,音杓。 之犬 子思 面 馬 稽 使, 示 畜 首

麾也。 使者 亟,數 不至也。」舉,用 有不至,一是敬心或有未盡。 公之於子思,非不 愧悟,自此不復令臺來致餽也。 禮待己也。 之禮,故不 出 也。 數以君 拜 鼎肉, 悦。 而辭之。 臺,賤官,主使令者。 知所尊慕也,而猶若此者,一 也。 命來餽,當拜受之,非養賢 而於其末後復 熟 能 肉也。 養 犬馬畜伋,言不 然敬心 者未必能 卒,末也。 既 盡,則 來餽 輔 用,況 氏日 蓋繆 思 是 時, 慮必 思 以 摽, 慮 繆 又 公 麾 人 無 或

> 矣?」曰 思以 後廪人繼 曰:「敢問 者而臣之也 固不足道,況於養之之道,又有所不至乎? 粟,庖. 肉, 「以君 或 使己僕 君欲養君子,如何 人繼 命將之,再 僕 肉,不 以 拜稽 拜 君 也,非 命 首 斯 將 而 是焉 可謂 養君 之。 受。 能得 子 子 其 養 賢

初以君 則敬心完而思慮到矣。」僕僕,煩猥貌 有 其 職 亟拜之勞 繼 命 續 所 來 也。 無 餽 不, 則 輔氏 當拜受。 以 日: 君 命 「不使賢者 來 其後 餽 不 有亟 有 使 司 拜之勞 賢 各以 者

之道

也。

爲 鼎

爾

亟

去聲。 加諸 官 堯之於舜 牛 上位。 羊 倉 也 廩 故 備,以 ,使其子九男事之,二女女焉,百 曰:王公之尊賢者也。」女下字, 養舜於畎 畝之中,後舉而

之,而後世之所當法也。 能 養 能舉,悦賢 之至 也 輔氏曰: 唯 堯、 「堯之於舜,則 舜 爲 能 盡

唐之類

也

世有

徒徇養賢之虚名、而

無用賢之實事者,

不能

養

乎?

輔

氏

日

悦

而

不能

用

,如晉平公於亥

賢之極、養賢之至、用賢之周 也。」

而人君

禮 謂 曰 : 也。」質,與贄同 庶 萬章日 一在 國 庶人不傳質爲 曰 敢 市 問 ·井之臣 不 見諸侯, 一,在野 臣,不敢見於諸侯, 日 何 草 義 莽之臣,皆 也?」孟子

既仕 名爲之臣,其實皆庶人。 執 以 傳 自同於已仕者以見於君,是乃禮之當然也。」 在國之内者,雖 自 贄在位之臣不 一而有禄位者,則正謂之臣。 通 通 也。 者 也 質者, 莫非君之臣,然唯嘗執 或 内莫非君臣 同,故不敢見 士執 庶人既 雉,庶 若其他、 未曾 執 人執 ,但未仕者與 則雖 贄以 贄 也。 在 鶩, 位 自 隨 輔氏曰: 通 ,則不敢 所 相 於君、 居 見 而

往 召之,則不往見之,何也?」曰:「往役,義也。 萬章曰:「庶人,召之役,則 見,不義也 往役。 君欲見之,

之職 氏曰: 往役者,庶人之職。 「庶人則當服君之賤 爲士則知學問,崇禮義,不惟士之自處當 不往 事,故召之役則往役者,庶人 見者,士之禮。 如此 輔

> 皆去聲。 子,君也,我,臣也。何敢與君友也? 以德 之云乎?』子思之不悦也, 豈不曰: 『以 悦,曰:『古之人有言: 思,曰:『古千乘之國以 不召師,而況諸侯乎? 聞 且君之欲見之也,何爲也哉?」曰:「爲 求與之友,而不可 則子事我者也,奚可 欲見賢而召之也。爲,並去聲。 也,爲其賢也。」曰: 召與之與,平聲 亦以此望之,故召之則不往見之者,士之禮也。」 得也,而 以 「爲其多聞 與 曰 友士,何如?』子思 爲其賢 況可 我 事 友?』千乘之君 之云乎, 豈 繆公亟見於子 召與? 也, 也 則 吾 則 位 亟、乘 其多 日 未 天子 一,則 友 不 聞

之意。 孟 子 引子思之言 而 釋之,以 明 不 可 召

焉 ? 不忘在溝 齊景公田,招虞人以旌,不至,將殺之。 取非其招不往也。」喪,息浪反。 壑,勇士不忘 喪其元。 孔子 奚 志士 取

説 見前 篇

: 敢 問 招 虞 人何 以?」曰: 以 皮 冠。 庶

人以 如守官,君子韙之。二然則皮冠者,虞人之所 毛黄白者爲之。 皮冠,田 『昔我先君之田 旃,士以旂,大夫以 臣不見皮冠,故不敢進。」乃舍之。 「齊侯田于沛,招虞人以弓,不進,公使執之。 獵之冠也。 也, 旃以招大夫, 弓以招士, 皮冠以 事見《春秋傳》。 愚謂: 旌 皮冠,弁也,以鹿皮淺 仲尼曰:『守道不 愚謂: 令春 辭 秋 招 傳 有 虞

帛 事 士,謂已 也,故 ... 旃。)仕者。 以是 愚 謂 招之。 通帛,謂周大赤。 交龍 爲 庶人,未仕之臣。 旅,愚 調: 從周,正色無 畫 交龍於 旅游之 飾。 通

取 鳥 羽 析 注於干之首, 羽 耐 注 於旂 全而用之,名 干之首, E 日 **「旞**;析 旌 而用之,名

愚謂

旂

詩》作砥、之履反

上。

日

以 招 大 招 庶 夫之招 人,庶人豈敢往哉? 招 虞 人,虞人死 不敢 況 乎以 往 不賢 以 1: 人 之

> 之招招賢 (人乎?

貴者之招而招賤 賢人之招招賢人, 之法耳。」以士之招招庶人,則不敢 是説不以招賢人之禮招之。 欲見而 召之,是不賢 ,則不敢往者,畏義 則不 人之 蓋召之使見者,是招 可 往 招 也。 矣。 也 以 輔 往。 不賢 輔 氏 氏 之招 日 \Box 不賢人 以不 以 非 īfīi

招賢,則不可往者,重禮也。」

路,出 如矢。 也。 欲見賢人而 夫義,路 人是門也。 君子所履,小人所視。」」夫,音扶。 不 也 以 ; 其 禮 詩》云:『周 道, 門 猶 也 欲 其 惟 道 君 人 如 子 而 底,其直 能 閉 之 由 底 門 是

所由 石也。 義。 以爲法也。 詩 也。 輔氏 小雅 言其 日 平也。 以 引此以 周道 大東》之篇。 爲君子所履 矢,言其直 證上文「能 而 底, 證 由 義 也 與 是 路 砥 爲賢者之 路」之 視, 同 視 礪

官召之也。」與,平聲。 孔子非與?」曰:「孔子當仕有官職,而以其萬章曰:「孔子,君命召,不俟駕而行。然則

俟駕 觀 陳代章, 丑所 孔 處進退,一 不爲臣不見之禮,與夫賢者有不可召之義。 召之,故不俟駕而行,以敬君之命,故不敢慢也。」徐氏 不見諸侯之義,最爲詳悉,更合陳代、公孫 曰:「孔子、孟子,易地則皆然。」○此章言 此章及答公孫丑章,則又見孟子之不見諸侯,得古者 子方 問者而觀之,其説 而行。 則見孟子之不見諸侯,得不肯枉道從人之義 惟其禮與義而已,初無適莫也。」 仕 而 輔 任職, 氏曰: 一調 君以 如爲魯司寇時,魯公以司寇 乃盡。 其官名召之,故 輔氏曰: 蓋君子之出 「觀答 不

世也,是尚友也。」

之善士,斯友天下之善士。 善士,一國之善士,斯友一國之善士,天下○孟子謂萬章曰:「一鄉之善士,斯友一鄉之

言己之善蓋於一鄉,然後能盡友一鄉之善

其詩,讀其書,不知其人,可乎? 以友天下之善士爲未足,又尚論古之人。 頌 爲廣 推而廣之、至於一國天下、皆隨其高下以爲廣狹耳。」 然後能盡友一 而取之,必有偏而或遺者。 善者也。 士。 狹 推 若在我之善不足以蓋 也。 而至於 鄉之善士。 輔氏曰:「善士雖有大小之不同,皆主於 國天下皆然,隨其高 凡剛柔緩急,無 惟在我之善足以 鄉之善士,則随 是以論其 有 蓋其 或 遺 其 下以 一者矣。 所 鄉 主

尚,上 也。 之士,惟是進而友於古人,則其取友更無窮盡 以爲未足,又進 世,論其當世 而至於友天下之善士,可謂取友之衆矣。 友之道,而 則不可以不知其爲人之實,是以又考其行 世之士也。 夫能友天下之善士,其所友衆矣,猶 同。 蓋在我之善愈備 非 言進 止 行事 爲 而取於古人。 而 一世之士矣。 之迹也。 上 也。 則取於友者益 頌, 言既 是能 誦 然不過是 輔氏 通。 觀 一,而不 進其 其言 日二十 論 可 取 其 謂 世

九四四

無 雖 窮盡 有先後 也 ,故大而天下,遠 而 理 則無古今也 而前 古, 無不在 所取 焉。 蓋 時

易位。」 日 卿,有異 王曰:「卿不同 齊宣王問卿。 君 有 姓之卿。」王 大過 乎?!曰 孟子曰: 則 諫, 日 反 「王何卿之問也?」 示 覆 請 之 問 同 貴 而 戚之 有貴戚 不 聽, 卿。 之 則

更立親戚之賢者。 大過,謂足以亡其 可去之義。 以宗廟 (國者。 蓋 爲 與 重,不忍 君 易位, 有親 易君 坐視其亡, 親之恩,無 之位

王勃然變乎色。

故不得已而至於此

也

勃然,變色貌。

曰:「王勿異也。王問臣,臣不敢不以正對。」

孟子言也。

諫,反覆之而不聽,則去。」 王色定,然後請問異姓之卿。曰:「君有過則

> 論 昌 不 者,則日用常行而須臾不可離者也。」然三仁貴 過 義,親 君 孟子之説。 之卿,小過非不諫也,但 可易位。 邑。 也。 能行之於紂 而不聽,已可去矣。 臣義合,不合則去。 疎不同,守經行權,各有其分。 此 蓋行權者,非至於甚不得已則 異姓之卿,大過 又委任 ; 權 而 霍 力之不 光異 輔氏曰:「此説尤足以 必大過而 〇此章言大 非不諫也,雖 ·同,不 姓,乃能行之於 不可爲。 可 不 以 ·聽,乃 貴 臣 執 戚, 守 之 小 戚 經

孟子卷第十

後學 成德 校訂

孟子卷第十

朱子集註 後學趙順孫纂疏

告子章句上

凡二十章。

圓反。 人性爲仁義,猶以杞柳爲桮棬。」栝,音杯。棬,丘牛子曰:「性,猶杞柳也,義,猶桮棬也。以

義,必待矯揉而後成,如荀子性惡之説也。此爲箭,謂之柳箭,即蒲柳也。」告子言人性本無仁梏,似今棬杉台子。杞柳,恐是今做合箱底。柳,北人以栝棬,屈木所爲,若巵匜之屬。《語録》曰"「桮性者,人生所稟之天理也。杞柳,柜柳。

學趙順孫纂疏 |柳而以爲桮棬,則亦將戕賊人以爲仁義與?

將戕賊杞柳而後以爲桮棬也?

如將戕賊杞

孟子曰:「子能順杞柳之性而以爲

· 栝楼

乎?

率天下之人而禍仁義者,必子之言夫!」戕,音

墙。與,平聲。夫,音扶。

乎? 所謂仁。及其長也,皆知敬兄,即 若人之爲仁義,乃性之所固有。 之有? 使告子之言行,世之人必曰仁義乃戕賊人之物 曰「以人性爲仁義」,如此則性自性,仁義自仁義也,其可 揉而後就也。 謂人性本無仁義,必用力而强爲,若杞柳本非桮棬,必矯 道非亡也,幽、厲不繇也云耳。」○真氏曰:「告子之説,蓋 爲仁義之禍者,仁義何可禍哉? 人自禍之耳。 肯爲,是因子之言而爲仁義之禍也。 曰:「不言戕賊性而言戕賊人者,人之所以爲人者性也 言如此,則天下之人皆以仁義爲害性而不 夫以杞柳爲栝棬,必斬伐之,屈折之,乃克有成 何其昧於理邪! 夫仁義即性也,告子乃 孩提之童,皆知受親,即 所謂義。 何 勉强 亦猶言 輔氏

語録》曰:「告子只是認氣爲性,見得性有不善,須拗他

九四五

將 畏 此 惲 而 不 肯 爲。 是 率 天下 耐 害 仁 義 其 禍 將 不 可 勝

孟子所以不容不辨也。」

決諸 猶水之無分於東西) 告子 西 方 日 則 「性猶 西 流 湍 I也。」湍· 人性之無 水 也 他 決 端反 分於 諸 東 善 方 不 則 善 東 也 流

同 則 此其爲 日: 子以善惡皆性之所 即揚子之説。」曰: 湍 而 謂 小變之,近於揚子善惡混之説。 也。 此説則 謂 『小變之』者,但 故 波 「告子本以氣爲 水急則 性 小 中 流瀠回之貌也。 近 變 以 實 世也 也 性 波 無 善 爲 流 然揚子 思, 自然作 本無善惡, 前 「告子以善惡皆性之所無而生於習 有 性 但 説以 而 此 由 則 成 際回之貌。」告子 謂 説 於脩 人所 性 但 人 爲惡 亦然,故曰 輔氏 性 爲 可 此 而 以 實 ·, 必 亦 有 分 爲善, 有 矯 善 善惡 小異 一因 揉 惡 湍 可 而 前 或問: 水者, 相 因 耳。 也。」〇 説説。 混 以 後 前 爲 可 於 亦 水急流 中 惡 説 爲 不全 然所 湍 輔 耳 善 此 揚 而 氏 水

乎? 孟 子 人性之善也,猶水之就下 水信 無 分 於 東 西。 無 也。 分 於 人 上 無 有 下

日

不 善 , 水 無 有 不 下

之可 使 今夫水,搏而躍之,可使過 在 性 言 使爲不善,其性亦猶是也。」夫,音扶。 Ш 即 水 天理,未 誠 是豈水之性哉? 不 分 東 有不善者也 西 矣,然豈 顙; 其 不 勢則 激 分 而 上下 然也 行之, 乎? 搏,補 口

各反。

事,而 爲真而然。 額、在 搏, 可 者 爲 之而後爲惡 言性本善,故 就 常若易。 以爲善,可 下,但 也 擊 爲善者常若難。 山,皆不 也。 輔 爲 氏曰: 故學者須是主敬以涵養,放教生 此 以 搏 蓋 爲不善故也。 躍 由 激 順之而 非 「告子之見,正以 氣稟所 就 所 跳 本無定體, 惡是反性 下 使 也 拘 也。 無不善,本無惡,故 而 物 夫善 逆 顙 欲所 而爲,本 然 其 是 爲人之性 額 其 而 性 順 也。 可 本 積 是 耳 性 難 而 以 性 習之久 處漸 事 爲,本 本 水 無 未 無 而 之 所不 此 嘗 定 以 非 爲 熟 章 调 反 不 妄 惡 難

所以 終不能使不復其本性也。 未嘗不就下, 又謂 又小變其說 熟 變色者,至於見赤子之人井,則莫不怵惕而救之。 章旨數言盡之矣。」 也 處 然者,往往爲物欲所誘,利害所移,而非其本然之性 可 也。」〇真 故雖甚 漸 以爲 漸 生 善可 |愚無知之人,署之以惡逆,斥之以盜賊 而 雖搏之過顙,激之在 取喻於湍水。 氏 後 归 以爲惡,而借水以明之。 可 以 「告子杞柳之喻既 復 歸 人之爲不善者固有之矣,然其 蓋 其 本, 前説專指 Щ 順 者自 可 爲 暫違其本性,而 人性爲惡,至是 然易 孟子所 不知水之性 而 逆 闢 鮮 朱子 者 則 自 不

)告子曰:「生之謂性。」

説得。 日 : 動,人物只一 物,亦不可做一等説。」○又曰:「生之謂性,只是就 夫心有知覺之類。 生,指人物之所以 氣 物物 故 便有 「告子只説那生來底 具得許多道 蓋謂 不同 人也 般。 處。 有許 理,如 却不知 他 若 却 記説理 多知覺 知覺 物則 不 便是性,手足運 人之所以 之謂 知生便屬氣稟,自 氣昬 運 運 動,物 性則可, 動者 偂 異 理 於物者, 也 亦昬了。」○黄 行,耳目 而 有 然理之在 言。 許 1氣稟 以 多 視聽,與 知 其 而 語 人在 氣 得 覺 言 録 氏 運 F. īE.

其但 外 子 物之生則有知覺,能運動 者略 身而指其能知覺運動者以當之,所謂生者是也。 性」之一言,何也?」曰:「告子不知理之爲性,乃即 \Box 訖 辯 前此未有深究其弊者,往往隨其所向,各爲 言 己之意也,則又於此章極 見其但能 子之言,而病其説之偏於惡也,則又繼而爲湍水之喻, 説 視,耳之聽,手之捉執,足之運 以是考之,凡告子之論 孟 ·得箇形而下者。」○又曰:「且如手能執捉 無一定之論也。」與近 而 子折之,則其 乎此 ,蓋猶生之云爾, 論 能知覺 知覺者,人之精神,非所以言性也。」〇輔 相似。 不察其所以失之之端獨 性 前前 知覺運 ,或問: 運 後 動,非 《語 (説又 動, 四 「子以告子論性數章,皆本乎『生之謂 録》 而公都子之所引,又湍水之餘論 而 介窮, 教不成,故有杞柳之譬。 章 Ĕ 非有善惡之分。 性,其不外乎生之一字明 而終 其 語 死則無知覺,不能 世佛氏 一禪 立論之本意而索言之,至於 不 雖 奔,皆 在 上家説 悟其 於此 不 同 性 作 所 非 ,是以 用是 也 也。 又以 謂 然 性、蓋 説 作 其 其 其以食色爲 運 ,若執刀胡 孟子爲未 説 來說去,只 氏 動 説 既 大指 用 雖 曰 : 也。」告 矣。 始而 以 屈 謂 是性 多,而 人人之 與 於 Ħ 人 也 不 之 旧 喻 以 孟 見 之

又説得周 氣,而不説 蠢 殺 動 人,亦可爲性乎?」○陳氏曰 含靈皆有佛性 遮無畔岸爾,大略則 着那理 爾。」〇輔 運 水搬 氏 柴無 和類 EI: 非 「佛氏把作用 「謂 也 妙 用 略 相 不過 似 者、蓋釋 是性 只 認 得 便 E 箇 唤

下同。

下同。

下同。

下同。

亦無 白 焉,則是指形氣之生者以爲性,而謂人物之所得於天者, 曰:「今告子曰「生之謂性,如白之謂白」,而凡白 無差別 之謂 ,則是謂 不同矣。」 也。 白 猶言凡物之白者,同謂之白, 凡有生者同是一性矣。《文 白羽 以 下, 孟子 ,再問 而告子 無異 集》 E 更 É

性與?」「然則犬之性,猶牛之性,牛之性,猶人之

覺 孟 子又言若 ,皆能運 動,其 果如 性皆 此, 無以異矣,於是告子 則 犬 牛 與 人 皆 有 知

異,而 動,人 而不能 而進退 性,亦莫不是氣。 則紛紜雜糅,善惡有所分矣。」人物之生,莫不有是 謂性。」性,形而上者也。 性因有異,而遂指凡有生者以爲同,是以孟子以此語之, 人之性所以無不善,而爲萬物之靈也。 義、禮、智之稟,豈物之所得 所得於天之氣 性者,人之所得於天之理 孟子反復問之,以盡告子之辭,然後告子自 不知性與氣之所以 自知其説之非 語録》曰: 以以 》曰:「問:《中庸 爲健 理則 對。 無所據也。」〇輔氏曰: 與物若不 未嘗不同」、《孟子集註 順五常之德」、《或問 「形而上者,一 此 孟子所以爲 也。 分,而 而 章句 異 不能對也。 然以 《語録 》謂『人物之生,各得 理渾然,無有不善。 直以氣爲性,又不 也。 知言 「以告子無答辭 氣言之,則 ¥ 一而善 》亦言「人物雖 以 氣, 灣: 也。 理 教也。」〇愚 「生之謂氣,生之理 形而 而全哉? 黄氏曰 言 「以氣言之,則 生者,人之 之,則 知 知其説之非 下 形 知 而 氣 有 其 者也 而 或 知之也 告子既 氣稟之 所 覺 下者 案: 賦 令文 此 運 知 之

覺

運

動

之

蠢

然

者,人與物

此

章

之誤

乃其

八本根。

所

以

義

智之粹然者,人與物異

也。

孟子以

無 既 之異者,粹駁之不齊。 氣 所 覺 稟,豈物之所 形 成賦之理 異,則 異。 運 有不善,在 氣既 動,人 觀 其 具 萬物 亦隨以異歟?」曰:「論萬物之一 生 而 與 物 而 有 得而全哉?』二説似 物 之異 則 有得乎天之理亦異。 知 若 覺能 有 不異。 體 所 理之異者,偏全之或異。」〇又曰 蔽而 運 則 動者 氣 以 猶 不得其全,是乃所謂 理 生也 相 言 近,而 不同。 之,則仁、 蓋在 有生雖同 理 豈氣既不齊 人則得 絶 原 義、 不 则 则 同 禮、 然形氣 理 性 其全而 也 也。 智 百 則 之 氣 而

之本根,孟子開示之要切。

蓋知覺

運動

者,形

氣之所

以

内

也

非

外

也;

有生之同

反自

此

Œ

當

審

其

偏 爲

Œ

是折之,其

義

精

矣。

文集

ĕ

此

章

乃

告

子

迷繆

更 無 所 與 同 義 利 ○《語録 看 推 處。 L 避 善 謂 有 不去。」〇又曰: 害,人與物都 梳理教有條理。」告子不知性之爲 無 氣者當之,是以杞柳、湍 仁、義、禮、 》曰:「氣相 點明, 不 善之説,縱 虎 智 狼之父子,只是他仁 般。 近,如 是同,而 知覺運 理 知寒 横繆戾,紛 不同 其 動,人物皆異,而其 《暖,識 中 如蜂 却 有 飢 上有 蟻之君臣,只是 水之喻,食色 飽,好 異 人處。 紜舛 點明 理 生惡死,趨 須 前 錯 是子 八中却 , 其 而 以 細 他 有 他

同 然 者,蓋徒 而 不 · 知仁、 知 知 義,外也,非内也。」 見 乎 殊不知愛雖生於心,而 生於内,故以仁爲内。 而 而 知覺也。 之美而甘之也。 食悦色者即 告子以 告子曰:「食色,性 仁、義、禮、智者,天命之所賦。 禽獸,而不自 全闕,而 也。 外,而 事 不 必求合於義 物之宜由 所 求知所以自貴於物,不 甘與悦,即 人之知 以宜之者則 知己性之大全也。」 其 悦色者, 乎 性 覺 運 外。 運 可愛之物則在 動 在内。 也。 事 也。」故仁愛之心 也。 輔 知 物 動 氏曰 其色之美而悦之也。 之宜 學者但 輔氏曰: 者爲 是 仁, 可 學者於

孟子曰: 何 以 謂 仁内 義 外也?」曰: 「彼長

於

之中,疆

生

此

由

乎

外,

故

以

義

爲外。

「告子以仁愛之心

一當用·

力於仁,

生

於内

知,即

外; 物

事

理之宜雖

見

「人之甘食者,知其食

性

一故言

人之甘

從其白於外也,故謂之外也。」長,上聲,下同。而我長之,非有長於我也,猶彼白而我白之,

聲,下同 與 也; 日 ? 利等 心 爲 我 不識 長彼之心,由彼長,故不得不長之,所以指義爲外也。」 白 長 異於 只見那 處,正 Н. 也。 之,我以 謂 長 白 是本然之性 長 超利 《語録 馬 者義乎? 馬之白 之長 避害、 彼 ĕ ⊟ : 爲 飲 也, 也,無 「告子只知得 長 所以 食飽 也。 長之者義 無 道 暖 以 等處, 以 彼 長 我白之,我 異 異 而 人心,却不知 而 於 於白 我長 不 乎?」與,平 長 知辯 之,蓋 人之 人之白 别 以 謂 那 有 長 彼 我 義 道

也。 乃 張 之心,則義之非外明矣。 我白之也; 有闕文焉。」 所 氏 謂 白 日 馬 : 義 「上異於二字宜 也。 白 長馬長 愚案: 義 不 不 ·異,而長馬 白馬白人,所謂 在彼 人,所謂 之長 輔氏曰:「白馬白人,則 衍。」李氏 彼長 長 前 人不 在 而 曰 我長 我 彼 同 : 長 白 是 之 之 或 而

> 也。 同耳。 長 但 同謂 人之心以長馬乎? 豈可 以 之白可也。 謂義爲外而不 此觀之,則義不在彼之長 至於長馬長人,則不同矣。 其 事哉?」 (所以 然者,是乃吾 而 在我長 心之義 人孰 之之心 有不 肯以

言愛主於我,故仁在内。敬主於長,故義吾之長,是以長爲悦者也,故謂之外也。」我爲悦者也,故謂之外也。」曰:「吾弟則愛之,秦人之弟則不愛也,是以曰:「吾弟則愛之,秦人之弟則不愛也,是以

之説明處以通之也。」〇 之。」輔氏曰: 曰 : 耆之者在我,長在外而長之者在我,理初無異 言長之耆之,皆出於心 「告子以食色爲性,故 林氏 正説 自篇首至此四章 着 孟子 也。 意 因 輔氏 其 孟 所 日: 子 明 正 也。」林 炙在 欲 者 -,告子 就 而 告 氏 通 耐

在

外。

也。 之辯 乎自得之地。 以 能自 鹵莽而墮於詖淫邪遁之流也。」 思,徒守其舊所聞者以爲説,雖其 言勿求 求勝。 輔氏曰:「告子自不見性,又不能因孟子之言以 屢 反 屋,而 是其意只欲説得行便休,終不肯反求深體以造 於心者,所以卒於鹵莽 而 有 皆其不得於言勿求於心者錮之,是以卒於 所 屢 疑 變其 也。 (説以 此 正 (辯屢屈,不過屢變其説 水勝, 其 所 而 卒不 謂 不得 不 聞其 得 其 正 於 致

人。』」惡,平聲。

敬以敬之,則不在外也。 所敬之人雖在外,然知其當敬而行吾心之曰:「行吾敬,故謂之内也。」

所長在彼,果在外,非由内也。」長,上聲。「酌則誰先?」曰:「先酌鄉人。」「所敬在此,「鄉人長於伯兄一歲,則誰敬?」曰:「敬兄。」

乎? 曰:『在位故也。 公都子不能答,以告孟子。孟子曰:「敬叔父 在其敬叔父也?』彼將曰『在位故也』。 爲尸,則誰敬?』彼將曰『敬弟』。子曰:『惡 伯,長 所長在彼,則敬長之心果不 雖在内,而長在外,故以伯兄鄉人爲問,而 由中出也。 子答,而季子又言,如 敬弟乎? 也。 酌,酌酒 輔氏曰:「季子因公都子之言而復疑,敬 彼將曰『敬叔父』。曰: 『弟 庸敬在兄,斯須之敬在 也。 一由中出 此 此皆季子問、公都 則 也。 敬 長之心 日 所 敬 子亦 在 鄉 此

大 當如祖考也。 位,鄉人在賓客之位,則亦當敬,然此只是暫時之敬耳 之事也 客之位也。庸,常也。 尸,祭祀所主以象神,雖子弟爲之,然敬之 時制宜,皆由中出 兄與叔父,固 在位,弟在 所當 也。 敬, 斯須,暫 此理之常 愚謂: 尸 位 因 鄉 也 時 時 制 若弟在 也。 宜,乃義 在 賓

外,非由内也。」公都子曰:「冬日 日 季子聞之曰: 則飲水,然則飲食亦在外也?」 常或 暫 , 因時 「敬叔父則敬,敬弟則敬,果 制宜 則皆本於吾 心 爾 故 則飲湯,夏 日 由 出 也 在

知 枯了,安能知人性之本善? 堯舜矣。」輔氏曰: 仁義之在内,則知人之性善,而皆可 答,大指略同,皆反覆譬喻以曉當世,使 此 人皆可以爲堯舜也哉? 亦上章耆炙之義。 「若以 義爲外,則便於性之本體 既不知人性之本善,則豈能 ○范氏日 :「二章問 以 爲 明 偏

公都子曰:「告子曰: 蘇氏名軾,眉 能聽,便是 曰:「告子之意,説這性是不管善、不管惡底物事。 此 『食色性也』,便見得他只道手能持、足能履、 蘇 ,未嘗分善惡言 氏論 亦「生之謂性」、「食色性也」之意。《語 性,説自上古聖人以來至孔子,不得已而 物事。」近 Ш 人。 也。 胡氏名宏,安國子。 世 自孟 蘇 氏、 子 『性無善無不善也。』 道性善, 胡氏之説 而 ◎《語 與中支矣。 蓋 目能視、耳 録 如 説中 ₩ ⊟ 他 此 録 説

之論。「凡人之生,粹然天地之心,道義全具,無適無莫,言》云:『凡人之生,粹然天地之心,道義全具,無適無莫,更不看道理,只認我説得行底便是。」〇又曰:「胡氏《知

興則民好善,幽厲興則民好暴。』好,去聲。或曰:『性可以爲善,可以爲不善。是故文武

此即湍水之説也。

或曰:『有性善,有性

不善。

是故

以

,堯爲

君

而

然氣稟之不齊,蓋或相什百千萬,豈但 字端的,但分爲三品,又差了。 韓子性有三品之説蓋如此。《語錄 王元子,疑此或有誤字。 子、比干皆紂 本要求勝荀、揚 人之所以爲性者五,曰仁、義、禮、智、信。 分三品,却只説得氣,不曾説得性。」○陳氏 ,却又與荀 之叔父,而《書 、揚無甚異。」案此 三品之説,只説 三品品 稱微子 此語 而 日 ₩ ⊟ 已哉? 文 似 得 韓 看 爲 則 氣 韓子 得性 子 微 他 謂

曰:『生可以爲阜,可以爲下島。 是女文弋之論。」

968

以爲君,而有微子啟、王子比干。』

有象,以瞽

瞍爲父而

有舜,

以紂爲

兄之子

Ħ.

曰:「乃若其情,則 也。」〇 性既 順之而 何 有 知其性之本善耳。 都 故爲惡耳。」○《語録》曰: 皆 爲惡,則性之本善可 不是别物。」人之情,本 觸 物 即 發 本然之情,則無不善。 乃若,發語 不善。 子問性 着便 往 善也,然而本 恁地去。」○陳氏曰:「在心裏面未發動底,是性。 動 語 如此 3處。」○又曰:「情是這心裏動出,有箇路脉,曲 而不善?」此則又因其性之善, 詞 陳氏曰:「情之中節,是從本性發來,便是善 發動出來底,是情。 善也。 喜、 り則情 ,孟子却 情者,性之動也。 怒、哀、樂未發,何嘗不善? 且此若字,正與下若夫字相對,故 辭。 -則可 亦 答他情。」〇輔氏 如 若程子謂: 『天下之理,原其所 此 輔 以爲善,而不可 可以 也。 氏曰: 恐不必 「性不可 但 知矣。《文集》曰: 這動 但 爲善矣,乃所謂 「先儒皆訓若爲 此 可 如 底,只是就性中發 則因 《語録》曰:「心如 此説。 以 説 日 : 而知 以爲惡,惟 ,情却可 爲善而 其情之善,而 「情 蓋情自 其情之無不 發 只 説 而 是性之動 順,言順其 不 中 反其 「情未必 ,所以公 善、不待 善 斷 節, 自 可 出 水, 可 更 也。 事 來, 折 以 情 以 無 善 亦 以 物 情 爲 隨

> 不善。 不善。 其不中節 孟 子 論 情 是感物 有 把 做 欲 善 而 者,是專指 動,不從本性 其 本於 發 來, 性 之發 便有 笛

今曰『性善』,然則彼皆非與?」

與,平聲。

孟

子

言之。」

夫,音扶

若夫爲不善,非才之罪也。 理 物欲陷 底。 性 子問性,而孟子以情與才告之,何也?」曰: 是才,性既 器、人之能爲是事者,皆其材質也。」人有是性,則 不會發揮得,這處可見其才。」○輔氏曰:「凡物之能爲是 料相似否?1曰:「是。」」〇又曰:「才是能主張運動 否?』曰: 『是兼形體説 説。」問:「才字是以其能 便是指適用底説。「非天之降才爾殊」,便是就 子説「人見其濯濯也、則以爲未嘗有材」,是用木旁材字 字之别。」曰:「才字是就理義上説,材字是就用 才,猶材質,人之能也。 而 無形象聲臭之可 E 如這事有人會做得,有不會做得,有人會發揮得, 情則性之動 溺 而 善 然, 則 形容也,故以二者言之。 非其才之罪也。 而有爲。 才 ,便是説那好底材。』問"『如 亦善。 解作用底説,材質是合 才則性之具 《語録》曰: 人之爲不善,乃 問: (而能 或問:「公都 誠 「性之本體 知二者之 Ŀ 爲者也 「才與材 理義 形 説。 做 説 體 有 有 事 材 説 上 盂

티 : 質,亦無不善,譬物之白者,未染時只是白也。」〇真 如 不能盡其才者也。」」]〇又曰:「孟子是説本來善底才。 事,我不能做得些事出,故孟子謂「或相 才之罪哉? 才本可以爲善,而不可以爲惡,今乃至於爲不善者,是豈 曰 出 〇又曰:「孟子所謂才,止是指本性之發用無有不善處 專言善,何也?』曰:"了本是善,但爲氣所染 本 人之有才,事 來便是才也。」〇問: 「善者性也,而能爲善者才也。 「情本自善,其發也未有染污,何嘗不善? 亦是人不能盡其才,人皆有許多才,聖人却做 性之爲善必矣。」〇《語録》曰: 陷溺使然也。」 事做得 出 「孟子言情與 來, 性之中, 性以體言,才以用言。 八才皆 問: 萬善完備 倍蓰而 善, 故有 『孟子論オ 才只是資 如 無算者 何? 許多 善不 發 氏

惻 恭 外鑠我 心,禮也,是非之心,智也。仁義禮智,非 惻隱之心,人皆有之,羞惡之心,人皆有之, 「求則得之,舍則失之。」或相倍蓰而 ,敬之心,人皆有之,是非之心,人皆有之。 「隱之心,仁也;羞惡之心,義也; 也,我固有之也,弗 思耳 · 矣。 無算者 恭敬之 故 曰: 由

之才,初無限量,極天下之善,無不可

爲者。

今乃善惡

不能盡其才者也。 有,非 也。 中者 得者,在外故 求,而不能擴而充之以盡其才也。」○真氏曰: 以至於相去之遠,一 然有失之多者,有失之少者,有失之久者,有失之暫者 求之,則常存; 之心,人所固有, 辭遜、是非,情也。 也。」〇輔氏曰: 録》曰:「惻隱、 由 人自不思而求之耳,所以 容,敬主事。」樂,以 恭者,敬之發於外者也。 不思 自外來,獨 算,數也。 也。 不 陳氏 求 也。 舍 羞惡,是心 「仁、義、禮、智、性 非猶火之鑠金,自外而 而 患夫人之弗思弗 E 性則 而不思,則失之矣。 今但謂之心者,心統 不能 言四 倍十倍而 火消 惡,去聲。 「恭就貌上 求 其在 擴充 也, 所 者之心 金之名 我者,何不得之有? 不可數者, 舍,上聲。 説,敬 以能 以 也。 求 善惡 敬者,恭之主 爾。 盡 人 ,自外 惻隱、 存則 惻 就 至内 性情 其 所固 皆 隱、羞惡者,才 相去之遠, 心上 蓰, 才也 善, 物 由於不思 也。 者也。 羞惡 性 以 音師 説 有 失 有 但 求 我 、則惡 至 恭 本然 了, 但 恭 四 思 而 所 《語 於 内 固 者 而

之端,而 子教人用功之至要。」前 去之遠,由 此 不 能 不言端者 杰 其 オ 也。 篇言是 1,彼 日 思、 欲 四者 \Box 其 求、 擴 爲仁 而 而 又曰 充之,此 義 盡 禮 此 智 孟

順

直

大

用

以

著其

本體,故言

有

不

司

耳

好,去聲 故 好是懿德。』孔 詩》 有物 Ĕ 必 『天生蒸民, 有 則,民之秉夷也,故好是懿德。」」 子曰:『爲此詩 有物 有 則。 者,其知道乎 民之秉 夷 1

則

衆也。 物 見 好 心 目 彝 詩 也 是民民 常常 此 一; 則 九 竅、 而 懿 詩 也。 大雅 莫不有 有 Ŧi. 傳 物, 德者。 所 聰 藏 ĕ ∃ : 而 秉 懿,美也 明 • 事 法 達 「天生衆 之德 馬, 執之常 也。 蒸民》之篇。 之君 以 如 此 臣、父子、夫婦、長 視 ; 則, 民,有是 之明、 觀 性 有 有物 之,則 法也。 也,故 父子, 聽之聰、 物 必 蒸、《詩》作 必 有 人性 有 則 人之 夷,《 法 貌 幼 是則 有 之恭、言 朋 之 情 慈 如 詩》作 友, 蓋 善 孝 無 有 無 烝, 自 之 不 耳 口 之 非 百

> 性初 子所 上,加 善可 故其 曰: [三者 詩者、蓋謂秉彝好德、心之所好處、即 人性之所稟者,謂之『彝』; 者,即指上文『秉彝』 不容已也。 生,各稟其有常之性 使人就其切 人身之所接 耳目父子言者,蓋耳 「德」,其實一而已 一使其 君 ,無物不體,而 得而 發 情無不好此美德者。」○輔 一「故」字於「好是」之上,其旨 臣 問 (動處指出以示人,方見得此性之本 知以 有義、父子有親之類 見。一〇 1雖同 之三説, 行而最 所 近者體 性 謂 爲説氣質之性,然兩 耐)蔡氏 此理之妙,實根於人性之本。 親 懿德, 兼言之, 矣。 者。 而 而言也。 ,所以 目則人身之所 皆不 認 티 : 孔子 故特舉 即 之,則 所 應 「末舉《蒸民 則 又加 存於心而 謂 是 辨 事 無病矣。 天命之所賦者,謂之『則 餘 其 氏 接物、皆 物之則 也 而 皆 日 一「必」字於「有則」之 耳 或之説 自 可 自 具. 是 愈明矣。 是性之發 「莫非 有所得者,則謂 以 而 惟告 乃民 慈孝之則 也。 》之詩 明 好此 類 最 善。」 矣。 切切 推 物 所 子 猶 其 懿美之德 者,當 執 者,父子 也 孟子 無 日 而 知 而 動 然惟人之 語 之常 而言之 好好 獨舉 善 性之本 處。 分 公 舉此 然之 無 别 録 是 都 性 就 不 善 之 而 則 其

九五 π 惡

善之説最無狀,他就

此

無善

無惡之名,渾

然無所

分

則

雖

形象。 少 0 在清 有是氣則必 氣,如 濁。」〇又曰: 理之全闕繫焉耳。」〇《語 爲 雜。」〇又曰 便是理。 氣 者,則自暴自棄之人也。」《文集》曰: 之本,湯武身之是也。 清 理 稱 而 異 輔 爲本性 極 知之, 善爲惡 濁 則 清而 水中。 矣。 氏 何?」曰 堯 日 性之善固無不同,氣便有不齊處。」○問:「才稟於 稟 學 人之所以 總不 理 舜至於塗 者, 則 其 無蔽 而知之,則氣 稟氣之濁 有 此所謂才,則 「性與氣皆出於天。 何 是 氣 清 理 妨 以 理。 也。 「氣亦天 如 無 也。 異 者爲賢,稟其 有 寶珠,氣 者,爲 清濁,皆 哉?」程子 學 但稟氣之清者,爲聖 善有不善,只緣氣質之稟各 人一也。 與 知以下,則氣之清 無清 録 今世之不擇 也。 是 ĕ ⊟ : 愚 就氣質之性言,與 如水。 濁。 孔子 爲 理 「天地間 暗 可 精 性只是理,氣則已 曰 皆可 才稟於氣 有 濁 至 如 所言下愚 善惡 , 故 是 珠 至於善而復 於善 者爲 理 只 落 性 純; 一爲賢,如 濁有多 而 而 是 「生而 在 即 顛 後 (孟子 愚。 濁 而 氣粗,故 倒 有 道 , 氣 理 水 復 寡 知 不 是 是 理 性之 之説 中。 屬 珠 有 者, 也 而 非 氣 性 學 性 移 有 落 於 清

不備。 之性 方明 不明。 不及氣稟,非 從言之不同耳,故二之則非也。]○陳氏曰: 者,無以自别於氣質,故 後 原言之,則雖知 本,便只説得 至善之源未嘗 塞、剛柔、彊 性,只是至善,然不以 也。」〇《文集》曰: 之言性善者,前聖所未發也。 又曰 本者,即 氣不論性,則 盡。」〇又曰: 備。 而不知 知 張子所謂『善反之、則天地之性存焉』者 「論性 二之者,正指 有氣質之性 二之則 弱, 有氣質之性 粗 所 無以 有異,故 有昬 故有 底,而道 論 「性自是性,氣自是氣,須 不 有 見理義之同。」〇《語 「論性不論氣,則 不是。」或問程 明 欠關 所 論 氣質 而 八開 上兩句也。」〇黄氏曰: 不備。 有所不明。 日 一,則 理全然不明。 氣, 不 不 塞、 未 知 而 如 明。 備。 不 有 論之,則莫知其 剛 三品之類,包 徒 而 柔、彊 天地之性, 備 論氣質之性,而 此言者, 然 若只論 須合 無以見生質之異 子之説 二者本非 Ŧ 弱之不同 論 録》曰: · 萬世 性與 氣稟 是兩邊 又孟子 氣 括不 「只論大本 則 而 有昬 有 氣觀之, 不 日: 得之天 而 知 「本然之 異,特 盡 都説 下,學者 不自 論 有 而 所 不 是 孟 明 故 及 天地 也。」 不 未 性 理 大 而 地 妖 知 開 論 發 子 所 \exists 本

只得

按他説,更不可改易。」〇蔡氏曰:

「論

性

不論

氣,是

便

本

而 Ŧi.

子所謂: 理也。 理與 所謂氣質之性者,告子所謂 其理之在 明。」張子曰: 然之妙,萬殊之一本也。 粹至善而已,所謂天地之性者也。 是 前 最 行 上 却 却 \mathbb{Z} 、所稟之性,所謂 者 天地之性 (氣雜 萬殊也。」〇又曰: 靈,乃氣質以後事。」〇又曰:「天地之性,則太極 便 而遺下,故 L明、厚 從那 焉。」或問氣質之性。 其 般 性之本,所謂極 「論天地之性 有氣質之性。 生物者,氣與質也。 滋味。」〇又曰 而言之。」〇又曰:「天地之性是理也 是者,則謂 裏過。 薄 之不齊,故性 不備。 存焉 好 形而 才者,皆 底 之性。 ,則專指理而言。 至此便有昬明、厚薄之殊,得其 性 本窮源之性,皆謂 論 「氣質之性,便只是這箇天地 後有氣質之性 氣質之性 氣不論 如 故 性只是理,然無那天氣地 水,氣質之性 謂 生之謂 一之在 然所 氣質之性,君子有弗 曰:「天地之所以生物 人物得是氣質以 是 性,是 也。 謂 是 性,程子所謂 則二氣交運 者, 氣質者,有 孟 然 語下 論氣質之性 其 子所 其本 此 如 爲 殺 者也。」○《語 而遺上,故不 ,善反之, 品 謂 然之理 此 ,纔到陰陽 偏 成 一番與 而 性 亦 生質 不二。 形, 善, 正 生, ,則以 質 鹽 > 本 秀 程 則 之 純 而 則

性

純

録

駁

性

則

語

便見得-偏 後 焉」,蓋謂天地之性未嘗離乎氣質之中 者、而寓乎氣質之中也、 言之:不雜乎氣質而爲言,則是乃 謂之命,而不可謂之性。」曰: 有 所 氣質之性,然後諸子之説定。 學,讀之使人深有感。」〇黄氏 〇又曰: 論氣質之性,即 ○又曰:「氣質,陰陽五行所爲。 以 出 而 言,特指其純粹至善,乃天地 金之氣盛 唇明。 謂氣質之性也。 來。 有氣質之性,其所以 反之,則天地之性存矣。 正,則所受之理 此 ,則天地之性乃未受生以 理 本原之性無有不善,只被 蔽固少者,發 没 「氣質之説起於張 安頓 木之氣盛,則 ,則木之氣衰 處。 此體墮在氣質之中耳,非别 隨 然嘗有疑焉: 但 出 而 得 有善惡之不同,何 來天理 故 ,故其言曰『善反之則天地之性 偏 金之氣衰,故 氣之清 正。 義常多而 前 程 故説性 賦予之本 「非此之謂也。 性善者,天地之性 日 : 勝 天理 極, 氣 明 氣質有昬 所謂 有 性,即太極之全體 天地賦 有功於聖門,有 「張子分爲天地之性 蔽 . 昬明 之流 則不 須兼氣質言,方 仁常 固多 仁常多 氣質之性,形 然也。」曰 也。 行 蔽 也?」曰 少。 , 則 與 濁 者 固,此 者,如 其以 有 所受之理 萬 蓋自其 而 , 則 則 若此 物之本 義 也 隔 私 性 天 此 理 補 者,氣 常少。 了, 欲 備。 也。 順 形 地 理 則 而 餘 於 勝 學 發 有 而 爲 存 而 可 削

此 或問: 日 之在是者爲氣所 爲 小異。 之。 氣之不美者,則 氣者言之也。 然 謂 則 爲言爾。」愚 質之性有 미 有 氣質之中,只是就那 孟子、程子之説所以小異而不害其爲同 ,若其所以 以 以 不善,而不害性之本善; 氣 人之才固 才無不善; 「《集註 天地之性,是以大本言之。 無 事理考之,程子爲密。 質之性 「程子 蓋 :善惡 省察矯揉之功,學 》中以程子爲密,即見得孟子所説未免少有疎 何以言才之有不善也?」曰"「此以 孟子 案: 爲情與才之本然者, 蓋性不自立,依氣而形,故 也。」〇陳氏 其情多 有 拘 是 程子 程子 専 ,而其理之爲善者終不可 智 也。 氣質中分别出天地之性,不與相 指 明 流於不善。 兼指 此 强 其 説 弱 發 説 氣 其實天地之性亦不離 之不同矣,張子所 其稟於氣者言之, 才字,與 於性者言之,故以 雖 則 者 才 質之性, 性雖本善,而 殊,各有 蓋 初亦未嘗不善 所當深 亦 形 氣質所稟雖 有 也。」〇《文集》 生質具 時 孟子本文 ,是以 得 而 而變。 所當, 玩 其 偏 氣 (稟於 於不 《稟言 則 也 也 不 但 性 離 平.

> 善,而 學者於程子之説,尤當深玩。」 於理 之,則才雖有不善,而 使人知性善而皆可爲堯舜矣。 性者言之,故以爲性本善,情與才皆 相妨,須是子細看,始得。」○輔氏曰: 之方備。」〇又曰:「程子説才,與孟子説才自不同, 中 周子、程子、張子,方始説到氣上。 大抵孟子多是專以性言, 故以爲出於性。 他氣稟有善惡,故其才亦有善惡。 異。」曰:「才只 氣質而言,所以 發用無有不善處,如人之有才,事 處。 萬善完備,發將出 今但以 無遺矣。」〇《語録 賦命受生之後,又不可 程子爲 云有善不善。」〇問:「孟、程所論才字同 一般能爲之謂才。 程子則自其異者言之,故以爲稟於氣 主 來便是才也。 初 而 ₩ ⊟ 不 推 故以爲性善,才亦無不 害所謂 其 「孟子所謂 八説,以 不 程 加 本 子 省 事做 才之初,亦無不善,緣 要之,須兼是二 如 陰補 孟子自其同者言之、 善。 察 兼 無 程 「孟子專以其 指 矯 才,止是指本性之 不 得 子論才, 孟子之不足,則 善。 揉 又 其 出 可 稟 之功 來。 於氣 見 此 却是 性 · 善。 固 也 然不 者 善之 發 雖 者 足 故 本 於 到 言 以 言 指

暴。 ○孟 子曰: 非天之降才爾 「富歲 子弟 殊 也 了,其所 多 賴 以 X 陷 一歲,子 溺 其 心者 弟 多

然也。

故 以陷溺其 富歲 有所 ,豐年也。 顧 藉 而 爲暴。 爲 賴,藉也。 善。 X 年 衣食不足,故有 豐年衣食饒足,

心

而

不同,則地有肥磽,雨露之養,人事之不齊 今夫 同,浡然而生,至於日至之時,皆熟矣。 麰 麥, 播 種 而 耰之,其地 同,樹之時 雖 有 又

口

相

似

也。

耆,與嗜同

下同下同

成熟之期也。 麰,大麥也。 耰, 磽,瘠 覆 種也。 薄 也。 日至之時,謂當 也。

夫,音扶。

麰,音牟。

耰,音憂。 磽,苦交反

之 ? 故凡 同類者,舉 聖人與我同 相 類 者 似也,何 獨至於人而 疑

故龍子曰: 『不知足而爲 聖人亦人耳,其性之善無不同也。 屨,我知其不爲蕒

也。』屨之相似,天下之足同

也。

費,音匱

雖 蕢,草器也。 未必適中,然必似足形,不至成蕢也。 不知人足之大小而爲之屨,

> 者也。 馬之與我不同類也,則天下何耆皆從易牙之 於味也? 口 之於味,有同耆也,易牙先得我 如 使口 至於味,天下期於易牙,是天下之 之於味 也,其性與 人殊,若犬 口之所

惟耳 言易牙所調之味,則天下皆以 淄、澠二水爲食,易牙亦知二水之味。 易牙,古之知味 亦然。 至於聲,天下期於師曠,是天下 者。 愚案:易牙,齊桓公臣也。 爲 桓公試之輒 美也

之耳 相 似也 言師 曠所和之音, 則

師 曠,能審音者也。

惟目 不知子都之姣者,無目者也。 天下皆以 亦 然。 至於子都,天下莫不 爲美也 姣,古卯反 知其姣 也。

子都,古之美人也。姣,好也。

0 嗜」,原作「耆」,據四庫本改

理 理 猫 有 故 義 也 無 同 \Box 之悦我 聽 所 義 口之於 焉 同 也。 然乎? 目之於色也,有 心, 聖人先得我心之所同 味 猶芻豢之悦 也 心之所同 有 同 耆焉 同 我 然者何 美 ; 口 焉 耳之於聲 然 也? 至於心, 耳 也 謂 故

也 見。 又 須 把 間 便 便 物 然 愈言「行而宜之之謂義」,若以義爲宜 也。」〇又曰: 曰 OF. 日 如 他 有箇區 有此理,義是於此物 爲 豢,犬豕是 蓋 程 如此用 處 猶 義,)輔氏曰: 物之宜 子言『處物爲義』,是則處 物 非 可 爲義、義、 處。」〇又曰: 『處 體 也。 ,便是義。」〇又_日 「且如這卓子是物 物爲 用之謂 雖 「事亦物也。 在 也。 草 義」 宜 外 食曰 也。 上自家 「凡物皆 而 也。《語 程子曰 句 所 是 則 芻, 以 凡 非 。處置。 處 有理 後來人恐未免有義外之 「揚雄 物者 於理 可 記録》曰: 之使 4 事 : 否, - 羊是 蓋 「在物爲 ,則義 在 合如此 言 物、各有 可 處之得 得 心 理不外乎事物之 以安頓物事,我 「義以宜之」,韓 其 「理是在此 而 有在外意思。 也。 宜 非外 便是 宜 者 也。」〇 之謂 理 理 則 穀 義、義 一,處 理, 在 物 食 内 義 上

意味,方爲有益。」

義也亦然,故程子以爲親切有 我 乎此而已,無 芻豢,自是相投入,相宜 須 有 體 \Box 悦理義者,但聖人 之所未及,到程子而其義始明。」孟子言人心 也。 ,始得。」輔氏 實體察得理 以 心 異於人也。」輔氏 處其事物使之各得其 猶 芻 **然有不同** 豢之悦我 日 義之悦 也。」程 「芻豢,謂蔬菓五穀 相悦,有 八則先 E. 子 理 口,此 味。 心,真 知先覺乎此 文 , 則 不可 雖聖人亦只是先知先 學者須是着實體 爲 曰 形 義 語 : 猶 容者。 用 親 也。 也 芻 理 切 豢之悦 心之悦 義 人之口 此 耳,非 有 亦先 之悦 無 察 不 其 理

割反 以 而 息,雨露之所潤 也,斧斤伐之,可 爲 牧之,是以 孟子曰:「牛山之木嘗美矣,以 未 嘗 有 材 若 焉,此豈 彼 非 以 濯 爲 無 濯 萌 美乎? 也。 Ш 蘖之生焉 之性 人 是 見 也 其 其 其 , 牛 哉? 日 郊 濯 夜 於 羊又從 濯 蘖, 五 之所 大 也 國

也。上萌 與位 有 光 心 而聖人多,後世氣化衰而聖人少,雖有之,而又不得其 夫物耳,而人之良心亦係於氣化乎?』曰:"古者氣化 間,凡物皆有所 之所息。 4 之者衆,故 Ш 油 萌 潔 之木,前 Ш 然 焉,是亦係乎氣化也。 葉,而 心之貌。 齊 而 芽也。 生 之東 謂氣化流行未嘗間斷,故日夜之 長者,則又係乎一身之氣耳,是亦一氣化 牛羊 此固 失 材,材 南 其 蘖,芽之旁出 生長 -又從 (美耳。 嘗美矣,今爲大國之郊,伐 Ш 也。 木 也。 至於平旦之氣,清明之時,良 也。 而害之,是以至於光 息,生長也。 邑外謂之郊。 輔氏曰: 言山 者 木雖 也。 「問:『此但 伐 濯 日 言 濯 猶 夜 4 時 盛 言 之情

好 其 雖 口 惡 以 良 存 與 爲 心 乎 入 美乎? 者,亦猶斧斤之於木也,旦 人 相近也者幾希,則其旦晝之所爲, 者, 豈無 其 日 仁 夜之所息,平旦之氣,其 義之心哉? 日 其 而 所 代之, 以 放

潔

而

無草木

也

存。 見其 有梏 禽獸 夜氣不足以 亡之矣。 也,而以爲未嘗 好、惡,並去聲 梏之反 存, 則 覆, 其 違禽獸 有才焉者,是豈 則 其 夜 不遠 氣 矣。 不 足 以

也哉?

也。 近,但 愚謂: 致,然亦大綱與人相近,所争不多也。」 梏,械也。《語 身之氣清明,則其良心自然發見。 人來就幾希字下註開了,便覺意不連。」〇輔氏曰:「言 没了。」好惡與 清明之氣。 息得許多時節,不與事物接,纔醒來,❶便有得 時,清明之氣也。 義之心,即所謂性也。 良 心者,本然之善心,即 □此心存得不多時也。□○又曰:「幾希,不遠 幾希,不多 仁義,性也。 此 心自恁地 人相近,言得人心之所 而以心言者,心統乎性也。 也。 《語録》 平旦之氣 虚静,少 《語 》曰:「平旦之氣,只是夜間 録 所 間纔與物接,依 ₩ ⊟ 雖未能與聖人同 謂 謂 仁義之心 其 未 好 與物 惡 良心即仁 這 也。 舊又 與 此 同 接之 其極 自 人 也 然 後 相

0 醒」,原作「惺」,今據四庫本改。 之,雖芽蘗之萌,亦且戕賊無餘矣。」畫之所爲,既有 惡與人相 猶人之放其良心。 木既 去旦晝理會,這兩字是箇大關鍵,這 完全?』曰"『不能存得夜氣,皆是旦晝所爲壞了。 之意。」〇又曰:「反覆,只是循環。」言人之良心 轉 亡之,《語録》曰:「問:「平旦之氣甚微小,如何會養得 見至微,而 之所息,平旦之氣,蓋是静時有這 猶必有發見者。 長。」故平旦未與物接,其氣清明之際,良心 操存之功,則安得自能生長?』曰:『放去未遠,故亦能 録 已放失,然其日夜之間,亦必有所生長 語録》曰"「問"『凡物日夜固有生長,若良心既放,而 》曰:「牛山之木嘗美矣,是喻人仁義之心。斧斤伐之, 也。 日 伐,猶有 《文集》曰:「反覆,非顛倒之謂,蓋有互换更 近處。 如 被他 旦畫所 禁械 日 萌 晝之所梏亡,則又所謂牛羊又從而 非無萌蘗之生,便是平旦之氣,其好 葉,而 《語録》曰:「氣清則心清。 在 那裏, 爲之不善,又已隨 牛羊又牧之也。 更不容轉 好處發見。」但 裏有工夫。」 計動。」 反 覆 其日 如 而 其 只是 《語 Ш 梏 發 雖 展 牧 夜 一 4 無

分。 泯。 分,自家止有九 ○又曰:「良心當初本有十分,被他展轉梏亡,則 梏之,今日梏一分,明日梏 存得此心,夜間雖聚得些,小又不足以勝其旦晝之梏亡, 水便滿。 動,若不曾操存得,無非是耗散底 少間這氣都乾耗了,便不足以存其仁義之心。」〇又曰: 起時便接續操存而不放,則此氣常生而不已。 在那裏,如水之流,夜間則關得許多水住在這 以養得那良心。 隨手又耗散了。 氣,日裏也生,夜間也 以害其夜之所息 則平旦之氣亦不能清、《語録》曰:「氣只是這 生,日以浸薄,而 畫之所爲,是以 夜氣是母,所息者是子。 夜氣亦不足以存,若能存,便是息得仁義 他日會進,自家日會退。」〇又曰:「今若壞了一分」 次日又放乾了,到夜裏又聚得些少。 若從平 分。 且如 夜間生底,則 明 H 生。 日 不足以存其仁義之良心, 展 ; 間 他又進一 蓋所息者本自微了,旦 夜之所息,又不 轉 目 只是日 分,所謂梏之反覆 視耳 相 聚得 害。 時節。 聽,口 分,自家又退,止 在那 間生底,爲物欲梏 至於夜氣之 裏,不曾耗散 裹説話,手 夜間則 裏,這 之良 若日間不 而 能 畫 停 所息者 勝 一只管 足運 留 所 广 其 池 日 得

夜氣漸 有 譬如一井水,終日攪動,他便渾了。 則 清水出。 心爲之不存矣。 消得多,夜氣益薄,雖息 能 止 息 存固有之良 薄 時, 所謂夜 明 此 日又壞,便 水 亦 然暮 氣不足以存者,便是 心,如旦 不 能 夜止息,稍 壞 清 畫之所爲有以汨 夜 成 矣。」 兩 ,也存不得。」〇又曰: 分。 而 不 所 那水至夜 紛擾,則良 攪動 漸消 好 惡 得 亂 只 太甚 科静 其 遂 管 心復 氣 無。 與 氣 則 便 則 人 生 雖 有 良 清 到

遠矣。

消。長,上聲。故苟得其養,無物不長。苟失其養,無物不

鄉。」惟心之謂與?」舍,音捨。與,平聲。孔子曰:『操則存,舍則亡,出入無時,莫知其

句 孔子言心,操之則 云操則常存,則疑若有 人無定時,亦無定 但言本心神明不 測,不存即亡,不出即人,本無定所 一定之所矣。』曰: 處如 在 此,捨之則失去,其 此。 《語録 『無定所。 》曰:「問: 此四 既 出

外入也,亦曰 明不 ◎《語 者於此,荷 常,莫知其定 學者不可以無持養工夫也。」程子曰:「心 存之,則其 正,然不可謂本心之外,别有出入之心也。 者,其無乃非心之正邪?」 内 忽然入,無有定時。 如今處處常要操存,安得 入,亦以 孟子引之,是言人心神明不測,得失之易,而保守之 非 氣定,常如平旦之時,則此 失其養。 存 在此、舍之便亡失了。」 而 仁義也。 録 測 己。」或問:「程子以爲心無出人,然則其有 $\stackrel{>}{\exists}$,得失之易,而 能 出 操 學者當無時 處耳。 操而存之,則此 逐物之心暫息 耐 「心豈有出 舍 輔氏曰:「孔子之説,是直指 逐 物於外,與 而 忽在此,忽在彼,亦無定 然所謂 言 耳。 孟 有定所。」〇 _딘 人者,亦非 則此 子引之,以 心不放 而 保守之難,不 其偶存於内者,皆 出 出只指外而 操之之道,敬 不 心 而 用 心常存,無 逐物者,固 而 未嘗 陳 其力,使 此 常爲 氏 | 不在 心 E 言、人只指 明 但 既 主於内 處 人心 贵 内 「忽然 出 不 可 非 心 荒 矣。 操之便 能 愐 本 之 以 有 神 言 適 頃 出 忽 心 復 操 之。 出 直 出 神 學 而 刻 自 無 而

極

有

隙光半 晷 往,則 底,其他 但 養,使其萌蘖 所生,又關乎 其認取此 然。」○永嘉 爲不害其理,則夜氣之所養益厚。 自 清 旦 理 却只是這一事 也。」〇又曰: 自 而 1然清明· 晨興略略 ,則旦晝之所爲益無不當矣。 言,只是要人操而存之耳, ,所以索然無有平旦之氣。 可見矣。」《語録 一畫之間,不至梏亡,則 義 ,則平旦未與物接之時,湛然虚明 夜氣方和平,既 之心未嘗無,唯持守之即 點 道 萌 時 虚静,至平旦亦然,至旦 [理總包在裏面。] ○ 見得 體段,從此養去也。 陳氏曰 葉,便 不漸漸 直 「操之之道,惟 最 一畫之所 微眇, 、緊要。 光明 是 良 「此段境界,乃 和平則平旦之氣亦 ě 轉 爲,惟 則 這主一無適底道 心 步 雖當旦 發 便 「氣與理,本相依。 見 日 在 非 形雖 去利欲 處。 愚聞之師 敬以 晝 是如物之散失而後收之 日間 蓋平旦之氣,乃夜氣之 書,也 一暮應 夜氣 之所爲者能 具 指 人於 夜之所息既 直 而心 血 梏亡者 示喪 事接物時,亦莫不 内。 如平旦 愈清。 氣 在 此 理,却是一 清 則亡,於 上走,終 失良 如今做工夫 爾。 時 明。 트 : 矣。 寡 能 日 不 心者,欲 氣象, 與 有 持 那 則 畫之所 夜氣 若於 人, 禽獸 八日唇 今人 箇大 時 物 夜 循 助 俱 涵 有 氣 於 得也。

見,音現 至矣,吾如 未有能生者也。吾見亦罕矣,吾退而寒之者 雖有天下易生之物也,一 孟子曰:「無或乎王之不智也。 或,與惑同 奚擇馬?」孟 力,宜熟玩 有萌 ,疑怪也。 而深省之也 子發此夜氣之説,於學 焉何哉? 王,疑指齊王 日暴之,十日寒之, 易,去聲。 暴,步 者

其如之何哉?」 者至矣。 猶草木然, 煙之以陽則生, 寒之以陰則悴。 也。 也。 見之時常少,理義灌 真氏曰:「人主之心,養之以理義則明,蔽之以物欲則 暴,温之也。 雖 我退則 猶煗之日寡 有萌 諂 蘖之生,我亦安能 我見王之時少,猶一 諛 溉之益,其能幾何? 而寒之日多,雖 雜 進之日多 有萌芽,旋 7,是 如 退 之何 + 正人賢 耐 日 H 以 復 邪説 暴之 哉 寒之 摧 1 晷

今夫奕之爲數,小數也。

不專

心致

志

則

不

奕秋,通國之善奕者也。

使奕秋

誨

トレ反

子、范氏之説,是乃所

謂

Œ

君

養德之道

必如是,然後

事

無本,知

求

治

൬

不

知

Œ

君

知

攻

過

而不知

養

德。

若

程

君德成而治有本,庶幾三代可復。不然,雖欲言治、

苟

人奕,其一人 雖 聽之,一心 專 以 心 致 爲 有 志,惟奕秋之爲 鴻 鵠 將至, 思 援 聽 弓 繳

而已。

弗若與? 曰:非然也。」夫,音扶。繳,音灼。射,而射之,雖與之俱學,弗若之矣。爲是其智

奕, 圍 棊 也。 數, 技 也。 致, 極 也。 奕 秋,食亦反。爲是之爲, 去聲。若與之與, 平聲。

善奕者名秋也。

繳,以繩

繋矢而

射也。

接賢 程子 所 用 則 識 口 爲 士 以 者恨之。范氏曰:「人君之心,惟 大夫之時多,親宦官宫妾之時 講官,言於上曰:「人主一日之間, 涵 養 氣 質, 而 薰 陶 德性。」 時 不 少, 能 在

所不

辟

也。

惡、辟,皆去聲,下同

少 能 則 一, 而 養。 勝 愚。 **念**衆,正 亂 然賢 君子養之以善則智,小人養之以 日常多,蓋 不能 人易踈,小人易親,是 勝邪。 以 此 自 也。」輔氏曰:「後世 I 古 國 家 治 以 日 寡 常 不 惡 作

> 也。二者不 生,亦我所欲 〇孟子曰:「魚,我所 미 也,義,亦我所 得 兼, 欲也; 舍 魚 欲 而 熊掌,亦我所欲 也 取 熊 二者不 掌 者 也 可

魚與熊掌皆美味,而熊掌尤美也。得兼,舍生而取義者也。舍,上聲。

也。 生亦 死 我 亦 所 我 欲 所惡 所 欲 一, 有 惡 甚 有甚於死者,故 於生者,故不 爲 苟 患 有 得

只就 於生死 惡死 易於體察也。」是以欲生而不爲苟得,惡 謂 此二句,便可盡 釋所以舍生取義之意。得,得生 私慾 欲惡二者之中,分别出天理人欲,最爲明切 者,雖 也。 者 義 理者, 乃秉 衆 得此一章意。 人利害之常情, 秉彝之良心,即 彝 義 理之良 利害者,天下之常情 所謂 心。 而 天 欲 也。 輔 理 氏 惡 也。 ,使學者 \Box 死 有 欲 即 孟 一只 甚 生 而 子 所

有 所 不 避 也

何 如 口 以 不用 使 辟患者,何不爲也? 人 也? 之所 欲莫甚於生, 使人之所惡莫甚於 則 凡 可 死 以得 者,則 生者 凡

情 古 字説盡私情之意象。 設 而 有,而利害之私情乃因物而旋生出耳。」 爲之矣。 則 使 人 风可 無 秉 以 輔氏曰: 偷 彝之良 惟 生 其不 「偷,謂偷竊。 免死者,皆將 心,而 然 則知 但 秉彝之良心乃 免,謂苟免。 有 利 不 顧 害之私 禮 此兩 吾所 義

不 由 爲 是則生而有不用也,由是則可以辟患而有

屑

是故 如 由 所欲有甚於生者,所惡有 此 其 必 輔氏曰:「由是之是,蓋指秉彝之良心而言也。」 有秉彝之良心,是以其 甚 能舍 於死者,非 生取 義

羞惡之心,人皆有之,但衆人汩於利欲而

獨

賢者

有是心也,人皆有之,賢者能勿喪耳。

喪,去聲

已矣。」 體而言。 矣。 利欲 也。 惡之心,即所謂秉彝之良心也。 忘之,惟賢者能 存則操而存也,喪則舍而亡也,存之之道,亦惟 忘,猶失記也。 中,而失記之耳。 羞惡之心,則又於全體之中 義乃吾之性,不解亡失,人但汨 存之而 才失記,便與無相 不 秉彝之良心,是指 ·喪耳。 -指其 似 八所謂 輔 則 氏 是喪 義者言 H 亡之 没於 敬 其 羞

而 簞食,一豆羹,得之則生,弗得則死。 也。食,音嗣。 與之,行道之人弗受, 嘑,呼故反。 蹴 蹴,子六反。 爾 而與之,乞人不 嘑 爾

氏曰: 不食,則羞惡之本心欲惡有甚於生死者,可見人無有 所 本心,欲惡有甚 猶惡無禮 也。不屑,不以爲潔也。言雖欲食之急 中凡人也。 豆,木器也。 繫,利害之至急切 「路人與乞丐,人之至微賤 有 蹴,踐 寧 嘑,咄啐之貌。 者 一於生死者,人皆有之也 死 也。 而 踏也。 不 於 ·食者。 此 者也。 而 乞人, 丐乞之人 猶 悪 行道之人,路 簞食豆羹,生死 是其羞惡 無 禮,寧 舍 之而 耐 輔 無

是 心者矣。 言 羞 惡 而 併 及夫欲 者 羞 悪 則 古 爲惡 矣,及

反之而不羞惡焉者,則是所欲也。」

我與? 焉 ? 萬 鍾 則 爲宫室之美、妻妾之奉、所識 爲,去聲。 不 辨 禮 與,平聲 義 而 受之。 萬 鍾 於 窮乏者得 我 何 加

者

則其 難存。 所以貴於戰兢自持,而於窒欲克己不敢緩也。」 以 惠 萬 人所以喪其良心者,固不止此三事,但姑舉其端 有,而物欲之蔽,亦人所易昬也。 識 喪之,由 也。 鍾 窮乏者得我,謂 他可以類推矣。 於 物欲之蔽雖是旋旋生出,然污下而易溺。 上言人皆有羞惡之心,此言衆人所 我 何加,言於我身無所增益 此三者。蓋理義之心 理義之心雖是本來固有,然微妙而 所知 識之窮乏者感我之 輔氏曰: 雖 也。 而言之, 此 曰 君子 凡 所 古

身死 不可以已乎? 鄉 而 爲 不受,今爲所 身死而不受,今爲宫室之美爲之。 而不受,今爲妻妾之奉爲之。 此之謂失其本心。」鄉、爲,並 識 窮乏者得我而爲之。 鄉爲 是亦 身死 鄉 爲 去

也。

聲。 爲之之爲,並如字。

孟子曰:「仁,人心也 轉不已,以 之發,其不可遏有如此者。 所固 計豐約於宴安之時,是以君子不可 心,謂羞惡之心。 以已乎」警之。 有,但危迫之際,私慾未肆,三者之念都未萌芽,故天理 不省察於斯焉。 重者,蓋爲物欲所昬,是以倒 輔氏曰: 鄉爲身死猶不肯受嘑蹴之食,今乃爲此三 言三者身外之物,其得失比生死爲甚輕。 而 人能於此而省察焉,則知所以存天理 有。 ·受無禮義之萬鍾,是豈不可以 「生死至重,三者至輕,今乃以重爲輕,以輕爲 至計 或能決死 深味此言,自能使人惕然有省也。」本 較豐約,都忘義理之心,乃其勢之使然 輔氏曰:「羞惡之心,雖人之所 〇此章言羞惡之心, 生於危迫之際,而不 至於宴安之時,私 行 義,人路 而逆施之,故以『是不可 而遏人欲矣。 也 慾紛紜,展 頃 止 刻 乎? 免 而 固

生之性」是也。《語録》曰:「仁只是天地間 仁者心之德,程子所謂「心 如 穀 種,仁則 箇生底 其

情。 不 路 心, 心 真氏曰:「仁者心之德也,而 酬 須臾 則 則 謂其具此生理而 曰人心,反謂反之於身也。 人不知己之所自 可 道 心是穀種,心之德是穀種中生之性也。 即有此仁心,而不仁則非 酢萬變之主, 豈可以 `識矣。」○又曰: 理 其 可 川則 ,而不可 口 人 角 須認得 ,程子所 須 、失矣。 以 不 功 可 處而 見其 **奥舍矣**。 知其 以二視之也。」義者行事之宜,謂之人 以 生字不涉那喜怒哀樂去。」然但謂之仁 謂 見其 言。 輔氏曰: 爲 「譬 切 有,或不 未生也。」〇又曰:「若生出了後,已是 此則 此身酬 「生之性,便是愛之理。」〇黄氏 如 於己,故 八爲 穀 輔 須臾失哉? 徑舉 種,仁則其生之性」。 氏 出 「但謂之仁而不着人身上説 知 \exists 人矣。 既曰 求, 入往來必由之道,而 孟子直以爲人心者,蓋 全 酢 體 一謂 或求之外。 反 萬 人心,則是吾身之所以 ,使人知心 耐 孔門之言仁多矣,皆 變之主,而不 之人路 失對放字而言。」〇 名之曰人心, 生之性便是理 則 故反 玩此 即仁、仁即 是乃 而 名之 吾 有 則 E 則 可 此 身 仁 上聲。

此,則 無目 調事 問: 處。」○真氏曰:「義者,人所當行之路。 白易知。 就他當行路上行。 義爲道用,均謂之路,何邪?」永嘉陳氏曰: 「孟子謂『道若大路然』, 事物物各有當行之路。 者 陷於邪僻之徑矣。 也。 義爲人路,則取其往 不 知義之猶 故各以 路, 路 無 言。 又曰「義,路 義亦言路者,謂 來必由。 足者 然道若大路 也。 不知道之猶路 也, 跬 此 孟子 步 處 道以 道 而 則 事 爲 言 不 取 處 路言 義 由 物 意 其 體 各

舍其路而弗由,放其心而不知求,哀哉! 舍,

則仁之發也,深省則智之用也。」輔氏曰:「《集註》拈起這兩字說,其警切學者至矣。惕然哀哉二字,最宜詳味,令人惕然有深省處。

人有雞犬,放則 説,正説着孟子意脉。 至重哉? 求之,心放則不知求,豈愛其 程子曰:「心至重,雞犬至輕。 弗思 知求之。 偂 夫人皆有是 已矣。」輔 有放 心,豈 氏日 心,而 至 雞 肯愛其 程 輕 犬 不 子 而 放 知 至輕 重 忘 則 求。 輕 其 知 而

出

人往來之道,又豈可以須臾舍也。

舍對弗求而言。」〇

中。 則 天理之流行,故曰 知 相離,故上兼言之。 \exists 能 愚 也。」〇 忘其至重 求 其 謂 求放心,則不違於仁 「立人之道曰仁與義,仁,體也 (應事接物之際,必能 蓋 ,則兩失之矣。 真氏 有體則不能 上兼言仁義, 哉 日 : 特 借 不 以 無用 能 然仁義 違仁。 至 不 求其 思 輕 矣。」 合乎 而 之故,是 而 既 心 之理具 喻 此下 河 時 則 日 至 重, 措 義 無 心 以 之宜矣, 於一心,若 存,心存則 通 義 專 在其 所 昧 而 用 論 夫輕重之分 以 非 使 中 求 天理 也 故 人 放心 · 矣。 心放 \Box 無 體 知 之流行, 適 義 用 警 在 輔 者 而 而 不 如 也 非 其 不 可 Æ 此

學問之道無他,求其放心而已矣。」

放 學 無 實 洒 爲 放 品掃門户 何用 無他。 心不收,則 非 物 心而已。 問之事 2,乃是用 焉? 整 蓋身如 也 古 固 功 何 且 頓 如 然其道 者 事 也。」〇 語 1爲學、 務。 中 非 屋子,心如一家主,有此家 録 庸 ₩ E 則 若是無主,則 輔 問、 》言學、 端, 皆 氏 學 思、 只 \exists 欲 然 問、 問 辯 求 亦多端 其道則 誦 其 哉? 思 此屋 詩 放心 辯四 讀 收 矣,而 不 書,孝悌忠信 而已。二〇 | 者甚 在 斂 過 此 主 於求 孟子直 心,不 切 荒 然後 屋)蔡氏 然 其 爾 容 而 能 以

去,這 求,則 收斂, 可以 也。 字字玩 己,正 之心約之,使反復入身來,自能 方驗得聖賢之言 下學而 程 明 昧 清 必 氣與平旦之氣是 日 集註》『學問 讀 : 子 矣。 放 明 知性、 人心 「或者但 書 雖日 是已得 心 逸, ()義 日 所以 一,不必 味,不可 便在,便是反復 輔氏 : 上達也。」《語録 存 知天。 從事於學問, 理 雖 一發明 則 「聖賢千言萬語 此心 見孟子 之事,固 窮 日: 志 昭 \Box 理 容易 有 與氣 也。 孟子之本意,以救異學之失。 方可 不然,則志氣昬 著, 「志者,心也。 從 歸 只 有『無 讀過也。」 着 皆 事 要 志,氣之帥 做 而 非 入身來。」○又曰 而 自 存 清 於 去,不是塊 終不能 可 他二 明 端, 本心之説 然有 學, ₩ ⊟ 以 而 蓋 然其 氣者, 愐 上 ,只是欲 也。 契。」〇 義 而 昧 「須 有 己 能 理 達。 然守 而 所 終不能 道 矣』之語 《就心上! 所 義 自 如 不 發 則 一身之氣 理 又 清 然 以 明 是, 得 尋 在 不然,則 則 白 日 明, 昭 卒 於己也。」 這 於 人將已放 向 做得主定 著 流 放逸 性之所 有 則 學 求 便 心 能 一只 於異 , 所謂 便了。 尋 由 者 放 立爲不 所 志 向 是 而 是 切 心 故 發 唇 氣 H 知 具. 不 而 夜 宜 而

九六九

來。 上達也。」此乃孟子開示要切之言,程子又發 制欲、無蠱蝕之病而日趨於理義、自能尋向上去、下學而 明之,曲盡其指,學者宜服 方,然其道則不過欲人將已放之心收約之,使反復入身 至空守此 ○又曰:「看『自能尋向上去,下學而上 則志足以帥氣, 心,無所用 無放逸之失而日就 心。」〇輔氏 日 膺而勿失也 「聖賢教人雖 達也」二句,必不 於清明; 道 足以 H 名

爲指之不若人也。信,與伸同。 痛害事也 孟子曰:「今有無名之指,屈 ,如有能信之者,則不遠秦楚之路 爲,去聲 而 不信,非疾

指不若人,則知惡之,心不若人,則不知惡, 無名指,手之第四指 也。

此之謂不知類也。」惡,去聲

豈愛身不若桐梓哉? 所 以 孟子曰:「拱把之桐梓,人苟欲生之,皆知 不知類,言其不知輕重之等也。 養之者。 至於身,而不知所以養之者, 弗思甚也。」

> 拱,兩手所圍也。把,一手所握 也。 桐、

之膚不養也。 則兼所養也。 ○孟子曰:「人之於身也,兼 梓,二木名。 所以考其善不善者, 豈有他 無尺寸之膚不愛焉,則無尺寸 所 愛。 兼 所

愛,

哉 ?

於己取之而已矣。

心焉,則自知矣。 豈待他人言之而後知哉? 貴賤小大,養其貴且大者則 愚謂"人之於身,無所不愛,則固當無所不 人於一身,固當兼養,然欲考其所養 否者,惟在反之於身,以審其輕 則亦反之於身而審其輕重於 善,養其賤且 小者則不 重 養。 而 已矣。 然 之善 ·善,此 體有

焉。 貴。 體有貴賤,有小大。 今有場師,舍其 賤而小者,口腹也。 養其小者爲小人,養其大者爲大人。 舍,上聲。 檟,音賈。 梧檟 樲,音貳 無以小害大,無以賤 ,養其樲 貴而大者,心志也 棘, 則爲賤場師 害

場師,治場圃者。梧,桐也。檟,梓也。皆

美材也。樲棘,小棗,非美材也。

人也。 養其一指而失其肩背,而不知也,則爲狼疾

爲,去聲。 飲食之人,則人賤之矣,爲其養小以失大也。 飲善顧,疾則不能,故以爲失肩背之喻。

飲食之人無有失也,則口腹豈適爲尺寸之飲食之人,專養口腹者也。

膚哉?」

雖所 曉 也 른 此言若使專養 語 ,則口腹 腹之養,軀命所 録 意謂 **ĕ** 當 但養小之人,無不失其大者,故口 使 養,而終不可 豈適爲尺寸之膚哉」此數句,説得倒了 飲食之人真無所失 此章言身,則 口腹,而能不失其大體 關,不但爲尺寸之膚 心 以小害大、賤害貴 具焉。『飲食之人無 則 П 腹之養本無害 也 有 也。 自 腹 而 則 伙 難 失

> 人屑屑 體,而 П 理會口 腹底 他 腹,則必有 自會去討喫,不到得 所失無疑。 餓 1 是以 也。」 當 知養 其 大

其小體爲小人。」
○公都子問曰:「鈞是人也,或爲大人,從

已矣。」已矣。」出,者弗能奪也。此爲大人而大者,則其小者弗能奪也。此爲大人而物,則引之而已矣。心之官則思,思則得之,也?」曰:「耳目之官不思,而蔽於物,物交也。」曰:「與是人也,或從其大體,或從其小體,何

此 蔽於外物,則 官之爲言司 職而不能思,是以蔽 物,其引之而去不難矣。 也。 亦 物物 耳司 而 於外物。 聽, 른 《語 目 又以 司 録 既 視、各 Ħ 外物交於 不 能 問 思 有 所 而

思,而 是人自 人也。 者 爲大人哉!」然此 字下得有力。 能 凡事物之來,心得 耳目之物,自 則不爲他 是爲他所蔽 是 不得,須是去思方得之,不思則不得也。 物。二〇又曰 言,下箇物字主耳目言。」心則能思, 君子固 語 遮 蔽; 録 而 蔽否?』 ĕ ∃ : 主張 《語 耳 當於思 心 失其 所蔽 目之欲 爲 「心固是元有此 起 $\bar{\exists}$ 録》曰: 「然被他引去。」○又曰: 夫然後耳目之官小者弗能奪也,是安得 大。 矣。」曰: 處用 來。」此三者,皆天之所 職 耳 能 「然。」問:「如目之視色,從他去時, 思 則 自 天之此,舊 工,能不妄思,是 若能 不 ,則視其 「立者,卓然竪起此心。」〇又曰: 物也,外物 不得 「然。 其 能奪之矣,此 思,只恃其 職,則得 有以 所當視,不視其 若不思,則耳 其 理, 立之,則 本 物也,以 能先立其 「上箇物字主外 (有此,任他如 多 而 其 而 此是最要緊,須 作 (理,而 物 以 所 目 外物 比 來 所不 思 以 以 、大者。 事 亦只 、蔽之。 爲 而 爲 與 物不 而 無 當 何却 是 交乎 職 捎 大 我 視 示 不 立 物 便

> 敬。 潤 耳。 中理者鮮矣。 蓋大者既立,則 此章之説。 與 隙,爲厥 是身之微,太倉 茫堪輿,俯 作 短,故且從今本云。 乃禽。 存者,嗚呼 此, 乃未詳 天君泰然,百體從令。」後,婺州人。 往古來今,孰 心病。 曰:「其要正在夫『先立乎其大者』之一言耳。 唯口 范氏之箴蓋得其指,未可易之也。」 仰 凡動 無 幾 耳 孰 静 一心之微,衆 垠。 稊 希! 云爲皆主於思 無此 目,手足動 是。 米。 人於其間,眇 ○范浚《心 君子 心 ? 但 參爲三才, 公卿大夫,此 作 存誠,克念克 比 而 心爲形役, 静。 欲 不隨於物 箴》曰:「茫 方, 攻之。 然有 投間 仁 於 曰 〇或問 惟 人爵 義 義 身。 忠 其 抵 乃 475 爲 不

也 信,樂善不倦,此天爵也。 孟子曰:「有天爵者,有人爵者。 樂,音洛

註

亦以

比

方釋之。

今本既多作此,而

註

亦

天爵者,德義可 尊,自然之貴 也

古之人脩其天爵,而人爵從之。 從之,蓋不待求之而自至也。或問:「有以爲從 脩其天爵,以爲吾分之所當然者耳。人爵

之者,猶言其任之云爾,如何?」曰:「是蓋嫌其猶有意於 人爵之求耳。殊不知此章之意,所以爲天理人欲之别

者,特在乎求與不求之間。有意於求,則是乃所謂「脩天 爵以要人爵」者,孟子固已斥之矣。其或不求而自至,則

是乃理勢之必至者,而又何嫌之有哉?」

其天爵,則惑之甚者也,終亦必亡而已矣。」 今之人脩其天爵,以要人爵,既得人爵,而棄

假 後始謂之棄邪?」曰:「若是者,猶五霸之假仁,猶 以要人爵者,雖曰脩之,而實已棄之久矣,何待得人爵之 要,求也。 必并其所得之人爵而亡之也。或問"「脩天爵 耐 不脩耳。聖人之心,寬宏平正,善善蚤而惡惡遲,不 得人爵 脩天爵以要人爵,其心固已惑 而 棄天 、爵,則其惑又甚焉,終 愈於不

> 如是之急迫 處之邪? 也。 且 若是言 則 彼直 棄 而 不 脩者,又將

何

〇孟子曰:「欲貴者,人之同心也。 人人有貴

以

於己者,弗思耳。

貴於己者,謂天爵也。

人之所貴者,非良貴也。 趙孟之所貴,趙孟

能賤之。

者,本然之善也。趙孟,晉卿 人之所貴,謂人以爵位加己而後貴也。 禄與人而使之貴,則 亦能 奪之而 也。 使之賤 能 以 爵 良

矣。若良貴,則人安得 而賤之哉?

《詩》云:『既醉以酒,既飽以德。』言飽乎仁義 於身,所以不願 也,所以不願人之膏粱之味也。令聞 人之文繡也。」聞,去聲 廣譽施

《 詩 • 大雅 既醉》之篇。 粱,美穀。 飽,充足也。

聞,亦譽也。 願,欲也。膏,肥肉。 文繡,衣之美者也。仁義充 令,善也。

九七四

至貴,無以復加於此矣。」 點之鼓瑟浴沂,翛然悠然,蓋將與 天理流行,一豪物欲不能爲之累。 輕,在外者愈輕,則 者,要當深明 足 日 mi 「言在 聞 譽彰 夫内外輕重之分。 我 者重,則外物輕。」黄氏 著,皆所 在内者愈重。 謂 良 (造物相爲酬酢,天下之 在 真積力久,胸中泰 顏子之節 貴 内者重,則 也。 瓢陋巷,曾 日 在 尹 「善學 外 然 氏 者

者也。

一者也。

一名,以为,是一个,是一个,是一个,是一个,是一个,是一个,是一个,我一个,我一个,我一个,我一个,不是一个,我们一个,我们一个,我们就是一个,我们就是一个,我们就是一个,我们

與,猶 之,則正之勝邪,天理之勝人慾,甚難, 也。 之勝天理,却甚易。 欲,甚易; 但 不能勝,是我之所爲有以深助於不仁者 爲之不力,則 **《語** 助也。 録》曰: 而邪之勝正,人慾之勝天理,若甚難。 「以理言之、則正之勝邪、天理之勝 仁之能勝不仁,必然之理 蓋纔是蹉 無 以 勝 跌 不仁,而 兩 件事,便被邪 而邪之勝 人遂以爲 Œ 以事言 來勝 人慾 也。 人

> 將去。 己,遂謂真不能勝 又與於不仁之甚也」,此則指當時之人爲仁不至,不能 火」,此就人之爲仁者言也。 之理而言也。「今之爲仁者,猶以一杯水救一 以干之矣。」〇愚謂:「仁之勝不仁也,猶水勝火」,此 猶自恐,怕勝他未盡 若以 正 勝邪 而 ,則須是做 在。 自 怠於爲仁者言也。 正如人身正氣稍不足,邪 「不熄,則謂之水不勝 得十分工夫,方 如此,則深有 勝 得 車薪之 火,此 他 以仁 便得 然

亦終必亡而已矣。」

助於爲不仁者矣。

以其能求句中意而得之。 言此人之心,亦且自 而天下歸之,如水勝火,斯可 而 其所爲而亡之。 不反諸己也。」輔氏曰: 趙 凡解經者,只當如此。」 見焉。 氏 怠於爲仁,終必 「能反求諸己,則其身正 曰:「言爲仁不 趙氏雖未知夫仁,然 并 至. 與

蹄。稗,蒲賣反。夫,音扶。 不如荑稗。 夫仁亦在乎熟之而已矣。」荑,音不如荑稗。 夫仁亦在乎熟之而已矣。」荑,音

荑稗,草之似穀者,其實亦可食,然不能如

之熟。 能熟夫仁。」 曰:「日新者,日進也。 之有成也。 極多。」〇尹氏曰:「日 種之美,又不可以仁之難熟,而甘爲 有成。是以爲仁必貴乎熟,而 五. 一穀之美也 猶爲仁 輔氏曰:「學者於上一病猶少,於下 而 但 五. 不 不已者,無間斷也。 熟 穀不 新 ,則反不 熟,則 而不已則熟。」輔 不 如 反 必如是, 可 爲 不 徒 他 如 他 特其 道 荑 然後 道 之 稗 病 氏

必志於穀。殼,古候反。 ○孟子曰:「羿之教人射,必志於彀,學者亦

滿 羿,善射者也。 而後發,射之法也。學,謂學射 志,猶 期 也。 彀,弓滿 也

大匠誨人,必以規矩,學者亦必以規矩。」 大匠,工師也。 教,弟子舍是則 言事必有法,然後 人之道乎? 輔氏曰: 無 規矩,匠之法也。 以 「《集註 可 學。 成。 》謂『事 曲 師舍是則 藝且然,況 必有法, 然後 無 此 章 聖 以

> 也。 教者與受教者舍彀而言中,舍規矩而言巧,則皆所謂 能中矣。 而無失,方可以言巧。 成』者,當矣。 則,故易於求中。 若夫欲學乎道 工者守乎規矩而真積力久焉,則能巧矣。 然彀之所以爲射法者,蓋射 而 規 處下 故射者志乎彀而 矩之爲匠法者,器 闚 高,舍近 鶩 遠,不務 真 泌先 必 行積 滿 力久焉 正 而 下 其 後 若夫 學 方 力 則 圓 始 而 誣

有

孟 子卷第十

徑

欲上達者

则 则

亦終無所成而已矣。」

後學 成德 挍 訂

九七五

孟子卷第十二

子不能

對。

明日

之鄒

以告

孟子。

孟子

於答是也

可有??

於,如字。

何有,不難

也。

不親

迎,則得妻,必親迎乎?」迎,去聲。

屋 廬

後學趙順孫纂疏

朱子集註

告子章句下

凡十六章。

任人有問屋廬子 曰:「禮 與食孰重?」曰:

禮重。」任,平聲。

任,國名。 愚案: 任,薛同姓之國,在齊楚之間 屋

廬子,名連,孟子弟子也

色與禮孰重?」

任人復問也。

禮食,則得食,必以禮乎? 曰:「禮重。」曰: 以 禮食,則 親迎,則不得妻; 飢 而死; 不以

> 揣,初委反 末,謂上。方寸之木至卑,喻食

不揣其本而齊其末,方寸之木可使高於岑

樓。 本,謂下。

若不取其下之平,而升寸木於岑樓之上, 齊,固當揣其本以齊其末,不可只據其末以定其高卑。」 則寸木反高,岑樓反卑矣。 色。岑樓,樓之高鋭似山者,至高,喻禮 輔氏曰:「物之不

金重於羽者,豈謂一鉤 鉤,帶鉤 也。 金本重 金與一 而 帶 鉤 興羽之謂 小,故輕,喻禮 哉?

喻食色有重於禮者。輔氏曰:「物固有重而有 有輕於食色者。 羽 本 輕 而 輿多,故重,

然重者少而輕者多,則輕者反重,而重 者 反輕矣。」

取食之重者,與禮

之輕者而比之,奚翅食

色重? 翅,與啻同,古字通用,施智反。重? 取色之重者,與禮之輕者而比之,奚翅

禮 翅,猶言何但。 性,不得妻 食親 迎, 而 禮之輕者 廢人倫,食色之重者 言其相去懸絕,不但有輕 也。 飢 而 死 以 也 滅 奚 其

宜矣。」

重之差而

Ë

乎?』」終,音擊。摟,音婁,則不得妻,則將摟之終,則不得食,則將終之乎? 踰東家牆而摟往應之曰:『終兄之臂而奪之食,則得食,不

尺 聖賢於此 有 爲尤重也。 者,禮與食色皆其重者,而 終,戾也。 視於理之當然而已矣。 而 大分,然於其 直尋,亦未嘗膠柱而 ,錯綜斟酌,毫髮不差,固不肯枉 摟,牽也。 〇此章言義理事物,其輕 中,又各自有輕重之别。 處子,處女也。 調瑟,所以 輔氏曰: 以之相較 「章旨之説於 斷之, 了,則禮 此二 重固

> 直尋, 聖賢處事之權 度未審 拙 ,則凡於事 者 必 度, 至 於 物 固 膠 膠轕 Ξ 柱 深 得 難辨之際,巧者必至 而 調 其要矣。 瑟,終不 苟或 能 義 得 理 夫 一於枉 時 未 精, 措 尺 之 而 權

子曰:「然。」○曹交問曰:「人皆可以爲堯、舜,有諸?」孟

長,句。 「交聞文王十尺,湯九尺,今交九尺四寸以 然曹交之問,又初不言是孟子説,故疑是古語有之。」 也。 曹已滅矣,交特姓曹者爾,謂爲曹君之弟者,趙氏 趙氏曰:「曹交,曹君之弟也。」愚謂: 人皆可以爲堯舜,疑古語,或孟子所嘗言 輔氏曰:「孟子言必稱堯舜,故恐或是孟子所嘗言 食粟而已,如何 則 **司**? 春 誤 秋 也 末

是 舉 此,力不能 曰:「奚有於是? 亦 百鈞,則 曹交問也。 爲 烏 獲 勝 爲 丽 有 食粟而已,言無 已矣。 兀 力 人矣。 離,則 亦爲 夫人豈 之而 爲 然 無 則 他材能 已矣。有人於 力人矣。 舉烏獲之任 以 不 勝爲患 也 今日

九七八

哉? 弗爲耳。勝,平聲。

案:秦武王好以力戲,力士烏獲至大官。能舉移「匹爲鶩」是也。烏獲,古之有力人也,愚匹,字本作鳴,鴨也,從省作匹。《禮記》説

干鈞。

而已矣。」之、行,並去聲。

能也。 所以爲之,乃在夫行止疾徐之間,非有 豈. 性 豪末於其間哉。」楊氏 舜之聖,爲人倫之至,亦 知愛其親者,及其長也,無不知敬其兄者,是 陳氏曰: 也。 能加豪 本於性之自然,初 堯舜,人倫之至,亦率是性 「孝弟者,人之良知良能,自然之 末於是哉?」輔氏曰: 不過率 曰 -非 有 所勉强矯 是 堯舜 性而 充其 之道大矣, 揉 「孩提之童,無 而 (量耳 所謂 能 也。 而 贵. 良 能 知 르 雖 甚 而 加 堯 良 不

> 矣。 子服堯之服,誦堯之言,行堯之行,是堯 氏曰: 高 蓋日用而不知』者,其警發於人,尤爲切至也。」 堯舜上説,而本於孝弟之近。 二説互 子服桀之服,誦桀之言,行桀之行,是桀 難 行之事 「陳氏是就孝弟上説,而 也,百 姓蓋 極於堯舜之聖。 日 用 相 而 發明,所 不 知 楊氏是就 謂 耳 百百 而 已 輔 姓

此也。」 不以難而 爲堯舜邪? 爲堯舜,所以誘曹交之進 時,禮貌、衣服、言語之不循乎理,其必有所不免矣。」故 湯、文較也,人皆可以爲堯舜,豈謂是歟? 之間,多不 孟子告之如此兩節 交蓋全未知大學。 淺陋麤率,必其 言爲善爲惡,皆在我而已。 沮 人,亦不以易而 勉之以孝弟,又勉之以衣服、言行之間,固 循 理 又以孟子所告兩節言之,則其 輔 進見之時,禮貌衣冠言動 也, 云。 氏 許 曰:「此 然 人。 亦豈 蔡氏曰 惜乎曹交之不足以 謂 指其以身之長短 詳曹交之問 :「孟子以人皆可 不 假 觀此之問,則 脩 爲 而 進見之 即 龃 可

不屑之教誨也。

輔氏曰:「使交能因是而思孟子所

蓋孔子餘力學文之意,亦

而

不容其受業。

至,求道之心又不篤,故

孟

子教之以孝弟,

曰:「交得見於鄒君,可以假館,願留而受業

於門。」見,音現。

曰:「夫道,若大路然,豈難知哉? 人病不求曰:「此亦是富貴者之習氣,都未知那居無求安之味在。」假館而後受業,又可見其求道之不篤。輔氏

音盤。

耳。 道不必索於外而存 處,無不發見。 其 自棄而不肯 人所共由者 師 則性分之内,萬理皆備,隨處發見,無不可 言道不難知,若歸 (自然之性,則一 子歸而求之,有餘師。」夫,音扶 ,不必留此 也。 而察之、而體之,則師不必求於外,而得 初匪 性之中,萬理皆備,日用之間,隨所感 而受業也。 誠 矣。」〇 能即 |難知,但患人蔽於私,役於氣,自暴 而 其孝親弟長之良知良能 求之事親敬長之間, 曹交 輔氏曰: 事 長之禮 「道若大路然 既不 而 遡

詩也。』」孟子曰:「何以言之?」曰:「怨。」弁,○公孫丑問曰:「高子曰:『《小弁》,小人之以不容己受業之故,而得其説,則是亦所以教誨之也。」

爲作此詩,以敘其哀痛迫切之情也。伯服,而黜申后、廢宜臼。於是宜臼之傅幽王娶申后,生太子宜臼。又得褒姒,生幽王,齊人也。《小弁》,《小雅》篇名。周

仁也。 射,食亦反。夫,音扶 無 關弓而射之,則己談笑而道之,無他,疏之 也。其兄關弓而射之,則己垂涕泣而道之, 曰:「固哉,高叟之爲詩也! 他,戚之也。《小弁》之怨,親 固矣夫,高叟之爲詩 也 有人於此,越人 親 _! 也。 關, 與彎同 親親,

氏曰:「此正程子所謂 或 古 名。 謂 執滯不通也。 道,語 也。 『性中只有箇仁義禮智而已,曷嘗 親親之心,仁之發 爲,猶治也 越 也。 蠻 夷 輔

九八〇

有孝弟來? 仁主於愛,愛莫大於愛親者』是也。」

曰:「《凱風》何以不怨?」

安其室,七子作此以自責也。《凱風》,邶風篇名。衛有七子之母,不能

可磯,亦不孝也。磯,音機。之過小而怨,是不可磯也。愈疏,不孝也,不過大者也。親之過大而不怨,是愈疏也,親曰:「《凱風》,親之過小者也。《小弁》,親之曰:「《凱風》,親之過小者也。《小弁》,親之

若此 可 號 惡,恝然不少動其心,而父子之情益薄矣。 親之過小,則特以 父子之至愛。 磯,水激石 也。《文集》曰:「問:「親之過大,則傷天地之太和,戾 而 ·磯是如此否?」曰:「得之。」 奮 而遽怨焉,則是水中不可容一激石,一有激石 一怒矣。 此之謂不可磯。 若此而不怨焉,則是坐視其親之陷於大 也。 時之私心,而少有虧于父子之天性 不可磯,言微激之而 故二者均爲不孝也。 此之謂愈疏。 遽 「,則叫 怒 不

孔子曰: 『舜其至孝矣, 五十而慕。』」

言

舜

下此數語極切當,不易得他究到這裏。 以《小弁》之怨,未足爲 吸,氣通於親。 ○趙氏曰: 「生之膝下,一 當親 而 您也。」輔氏曰: 疏 體而 怨 學者儘當玩 慕 分。 號 天 喘 「趙氏 息 繹。」 是 呼

宋、姓、牼、名。石丘、地名。

曰:「先生將何之?」●

趙氏曰:「學士年長者,故謂之先生。」

不舍。」疏云:「齊宣王時人。」以事考之,疑 者,禁攻寢兵,救世之戰。 王 時 也。 宋 經方欲見楚王,恐其不悦, 遇,合也。 案《莊 子書》: 上説下教,强 則 有 將 見秦 宋 聒 鈃

猶怨慕,《小弁》之怨,不爲不孝也。 0 「生」,原誤作「王」,今據四庫本改。

即此人也。

志則大矣,先生之號則不可。如?」曰:「我將言其不利也。」曰:「先生之曰:「軻也請無問其詳,願聞其指。説之將何

可。 不可 徐氏 故反陷於不善而不自知也。」 之説,非志之大者,固 民爲説,其 此蓋聖學不明,人雖有善心,而不知所以爲之之道 也。」輔氏曰: 曰:「能於戰國擾攘之中,而以罷兵息 志 可 謂 「當戰國擾攘之時,而爲罷兵息民 有 大矣。 所不 能。 然以 然以利害爲説,則不 利爲名 「, 則

其父,爲人弟者懷利以事其 爲人臣者懷利以事其君,爲人子者懷利以事 罷 先 楚之王,秦楚之王悦於仁義,而罷三軍之師, 者,未之有也。 子、兄弟終去仁義,懷利以 生以 軍之師,是三軍之士樂罷而悦於利 利説 秦楚之王,秦楚之王悦於利 樂,音洛,下同。 先生以仁義説 相接,然而 兄。是君臣、父 不 以以 也。 秦 亡

父,爲人弟者懷仁義以事其兄。 者,未之有也。 子、兄弟去利,懷仁義以相接也。 然而 懷仁義 軍之士樂罷 以事 其君,爲 何必 而 悦 曰利?」王,去聲 人子者懷仁義 於仁 義 也。 是君臣、父 爲 以 人 不王 事 臣 其 者

牼一言而罷之,豈非 察而明辨之也。真氏曰:「戰國交兵之禍烈矣,宋 利之殊,而其效有興亡之異,學者所 有甚於交兵者,是以聖賢不得不嚴其 顧利端一開,君臣、父子、兄弟大抵皆見利而動,其禍又 此章言休兵息民,爲 生民之福 事 則 而仁人之所甚 一,然其 防也。」 願 心 者 當深 有義 哉

不報。任,平聲。相,去聲,下同。 不報。處於平陸,儲子爲相,以幣交,受之而 不報。處於平陸,儲子爲相,以幣交,受之而

不報者,來見則當報之,但以幣交,則不必國,季任爲之居守其國也。儲子,齊相也。趙氏曰:「季任,任君之弟。任君朝會於鄰

報也。」輔氏曰:「來見則禮意重,幣交則禮意輕也。」

子。屋廬子喜曰:「連得閒矣。」他日由鄒之任,見季子,由平陸之齊,不見儲

屋廬子知孟子之處此必有義理,故喜得其

閒隙而問之。

其爲相與?」爲其之爲,去聲,下同。與,平聲。問曰:「夫子之任見季子,之齊不見儲子,爲

輕之邪?

不享,惟不役志于享。』曰:「非也。《書》曰:『享多儀,儀不及物曰

于享故 稱,然後成享。 禮,幣有餘 禮意不及其幣,則是不享矣,以其不用志 儀,禮也。 書》,《周 也。 而 禮 書 物、幣也。 蔡氏曰: 不 或偏勝,是心有慢上者矣,與不享同 洛 浩 》之篇。 -足,亦 所謂不享也。」〇 「享,朝享也。 役,用也。 享不在 享,奉上) 愚謂 言雖 幣而 儀 享 物 在於 也。 前 相

爲其不成享也。」

孟子釋《書》意如此。

之鄒,儲子得之平陸。」屋廬子曰:「季子不得屋廬子悦。或問之。屋廬子曰:「季子不得

禮,而季子、儲子皆非惡人,而亦有可受之理歟?」 也。 其宜如此。 曰:「此章見孟子於禮意之間、是否之際,權衡輕 子之所爲,一視其禮意之輕重,而行吾之義而已。」○蔡氏 不來,則是制於禮者也。 交,而禮意不及其物也。」輔氏曰: 孟子,則 相,可以至齊之境内而不來見,則 徐氏曰:「季子爲君居守,不得往 制於禮者,欲爲而不可。 然皆以幣交而皆受之,豈孟子當時亦有幣交之 以幣交而禮意已備。 得之平陸而不至,則是簡於禮者 簡於禮者,可 爲 儲 「不得 他 耐 雖 子 不欲 或 之鄒 以 爲 以 幣 齊 見 тí

去聲。
○淳于髡曰:「先名實者,爲人也。後名實者,自爲也。夫子在三卿之中,名實未加於

於 而 名 而 Ĩ. 「, 聲 不爲者,是欲獨 爲之者,是有 一下,言上未能 譽 也。 實,事 志於 善其 IE. 功 救 也。 其君,下 民 身者也。 也 言 以 以 未能 名實 名 名 實 實 濟 未 爲 爲 其 加 後 先

民

也。

也。 矣,何必同?」惡、趨,並去聲。 小官者,柳下 五就 孟 子曰:「居下位,不以賢事不肖者,伯夷也。 湯,五就桀者 者何也? 惠 也。 一**,** 伊 曰:仁也。 三子者 尹也。 不同 不惡 君子亦仁 道 汙 ~, 其 君,不 而已 趨 辭

天理。 以 矣。」〇問: 心,以 而 以爲當理 仁者,無 爲當 合天理。」 私 心而 存諸心 理 其先後不同 2而無私 恦 行 私 「《論語》於令尹子文、陳文子之事,註引師 無私 ·楊氏曰:「伊尹之就湯,以三聘之 事 而言。 心 有 心; 心則仁矣。今又以爲仁者無私 不 而 ,何也?」曰:「彼就二子之事而 合天理者,唯 合天理,以 此直指夫仁而言,故曰仁者無私心 合天 理 之謂 行 諸外 仁 則 而言。 内外 輔氏 合、天 日 人固 心 無 言,故 而 人 有 説 合 備 私 雖

必

能

有爲也。

矣。 之意 曰 : 也。 而 伐之耳。 遷善而已。伊尹 勤 也。 伊 「楊氏真得湯、伊尹之心,足以洗世儒之惑。」 以取天下爲心,豈聖人之心哉?」輔 尹遂 哉 及其終也 ? 其 若湯初求 就 相 其 桀 之以伐桀,是以 進 也,湯 ,人歸之,天命之,不得已而 既 伊 尹 就湯 伊尹,即 進之 以 事之也 ,則以湯之心爲 也。 有伐桀之心, 取天下爲心 湯), 欲 贵 其 有 悔 伐 心 過 桀

國也!」 臣,魯之削也滋甚。若是乎賢者之無益於日,「魯繆公之時,公儀子爲政,子柳、子思爲

削,地見侵奪也。髠譏孟子雖不去,亦未公儀子,名休,爲魯相。子柳,泄柳也。

不用賢則亡,削何可得與?」與,平聲。曰:「虞不用百里奚而亡,秦穆公用之而

百里奚,事見前篇。

其夫 於高 也 而 日 一,有則髡必識之。」華,去聲 無 介而 唐, 其 昔者王 功 變 而 者, 髠未 國 齊 豹處於淇 俗。 右 善. 有 歌 嘗 諸 覩 内 華 而 之也 必 周、 河 形 西善 杞梁之妻 諸 是故 謳 無 爲 緜 賢 其 善 駒 者 哭 事 處

髠 死於莒。 高 内郡共縣北 王豹,衛 以 [唐,齊] 此機 西 人,善謳。 Щ 孟 其妻哭之哀,國俗化之皆善 邑。 東至黎陽 子仕齊無功,未足爲 華周、杞梁,二人皆齊臣 淇,水名。 入河。 緜 駒,齊 愚案: 賢 也 淇 水 善 出 哭。 一,戰 歌 漢 河

者以爲 音脱。 欲爲 至,不税冕 日 荷 爲肉、爲無之爲,去聲 孔 去。 爲 子 無 爲 而 禮 君子之所爲,衆 行。 魯 也 司 寇 不 乃孔 不不 知者以 子則欲 甪, X 爲 從 固 爲 而 以 不 祭,燔 肉 微 識 也,其 罪 也 行,不 肉 税 知 不

人聞而懼,於是以女樂遺魯君。季桓子與案《史記》:「孔子爲魯司寇,攝行相事。齊

但曰 意忠厚』兩語斷之,亦可謂 而不欲言之者矣。 子引孔子之事以答淳 不 顯 爲深知孔子者。 爲爲 魯君 日 子之所爲,豈髠之所 而 以 又不致膰 夫,則吾 以 其 用意忠厚,固 行矣。』孔子曰:『魯今且郊,如 衆 肉者 君 女 往觀之,怠於政事。 人 淳 固 樂 相之失,又不 于 猶可 不 去,而 ,固不足道,以爲爲 俎于大夫,孔子遂行。」孟 髠 識 者, 未 以止。』桓子卒受齊女 至孔子之事、《 嘗 非 此 于髡,則 以 蓋聖人於父母之國,不 又見 衆 知 膰 善言 能 仁, 人 欲 肉 孟 孟子之去齊, 識 所 聖 子 行。 爲 亦 子路 集註 人也。 哉 忠 能 無 未 厚之意。」 ? 識 》以『見 其 故 嘗 無 曰 : 不 也 輔氏 見 而 禮 識 E 亦 致 幾 苟 ! 髡所 幾明 則 夫 賢 日 子言 然則 膰 必 (樂,郊 去, 明 有 也 尹 于大 亦 子 決、 不 觀 决, 所 氏 故 欲 識 孟 用 以 口 爲 孟

宜乎其言若是。」輔氏曰:「尹氏斷髠甚當,唯其如

此,故承當孟子之言不得也。」

(○孟子曰:「五霸者,三王之罪人也。今之諸侯之)

罪人也。

謂 恐非創始爲之,必 丁氏 氏曰:「此必有所傳授,決非臆説。 晉文,謂之五霸。」丁氏,名公著,唐蘇州人。 楚 趙 莊 氏 丁氏説本杜預《春秋傳註 也。 曰:「夏昆吾,商大彭、豕韋,周齊桓 曰 : 五霸 三王: 有所自 夏禹、商湯、周文、武也。」 齊桓、晉文、秦穆、宋襄 來,故取 其説而附見之。」〇愚 夫齊桓、晉文之霸 〇輔 亦

賢 天子 疆 春 有 漫,慶 ,土地辟 省 耕 適 克在位,則有 諸 而 U 侯 補 **田** 地 日 不足, 秋省斂 野治,養老尊賢,俊傑在位,則 巡 人其疆 狩,諸侯朝 讓 一, 土 一不朝 而 地 於天子曰 助 荒 不給。 則貶其爵 蕪 遺 述職。 老 其 失 ;

> 摟諸 罪 再不朝,則削其地,三不朝,則六師移之。 故天子討 人也。 侯以 朝,音朝。 伐諸侯者也,故 而 不 伐,諸侯伐 辟,與闢同。 **日**: 而不討。 治,平聲。 五霸者,三王之 五霸者

帥諸 也。 也。 諸侯,不用天子之命也。 罪而伐之也。 摟,牽也。 慶, 「六師移之」,言述職 則有讓 賞也,益其 讓,責 討者,出 侯以伐之也。 」,●言巡狩之事。 也。 命以 移 地以賞之也。 之者 討 伐者奉天子之命,聲 之事 其 1, 誅其 、罪,而 五霸牽諸侯以 白「入 自 使 人 掊克,聚 耐 方 一不朝 其 伯 變 疆 置 連 伐 至 至 其 帥 之 斂

以 而 五霸,桓公爲盛。葵丘之會諸侯,束牲、載 妾爲妻。』再命曰: 不 歃 血 初 命 曰: 『誅 『尊賢育才,以彰有德。』 不孝,無 ぶ易樹 子 無 書

● 「讓」,原誤作「責」,今據四庫本改。

侯,五霸之罪人也。 好。』今之諸侯,皆犯此五禁,故曰:今之諸 告。』曰:『凡 『士無世官,官事 夫。』五命曰:『無 三命曰:『敬老慈幼,無忘賓旅。』四命 輔氏曰:「但壹意以明天子之禁而已。」樹,立也。 已 案《春秋傳》: 而不殺。 讀 我 書加於牲上,壹明天子之禁。」 同盟之人,既盟之後,言 「僖公九年,葵丘之會,陳牲 無攝, 曲 歃,所治反。 防,無 取士必得, 遏 糴 糴,音狄。 ··, 無 無 有 好,去聲。 專 封 歸 殺 而 \Box 于 大 不

長君之惡其罪小,逢君之惡其罪大。今之大 得閉 專小 也。 邑而不告天子 無專殺大夫,有罪則請 糴 利 無 也。 病 曲防 鄰 不得 無 或 也 有 也 封 曲 而不告者,不得 無 爲 隄防 遏 命于天子而 糴 **鄰** ,壅泉激水,以 或 凶 專封 後 荒,不 殺之 或

之罪人也。」長,上聲。 夫,皆逢君之惡,故曰:今之大夫,今之諸侯

罪,則 之惡者,有才而傾險,陰邪之人也。」〇林氏曰:「邵 也。』孟子此章之義,其亦若此也 有大於五 之間,有功者未有大於五霸,有過者亦 子有言: 輔氏曰:「長君之惡者,無能而巽懦,阿諛之人也。 君之過未萌,而 君有過不能諫,又順之者,長君之惡 事 無 『治《 霸 統 理,而 春 故 先意導之者,逢君之惡 Ŧi. 秋》者,不 霸者, 不得聖人 功之首,罪之魁 先 八之心。 治 Ŧi. 與? 霸 之功 春 逢君 也 也 秋 然

也。

官事

無

攝

當

廣

求

· 賢

オ以

充之,不可

可

忽忘也

士世

禄

而

不世官

恐其未必賢

賓客也。

旅,行旅

也。

皆

當當

有

以待之,不

是不子,易樹子是

不父,以

妾爲

妻

則

無

夫婦之道。」賓

世子必告於天子而後立,既立,則豈可擅自易之。

不孝

正家之要也。

輔氏曰:「不孝是惡之大者,故居首

立世子,不得

擅

易。

初命三事,所以

脩

身

以

闕

人

廢

事

也。

取

士:

必得,必得其人也。

皆出於異世,故得以逃其罪。 Ŧī. 侯非惟莫之罪也,乃反以爲良臣 夫,且得罪於今之諸侯,則同 霸 不以爲罪而反以爲功,何其繆哉 得 罪於三王,今之諸 侯 得罪 時矣。 至於今之大 於 而 Ŧī. 而諸 !! | 輔 厚禮 霸,

○魯欲使慎子爲將軍。

慎子,魯臣。

者,不容於堯、舜之世。 | 孟子曰:「不教民而用之,謂之殃民。殃民 |

謂之殃民。在堯舜之仁政,豈容之哉?」 打頭目,子弟之衛父兄矣。不然,則是陷之於死地也,故 其民,乃可以即戎使之敵愾禦侮,臨戰之際,皆如手足之 上也。 用之,使之戰也。輔氏曰:「能如是而教 大也。 用之,使之戰也。輔氏曰:「能如是而教

戰勝齊,遂有南陽,然且不可。」

曰:「只以孟子獨言「遂有南陽」,便可見也。」故孟子是時魯蓋欲使慎子伐齊,取南陽也。輔氏

慎子勃然不悦曰:「此則滑釐所不識也。」滑言就使慎子善戰有功如此,且猶不可。

音骨。

滑釐,慎子名。

氏曰:「邵子可謂善治《春秋》者,孟子雖取桓公之五命,

而猶以五霸爲三王之罪人,得《春秋》之大指矣。」

不足以待諸侯。諸侯之地方百里,不百里,曰:「吾明告子。天子之地方千里,不千里,

不足以守宗廟之典籍。

待諸侯,謂待其朝覲聘問之禮。宗 之哉?」 知先王之制,封國大小,自有意義,豈私 籍,祭祀會同之常制 也。 輔氏曰: 意 觀 可 此 得 而 廟 句,則 損 典 益

地非不足也,而儉於百里。 於百里。太公之封於齊也,亦爲方百里也, 周公之封於魯,爲方百里也,地非不足,而儉

二公有勲勞於天下,而其封國不過百里。

其所併 周 氏只文字上説得好看,然甚不曉事 里,周公斥而大之,中國方七千里,所以不同。]曰: 男 地 處。 十,得 得 大國 遷西移,改立宗廟社稷,皆爲之騷動矣。 何不見許多國。 塗山,執玉帛者萬國,到周時,只千八百國,自非吞併, 意其初只方百里,後來吞并,遂漸漸大。 古制。三儉,止 語 万百里。 就 人欲增 封 録》 理 孟子百里之説,亦只是大綱如此説,不是實攷得見 而封之。 便 許多空 四 方 E 医無地可 國,又當 Ŧī. 鄭氏以《王 到 問: 白 五百 地可 里, 當時 容了 武王 而 《王制 里, 諸侯 别 封,不然,則 不過之意 封許多 列 制 時 許多國何以處之? 須併四箇百里國地,方做得 方四 地 ,諸國地已大,武王亦不奈何,只 爲 》與《孟子》同 以封 功 夏商制 百里,伯三百里,子二百里 臣之國,緣 之。 周 也 公、 情。 如此,則天下諸 謂 太公,亦 而 夏商中國方三千 且如百 如此趲去,不數 當 《周 如禹會諸 恐不其然 初 禮》,諸公之 滅國者五 自 里之國 無 侯東 安 侯 「鄭 國。 頓 於 竊 如

魯地之大,皆并吞小國而得之。有王者

作,則必在所損矣。

徒取諸彼以與此,然且仁者不爲,況於殺人

以求之乎?

殃民而求廣土地者乎?」 , 一取彼與此, 仁者猶且不爲, 以其非所當得故也, 況於徒, 空也, 言不殺人而取之也。輔氏曰: 「不殺

而已。」 君也,務引其君以當道,志於

也。 也。 地,充府庫。」今之所謂良臣,古之所 ○孟子曰:「今之事君者曰:『我能爲君辟土 氏曰: 則事必合於理矣。 必不肯殺人以從欲。 當道,謂事合於理。 曰:「道之與仁,非有二也。 心之德而言,則曰仁。心存於仁,則其行無不合道矣。」 爲,去聲,辟,與闢同。 君不鄉道,不志於仁,而求富之,是富桀 「事合於理,則必不 先言當道者,就事 然此亦内外之符也。 鄉,與向同,下皆同 敢并 志仁,謂心在於仁。 以事之理 小以 爲之。 而言,則曰 説 故 心在 心苟在於仁, 耳。」〇真氏 謂 於仁,則 道。 民 賊 以 輔

辟,開 墾 也

古之所謂民 我能 爲 君 約與國,戰必克。」今之所謂良臣, 賊 也。 君不鄉道,不志於仁,而

求爲之强戰,是輔 桀 也

由今之道,無變今之俗,雖與之天下,不能一 約,要結也。 與國,和 好相與之國也。

朝居也。」

不二世而亡,則孟子之言驗矣。」 之,孟子之説似若過當。然其後六國卒并於秦,而 言必争奪而 至於危亡也。 輔氏曰: 自當 秦亦 時 觀

○白圭曰:「吾欲二十而取一,何如?」

取其一分。林氏 白圭,名丹,周人也。欲更税法,二十分而 曰:「案《史記》: 白 圭 能

其爲此論,蓋欲以其術施之國家也。」 變,人棄我取,人取我與,以此居積致富。

薄飲食,忍耆欲,與童

僕同苦樂。

樂觀

時

孟 子曰:「子之道,貉道也。 貉,音陌

> 貉,北方 夷狄之國名也

萬室之國,一人陶 則可乎?」曰:「不可,器

不足用也。」 孟子設喻以詰圭,而圭 亦 知其不可

也。

室、宗廟、祭祀之禮,無諸侯、幣帛、饔飱, 曰:「夫貉,五穀不生,惟黍生之。 無城 郭、宫 無

百官有司,故二十取一而足也。夫,音扶

北方地寒,不生五穀,黍早熟,故生之。

饔

飱,以飲食饋客之禮也。

今居中國,去人倫,無君子,如之何其可 無君 臣、祭祀、交際之禮,是去人倫。

陶 以 官有司,是無君子。 寡,且不可以爲國,況無君子乎?

因 其 辭以折之。

欲輕之於堯舜之道者,大貉小貉

也;

欲重之

於堯舜之道者。大桀小桀也。」

什一 而税,堯、舜之道也。 多則 桀, 寡 則

九八九

也?

無百

其事之易辨者以開其智,中則歷陳其不可之實以破其 也。 可謂委曲詳盡矣。」 説,末則舉堯舜之道不可 欲以其術施之國家,故孟子明辨其不可。 樂觀時變,知取知予,以此居積致富,此三代盛時所無有 制盡廢,兼并之俗起,而貧富遂以不均。 其中正,所以行之天下而安,傳之萬世 雖因時損益,有所不同,然一本於中正,則無以異也。 氏曰:「什一,中正之制也,故以爲堯舜之道。三代聖人 其犯先王之禁大矣,顧乃私憂過計,創爲輕賦之説, 今欲輕重之,則是小貉、小桀而已。 得而輕重者,使之有所歸着,亦 一而無弊。 白圭厪身禁欲, 觀其始, 周衰,王 則取 輔 惟

○白圭曰:「丹之治水也愈於禹。」 ○白圭曰:「丹之治水也愈於禹。」

喜其道之得行。

壑,受水處也。 是故禹以四海爲壑,今吾子以鄰國爲壑。

> 所惡也。吾子過矣。」惡,去聲。 水逆行,謂之洚水。洚水者,洪水也,仁人之

亮,信也,與諒同。輔氏曰:「以實之謂信,不信則○孟子曰:「君子不亮,惡乎執?」惡,平聲。水以害人,則與洪水之災無異矣。水逆行者,下流壅塞,故水逆流。今乃壅水逆行者,下流壅塞,故水逆流。今乃壅

曰:「此可以言不敬,而却謂之不亮,蓋不信實者,必苟且惡乎執,言凡事苟且,無所執持也。永嘉陳氏也。此與論人而無信章同意,此以守言,彼以行言也。」也。此與論人而無信章同意,此以守言,彼以行言也。」不實,不實則無物,而輕飄浮搖,故凡事苟且,無所執守不有,也,具言一

而不寐。」 ○魯欲使樂正子爲政。孟子曰:「吾聞之,喜

自欺也。」

者,戰 故丑 蓋 此三者,皆當世之所 皆是也。 陳之事 疑 而 多聞 皆在其中。 歷問之。 識,謂 廣 有智 輔氏曰 聞 尚 博 [慮,謂 識] 强 而樂正 多 能 知 爲計 謂 而 有强 子之所 能 謀,如 言 力可 之士 縱 短 横 辦 也。 捭 事

「然則奚爲喜而不寐?」

此三者,皆戰國之所尚,而善信之士所不屑也。」

丑問也。

足乎?」曰:「其爲人也好善。」好,●去聲,下同。「好善

丑問也。

曰:「好善優於天下,而況魯國乎?

愚謂"善取於己,則有盡。善取於人,則無窮。此其所以優,有餘裕也。 言雖治天下,尚有餘力也。

之以善。夫,音扶,下同。 夫苟好善,則四海之内,皆將輕千里而來告

雖治天下猶有餘力也

輕,易也,言不以千里爲難也。輔氏曰:「上之

而皆來告之也。」人好善,則人有善者喜得其伸,故不以千里之遠爲難

致

矣。』訑訑之聲音顔色,距人於千里之外。 諂 治,去聲 止於千里之外,則讒 夫苟不好善,則人將曰:『訑訑,予既已知之 面 之人居,國欲 諂 治, 面 諛 可 之人至矣。 得 乎?」 訑, 與讒 音 移 士

之長而已。 乎!」君子小人,迭爲消長。 原其始,則起於「予『既已知之』之意萌于中 間此等人亦甚多,然其所謂智者,是乃所以 訑 内,輕千 章言爲政不在於用一己之長,而貴於有以 遠,則讒諂 來天下之善。 訑 ,自足其智,不嗜善言之貌。 -里而 所謂「貴於有以來天下之善」者,蓋指 來而 面諛之人至,理勢然 告之以善 輔氏曰:「公孫丑所問 而言也。」 直 諒 三者,不過是己 丽 也。 多 輔氏 爲 Ë, 聞 愚 \Box 也。 四海之 可 之士 不畏 世 此 然

❶ 「好」,原誤作「行」,今據四庫本改。

九九一

「所就三,所去三。 ○陳子曰:「古之君子何如則仕?」孟子曰:

其目在下。

貌未衰,言弗行也,則去之。 迎之致敬以有禮,言將行其言也,則就之,禮

受女樂而不朝,則去之矣。 所謂見行可之仕,若孔子於季桓子是也。

之, 禮貌衰,則去之。 其次,雖未行其言也,迎之致敬以有禮,則就

與公遊於囿,公仰視蜚鴈而後去之。 所謂際可之仕,若孔子於衛靈公是也。故

也,免死而已矣。」
也,使飢餓於我土地,吾恥之。』周之,亦可受聞之曰:『吾大者不能行其道,又不能從其言其下,朝不食,夕不食,飢餓不能出門户。君

義,況此又有悔過之言,所以可受。然未所謂公養之仕也。君之於民,固有周之之

其賜,止以免其死,則時 得者以是藉口 已,此君子之不得已也。」〇又曰:「《集註》恐後之貪利苟 也,道在我,禮在彼。 就之,爲道而仕也。 也,故言此以防警之爾。 矣,固不可苟安貪得 勢利而變其初心也。 以其交際之禮爲可而 己而仕也。 交際之禮爲可而仕也。 餓瀕死,然後受之。 行可之仕,謂見其可行之幾而仕也。 免死而已,則其所受亦有節矣。 至於飢餓不能出門户,則猶不受也。 見其有可行之幾而仕,故言之弗行則去之。 而全不顧彼己之義,遂流 迎之致敬以盡禮,則就之,爲禮 然其受之,亦以 而因以爲利也。 至於周之,亦可受也,則享 仕,故禮貌 爲君以周民爲義,養己而 公養之仕,謂因君以周民爲義養 可 然使上之賜下,止周其身,下受 知矣。 一衰則去之。 免死無累其 言將行其言也 際可之仕 於欲 輔氏 此皆不以 耐 仕,則飢 曰 : 不自 其意 謂 君 其 而 則 因 則 「見 \exists 其 E 而

○孟子曰:「舜發於畎畝之中,管夷吾舉於士,孫之間,膠鬲舉於魚鹽之中,管夷吾舉於士,孫

舜耕歷山,三十登庸。説築傅巖,武丁舉

海 仲 濱 闪 膠 楚 於 鬲 士 莊 官 遭 王舉之爲令尹。 亂, 桓 公舉 鬻 販 以 魚 相 鹽 或 文 百 \pm 孫 里 舉 叔 奚 之。 敖 事 隱 管 見 處

前篇。

其筋 故 7,所以 子曰 天將降大任 撞 得 動。」然所 忍其性,則性定。 心,堅忍其性 爲不遂,多背戾 空,窮也。乏,絶也。 降大任,使之任大事 只是要事 行取 熟了, 骨 去,少 方認 動 餓 事經 謂 心忍性,曾益其所不 其 間 得 要熟, 性 定 體 許 歷過,似 於是人也,必先苦其心志, 也。 心活 墮坑 多 膚,空乏其 亦 險 也。 也 落 阻 指 則不爲欲所役,性定 輔氏曰: 須從 塹去 去 條路 氣 虚。 動心 也,若 拂,戾也,言使之 稟 也。」〇輔 河, 這 「竦動其 若素不曾 食 身,行 忍 裹 毎日 色 5舜以 能。 過。」《 性 而 氏 從 心,則心 言 曰:「人不 行, 上 謂 拂 曾,與增同 則不爲 下 面 語 忽 竦 亂 耳。 . 是 往 録 然 活 其 一來,行 動 也 Ĕ 氣 . 所 程 所 勞 其 娙 日 所 臤

> 憂患 多率 履吾室中。」 變故多,則 困 故謂 窮 頓 人要 閱 挫 義 摧 熟 理之會 屈 須從這裏 則 熟 心 不 平 熟 過。」〇永 -, 氣 謂 義 不易, 理 與 嘉陳 察 自 家 理 氏 相 不 \exists 便 盡 更 處 如 嘗 事

作。 人恒 故必事 平 見是中人之性矣。 自人常過而下,則中 曰:「舜,大聖人之事 衡慮者,人覺其有過,徵色發聲者,其過形於外。」○ 之聲,然後能警 慮,然後能 於平日,故 人之性,常必 奮起也。 恒,常也。 白 徵於色,發於聲, 過, ,至於事勢窮蹙, 然 ,理暴著,以 後 徴,驗 必 猶言大率也。 奮 能 事 有 下 發 改。 勢窮 人之事 悟 也。 困 兩句只 也 過,然後 而 心横 而 至 興 而 木 傅 观蹙,以 喻, 通 驗於人之色,發於 起。 是改過之事, 也 後 慮, 説 於 曉 而 喻 心, 始 纔言常 也。 曉 能 横,不 下, 不 能 至 改。 也。 則 衡 奮 能 衡 三語 木 皆上 過 發 與 燭 於 雖 於 順 録 此 耐 前 蓋 横 是 慮, 於幾微 興起, 智 \mathbb{F} 心 後 也。 同 不 又 不 1之事 能 〕,横於 能 言 能 改, 困 而 然必 輔 謹 也 人 謹 中 後 便 於 氏 1

竟是其 愚而已。」 察,如此故亦 著,證色發聲,始能警 才尚足以有 可以 進於善。 爲 悟 雖是不能 而 通曉,然必竟是其智尚足 若至是而猶不之覺焉 燭於幾微,至 於 事 則下 理暴 以 有

亡。拂,與弼同。 一人則無法家拂士,出則無敵國外患者,國恒

能正其失於事。 拂 矣,故此推 此言國 士,輔 一亦然 言 拂之賢 在國亦然。」 也。 輔拂之賢士,則能救其過於身。」 士也。 輔 氏 法 ⊟: 輔氏 家,法度之世 上既 曰:「法度之世 言 上智中 臣 人之事 臣 也 則

然後知生於憂患而死於安樂也。」樂,音洛 之者多矣。」輔氏曰: 拂鬱,能堅人之志,而熟人之仁,以安 心 戒則心體流行而不息,是生道也。 死亡由於安樂矣。 以 死矣,心死則身亦隨之。」○尹氏曰:「言困 上文觀之,則知人之生全出於憂患,而 輔氏曰:「憂患則 「此言深切,非深履而得 安樂則怠 知 肆, 做 戒 怠肆 樂失 其味 知 窮 則 儆

決不能知。」

者,是亦教誨之而已矣。」 〇孟子曰:「教亦多術矣,予不屑之教誨

也

《語録 因 能 其人爲潔 子不屑就與不屑不潔之言,屑字皆當作潔字解。」不以 多術,言非 尹氏 其 感 (才而篤之,無非教也。) ĕ ⊟ : 此,退自脩省, 曰 : 「如坐而言不應、隱 而 一端。 「言或抑 拒 絶之,所謂 屑,潔. 或 則 《揚,或 是 几而卧之類。三其人若 也。《語録》 亦我教誨之也。 不 與 屑之教誨 或不與,各 曰:「考孟 也。

孟子卷第十二

後學 成德 校訂

孟子卷第十三

朱子集註 後學趙 順 孫 纂 疏

乎此

心之量。

故能

極

其

心

之全

體

而

無

不

莫非全體,然不窮理,

則

有

所

蔽

而

無

以

盡

盡

者

,必其能

窮夫理

而

無

不

知

者

也。

或問

盡 心章句上

凡 四十六章。

以平居:

静處

虚 盡 無所

明洞

達

固

無豪髮疑慮存於胸中,至於事

所不知

",则

固

其

無所不

統之體,無所不周之用矣。

是

不統,而其用

不周

者

也。

今窮理而

貫通,以

至

於 無所

無

心無限量者也,此其言盡心,何也?」曰:「心之體

知天矣。 孟子曰:「盡其心者,知其性也。 知其性, 則

也。《語録》曰: 心者,人之神明,所以 這 箇神 明 具衆 不 測、 理 至 虚 而 至 應 靈, 萬 是 事 甚 次

神妙 第。」〇黄氏曰:「心也 而不測,主宰乎一身,總括乎衆理,]者,與 生俱 生者 也, 應 虚 酬乎萬 靈 愐 事。」 應

性 一則心之所具之理、語録 ¥ 「性便是許 多道 理

得之於天而具於心者。」而天又理之所從以

出

者 者 至物 貴於窮理。」○又曰:「心性本不可分,況其 氣質偏了,又爲物欲所蔽 心本來虚靈,萬理具 只看鏡子,若有些 所以盡之也。」○《語録》曰: 心,則心之體用 之之方,奈何?」曰: 心者,則固未嘗有限量也。」曰:「然則心之爲物 間者,亦無不判然迎刃而 來,則雖舉天下之物,或素所未嘗接於耳目 在 小 我,不必 備 照 由 事 不見處, 窮理 , 故 解,此其所以 事 先事 杰 昬 物物皆 致 而 便是 揣 心 知積累其功,以 不 如明 量 能 本 所當知。 着 盡 爲盡心。 身 鏡,無些子蔽 意想 知 有 語 ,故聖賢所 此 脉是 象, 今人多是 塵 與與 汙。 至於 1思慮之 而 而 二盡 别 其 所 翳 其 以 此 求 盡 謂 盡

也。 《文集》曰: 「天以公共 道 理 而 言 $\bar{\circ}$ 輔 氏 日 : 山此

三語

斷置得心性天三者,可

謂

精

密

矣。」人有是

九九五

故凡 之中, 三者蓋所從言之異耳,要之,性即 謂之天,自稟受言之謂之性,自存諸 然,故《集 則 性, 闕 酬 豪蔽惑,然後吾心之體至通至明, 禮 實理上窮究得 實具於心,可 便 盡其心之體量 却是實理 性 心 此 知其性 是盡其 酢 測,容受得衆理而應變不 知性 斯 數語 能盡此 可 知 ,則無奈這心,何視之如寇賊而 爲 以 人須是 其 説得 則 盡 心之實理,若不知 矣, 盡其 心。 (性」。 註 知天,而 其 心者,必其知此性者也 心 〗 心 知 以 知 就 此句 體量之大。 似乎有 其性 心只是 按本文,更定今説。 體 矣。」〇陵 則懸空無下手處, 性始能 此 認 分明, 《集註 四 `文義與「得其民者、得其心也」相 則 識 者 形像,然其 包着 盡 察。 知天矣,而 上 陽 則 心,尤爲明 翼 體 且如性之實理莫大於仁、 得, 窮。 這道道 李氏 心之神明都 若未能 八馬。 認得 却 性只是理 體 理, 日 盡箇 信如舊説、當 理 後 將 隨 明,各極其至,更 却 , 苟不知之, 若之何其 究窮得此 白 程子曰:『自 不可 久而 盡 也 人者言之謂之心。」 文義相 其 虚 知得 甚?」○輔 舊 運 理 無所 惟 性 説 量亦 墮 制 ,雖無 則 一雖是 其 其 協。 謂 矣。 一於虚 實理 蔽 虚 性 無 盡 Z 而已 無形像 之道 形 今乃 故神 盡 惟 理 心 而 無 氏 像,而 言之 豪慊 其 滉 便 矣。 則 無 運 能 \Box 義 理, 似 不 明 心 知 用 於 漾 要

之極 티 : 禮、智 既 盡之? 性 來,此物是何緣 便脱模是 間言之,則恐其猶未盡心統性情之説耳。」既 得。 有,隨用隨足,方盡得家主之職 盡 來 則其所從出, 説 先後之倫也。 盡 循致其極,以 之學者,每有心小性大之蔽,意謂必 心者 也。 識得家中之物 於《集註 則物格之謂 則 處無不 知與 物字對性字,知字對心字。」〇又曰: 有序。 ,即是天之元、亨、利、貞,凡吾之所有者,皆自 ,譬如一家主,識 故知吾性,則自 既 盡 >極 知之矣, 到, 箇大底人,人便是一箇小底天。 有序 性與心無間 知 讀者可以 有功 而有 知 天性。 性也。 則 則 亦不 · 盡 則 但 也。 自 謂 所 然知 然知天矣。」〇輔氏 盡 殊不 得 心小性大之辨,特以 曉然無疑矣。」〇蔡氏曰: 心則 外是矣。 謂 知至者,吾心之所知 以《大學》之序言之, 則 之爲 一家中 天 其 謂 知 者 知至之謂也。 物所來處, 先 知 性 知性 所有之物,然後 耐 性 岢. 與 知之爲 故能 先盡 外 心, 語 而知天,則 此 初 録 盡 其 而 此物是 物格格 日: 心者, 後 無 心 他 吾之仁、義 性與 Ĕ : 無 者 知 間 求 而 不 者 從何 如家 其 哉 「 天 者 是 知 心 隨 而 後 盡、盡 「李氏 語 取 性 彼 初 失 義 可 知 録 知 理 而 主 其 隨 mi 而 與 以 #

裏,若於心有些子未盡,便打不過,便不足。」 極於忠,爲子必要極於孝,不 也。」〇又曰: 心 也。」〇又曰: 「知得到 示 知 時 性,不能 ',必盡 是 我這心去做 以 備禮 盡 其 如此。 心,物 既 如 格 知 事 而 得 君 後 到 必 知 要 這 至

既

得

賦

存其心,養其性,所以事天也

聞 違悖而戕傷之。 不然則 蔡氏曰:「操而不舍,如居處恭,執事敬,與人忠,便是存 便是戕傷之也。 奉承而不違 存 又便是天非有二也。」 心之法。 也」便是所以事天。 ,便是所以養性。 便放去矣。 操 順 而 而不害,如 不舍,養,謂 也。 奉承之而不違,便只是存心養性事。」〇 性本不可 性 奉承 是實理,須當順之而 輔氏曰:「心是活物,須是操則 戒謹乎其所不覩,恐懼乎其所不 但存之養之,又便是事心與性 而不違, 以戕傷言,但 順 如「存,吾 而 不害。 一爲自家違悖了, 不 順事,没,吾 害。 事, 害 謂 存 則

殀壽不貳,脩身以俟之,所以立命也。」 天之至,脩身 殀壽,命之短長也。 ¥ 「既不以 以 殀壽貳其心,又須脩身以俟,方始立 俟 死 貳,疑 河,則 事 也。 天 不貳 以 終 身 者, 也

知

0

也。 而已。 家有 者也。」〇蔡氏曰:「曰心、曰性、 而人之所得以生者也。 者,理之自然,而人之所由以生者也。 之性,自存諸人而言謂之心。」《語録》 人爲害之也。○○程子曰:「心也、性也、天也 夫」,兩全其極也。 爲命,物所受爲性。 其天之所付,不以人爲害之。輔氏曰:「天所 知天之至,則更無商量 命於人,有長有短,雖若可疑,是亦理 不以殀壽動其 這 理也。 立命,全其身也。 命。 脩身以俟死,便是事天以終身也。」立命,謂全 日在世,一 自家有 自理 心, 百年 日之内,也須教事事是當,❶始得。 徇私以賊理,縱欲以傷生,皆所謂 而言謂之天,自稟受而言謂 命與性,其實一 在 向亂做,又不可。」〇輔氏曰: 曾子臨 ,不用計較,以 世,百 心則人之所以 年之中 終,而 曰天, - 須 也。 啓手足曰『吾 道脩身,敬俟其 主於身而具是理 性者,理之全體 事 也,何疑之有? 理而已。 事天,全 事 教 ₩ ⊟ 是 朱子 知 其 天 天 以 免 理 自

也須教事事是當」,原脱「也」字,「是」上行「要」字。 四庫本《朱子語類》卷六十删補

密耳。 説。 티 : 率性 曰 : 四 就人上説。」〇又曰: 底物,因有形而見。 自然底。 子,方見這箇道理。」〇又曰:「『由太虚,有天之名』,是箇 與 「合虚 有道之名」,這説着事物上。 太 心,是推源以及其 稟受而言謂之性,自 言天,是遡流以窮 心之所具之理,而天又理 語録 者而言。 氣 虚 「『由太虚,有天之名" 『心者, 『合虚與氣,有性之名; 方見得 與氣 》曰:「「由太虚,有天之名」,這全説理。 『由氣化, ,有性之名; ,有天之名; 『由太虚,有天之名』,便是四者之總體 山 『由氣化,有道之名』,氣化者,那陰陽造化, 人之神明,所 有性之名」,是自然中 許多道。 氣化,有道之名」,是虚 其源。 流。 所謂道者,如天道、地道、人道是也。 存諸 「四句本只是 且如君 合性與知覺,有心之名。」 由 初 以 程 人而言謂之心。」先言天,後 之所從以 無異 氣 由氣化, 具 子曰:『自理 合性與知覺,有心之名」,此 臣、父子之道,有 如率性之謂 化,有道之名,合虚 衆 旨 理 -包得 也。」張子曰: 一箇太虚 而 出 底物在實上見,無形 有道之名」,此 應 者也。』先言 許 萬 而 多物事。」〇又 道,性只是理, 事 言謂之天,自 ,漸細分説得 者 那君 而 也 不 臣、父 ľ, 由 雜乎 是 性 總 後 言 則

虚明, 問: 氣,這 故謂之天。 古聖賢説天,多是就理上 天之名; 曰:「太虚 有 氣,所以有人。」〇問:「合性與知覺,有心之名。」曰: 具 離於道之理?」〇又曰: 道者。」○問"「合虚與氣,何以有性?」曰 又是那氣之虚處,聰明、 雜 盡,而終有二意。」問:「如此,則莫是性 亦得其意,然亦有未盡 虚與氣,有性之名」,有這 太虚便是太極 金、 非 無迹之理,是之謂性。」〇又曰: 未瑩處 氣化,實不雜乎太虚 此之謂 木、水、火、 「氣化何以謂之道?」曰: 則性寓于中, 理去甚處安頓? 由氣化,有道之名」,此 ,有心則有知覺,又何合性與知覺之有?」〇又 而下四 若就天之形體論 到這 土皆 圖 句,極精密。」〇 E. 處 是, 面 故 則 『合虚與氣, 處。 只 ,然亦未説 視聽、 『合性 圓圈 有是名, 「氣有形 氣,便有 便是 論 言虚即是性,氣即是人,以 理 **氣** 作爲、運 與 那 也 「天地間無有 無 是推原來歷 太 只是箇積 而 在 知覺,有 化 陳氏 這理 到 形 虚 虚無迹,以有形之氣 人如 有性之名』。 虚 便 人物各具當 狀 將 是 隨在 用 曰:「由太虚,有 只 離於道邪?」曰 以 是説 氣 何 陰 ,皆是知覺。」○ 心之名」, 化 氣 其 看 静 此 這 雜 天即 一,然 豈 自 理,合虚 裏,若 陽 恁蒼 物 了 動。 然 語 然之理 雖 不由 説。 侕 理 詳 蒼 有 説 知 無 也 看 與 氣 覺 此 雖 性 略 其

之盡 卒歸於異端而已。」知天而不以殀壽 也; 耳。 恁地 以 履 此。」〇又曰: 夫,知與行 知 於三者同處 覺從氣來,不離理。 去成這性 定 茫,實何 心之名。」〇愚謂: 有 在 其 其 諸己, 這 便 愚 存 是冥行妄作而已, 也; 事 理,固不能 心養性以事天,則 是 有 謂 心養性 ,於是乎 人物 甚 兩下都要到。 形 則 事天而能脩身以俟死,仁之至也 盡 分 則 質? 亦 虚 析得 所 元之氣,流出 必 心 無以 通 是以理言,理與氣合,遂生人物。 至於妄想空虚 《集註 方有 以 但 知 異 合性與知覺,遂成這心,於是乎方有 行之道,此 履 張 事天, 處分明,於異 性 性 有諸 其事 然徒知其理而不履其事,則 子 是行之事 》並舉程子、張子二説,正 盡 一之名。 此 而 心 來生人生物,便 天字,是 已矣。 知性而知天,則 所 知 ; 就 一只務 性從理來,不離 然徒造其 以 天 造化 也。 處體會得 履其 説 輔氏日 所 推 不知其 上 理, 原其 貢其心, 達,不務 以 事 理 有 造 同 理 是知之事 所 也 不 理而不 箇 「聖學工 處 從 氣 而 欲學者 成 其 下學, 路 履 親 受得 始 亦 是 智 不 理 無 其 切 知 如 死 〇孟子曰:「莫非命也,

怠廢。 鑿創 仁。 日: 智 矣,學者豈可不自警哉!」 之功不至,而所見日以昬蝕, 力,直到聖人大而化之之地位,方無退轉。 事,仁智兩極其至,日 雖欲爲之,不陷於姑息,則流於兼愛,故以爲不知所以 爲智矣。」〇又曰:「須是如《集註 亦 有 「智所以知,仁所以守。 意,作起事端,以 然智而不仁,則又所謂智及之,仁不能守之,必 示 將 知 盡,固不 而不盡,守之或渝 流 蕩 不法,而 知所以爲仁; 用行事之間,無 至 流蕩忘反,與 知有不盡,則不知仁之爲仁, 不足以 則終必爲異端曲學之所 踐履之功不力,而所得 》所 法 爲 時 然智 謂 度背 無 智 造 不然,則 處 其 馳 矣。 而 而 理,履 而 不 不 輔氏 用 將 日 窮 不 以 其 其 足

以

則

之致 或不然,不當然而 者,是正命。 皆是正命。 人物之生,吉凶 遇 須 唤做不正之命,始得 而至者,乃爲正 在人言之,便有正 桎梏死者,便是不正之命。」問: 或 然者,如 禍 福,皆天所 命、《語録》曰: 在 何?」曰: 孔 有 不 孟 Ē 言之,亦是正 如 命 如 孔 「在天言之 順 有 孟 其 然 道 老 當 惟 而 死 莫 而 死

順受其正

如顏子之殀、伯牛之疾是也。」故君子脩身以俟之,「然。 若在我無以致之,則命之壽殀,皆是合當如此者,在天之命,却自有差。」〇問:「此命是指氣言否?」曰:

是故知命者,不立乎巖牆之下。所以順受乎此也。

是自取其覆 勿動,擇地而行者,無他焉,知命 天爲之也。 命如此,便 説道,我自有命,雖立巖牆之下亦不妨,即是先指定 則不處危地 命,謂正命。 立乎巖牆之下,以致覆壓而死,則乃是人所自 是紂説我生不有命在天相似也。」○輔 蓋巖 壓也。 以 濫牆有 巖牆,牆之將覆者。 是故君子戰 取覆壓之禍。 傾覆之勢,自家却去下 而已。」 戰兢兢,如履薄 **《**語 録 $\stackrel{>}{\exists}$ 面 知正命, 冰 取 立 氏 耳,非 「若先 地 非 日 : 便 箇 禮

盡 其道 之,則謂之正 干之類,亦 矣。《語録》曰: 盡 其道 而死者,正命也 ,則所值之吉凶,皆莫之致而至者 是 ıΕ 命,以死生論之,則非正命,如 命乎?」曰: 「問:「人或死於干戈,死於患難, 固 是 正 命。」問 何?]曰: 以 如 理 比 論

> 命,如何得!』 萬仞始得。 者於此處,見得臨利害時,便將自家斫剉了,直 仁、舍生取義 死,却是失其正 如 何 恁 地 説? 如今小有利害便],「志士不忘在溝壑,勇士不忘喪其元 命。 得 盡 此 其 處須 道 而 生計 當活看,古人所以「殺 死 者, 較, 便説 Œ 命 也。 道 恁 當 地 須 死 是壁立 死 身成 非 而 不

桎梏死者,非正命也。」

乎此 則爲 《語録》曰: 言及吉凶禍福皆天所 桎 意。輔氏曰:「上章止言壽 上章蓋一時之言,所以發其末句未盡之 文王死於羑里,孔子死於桓魋,却是命。』 〇 此章 何謂之命?』曰:『亦是自作而天殺之,但 巖牆之下者同,皆人所取,非 梏,所以 也。」 Œ 命。 問: 故上章所謂 拘罪 『雖謂非 人者。 命, 君子脩身以俟之者,正所謂順受 然惟人爲莫與而天所自至者 正,然亦以命言,此乃自取 殀而已,故《集註 言犯 罪 天 非正 而 》於此 所 死 命耳。 爲 與立 也 , 如 與 使

於得也,求在我者也。舍,上聲。

外者也。」
水之有道,得之有命,是求無益於得也,求在求之有道,得之有命,是求無益於得也,求在不在我者,謂仁、義、禮、智,凡性之所有者。

章意,故《集註》取之。 制也。」○趙氏曰: 如不可求,從吾所好。」輔氏曰: 命,故曰命。 貴利達之類,皆命有所制,以其求之雖有道,而得之則 當爲,以其求之得之,莫不有義,故曰義。 章之説。 有道,言不可妄求。 在外者,謂富貴利達,凡外物皆是。 曰:「在我者,如仁、義、禮、智之屬,皆此 然聖人則力爲我之所當爲,而不問 「言爲仁 有命,則不可必 由己,富 「四句正説着此 在外者, 貴 或問: 在 彼之所 天, 理所 得 如 有 富

〇孟子曰:「萬物皆備於我矣。

之内也。或問"四章之説。曰"「萬物之生,同乎一事物細微,其當然之理,無一不具於性分此言理之本然也。 大則君臣、父子,小則

反身而誠,樂莫大焉。 内。 不同。 本。 之,則如事物之細微,其當然之理 之本然一 有其理而已矣。」○輔氏曰:「理之本然 物之中,莫不有萬物之理也。 蓋雖有萬之不同,然其理之本然,則一 其所以生此一物者,即 故極其大者言之,則如君臣、父子, 而已,然於應事接物之際,則 樂,音洛 其 (所以 所謂萬 無 生 物 萬物之理 而 其 即 皆 分限 不 而已。」 所 備 具 謂 굸 於性 其 品 性 者,亦 也,故 小 則 也 分之 者 各 言 日 自 理

强 恕而行,求仁莫近焉。」 色、 而自然無不利矣。 父而實有慈,爲子而實有孝,隨事 反之於身而實有是理,爲君而實有仁,爲臣而 但有紛擾疑懼而已,豈能樂乎? 我自我,理自理。 言盡性之事也。 惡臭、好好色之實然,則其行之不待 而 誠,實也。 惡惡臭,真實如此 無不利矣,其爲樂孰大於是。 言反諸身,而所備之理,皆如 夫萬物之理雖備於我,然反身不誠,則 事物之來,千頭萬緒,而 其爲樂,孰有大於誠者乎?」 而 無豪髮之或 須是見得 而 慊 處,皆如吾之好好 則 在我不待勉 輔氏 皆 到,信得及 實有敬、爲 無以應之, 日 : 勉 此 惡 强

00

有他也 遠矣。 聖人之道庶乎其可至也。 於强恕,其階 勉 仁之事也。 又曰:「如今人所以害事處,只是這些私意難除。 隔 强 私意隔着了,便只是見許多般。」○輔氏曰:「此言學者求 是要去箇私意而已。 心裏不能推己及人,便須强勉行恕,抝轉這道 箇反身而誠 然這箇强恕者,亦是他見 誠 恕便是推己及物,恕若不是推己及物 所依據者,不 强 庶 而 則 勉 ,推己及人,庶 夫盡性莫先於誠身,誠身莫要於求仁,求仁莫切 ,私意隔之,與理爲二,而未純乎 幾 理 仁 强 心 未 矣, 反身而誠 須 也。 級分明 公理 純 便要强 可 其有 同 恕, 也。 **総**其 其 年 一得 私意既去,則萬物 則人與仁合矣。 恕 而 推 未 I (心公平,得夫天 故 而 得萬物皆備 語 上做工 其與坐談高妙、馳 夫有序 己以及人 誠 當 矣。」〇 仁 凡 不 則 夫。 學 · 遠 事 是 此 者 所 於我了,只 ,别又是箇 也。 勉强,推 猶 自無欠闕處。」〇 章 八理,而 也。 然其 謂 由 也。 强恕 言 有 是 《語 志空虚 未 理 而 仁之道 故當凡 私 萬 反 進 誠 然 録 争 纔 蓋 1 意 身 物 己 馬,則 者,非 有此 亦只 |麽? 而卒 着 是 Ĕ : Z 及 之 而 不 事 他

> 學者求仁之方,其功大矣。 티 : 餘 ; 「章指之説 行之以 ,簡切明 恕, 則 盡 私 ,所以 不 容 直 指聖賢 而 仁 盡 可 性 之實 得 開 輔 氏 示

終身由之而

不知其道者,衆也。」

孟子曰:「行之而不著焉,習矣而

不

察焉

其所當 是就 是回 明 其所當然必 則識其所以然,是習矣而 則明之而已,察則又加精焉。」言方行之而 明意,故以爲知之明。 著者,知之明; 以終身由之而不知其道者多 方行之際,則明其當然之理 其 事之所 事 顧 Ŀ 後 説。 然,既習矣而 面 當然 有理 看 所以 所行之道 也 既習之後又識 然,是 理 察者、識之精。 察有密意,故以爲識之精 則 是 察。 就 理 其 如 理 猶 一,是行 所以 何。」〇 初 Ŀ 不 説。 其 間 然。 識 是 理 之而 輔 照管 所 凡 也。 其 事 氏 著。 以 輔氏曰: 所 能 티 : 然 皆 向 《語 於方 以 有 前 既 則 不 去,後 o 然,所 所 所 鼠録》曰: 行 能 行 能 之後 著 當 當 之時 知 蓋 明 夫

理

具於吾身,

體

之而

寶,則

道

在

我

而

樂

有

^{■「}識」,原誤作「察」,據四庫本改。

뾆。

其所繫豈不大哉。」

所以然。然雖不著不察,而道實未嘗相離,所以終其身明其事之所當然,既習之後鹵莽滅裂,而猶不識其理之道矣。但凡人不知此理,故方行之時倒行逆施,而不能

之道所以以格物、致知爲先也。」由乎道之中,而不知夫道之實體者比比皆是,此《大學》

恥矣。」

〇孟子曰:「人不可以無恥。無恥之恥,無

也。然則人豈可以無恥哉!」

一言,人若能以己之無恥爲恥,則可以終其身無恥辱之累善之人,終身無復有恥辱之累矣。」輔氏曰:「恥者,改過遷善之幾也,故人不可以無恥。又就無恥而「恥者,改過遷善之幾也,故人不可以無恥,是能改行從趙氏曰:「人能恥己之無所恥,是能改行從

〇孟子曰:「恥之於人大矣。

爲,故可以進於聖賢。失之則無所不爲,故必至人於禽民曰:「恥乃人之羞惡之心,性之義也。存之則有所不聖賢,失之則入於禽獸,故所繫爲甚大。輔配者,吾所固有羞惡之心也。存之則進於

爲機變之巧者,無所用恥焉。

恥,而 恥之心也。 是無所不爲者也。 爲機械變詐之巧者,所爲之事皆 彼方且 輔氏曰: 一自以 故人雖以爲深恥,而己方自以爲 爲 「陷溺其心於機械變詐之功 得計,故 無 所 人所深 用 其 則 愧 得

不恥不若人,何若人有?」
計,其愧恥之心雖其固有,亦自窒塞而不復發見矣。

其義亦通。輔氏曰:「前説指機變之人言之,後説則曰:「不恥其不如人,則何能有如人之事。」但無恥一事不如人,則事事不如人矣。或

泛言人不可以無恥之意。

前

一説痛切,後

一説較緩。」〇

於護疾而忌醫者多矣,故程子因以是警之。」 或問:「凡有恥不能之。「恥其不能而掩藏之」,則無不能矣。「恥其不能而掩藏之」,則不能而爲之」,則無不能矣。「恥其不能而掩藏之」,則不能而爲之可也,恥其不能而掩

000

致 而 何 獨 況 敬 孟子曰: 盡 不然? 得 禮 而 則 臣 「古之賢王好善而忘勢,古之賢士 樂其道而忘人之勢。 之乎?」好,去聲。 不 得 亟見之。 見且 樂, 由 音 故王公不 洛。 不 . 得 呕, 呕, 去

吏反。

以 知勢之在人,兩盡其道, 者 言 足與有爲哉?」 而 勢而驕夫士,士以 른 勢若相 君當屈 輔氏曰: 反 己以下賢,士不枉道而求利。 而實則 「君好善則不知勢之在己,士樂道則 勢而 則 徇乎 勢雖 相 君 相 成, 反而 則 蓋 兩失其道 實相 亦 成。 各 矣。 盡 不 其 ·然,君 尚何 道 不

遊。 孟 句,音 子 謂宋 鉤。 好、 句 語 踐 ,皆去聲 日:「子好遊乎? 吾語 子

人知之,亦囂囂,人不知,亦囂囂。」 宋,姓,句踐,名。 遊,遊説 也。

説之士大病,是不識義理而唯欲其言之售,故往往 趙氏曰:「囂囂,自得無欲之貌。」輔 氏曰: 以人 遊

> 則 可 之知不知爲輕重欣戚,是以孟子語以自 何 以囂囂矣。 如 斯 可 以囂囂矣?」 樂,音洛 日 得 無欲之説 尊德樂義

日

所守而自安,而後能之也。」 豈勉强矯揉之所能 知命之樂,樂其義則有以自安。 티 : 則有以自安,而 慕乎人爵之榮。 德,謂所得之善。 「尊,如尊德性之尊,尊其德則有以自重。 免哉? 不 義,謂所守 尊之,則 · 徇 乎 必 在 外 夫人爵之榮,外物之誘 我者有 物之誘 有以自 之正。 所得 樂,如 也。 重,而不 而 自 樂之, 重,有 輔氏 樂天

故士窮不失義,達不離道。 離 ,力智反

樂義 言不 見於行事之實也 以 貧 賤 而移,不以 富 貴 而 淫 此 德

望焉 窮不失義,故士得己焉,達不離道,故民不失

其興道致治,而今果 得 己 言言 不失己 也。 如所 民 不 望 失 也。 望,言 輔氏 日 : 素 一窮 望

不失義,則在我者得其所守。達不離道,則能興道致治,

以慰斯民平日之所望。」

世。窮則獨善其身,達則兼善天下。」見,音現。古之人,得志,澤加於民,不得志,脩身見於

爲也。」

善天下」也。」此章言内重而外輕,則無往而乃「民不失望」之實,「不得志,則脩身見於世」,乃「士得乃「民不失望」之實,輔氏曰:「「古之人,得志,澤加於民」,見,謂名實之顯著也。此又言士得己、民見,謂名實之顯著也。此又言士得己、民

豪傑之士,雖無文王猶興。」夫,音扶。○孟子曰:「待文王而後興者,凡民也。若夫不善。

豪傑,有過 興者,感動奮發之意。凡民,庸常之人也。 無待於教,而 文 所同得,唯 、武興則民好善 人 自 上智 之才知者 幽 能 厲興則民好暴,此皆中人以下之 感發 之材 以 無 也。 有 物 爲 欲 蓋 也。 之蔽, 降 衷 輔 秉 氏 爲能 彝 日

蔽,故雖不待上之人有以教之,而自能感發,而興起以有然則爲惡矣。若夫才知過人之士,則天理易明,物欲難資,所謂凡民者是也。蓋無特立之操,教之善則爲善,不

然,則過人遠矣。」做,音坎。 ○孟子曰:「附之以韓、魏之家,如其自視飲

附,益也。韓、魏,晉卿富家也。欲然,不 問滿之意。尹氏曰:「言有過人之識,則不 以富貴爲事者,皆凡庸之人,吝驕封閉,不足與有爲矣。」 高貴爲事者,皆凡庸之人,吝驕封閉,不足與有爲矣。」 ○孟子曰:「以佚道使民,雖勞不怨,以生道 ○孟子曰:「以佚道使民,雖勞不怨,以生道

然者反是。」輔 其所當爲,則雖 之也,除害去惡之類是也。 穀乘屋之類是也。 程子曰:「以佚道使民,謂 氏 日 咈 民之欲 「播穀乘屋之類,雖不免於勞 以 生道 而 殺 本 蓋不得已而 民 民,謂 欲 不怨,其不 佚之也 本 欲 爲 生

然其本意

則

乃欲佚之而已,故雖

勞

耐

不

怨。

除

害

去惡

怒也。」

則如天道之自然,當生則生,當殺則殺,而民自忘其喜

爲之者。

不

知

之有? 此所謂 帝力何有於我』之事。 善 之、輔之、翼之,使自得之」是 是因民之性,輔其自然,使自得夫善,如堯所謂『正之、直 利之也 稷,四明人。 之,故民日遷善而 之也,何 民之所 而不知誰之使我如此也。 一,何庸 惡 皡 庸 因民之所 〇輔氏曰: 皡 有之?』此 而 之有 去之, 如 也。 ? 不知 句 「因民之所利而利之,非有 利而利之,非有心 非有心於殺之也, 庸,功 輔 所 也。 包 其 此即程子所 誰 甚闊,凡帝王之政教,皆 性之自然,使 也。 惟 之所爲 其如 豊氏日 是,故民日遷於 謂 也。」豐 一耕 田 於 何 自 鑿 心於 氏 井 得 利 恕 因 名

流,豈曰小補之哉?」夫,音扶。 夫君子所過者化,所存者神,上下與天地同

君子,聖人之通稱

也。

所

過者化,身所經

者,理 之類 謂 妄作而已, 之殺之,可謂 而 勞與殺之事哉!」 不怨殺者。」〇又曰: ,雖不免於殺 也。 ,民之怨怒,其可 事雖不得已,而 咈民之欲矣,而民 ,然其本意,則 「不得已者 得而 吾但爲其理之所當爲 逃乎? 自不 乃欲生之而已 ·; 事 怨。 也。 君子其、 不然,則 爲其 (亦謹 是 所 故 故 當爲 私 其 雖 雖 所 意 绺 死

民,皡 孟子 程子 騹 虞 娘 日 -與與 日 如 也 歡 霸者之民, 驩虞,有所造 娱 皡,胡老反 同。 皡 皡, 驩 虞如 爲 廣 而 大自得之貌。 也; 然,豈 王 一者之 能

自然, 驩 也? 歡 者 説即程子意也,但楊氏説得 天,亦不令人喜,亦不令人怒。」輔氏曰: 娱,然豈 亟民之從,規模狹窄,故必至如此。 "虞,必 耕田 乃 能 有 王 久哉? 鑿 違 者之政。」 并,帝· 道 事 干譽之事 過意息 力 楊氏 明切,程子説得渾全耳。 何有 則 日: 子; 若 忘之矣。 於 時 我 下 ? 王 所 雖 至於王者, 得其 者 以 如 則 致 天 楊 民之 之 久 如 人 霸 氏

者 歷之處 遜 即 陶 人 河 無 濱 而 不化,如 器 不苦窳 舜 之耕 也。《文集》曰: 歷 山 而 田

也。」所存者神,心所存主處便神妙不測,如濱,略略做這裏過,便自感化,不待久留。 言其化之速於處,只曾經涉處,便皆化。」〇又曰:「如舜耕歷山,陶河於處,只曾經涉處,便皆化。」〇《語録》曰:「不獨是所居聲氣化之所被,皆謂經歷也。」〇《語録》曰:「不獨是所居聲經來不必爲經行之地,凡其身之所臨,政之所及,風

孔子之立斯立、道斯行、綏斯來、動斯和,

處,不是主宰,是存這事,這事便來應。」〇又曰:「存是自己 莫知其所以然而然也。《語録》曰:「存是存主

家主意,處便不測,亦是人見其如此。」是其德業之

比可三重之所从為下,而是至所當盡公陶之,非如霸者但小小補塞其罅漏而已。盛,乃與天地之化並行同運,舉一世而甄

而言。 不 並 也。 此 可 行 則王道之所以爲大,而 以 也 輔氏曰:「德以其得於己者而言,業以其 聖人之德業,兩極其盛,故能與天地之化同 事 物而言也。 世 而 甄陶之,蓋言其功用之大,成就之廣, 豈若霸者之所爲,但隨事小小 學 者 所 當 見於事者 盡 運 心 而

補塞其罅漏而已乎。」

○孟子曰:「仁言,不如仁聲之入人深 化而已。」 也。 昭明,則不能有也,故其感於人也亦深,非止言 養老之類是也。仁聲仁聞,非聖人之仁博厚悠遠, 仁聲,如邠人之聞大王之爲仁人,伯夷、太公之聞文王 也。」輔氏曰:「仁言, 聲,謂仁聞,謂有仁之實而爲 程子曰:「仁言,謂以仁厚之言加 此尤見仁德之昭著,故其 如《書》 》所載 訓誥 衆所 誓命之類是 感 於民 人尤深 語聲 稱 也 道者 自 色之 也 伙

善政,不如善教之得民也。

而誠服也。」

而誠服也。」

而誠服也。」

亦若「道之以德、齊之以禮」者,得民之心,感為夫法度禁令也,固亦有德行乎其間。但「道之以政、齊為夫法度禁令也,固亦有德行乎其間。但「道之以政、齊為夫法度禁令,所以相其外也。教,謂道政,謂法度禁令,所以制其外也。教,謂道

100 124

足道者也。」 母,愛之如四體,尊而敬之,則得其財與無不足,又有不 無不足也。不遺其親,不後其君,使民之於君,親之如 而君無不足者,取之有道,用之有節,故民先自 者,不遺其親,不後其君也。 得民財者,百姓足而君無不足也; 輔氏 日: 得民 足 云百 而 君 姓 心 父 亦 足

所不慮而知者,其良知也。 ○孟子曰:「人之所不學而能者,其良能也,|

皆無 之爲而爲、莫之致而至,故程子以爲 本然之能,不待學而能, 天,不係於人」,其論切矣。」〇真氏曰: 良者,本然之善也 「本然之善,謂其善不知其所由來,自然而然,如 所由,乃出 於天,不係於 本然之知,不待學而知 程子 曰:「良 『皆 「善出於性,故 1無所 人。」輔氏 由 知 巧 良 所謂 得 日: 能 有 於 莫

知敬其兄也。長,上聲,下同。 孩提之童,無不知愛其親者,及其長也,無不

愛親敬長,所謂 孩 提,一 二三歲 之間 良 知良能者 知 孩 笑、可 也。 提 輔 抱 氏 日: 者 也 孩

提而下,又所以指其良知良能之在人者曉之,是豈待學

下也。」

親

親

仁

也

敬

長,

義

也。

無

他,

達

之天

;

而後

能

慮

而

後

知哉?」

極、綱紀人道 雖若出於 不同者,所以爲仁義也。 言親親、敬長,雖一人之私,然達之天下無 人之私,然其所謂 ,以至於不可勝用者,不過即是 仁、所 輔氏 謂 EI: 義, 「親親、敬長 所 心 而 以 建 達 之於 立人

○孟子曰:「舜之居深山之中,與木石居,與 能禦也。」行,去聲。

則其 虚 居 專 至 深 義理 一明,渾 應 Щ, 甚 ,感非自外,應非自中,故能 謂 速,而 然之中,萬 耕 歷 無 Ш 所不 時 也。 理 通, 畢 蓋 具。 輔氏 至 聖人之心,至 速而 日 無不 有 聖 感 人 通 渾是 也。」 觸,

天下耳。」

非 孟 子 造道之深,不能 形容至此 也

孟 子 Ħ □:「無 爲 其所 不爲 ,無欲其所 不欲,

如

此

而

已矣。」

心非 不可爲、所 是廣充其羞惡之心者,將見其義至於不可勝用矣。」〇又 爲、欲所不欲,則心不在 所不欲者,心爲之宰,而 不欲,故曰如此而已矣。」〇輔氏曰:「凡人有所不爲,有 所不 知其所不當爲、所不當欲者,便要從這 計 所不當爲、不當欲之事,何嘗不知? 矣,故曰如此而已矣。」《語録 所 至 李氏曰:「有所不爲、不欲,人皆有是心也。 較利害,却自以爲不妨,便自冒昧爲之欲之耳。 一於私 謂 「上言不能 在外 爲、欲所不 拓 也 意 充其羞惡之心者,而義 不可欲 一萌,而 以禮義 而不 者 知求 1,謂非 欲者多矣。 制 焉, 禮義有以制之也。 不 之,而後又獨言羞惡與義者,所 ,則若不在焉耳。 -禮也。 而無禮 能 以 至於不爲其所不可爲 禮 義以制之耳。 》曰:「人心至靈,其 但 能 裏截斷,斷然不爲 義 一初間 反是心, 制之,則 不可 能反是心 若夫爲所不 自知了, 雖然 勝 今既 , 則 則 用 爲 到 故達。」

獨

不欲其所不可 欲,則 是羞惡之心,義 而 已矣。」

疾。知,去聲。疢,丑刃反。 ○孟子曰: 「人之有 德慧 術 知 者,恒 存乎疢

其所不能,而有夫德慧術知也。」 仁、義、禮、智之心,堅忍其 疾,則非真是病,故曰 也,與昬正 猶災患也。 性,增益其所不 德慧者,德之慧。 相 反。 言人必 術 能 之智,謂 猶災 也。 術 八患也。 有 食、色、臭、味之性,故 知 智 輔氏曰: 者,術 疢疾, 術 人惟 也, 與 之知 「德之慧,謂慧 則 有 愚 災 能 Œ 患,竦 動 相 疢疾, 能 反。 心 增 動 忍 益 其 疢 德

孤 臣 孽 子, 其 操 心 也 危, 其 慮 患 也 深

德慧 常有 德慧術知 能 者,則是所謂常 孤臣,遠臣,孽子,庶子,皆不得於君 動 心忍性,而 術 疢疾者也。 知 也。 有乎 不至於昬愚; 輔氏曰: ·疢疾災患者 達,謂 「孤臣孽子,皆宜不得 達夫事 達於事理,即 也。 理之當然 操 心危 慮 而 患深,故 親 於君 有 所 前 所 謂 親

0 _

者也。 ○孟子 E : 「有 事 君 人者, 事 是 君 則 爲 容 悦

阿 逢 迎 徇 以 以 爲悦 爲容,輔氏曰:「謂長君之惡以求容其身者。」 ,輔氏曰: 「謂逢君之惡以求君之悦者。

此 鄙 夫之事、妾婦之道也

有大人者,正己

而物

正者也。」

有 安社 眷眷於此 言大臣之計安社稷,如小人之務悦其君 務爲容悦之私,一 欲同行而異情也。 稷臣者,以安社稷爲悦者也。 而不忘 則務安社稷以爲忠也 其眷眷不忘雖同,而其情則 也。 輔氏曰: 「此則所謂 異。 天 理 則 人

有天民者,達可行於天下而後行之者也。 也。」不然,則 然後行之; 具,而人之虧欠者多矣。 民,故謂之天民。 民者,無位之稱。 伊尹、太公未出之時 寧没世不見知 輔 氏曰: 而 輔氏 以其全盡天理,乃天之 言。」必其道可 故程子謂天民爲能 「是 EI: 指 伊尹、太公已出之時 「天之生民,其理 而 不悔,輔氏 行於天下 踐形也,是 無 日 言 不

> 之徒。」輔氏曰:「張子之説,深得伊、吕之心事也。」 曰 : 也。」張子曰:「必功覆斯民然後出 樂天知命也。」不肯小用其道以 若使當時不遇湯與文王,則二子寧没身不見知而 「大匠不爲拙 工改廢繩 墨,以 道事君 徇於-人 不 如伊、吕 世 可 則 不悔 止 輔 者 氏

矣。蓋大人一出,而天下莫不文明,是聖人之事也。」() 盛,故上而君、下而民,無不化 天下文明」者。 大人,德盛而 上下化之,所謂「 輔氏曰:「上謂 四等。 也、《乾》之九二可 君,下 見龍 謂 民。 大人德 在 以 當之 田

佞之臣 足言。 天民則 則行理 輔氏曰: 士,知有其國而不知有天下也,春秋之賢大夫是矣。 無必,唯其所在而物無 此章言人品不同,略有 以 則 「孟子言此 安社 盡忠者也 是徇私 非一國之士矣,然猶 一稷則 而 ,然猶是 忘 ,所以 理者 忠矣,然猶 品 也, 節 國之士而已。 固不足道矣。 不化,惟聖者能之。 人 臣之品 有意也。 容悦佞臣不 ,有此四等。 國之士也。 所謂 安社稷者 無 國之 意 諛 至

無必也 之無意無必也。仕、止、久、速,無可無不可,孔子之無意 而 子在下而能使萬世文明者也,故曰『無意無必,唯其所在 公、孔子方能當之。 此聖人終是有任底意思」者是也。 然後行之,不肯小用 不可以小知者也。 於天民,則如伊、吕之徒,非止 物無不化 ,惟聖者能之」。 然猶微有意焉,必其道可行於天下, 周公在上而能使天下文明者也,孔 其 道以徇於人,如程子所謂 至公無私,進退以 一國之士也,可以 大人,則聖人矣,如周 道 大用 「伊尹, 周 公 而

弟無故,一樂也。 ○孟子曰:「君子有三樂,而王天下不與存

此人所深願而不可必得者,今既得之,其

樂可

知

仰不愧於天,俯不怍於人,二樂也。

廣體胖,其樂可知,有息則餒矣。」《語録》曰:程子曰:「人能克己,則仰不愧,俯不怍,心

「此説極有味。」

得天下英才而教育之,三樂也。

人之所願欲者,莫大乎是也。」

一世明睿之才,而以所樂乎己者教而盡得一世明睿之才,而以所樂乎己者教而為之,則斯道之傳得之者衆,而天下後世為一世明睿之才,而以所樂乎己者教而盡得一世明睿之才,而以所樂乎己者教而

君子有三樂,而王天下不與存焉。」

林氏曰:「此三樂者,一係於天,一係於人。本氏曰:「此三樂者,一係於天,一係於人。而亦何以爲教哉。」「此三樂者,而亦不能有其樂,雖有明睿之才, 性,則雖有父母兄弟,而亦不能有其樂,雖有明睿之才, 是,故曰係於人。至於仰不愧,俯不怍,則在我自致之而矣,故曰係於人。至於仰不愧,俯不怍,則在我自致之而矣,故曰係於人。至於仰不愧,俯不怍,則在我自致之而矣,故曰係於人。至於仰不愧,俯不怍,則在我自致之而於則雖有父母兄弟,而亦不能有其樂,雖有明睿之才, 作,則雖有父母兄弟,而亦不能有其樂,雖有明睿之才,而亦何以爲教哉。」

〇孟子曰:「廣土衆民,君子欲之,所樂不存

0

焉。 樂,音洛 下同

地 闢 民 聚, 澤 可 遠 施 ,故君子欲之,然 未 足

以

爲

樂

存焉。

中天下 而立,定 四 海 之民,君子樂之,所 性 不

之事也。 仁,故君子樂之。 然其 其道 下 闢民聚,澤可遠 故所欲者未足以爲樂。 無 性 而立,則其道大行,而 夫不被其澤,而 外之事,但於吾所受之全體 (所得: 之大行, 所得於天,則是指 於天者 無 施 要之,兩事皆只是仁, 則 夫不 民 得以推吾之仁,故君子欲之。 則 無衆寡之分。 地 至於樂, 無遠近之限; 被 不 性 其 而 在 則所謂 則 言 澤,故 是 也。 有 也。 何增 是又得以遂吾 但有 所 博 定四海之民 君子樂之, 損 欲 施 輔氏 哉?」 所樂, 濟 廣狹之辨 衆 日: 聖 中 古 「地 則 人 之 夫 亦

定故 君子所性 也。 分,去聲 ,雖大行 不 ·加焉, 雖 窮居 不 損焉,分

異。 輔 氏曰: 所 得 「事雖 於天之全體 有窮達,而性之全體何嘗有一 故 故 不 以 窮 達 而 豪之 有

> 君子所 喻。」醉,音粹。 睟 然見於面,盎於背,施 加 損。 性 分定,蓋言性之全體固自 ,仁、義、禮、智根 於 有一 四 於 體 心。 定之分故也。」 四 其 體 生色也, 不言 而

見,音現。

盎,烏浪反

也。 其藴 上言 不得,才有些 無異矣。」仁、義、禮、智,性之四 發其藴,則性只是一 《文集》曰: 也。 所性之分, 輔氏曰: 子 私 意,便 四端 懸空之物,都無實體 此 與所 根於心,便見得着 剗 所以 斷 欲所 了那 爲聖賢之樂也。 樂 根。」生,發 [德也。 不 同, 即與釋老之見 在 人心 若於此 此 根,本 見 上 也 相

施於四 雖不待吾言,而自曉 之於背,以至施 曉 自 而 **睟然**,清 有睟 也。 自 能 然清 體 曉 四 和 和 吾 體 謂 潤 潤澤之貌見之於面,盎 於四 意 不 澤之貌 見於動 也。 言 吾 體 意,如手容不待告語 而 而 《文集》曰 形 喻 於動 作 盎 言 威 作威 四 儀 豐 然豐 儀之間 其發見於容色者 體 之間 厚 厚 不待吾言 盈 而 盈 如 也。 溢 自 此 溢之意見 然 之意 恭,足 四 喻 體

容不待告語而自然重」。蓋氣稟清明,無物欲之

□、②便没了禮之根,有黑暗底心,便没了智之根,都各面著見於外者,不待言而無不順也。《語録》回著土,所以生色形見於外。衆人則合下生時,復爲氣便著土,所以生色形見於外。衆人則合下生時,這箇根理,計學與了仁之根,有頑鈍底心,便没了義之根,有頑鈍底心,其積之盛,則發累,則性之四德根本於心,其積之盛,則發累,則性之四德根本於心,其積之盛,則發

○此章言君子固欲其道之大行,然其所得盛致然。四體不言而喻,惟有德者能之。」者之根著土而已。程子曰:「醉面盎背,皆積有一重隔了。而今人便只要去其氣質物欲之隔,❸教四

於天者,則不以是而有所

加損

也

作 有善養老,則仁人以爲己歸矣。 者。』太公辟紂,居東海之濱,聞 曰:『盍歸乎來 〇孟子曰:「伯夷辟紂,居北海之濱,聞文王 .興,曰:『盍 歸野 吾聞西伯善養老者。』天下 來! 吾聞 西伯 辟,去聲,下同。 文王作興, 善 養 老

大,他蓋反。

己歸,謂己之所歸。餘見前篇。

之家足以無飢矣。衣,去聲。 足以無失肉矣。百畝之田,匹夫耕之,八口以衣帛矣。五母雞,二母彘,無失其時,老者五畝之宅,樹牆下以桑,匹婦蠶之,則老者足

也。 老五更之禮文而已。」 矣。若無此説,則人往 王之政也。觀五雞二彘之事,則文王之政 王》上篇已言之矣。今又言之者,故 此 文王之政也。 餘見前篇。 輔氏曰:「五畝之宅而 往將文王之養,只如後 一家養母 《集註 雞 Ŧį, 议 亦 可 母 世 下、《梁惠 爲 尊 謂 此 彘二 養二 周 是 悉 文

其妻子,使養其老。五十非帛不暖,七十非所謂西伯善養老者,制其田里,教之樹畜,導

^{●「}稟」,原誤作「宇」,今據四庫本《朱子語類》卷六十改。

^{▼「}狠」,原作「很」,今據四庫本《朱子語類》卷六十改。

❸ 「質」,原誤作「字」,今據四庫本《朱子語類》卷六十改。

0 рц

無 肉 凍餒之老者,此之謂 不 飽 不暖 不 飽,謂 也。 之凍 餒。 文王之民,

耕桑。 田 益之也。」 者,教導之使 謂 畜,謂 百畝之田。 雞 可 以 彘 養其老耳, 里,謂五畝之宅。 也。 趙氏 曰:「善養 非 家 賜 樹,謂 而 老 人

也。 孟子曰:「易其 易、斂、皆去聲 田疇,薄其稅斂,民可 使 富

食之以時,用之以禮,財不可勝用 易,治也。 教民節 儉,則財用足 疇,耕治之田 也 也。 也。 勝,音升。

乎?」焉,於虔反 無弗 如 民 非 水 與者 水 火。 火 菽粟 不生活 ,至足矣。 如 肾 水火,而民焉 暮叩 聖人治天下,使有 人之門户,求水火, 有不仁者 菽 粟

故也。 水火,民之所急,宜其 尹氏曰:「言禮義生於富足,民無常 愛之而 反不愛者 名 照 觀

焉。

水

有

術

日

月

有

明,

容

光

必

天下。 難爲言 ○孟子曰:「孔子登東山而小魯,登太山 則人心本仁可知已。 産,則無常 故觀於海者難爲水,遊於聖人之門者 心矣。」輔氏曰: 其或有不仁者,陷溺其本心焉耳。」 「尹氏之説 當矣。 而 觀 小 此

不得。 衆,言仁者難爲衆。 小; 能與之敵,故亦曰難爲衆也。」〇永嘉陳氏曰:「仁不可爲 難 者不足觀 天下之言皆不足以 海,則天下之水皆不足以 Ш 以明聖道之大。」東山、蓋 此言聖人之道大也。 爲言,猶仁 則 輔氏曰: 又高矣。 猶太山之前難爲山,大海之前難爲水。」 必觀 也。 以 不 輔 此言所 其 行而言也。」所 人吾之聽。 看有幾多人衆來到仁者 氏曰: 可 瀾 爲衆之意。 動 吾之視。 以 輔氏曰:「孟子因孔子之言 魯城東之高 處 亦猶仁則天下之衆皆 益 知而言 見既 高 遊於聖人之門, ,則其 也。」難爲水, 輔 大,則 氏 山,而 面前 曰 視 「觀於 其 下 小 太 使 莫 則

有 此明之發揮著見於外。 明之用 案:大波爲瀾,小波爲湍。 此 本矣, 觀日月於容光之隙無不照,則 言道之有本 也。 愚謂: 也。 明 觀 者、虚瑩昭徹之本體。 瀾,水之湍急處 明者,光之體; 水之瀾 則 知 其 光者, 光者,即 也。 源 知 之 愚

獨以爲言其有本者,蓋有本而後能無窮故也。」者,以其有本也。然程子以此爲言道之無窮,而《集註》其明之有本矣。輔氏曰:「以比聖人之道所以大

足於此而 如珠玉,小積則有小光輝,大積則 下,今日做得,明日又休也。」〇輔氏曰: 子貢之辯,子路之勇,都是 理 言學當以漸,乃能至也。成章,所積者厚, 而文章外見也。 一可觀。 如孝,真箇是做得孝成。 通 於彼也。 《語録》曰 真箇做得成了。 輔 氏 日 : 有大光輝」也。」達者, 「是做得成片段,有文 忠,是真箇做得 如自 「即程子所謂「譬 不是半 有諸己之謂 忠成 - 上落

> 미 氏曰:「聖道之大,固有其本矣。 於道,必成章而後達者曉之,以見學者當務實而有漸,不 能一蹴而遽至哉? 大而有本,學之者必以其 非妄想虚空者所能測識也。」〇此章言聖人之道 其間次第,皆是足於此 信,至於大而化之之謂聖; 躐等陵節 ,懸空妄想,而卒歸於無所得。」 故又以水必盈科而後行。 而 通 自『志學」,至『從心不踰矩』, 於彼。 然自學者言之,則又豈 漸 須實體之,方知其味 ,乃能至也。 君子之志

位。○孟子曰:「雞鳴而起,孳孳爲善者,舜之

雞 鳴 也。」言雖未至於聖人,亦是聖人之徒 之爲善與跖之爲利皆云孳孳者,天理人欲同 孳孳,勤 而起,孳孳爲利者,蹠之徒 勉之意。 輔氏曰: 「是勤 也。 勉不已之意。 行 而 異 情 舜

蹠、盜蹠也。

欲

知

舜與蹠之分,無他,利與善之間也。」

耳。善與利,公私而已矣。才出於善,便程子曰:「言間者,謂相去不遠,所争豪末

明日 着,如 以 善。」《語 謹 ? 舍人,雖有千金之寶,亦無安頓處,今日放在東邊草 何 於明善也。」或問:「雞鳴而起,若未接物, 説尤爲有益,此《大學》所以始於致知,而《中 爲義者,又學者所當深察也。」輔氏曰: 以 而其分,乃在利善之間而 於豪氂之間。」○楊氏 以 静時工夫也。 利言 爲 進 放在西邊草裏,終非己物。」○輔氏曰: (有箇屋舍了,零零碎碎方有頓 於聖人之學矣。」 善?」程 然講之不熟,見之不明,未有不以利 也。 録 $\stackrel{>}{\exists}$ 輔氏曰:「程子之説精切,使學者知 動静相 「且須常存 子 · 曰 : 涵 日: 敬 「只主 箇誠敬做主,學問方有 義兩立,孳孳不已,則庶乎 「舜、蹠之相去遠矣・ 已,是豈 處。 於敬,便 不然却似無家 「此又教學者 庸 可以不 》所以 是 楊 致謹 裏 爲 如 先 氏

也。

陽子,名朱。取者,僅足之意。取爲我者,不爲也。爲我之爲,去聲。○孟子曰:「楊子取爲我,拔一毛而利天下,

僅足於爲我而已,不及爲人也。列子稱其楊子,名朱。取者,僅足之意。取爲我者,

子莫執 墨子兼愛,摩頂 録》曰: 突其頂也。 墨子,名翟。 言曰,「伯成子高不以一豪利物」是也。 士,其保嗇神氣,雖 中, 「莊子數稱楊子。 執 放,至也。 中爲近之,執中 放踵 兼愛,無所不愛也。 一句話也不妄與人説。 利天下,爲之。 吾恐楊氏之學如今道流修鍊之 無 放,上 權, 摩 頂,摩 猶 《語 執

是亦執 執中而 偏 講學不明,不知至理之所在,克治不力,而各流 資質於理 意思固好,只是見不分明,依舊不是。」○輔氏曰: 在一處,要就二者之中而執之,正是安排尋 權,稱錘 度於二者之間 子莫,魯之賢人也。 淪胥不已,遂至於各極其偏, 略偏於剛毅,墨子資質於理略偏 無權,則膠 一而已矣。《語録》曰:「子莫見楊、墨 也, 所 以 而 稱 於 執 物之輕 知楊、墨之失中 其中。 定之中 則不肯 重 近, 而 而 於 拔 、寬厚 討 不 取 也。 道 知 中 也 毛以 於其 「楊氏 只原 一皆偏 變, 一, 故 原 也。 也 利 所 其

惡、爲,皆去聲。

天下

-而僅

足於爲

我,

則

欲

摩

頂

至

踵

以

利

天下

而

遂

至

於

哉 較 事 又曰 物 氏曰:「程子第一 難 事 自然之中,不待 則 央 則 中 間 中 兼 應變以取中。 物 愛。 與二子之執 而 有 而 也 則 堂 爲 識 萬殊 物天然有 執之,不 執 便不 若子莫者,是要安排 非 中 其 然 須 無所師 中 物 中 於子莫 中不 中 是 則 有 而 能 矣。 箇 默 家 或 如 萬 其 者,亦 第二説,又言中 川則 中 可 承 説,言中 (意固 類 識 稱 ~;則 蓋 一之中 穿鑿 在 執 前 又自 安排 錘 義 心 Ŀ 無異 然 善 也 廳 中 理 面 通 - 爲難 杜 其 箇中 爲 因 不 無定體 精 安排 非 而 矣。」程 末 識 撰, 於道 事 微, 中 流 中 假 識 來執之也 得 物之輕 且 而 爲 觀之, 須 贵. 人 而 一若但 則 推 難執, 則 試 度於爲 著 力 人力 子 堂爲 近 是 此 事 安 言 則 而 默 重 矣。 日 膠於二者 排 之 須 事 類 知 識 不 而 我兼愛二 中 然時 楊、 粗 先 オ 心 前 物 可 中 廳 中 識 通 却 淺 涉 墨 -矣。」輔 物皆 見 得 以 有萬變 故 所 安 之皆 矣。」 則 字 取 定之 者 能 排 則 能 或 平 最 中 有 與 計 事 隨 > 失

所惡執一者,爲其賊道也,舉一而廢百也。」

已盡一 是 顔 是 有 無 所貴 則 於時 在 皆 有我,故迷於愛 以立人之道,並 賊 不入,苟不當其 人,故役於私 不 異。 舉 亦 鬭 П 亦 陋 害也。 能 楊、 易 猶 巷,不改其樂,苟 (者中, 中,皆舉 而 章之旨。」楊氏 而 隨 子莫 執 不 時 廢 墨 地 百 逐 知 而 中 爲 而 則 也,百只是言其多耳。」 事 耳,故 執 而 一行 遂 閉 以 皆 之所 已 我 遂 至 耐 爲 取中, 户 矣。」《 至於害 於 然 而 不 害 可 我 害仁。 悖。 以以 廢 \exists 仁 孟 貴 同 故 兼 則 : 百 子以 者 義。 室 兩失其仁 爲我者,只 語録 其 愛之中 不 兼 與 者 兼 禹、 有 權 當 有 愛害 執二 墨 愛者,只 也 爲 $\check{\exists}$ 鬭 其 權 子 稷 賊 〇此 輔 義 者 而 也。 而 可 知 義 輔 \equiv 氏 無 之間 居 道 而 不 知 有 氏 無 曰 陋 害 異 過 則 章 日 : 執 有 我 知 巷,則 不 權 於 禹、 其 此 與 言 而 定之中 中 然 救之, 時 亡 不 耐 鄉 楊 顏 門 道 兩 者 中,是 似 稷、 , 則 不 知 義 句 鄰 氏 子 之 害 而 知 有 所

稷、 氏。 禹、稷、顔回 非 兼愛,顏子似爲我而非爲我。」○輔氏曰: 顔回之事,發明「中之所貴乎權」之義甚 一過其門而不入,則似墨氏。 示 能易 地皆然, 便是無權。 要之,禹、稷似兼愛而 無權 爲明白 楊 則 氏 是亦楊、 以 禹 使

害? 食之正也,飢 孟子曰:「飢者 人心亦皆有害。 渴 害之也。 甘食, 渴者甘飲,是 豈惟 П 腹 有 未得 飢渴 之 飲

墨而已矣。」

皆以爲甘美,故失其正味。 其 腹固能辨之。然常人一爲飢渴所害,則不暇擇其美惡 擇,而失其正理。 人心固能辨之。 口 腹爲 正 味。 飢渴所害,故於飲食不暇擇, 人心爲 然常人一爲貧賤所害,則不暇擇其當得 貧賤 輔氏曰: 富貴有當得不當得之正理, 所害,故於富貴 「飲食有美惡之正味,口 而 不暇 失 而

人能無以飢渴之害爲心害,則不及人不爲

不當得,而失其正理。」

憂矣。」

人能

不以貧賤之故

而動

其心,

則

過

人

遠

過人之遠,則不憂其不及人矣。」 所當得而受之,其不當得則不受之,則過於常人遠矣。 矣。 輔氏曰:「人若能不以貧賤動其心,而於富貴辨其

○孟子曰:

「柳下惠不以三公易其介。」

氏曰: 賢,必以其道,遺 凡事各有界限,甚分明,不可踰越。」柳下惠進 之和而不流。」❶ 微顯闡幽之意。故《集註》亦以孟子此説爲發明柳 惡」 意正相類,皆聖賢微 下惠和而不流,與孔子論 事人,至於三黜,是其 介,有分辨之意。輔氏曰: 「程子論孔子於夷齊之清,却言其不念舊惡,以爲 供不 怨,阨 介也。 顯 「如此則與界分之界同 闡幽之意也 夷、齊「不念 窮不憫 ○此章言 直 不 下惠 舊 柳 道 隱

及泉,猶爲棄井 ○孟子曰:「有爲者辟若掘井, 八尺爲仞。 言鑿 也。」辟,讀 井 雖 作譬。 深, 然未及泉而 朝,音刃 掘 井 九朝 ,與仞同 而不 止

^{●「}柳」,原脱,今據四庫本補。

説 所爲凡百,皆要極 則皆爲自棄其前功也 始怠終,得少爲足,故 棄前功也。」侍講名希哲,河南人。 之域,終未至於天道,未免爲半塗而 堯,孝不如舜,學不如孔子,終未入於聖 猶 廣矣,若夫爲人而 爲自棄其井也。 其 至而 未),故 中道 得爲聖人,言治 孟子發此説以警切之。 底於成。 〇吕侍講 而畫,半 塗而廢者多矣。 常人之情,則往 ○輔氏曰: 而不及於堯、舜 曰:「仁不 廢、自 吕氏推 一君子 如 往 人 如 鋭 此

皆爲未及夫泉也。」

渾全,何待脩習。 復其本然之性。」五霸則假借仁義之名,以求濟 得來底,只是其初資稟有 是做到那田 道,以復其性。 堯、舜天性渾全,不假脩習。湯、武脩身體 堯、舜,生而知之者也,故其氣質清明,天性昭著, .地。」○又曰:「性是自然有底,身是從身上做 湯、武 《語録 ,學而知之者也,故脩身體道 $\stackrel{>}{\exists}$ 些子不 「性之、合下如 相 似耳。」〇輔氏 此。 身之, 自 日: 以 然

者之所爲,與聖人用處天地懸隔。」其貪欲之私耳。輔氏曰:「五霸之事,皆矯竊詐

僞

久假而不歸,惡知其非有也。」惡,平聲。

别了,是以功烈如是之卑也 不足以爲之間 之而至也。 輔氏曰:「與道一者,無氣稟之蔽也。 真有,則誤矣。〇 說雖通,然却說得來慢了。」舊說,久假 其初不過以之欺人,而 五霸則假之而已,是以 歸,還也。 而 蓋嘆 也,身之者,履之也,及其成功則一也 不自知其非真有。 世人莫覺其 及其成功一者,皆真切爲之,故有 也。 有,實 若但假 有 尹氏 其終遂至 僞者。 」 也。 而已,則 輔氏曰:「凡假之者無不然 功烈 曰:「性之者,與 言竊其名以終身, 亦 以 已是 之自 如 通。 履之者,以身履踐 作僞,其 彼 欺。」或 不 輔 其 歸 成 氏 卑 意 而 也。 即 思 氣 此 道 爲 : 都 稟

太甲于桐,民大悦。太甲賢。又反之,民○公孫丑曰:「伊尹曰:『予不狎于不順。』放

0...0

大悦。

也。不順,言太甲所爲,不順義理也。餘「予不狎于不順」,《太甲》篇文。狎,習見

見前篇

尹之志,則篡也。」與,平聲。孟子曰:「有伊尹之志,則可;無伊賢者之爲人臣也,其君不賢,則固可放與?」

哉 ? 在我 者,不能也。」 也。 伊尹之志,公天下以爲心而無一豪之私者 無 非道全德備 輔氏曰:「公天下以爲心,謂合天下之心以爲心,而 豪適 莫之私意 ,其素行有以 也。 然 信於人,至誠有以通於天 此 豈 朝夕勉 强 而 能

信。『不素餐兮』,孰大於是?」餐,七丹反。 君用之,則安富尊榮,其子弟從之,則孝弟忠耕而食,何也?」孟子曰:「君子居是國也,其

詩

魏國

風

伐檀》之篇。

素,空也。

無

功而食禄、謂之素餐、此與告陳相、彭更之

意同。

事,故王子問之也。 工商賈,皆有 墊,齊王之子 王子墊問 日 :「士何事?」墊,丁念反。 :所事。 也。 上則 而 士 公卿大夫,下則農 居其間, 獨 無 所

孟子曰:「尚志。」

業,則高尚其志而已。 欲則卑污。」 其道,而其志則須高 得行公卿大夫之道,又不當爲農工 尚,高尚也。志者,心之所之也。 尚 方可。 輔氏曰: 志於仁義 「士雖未得 則高 尚 一商 士 溺 位 置更之 既 於利 以行 未

在 ? 日 : 「 義,大人之事 無 罪,非仁也,非其有而取之,非 何 仁是也 謂尚志?」曰:「仁義 備矣。」惡,平聲 ; 路惡 在? 義 是也。 耐 已矣。 義 也。 居 仁由 居惡 殺

而 人,謂 無不在於仁義,此士所以 其志 公卿大夫。言士雖未得大人之位 如此 ,則大人之事體用已全。 尚其志也。 若小 大

義,用也。 人之事 ',則固 大人之事,體用已全,得時得位,則舉 非所當爲 也。 輔氏曰:「仁,體也。 而 措

之耳。」

哉?」舍,音捨。 親 皆信之,是舍簞食豆羹之義也。 戚、君臣、上下。以其小者信其大者,奚可 孟子曰:「仲子,不義與之齊國而弗受,人 食,音嗣 人莫大焉亡

此 之事,其介然自守如此,則不義而與之齊國,必不肯受。 節,而遂以爲賢哉? 之大倫,罪 小廉耳。 齊國,必不肯受。 仲子,陳仲子也。 徇名而强矯者 其辟兄離母,不食君禄,無 莫大焉。 [或能之,故孟子以爲是特 [舍簞食豆羹 言仲子設若非義 齊人皆信其賢,然 輔氏曰: 豈 可 以 「觀前篇所論仲子 小 廉 信 而 與之 其 人道 此 大 但

> 道,則 之義」而已、蓋未以爲賢也。 非 盡性 而樂循 理者不能,故孟子言此以曉齊 若夫安於人倫,使之各盡 其

○桃應問曰:「舜爲天子,皋陶爲士,瞽瞍殺 之勿迷於小而不察其大耳。」

人,則如之何?」

刑天子之父。故設此問,以觀聖賢用 所極,非以爲真有此事 桃應,孟子弟子也。 而不可以私害公; 皐陶 其意以 也。 雖 執 爲 法, 舜 而 雖 不 愛父, 心 可以 之

孟子曰:「執之而已矣。」

父也。 言臯陶之心,知有法 《語録》 曰:「法者,天下公共,在 而已,不知 有天子之 臯 陶亦 只

得執。」

然則舜不禁與?」與,平聲 桃應問 也。

夫,音扶。 曰:「夫舜惡得 惡,平聲 而禁之? 夫有所受之也。」

之命亦不得而廢之也 言臯陶之法,有所傳受,非所敢私,雖天子

然則舜如之何?」

桃應問 也。

徙。 遵海 曰:「舜視棄天下,猶棄敝蹝 訢,與欣同。 濱 而 處,終身訴然,樂而忘天下。」雖,音 樂,音洛 也。 竊負 而 逃,

矣。 焉, 天理之極,人倫之至。 不知天下之爲大。 不知天子父之爲尊,爲子者,但知有父,而 猶草芥,而 互相發。 而 蹝,草履也。遵,循也。 已,不知 則 輔氏曰: 不待 〇此章言爲士者,但 惟順 有 較計論量, 「《集註 有此事」者,既 天下也。 於父母 》謂桃應「故設此問 蓋其所以爲 而天下 孟子嘗言舜視 學者 可以 言舜之心,知有父 解憂,與此 察 無 以 知 心者,莫非 此 難 有法, 觀聖賢 而 處 之事 有 天下 用 得 而 意 心

> 者也。」 成,時 於心,則天下萬事 發明孟子所以告之之説,以爲是皆聖賢之心,天理之極 人倫之至者,可謂 至 物 熟, 皆 雖紛 兩盡其旨矣。 不 待計 紜 輕轕,沓 較, 不 學者能致察乎此 至吾 待 安 前,亦 排 而 將 舉 如 無 水到 耐 難 有

子與?」夫,音扶。 居移氣、養移體、大哉居乎! 與,平聲 夫非盡人之 孟子自范之齊,望見齊王之子。

喟然歎曰

以所居不同, 言人之居處,所繫甚大,王子 范,齊邑。 居,謂所處之位。 故 所 養 不同 而 亦人子耳,特 養,奉養也。 其 氣體 有

孟子曰:

異也。

張、鄒皆云羨文也。

桃應問之之意,而又 者乎? 彼者,其 「王子宫室、 居使之然 車 -馬、衣 也 服 ; 多 況 與 居 人 同,而 天 下之廣 \pm 一子若 居

之極,非以爲真

已得

廣 於背,居天下之廣居者然 居,見前 篇 尹 氏 \exists : 也。」 啐 然見於 面 盎

魯君之宋,呼於垤澤之門。 守者 Ë : 『此 非 吾

君也 也。」呼,去聲 ,何其聲之似 我 君 也?」此無他, 居 相 似

敬,獸畜之也。食,音嗣 孟子曰:「食 垤澤,宋城門名也。 而 弗 愛,豕交之 孟子又引 畜,許六反。 此 也 事 爲 愛 證。 而 不

恭敬者,幣之未將者 交,接也。畜,養也。 也 獸,謂犬馬之屬

有 未 將 \Box 也。 將時,已 : 「恭敬雖因威儀幣帛而 ,猶舉也。 有 此 《詩》曰: 恭敬之心,非 承 後發見,然幣之 筐是將。」 因 幣帛 而 程 後 子

恭 敬 而 無 實、君 子不 可虚拘。」

敬 此 言 而 當時 無 其 諸 實 侯 也 之 待 拘 賢者 留 也。 特 輔氏 以 幣 \Box 帛 世 衰 恭 道

> 聘; 待之之誠。 微,在上者皆不知 發此論以警之。」 在 下者 唯 上下之情交鶩於利 知 有 有 幣帛 恭敬 之可 待賢之誠 慕 而 愐 不 不 知 而 知 有義理焉,故孟 察 惟 恃 夫上 其 之人 有幣 所 帛 以 之

以 踐形。」 孟子曰:「形 色,天性 也。 惟聖人,然 後

口

也。 歉 形 不 所爲,便踏着這 所具之理也。」○《語 言之踐。《文集》曰: 或有不可 是如何?」曰: 理,聽便有聽之理。」〇 天性也。 人之有 也 能 視 盡 而 又能 或問 其 犯 明,聽 形 語 者 理 有色, 盡 「一顰一笑,皆有 箇形色之性耳。」蓋衆 故故 理 而 録》曰: 踐 其 聰 也 形 者,理 無 録 理 無 之説。」 問 理 「踐,猶踐言踐 以 「形色上便 日 不 即 然 踐 也。 各有 性, 形 後 曰:「人之生於 其形 踐 是耳、 形色, 至理。」〇愚謂: 性 口 非踐 即 自 有天性,視 以 理 履之謂 色 目、鼻、 約之踐,非 然之理, 人 踐 也。 惟 也。 有是形 聖人 其 踐 或 П 天地之 形 蓋言聖人 便 莊 之類,色 耳 謂 有 有 而 所 如 或 目 視之 踐 偷 無 是 踐 謂 而 間 形 行

之正氣以生,物受天地之偏氣以生,故物則有能有不能, 也。」《文集》曰:「充字極分明。」〇輔 知 盡 地 聖 其形矣。 不能全其形之理,故有形雖人,而心實禽獸,是不足以 之也。」〇《文集》曰: 恭,言則極 雖有是形而無以 聰,貌則不恭,言則不從。 而又有以踐其形焉云者,本有是物,而又能脩其 人欲之私雜於其間,是以視則極明,聽則 於習俗之蔽,而不能無人欲之私,是以視則不明,聽則 之則焉,是則 天者,則是形是色,莫不有所以然之故焉,莫不有所 也,莫不有形。 之正 一人盡 · 賢 得 「可以踐形,則無愧於形矣。」〇程子曰:「此言 人理, 人踐之而 惟聖人能全其形之理,故可以踐其形也。」〇又 氣 得 從。 人 所謂 而 然後 蓋凡形色本然之理 其 道 生, 踐其形也。 有是 天性者也。 而 「性即理之謂 與 未 稱 能 形 萬 盡 其名。 蓋不能 也,莫不有色。 充其 物 惟聖人能 能 然衆人梏於氣稟之偏 不 (形也。 盡其形色本然之理 充其形,惟聖 也。 同。 衆人有之而 無 氏曰: 盡其 然衆人有 不 既爲 而 - 盡,既 極聰, 蓋 (性,而 本其 「人受天地 人得 實 貌 有 是 無 所 形 以 則 是 當 得 人 不 須 天 則 踐 而 副 形 豪 不 狃 然 極 於 愈於已乎?」

則。 各盡其則又説得周遍 唯 人則 則,則可 不能充踐滿足也。」楊氏曰: 分道理未免虧欠。 而不知有,賢人則雖 之全理,然其氣稟亦 名,不然則與物 聖人而已。」〇永嘉 無 物者,形 不能 以踐形矣。」輔氏曰: 也。 無異矣。 既 色也。 才於性分有虧欠,即是空具 是爲 踐 有清濁 陳氏 形 人,則 뻬 然人得天地之正 日 : 則者, 未盡,能充其形而全其理者 唇 明之異,如衆 須 「天生烝民,有 「學未至於聖人,則 盡 得 性也。 楊氏即 人之理, 氣,故 人則 程子意, 各盡 方 此形色 得 雖 稱 物 於性 天地 有之 人之 其 有

齊宣王欲短喪。 公孫丑曰: 猶

已,猶止也。

云爾,亦教之孝弟而已矣。」終,之忍反 孟子曰:「是猶或紾其兄之臂,子謂之姑徐徐 終,戾也。 教之以孝弟之道,則彼當自知

0 楊」, 原誤作「孫」,今據四庫本改。

如此。蓋示之以至情之不能已者,非强年之愛於其父母乎?」所謂教之以孝弟者「子生三年,然後免於父母之懷,予也有三兄之不可戾,而喪之不可短矣。孔子曰:

孫丑曰:「若此者,何如也?」爲,去聲。 王子有其母死者,其傅爲之請數月之喪。公

之也。

喪也。 何 陳氏 既葬而未忍即 衣、縓緣, 既葬除 敢終喪。 如?」案《儀禮》:「公子爲 曰:「王子所生之母死,厭於嫡 時又適 其傅 除,故請之也 爲請於王,欲使得行數月之 有 之。」疑當 此 事,丑問 時 如 其 此 此者,是 禮 母 練冠、麻 已廢,或 母 而 非 不

已,謂夫莫之禁而弗爲者也。」夫,音扶。曰:「是欲終之而不可得也。雖加一日愈於

得加一日,猶勝不加。我前所譏,乃謂夫言王子欲終喪而不可得,其傅爲請,雖止

喪,天經 莫之禁而 至情,則不肖者有以 地 自 義,不容私 不 爲 者耳。 企而及之矣。 意 有)此章 所 短 言三 長。 年 示 之 通

〇孟子曰:「君子之所以教者五:

親承其教,遠與後者 或近者,又有或先或後 之遠近先後,則言私淑艾者爾。 成德達財者,品之次者也。 後之不同。 下文五者,蓋因人品高下,或相 輔 氏日 則 而不同 有不能及門而受業者也。」 如 答問 時 時者,故 雨 蓋有雖 者、品之下者 化之者,品之高 近 同 與先者, 時 去遠 而 也。 相 則 去或 近先 者 相 得 也 以 遠 去

有如時雨化之者,

位已到,因而發之,孔子於顏、曾是也。」 未能自化,所少者,雨 時 也,若孔子之於顔、曾是已。 而 其時而已。」草木之生,播種封植,人力已至 雨 雨之,則 ,及時之雨 其 化速矣。 也。《語録》曰:「不先不後,適 露之滋耳。 教人之妙, 《語録 日 亦 及 此 由 他 是 時 而 地

有成德者,有達財者,

財,與 才是明敏者。」 閔,德則天資純粹者。 於由、賜。《語録》曰"「成德,成就其德,如孔子於冉、 成 (德,如孔子之於冉、閔,達 材 同 此各因 達才,通達其才,如孔子於由、賜, 其 所 長 財 丽 ,如孔子之 教之者也。

有答問者,

是也。」
是也。」
是也。」
是世。《語録》曰:「答問,則是費言語。」○輔氏曰:「樊遲也。《語録》曰:「答問,則是費言語。」○輔氏曰:「樊遲就所問而答之,若孔、孟之於樊遲、萬章就所問而答之,若孔、孟之於樊遲、萬章

有私淑艾者。艾,音义。

誨之所及,若孔、孟之於陳亢、夷之是也。 之道於人,而 艾,亦取諸此。」人或不能 私,竊也。 「艾, 芟草也。 自艾淑艾,皆有斬絕自新之意。 淑,善也。 竊 以善治其身,是亦君 及門受業,但 艾,治也。《文集》曰: 聞 懲艾、創 子教 君 子

反。

率,音律

也。」孟子亦曰:「予未得爲孔子徒也,予私私竊傳其善言善行,學之以善於其身,是亦君子之教誨《語録》曰:「未嘗親見面授,只是或聞其風而師慕之,或

此五者,君子之所以教也。」

淑諸人也。」

賢無棄人。

賢無棄人。

と以及、大、無棄人也。 愚謂:君子之教人,如天地之生物,
と以成外, 無棄人也。 愚謂:君子之教人,如天地之生物,

繩墨,羿不爲 也?」幾,音機。 似 ○公孫丑曰:「道則高矣,美矣,宜若登天然, 不可及 也。 拙射變其彀率。 孟 何 子曰: 不 使彼 大匠 爲可幾 爲,去聲。 不 及 爲 而 拙 日 工 彀,古候 孳孳 改 廢

君子引而不發,躍如也。中道而立,能者易之法,不容自貶以徇學者之不能也。彀率,彎弓之限也。言教人者,皆有不可

易。

能者從之,言學者當

自

勉

也

輔

氏

Ξ:

過

則苟難而不可及。

不及乎中,則又苟易者之所

無過 但授之以學之之法。不發,謂不告以得之之妙。一中 那 間。」因上文彀率,而言君子教人,但授以學 得,自是那妙處不容説。 不發,又是甚麼物事 弓而不發矢,然其所不告者,已 之之法,而不告以得之之妙,如射者 中躍出。」〇《語録 引,引弓也。 人心精 見於前矣。《語録》曰:「須知得引箇甚麼,是怎生 出也。《文集》曰:「是道理活潑潑地 道 箭,然已知得真箇是中這物事了。」○輔氏曰:「引,謂 箇物事自跌蕩在 一理散在天下事物之間 不及之謂 一無些子夾雜,方見得他那精 發,發矢也。 ĕ ∃ : 面 躍在 前。 「義理 中 然雖不說,只纔挑 ,聖賢也不是不説,然也全説不 面前,須是聳起這心與他看,教 如張弓十分滿而不發箭,雖不 道 一昭著, 而 立,言其 如有物躍然於心目 躍 微妙處。」〇又曰: 發出 如,如踊躍 動 如 在 那頭了時, 非 面 踊 前 難 之引 躍 者, , 如 非 而 而 之 地 H

> 른 卑,法地是也; 藏。 卑不可抗,高不 以成物也。」〇 者所當 便 者,從之而已。」 言而可以益其顯,不 也。 唯其道有定 輔氏曰: 唯 自 勉 中 也。 道 耐 高者不可貶而下知崇,效天是也 「道有定體,率性而已。 此 體, 中 立,是以 章言道 道 因 故 可貶,語不能 而立,成己之事。 無 教 説 無 有 而 難 有定體 成 可 無易。 法 以 晦 卑. 能 其 教有成 者 教 八藏,中 能者從之,又所 者從之,則 示 顯 口 有 法, 默 道 抗 成 不因 修道 而 而 法 立 隆 又學 能 能 有 禮 而

道,以身殉道。○孟子曰:「天下有道,以道殉身,天下無

達、非 而 則道在必行,道 殉,如殉葬之殉,以死隨物之名也。 不 離 道殉身,即身殉道,以死相 也。 愚謂: 屈 道 不可 則身在必退,以 離也 從),雖時 贵 可 得 有治亂, 耐 離哉? 死 己有 身出 相 從 窮

未聞以道殉乎人者也。」

「盜亦有道」者,言是亦道耳。但只是妾婦之道,妾婦以以道從人,妾婦之道。輔氏曰:「此正如莊子所謂

順悦爲道者 也。

○公都子曰 滕更之在 門也、若在所禮。 而

不答,何也?」更,平聲

子曰: 趙氏曰:「滕更、滕君之弟、來學者也。」 「挾貴 而問,挾賢而問 ,挾長而 挾,

孟

有 熟勞 而 問 ·; 挾 故 而 問 , 皆所不答 也。 滕 更

有二焉。」長,上聲。

乃滕君之弟,則知其挾貴矣。 趙氏曰:「二、謂挾貴、挾賢也。」輔氏曰: 而肯來學於孟子,則 知 「更 其

挾賢矣。」尹氏 曰:「有所挾,則受道之心 不

專,所以不答也。」輔氏曰:「學者之心,須是專一,

愛物。」

誨 方有受教之地。 人不倦,又惡夫意之不誠者。 有所挾,則二三也。」〇此言君子雖 輔氏曰: 「誠

孟子曰:「於不可已而已者,無所不已; 於

則

一,二則不誠矣。」

已, 止 也。 不 可止,謂 所 不得不爲者也。 所

厚者薄

無

所不

薄

也

其進鋭 者,其

所厚,所當厚者也。

此言不及者之弊。

(退速。」

進

鋭

者,用

心太過,其

氣易衰,故退

速。

三者之弊,理勢必 然,雖過不及之不同,然

卒同歸於廢弛。 輔氏曰:「不及者之弊,則愈見其

問

不及,流於欲者之所 爲 也。 過 者 之弊,則 其退 也 可 立

待,役於氣者之所爲也。 欲 肆 則無 極,氣過則易 衰 循

理

而行,則有則而可 繼 也。」

民 也, 孟 子曰 仁之而 : 「君子之於物 弗 親。 親 親 也,愛之而 而 仁 民, 弗仁; 仁民 於 而

序。 節。 而言之則皆仁,分而言之則有序。 以及人之老,於民則 物,謂禽獸草木。 統而言之,則皆自吾一性之仁。 然在學者言之,則於此三者之序,有由之而不知者 ○程子曰: 「仁,推己及人,如 愛,謂取之有時,用之有 可 於物 分而言之,則 則 不 有 輔氏 可 老 輕重之 吾 日: 老 統

差,然後是 愛物、仁民、親親之際, 之後、毋惑於異端、毋汩於私慾、安處善、樂循 當因聖賢之言,反求之心,涵養於未發之前 有得於此而 聖學工夫。」楊 失於彼者,又 皆與 有 氏 倒 曰 : 聖賢之説 行 逆 施、 「其分不 雜 自然脗 亂 ,體察於已 無 理,凡 次 同 合 者 而 形 故 無 於 發 要

類; 無不偏 者也,是之謂 真氏曰: 所 施不 而物則異類矣,是之謂分殊。 「凡生於天壤之間者,莫非天地之子而吾之同 以 能無差等,所謂 其 分殊,故仁愛之施 理。 然親者,吾之同體 理 以其理 則 有 而分殊者也。」 差。」尹 一,故仁愛之仁 民者,吾之同 氏 曰 : 氣 悦反。

氏曰: 何以 「尹氏説尤要切。 有 是 二本也。」 差等? 本故 本故 無僞而 也, 有差等,若 無 僞 也 無差 輔

等,則是僞而

徧物 也。 者無不愛也,急親賢之爲務。 ○孟子曰:「知者無不知也,當務之爲急,仁 知者之知,並去聲 ,急先務也, 堯舜之仁不徧愛人, 急親 堯舜之知而 賢 不

知 者 古 無 不知,然常以所當務者爲急,則

雖

徧

知人之所知、徧能人之所能,徒弊精

民之義,應係所當爲者。 事 天下,豈無所用其 務之急,如所謂 無 不 治, 而 勞心者治人,勞力者治於人。 心? 其 爲 亦不用於耕耳。 知 皆是也。」仁者固無不愛, 者 大矣。 又如夫子言務 語 録 堯、舜之治 \Box

問無 不能三年之喪,而 齒 決,是之謂不 緦 小功之察; 知務。」飯,扶 放 飯 晚 反。 流 歠: 猷, 而 昌

博矣。

然常急於親賢,則

恩

無不

洽, 而

其爲仁也

狹; 斷乾 飯。 輔氏曰:「此是言知。」豐氏 五月,服之輕者也。 三年之喪,服之重者也。 此章言君子之於道,識 輔氏曰:「此是言仁。」知 肉,不敬之小者也。 流歠,長歠,不敬之大者也。 察,致 日 所 「智不急於先務 先後,則 其全 問,講求之意。 緦 詳 麻三月,小 也。 體 ,則心不 齒決,齧 放 事有序。 飯,大 功

0...0

推言之如此。然孟子之意,亦是如此。」 對,雖有仁民愛物之心,小人在位,無由下賢,雖有仁民愛物之心,小人在位,無由下達,聰明日蔽於上,而惡政日加於下,此孟達,聰明日蔽於上,而惡政日加於下,此孟

孟子卷第十三

後學 成德 校訂

孟子卷第十四

朱子集註 後學趙順孫纂疏

盡心章句下

凡三十八章。

所愛。」 一者以其所不愛及其愛及其所不愛,不仁者以其所不愛及其孟子曰:「不仁哉,梁惠王也! 仁者以其所

及其所不愛也。親親而仁民,仁民而愛物,所謂以其所愛

故驅其所愛子弟以殉之,是之謂以其所不愛糜爛其民而戰之,大敗,將復之,恐不能勝,公孫丑曰:「何謂也?」「梁惠王以土地之故,

及其所愛也。」

也。 梁惠 流,故横放逆施,莫之紀極也 仁之禍,由 恩,自内及外,不仁之禍,由疏逮親。 以 之戦 其子弟,終不至殺身覆族,不已也。」 本而推之,故雖無所不愛,而輕重等差,蓋不可紊也。不 曰:「仁人之恩,自内以及外者,自本而推之也。 子弟,謂太子 民之故及其子,皆以其所不愛及其所愛 鬭,糜爛 王以下,孟子答辭也。 〇此承前篇之末三章之意,言仁人之 疏逮親 混者,徇 申 其血 也。 欲而 肉也。 以土地之故及其民, 從流 始 者 也 復之,復戰 糜 也。 糜爛其民,使 爛其 惟 人 其 民 徇 ൬ 惟 欲 輔 其 也。 残 而 賊 從 氏 自

○孟子曰:「春秋無義戰。彼善於此,則有

者。但就中彼善於此者則有之,如召陵之著其擅興之罪,無有以爲合於義而許之《春秋》每書諸侯戰伐之事,必加譏貶,以

0

師之類是也。

征者上伐下也,敵國不相征也。」

正之,此春秋所以無義戰也。征,所以正人也。諸侯有罪,則天子討而

○孟子曰:「盡信書,則不如無書。

者,學者當識其義 程子曰: 載 事之辭, 而已; 荷執於 容 有 重 稱 辭 而 則 過 時 其 或 實

有害於義,不如無書之愈也。」

吾於《武成》,取二三策而已矣。

其餘不可盡信也。程子曰:「取其奉天伐之書也。策,竹簡也。取其二三策之言,《武成》、《周書》篇名,武王伐紂歸而記事

血之流杵也?」 仁人無敵於天下。以至仁伐至不仁,而何其

暴之意,反政施仁之法而

Ë

王伐紂,紂之「前徒倒戈,攻于後以北,血杵,舂杵也。或作鹵,楯也。《武成》言武

之也。 之心,其爲害大矣。」 惑之,以爲聖人在上,亦或 置,豈肯使之殺人至於如 之自殺,然畢竟過乎實。武王伐紂,遇此等事,亦 不仁之心耳。輔氏曰:「如血 流漂杵。」孟子言此則其 書》本意,乃謂商 孟子之設 是言,懼後 人自 此之多? 有時 殺人如 相 流漂杵一 殺,非 不可 此而 此,則將長其不仁 世之惑, 不 辯, 信 語,雖 謂 竊恐 者。 武 是 必 且 王 自 商 後 長 殺 然 處

○孟子曰:「有人曰:『我善爲陳,我善爲

制行伍曰陳,交兵曰戰。戰。」大罪也。陳,去聲。

國君好仁,天下無敵焉 狄怨,東面 而 征 西 夷 怨。 好,去聲。 日 『奚爲 南 後 面 我?』 而 征北

此引湯之事以明之,解見前篇

武王之伐殷也,革車三百兩,虎賁三千人。

兩,去聲。賁,音奔。

又以

武王之事

明之也。

兩,車

數,一

車

兩

輪也。愚案:《風俗通》云:「車有兩輪,故一車謂之一

兩。」千、《書序》作百。

王曰:『無畏! 寧爾也,非敵百姓也。』若崩

厥角稽首。

王謂商人曰:無畏我也。我來伐紂,本爲《書‧泰誓》文與此小異。孟子之意當云:

安寧汝,非敵商之百姓也。於是商人稽首

至地,如角之崩也。

征之爲言正也,各欲正己也,焉用戰?」焉,於

虔反。

民爲暴君所虐,皆欲仁者來正己之國也。

○孟子曰: 「梓匠輪輿能與人規矩,不能使

人巧。」

後自得之妙。」蓋下 悟 尹氏曰:「 人,雖大匠 周 所 規矩,法度可 論斲輪之意蓋 亦末如之何也已。 學可以言傳,上達必由 告者 如此。」 也。 輔氏曰: 巧 則 巧謂 在 心 其 熟

有之。」飯,上聲。糗,去久反。茹,音汝。袗,之怒反。及其爲天子也,被袗衣,鼓琴,二女果,若固公孟子曰:「舜之飯糗茹草也,若將終身焉;

果、《説文》作婐、烏果反。

聖人盡性,故其心湛然,而無所厭 也。 動 安,是不以物動己也。 行不加,窮居不損也。 心,不以貧賤 以果爲侍。《廣韻 女,堯二女也。 畫衣也。 飯、食也。 於中,隨遇而 輔氏曰: 愚 「所性 糗,乾精 謂 丽 》從女從果者,亦曰 畫 安,無預於己,所性分定故 果,女侍 ,謂天所予我之性也。 有慕於外,不以 無預於己,是不以己隨物 夫貧富貴賤,皆外 衣 者, 也。 畫 也 黼 茹,亦食也。 羨欣戚於其 黻 侍也。」言聖 絺 語 繡 物之儻來寄 録 之衣也。 富 分定,謂雖 ≥ ∃ : 間,隨遇 貴 也 人之 「趙氏 而 袗, 也 有 大 而

兄。然則非自殺之也,一間耳。」間,去聲。人之父,人亦殺其父,殺人之兄,人亦殺其人。 强子曰:「吾今而後知殺人親之重也:殺

敬其親矣。」 切。」范氏曰:「知此則愛敬人之親,人亦愛 親 間者,我往彼來,間 言吾今然後知者,必有所爲而 無異 也。 輔氏曰:「『間』字説分明,其感發於人尤 一人耳, 其 實 感發也。 與 自 害 其

○孟子曰:「古之爲關也,將以禦暴。

今之爲關也,將以爲暴。」

則不同 也。 之; 氏 而 諸侯,必行文王之政,凡此之類,皆不終 税,此以賦斂爲 征税出 改 曰:「古之耕者什一,後世或收太半之 齊宣王之囿,爲阱國中,此 後世 也。」輔氏 譏察非常,爲義也,征税出人,爲利也。」○范 爲暴,不止 輔氏 日 : 日 暴也。 「先王制 關 於關、若使 則 其本者,天理 文王之囿 一,而 古今所以爲關之意 以 孟 袁 也。 子用 與 有 後世 民同 爲 日 於 暴 流

句是事實,言之則必行之矣。」
侯,必行文王之政』者,尤説得孟子之事實。蓋孟子言句之,故范氏推言及賦斂苑囿之事。且曰『使孟子用於諸

以道,不能行於妻子。」○孟子曰:「身不行道,不行於妻子, 使人不

者,令不行也。 也。使人不以道者,以事言之。不能与身不行道者,以行言之。不行者,道不与

者,邪世不能亂。」
○孟子曰:「周于利者,凶年不能殺,周于德

而後已,凡皆以周其德也。」 子不患乎世之難處,而惟患乎積德之不周 貴積蓄,然後有餘用 矣。故良農不患乎年之有凶,而惟患乎蓄糧之不厚 周,足也。 長自以爲足,而 言積之厚則 欲以 ,而外物不足 游 於邪世 用 則 以亂之。 有 鮮 餘。 有 不 , 戰兢自 若夫挾 輔 爲 氏 其 所 7; 亂 一德 者 善

其人,簞食豆羹見於色。」好、乘、食,皆去聲。見,○孟子曰:「好名之人,能讓千乘之國,苟非

於末者,人欲也。

天下之事莫不然,孟子舉關之一事言

安,即誠也。 人之法,不於其所勉而於其所忽,人之誠與僞見矣。 其勉於大而難久。 心勝,大處打得過,小處漏綻也。」○輔氏曰:「矯情者,務 千乘之國,那邊簞食豆羹必見於色。」〇又曰:「是好名之 讓國也,徒出一時之慕名而勉强爲之耳。然這邊雖 之人亦有時而能之。 也。」〇《語録》曰:「能讓千乘之國,惟賢人能之,然好名 而不意其鄙吝之真情實態,乃發露於忽易而不虞之地 其耳目於斯哉? 所指之地也。 小物,何哉?」曰:「千乘之國,辭受之間,十目所視,十手 之實也。 其所勉,而於其所忽,然後可以見其所安 者,反不覺其真情之發見矣。蓋觀人不於 好名之人,矯情干譽,是以能讓千乘之國, 然若本非能輕富貴之人,則於得失之小 或問:「好名之人能讓國矣,而不能忘情於 簞食豆羹,得失之際,則微矣,人亦何暇注 此好名之士所以飾情於彼以取美名, 至誠者,不忽於其小而有常是。 然若不是真箇能讓之人,本非真能 故觀 能讓 所

○孟子曰:「不信仁賢,則國空虚。

遭養,引二下儿。空虚,言若無人然。

無禮義,則上下亂。

無政事,則財用不足。」禮義,所以辨上下,定民志。

爲義,政事之施,則先後無序,寬猛失宜也。」 仁賢爲本者,當矣。禮義由賢者出,政事以得人爲本,故 國虚矣。有之而不能信任之,則與無同。 無仁賢,則處之皆不得其當。 德之首,賢則總言其有德耳。 義政事,處之皆不以其道矣。」輔氏曰:「仁者 尹氏曰:「三者以仁賢爲本。 生之無道、取之無度、用之無節故 國以賢 禮義則以非禮爲禮 而 無仁賢,則禮 立,無仁賢,則其 尹氏謂三者以 也。 、非義

得天下,未之有也。」 〇孟子曰:「不仁而得國者,有之矣,不仁而

來,不仁而得天下者有矣,然皆一再傳而而不可以得丘民之心。鄒氏曰:「自秦以言不仁之人,騁其私智,可以盜千乘之國,

可者,得孟子之旨也。」
氏及五代之君皆是也。鄒氏斷以得天下必如三代而後代而後可。」輔氏曰:「不仁而得天下,如曹操、司馬失之,猶不得也。所謂得天下者,必如三

티 : 是,而姑借聖賢之説 而不悖也,各於其時視其輕重之所在而 此。 在西。」蓋國以民爲本,社稷亦爲民而立,而 之壝。」壝者、累土以爲高也。不屋而壇、社壇在東、稷壇 其同功均利以養人故也。《周禮・大司 非土無以生、土非稷無以見生生之效、故祭社必及稷、以 孟子曰:「民爲貴,社稷次之,君爲 君之尊,又係於二者之存亡,故其 社,土神。稷,穀神。 「以理言之,則民貴。 愚謂: 或問:「民貴君輕之説,得不啓後世篡奪之端乎?」 社 所以祭五土之神,稷所以祭五穀之神。 則 亦何詞之不可借,而所以啓後 以分言之,則君貴。 建國則立壇壝以 己爾。 徒》:「設其社 輕。 此固兼 若 輕 不惟 重 祀 如 稷 人 其 行 稷

得乎諸侯爲大夫。

天下歸之。天子至尊貴也,而得其心者,丘民,田野之民,至微賤也。然得其心,則

諸侯危社稷,則變置。

不過爲諸侯耳,是民爲重

也。

賢君,是君輕於社稷也。 諸侯無道,將使社稷爲人所滅,則當更立

溢,則變置社稷。」盛,音成。 犧牲既成,粢盛既潔,祭祀以時,然而旱乾水

而併及夫社稷焉,蓋社稷亦爲民而立故也。 爲民而立也。 於民也。 其人而祀之,蓋言遷社稷壇場於他處耳。」亦年不順 愐 成,八蜡不通之意,是 患,則毀其壇壝 祭祀不失禮,而 反視其民 如 輔氏曰:「天生民,而立之君以 草芥 世衰道微,至戰國之時,爲君 而 土穀之神不能 而更置之,《語録》曰:「非 不 之恤 也 社 故 稷 孟 雖 一子發 重 爲 者不 此 司牧之,是君 於 民 於是反覆明 君 禦災 -知其 重 之論 而 謂 捍 輕

是故得乎丘民

而爲天子,得乎天子爲諸侯,

之禍者,又豈止於斯乎?」

辨之,其丁寧警切之意,可謂仁矣。」

是也。 志; 非聖人而能若是乎,而況於親炙之者乎?」 百世之上。 ○孟子曰:「聖人,百世之師也,伯夷、柳下惠 聞柳 故聞 下惠之風者,薄夫敦,鄙夫寬。 句。百世之下,聞者莫不興起也。 伯夷之風者,頑夫廉,懦夫 有 奮 乎 立

也 興起,感動奮 一、餘見前篇 發也。 親炙,親近而熏炙之

孟子曰:「仁也者,人也。合而言之,道也。」 [仁]字不是别物,即是這人底道理。」然仁,理也; 仁者,人之所以爲人之理也。《語録》曰:「此

人,物也。

以仁之理,合於人之身而言之,

而 之理,合於人之身』而言,然後仁之爲道可見。 之,則又徒爲虚言,而 及仁,則血 乃所謂道 已矣,道則父子之親、君臣之分,見於人之身而尤著 氣物 者也。 欲之私而已。 或問:此章之説。曰:「言人而不 無以見天理 言仁而不即人之身以 流 行之實。 故必「以仁 蓋仁則 性 明

> 〇孟子曰:「孔子之去 信乎?」曰:「不可知也。 明,然未詳其是否也。 者實也』,凡二十字。」今案如 也者宜也,禮也者履也,智也者知也,信也 也。」〇或曰:「外國本,『人也』之下,有『義 也。」程子曰: 國之道也。 \(\int\) 庸 姑記之以俟知者。」 魯,曰:『遲 所 去齊、接淅 或問:「外國別本十五 謂 率 成此,則 性之謂 圃 遲 理 行,去 吾 極 道 行 分 是 字

他國之道也。」 也 。」去父母

重出

交也。」 ○孟子曰:「君子之戹於陳蔡之間,無上下之

亦氣數之窮,在聖人則何與焉?」 孟子特原其事,以 所與交也。 君子,孔子也。 輔氏曰:「陳蔡之厄,聖人之極否也。 爲蓋緣 戹,與厄同,君臣皆惡,無 君 臣 俱惡,無 所與交之故。 是 故

○貉稽曰:「稽大不理於口。」貉,音陌

也。」今案《漢書》無俚,《方言》亦 者,言大爲衆 理 趙 賴 氏 日 也。 口 輔 貉 所訕,不見理於衆口,是 氏 曰 : 姓 理 稽,名。 雖訓 賴, 而 爲 日『大不賴 衆 訓 無所賴 П 賴 所 於衆 訕 於 П

孟子曰:「無傷也。士憎兹多口。

「肆不殄厥愠,亦不隕厥問。」文王也。」《詩》云:『憂心悄悄,愠于群小。』孔子也。則憎當從土,今本皆從心,蓋傳寫之誤。趙氏曰:「爲士者,益多爲衆口所訕。」案此趙氏曰:「爲士者,益多爲衆口所訕。」案此

怒於 口 之。肆,發語 本言太王事昆夷,雖 悄悄,憂貌。 不自墜其聲問之美。 以 ** 當 群 之。 小。 風 三語 柏舟》及《大雅・縣》之篇也。 孟子 辭。 愠,怒也。本言衛之仁人見 録 Ĭ ,以爲 殞,墜也。 「問:『《衛邶 不能殄絕其愠怒,亦 孟子 孔子之事,可 以 爲文王 問,聲問 柏舟》之詩,何 一之事 以 也。 當

與

孔子?

而孟子以此稱孔子,何也?」曰:"此不必疑,

己。」輔氏曰: 亦如是而已矣。」 氏曰:「言人顧 下文豈得便言文王? 殄厥愠』之語,註謂説文王。 意似孔子之事,故孟子以此言孔子。 如見毀於叔孫,幾害於桓魋,皆愠 一尹 氏深得 自 如此意其間須有闕文。二〇 處 此章之旨。 如 以詩考之,上文方説太王 何, 于群 盡 至於《 小 孔子、文王之心 其 也。 在我者 《緜詩》『肆不 辭則 衛 **尹** 詩 而

其昬昬,使人昭昭。」○孟子曰:「賢者以其昭昭,使人昭昭,今以

之而成路。句。 ○孟子謂 步不可移,雖至近如妻子,亦且不順之矣,況他人乎? 不順者寡矣。 引《大學》之説當矣。 者,求之己也。 其有不順者寡矣。」輔氏曰: 學》之道,在自昭明德, 昭昭,明 高 也。 子 若不自明其德,則 以己昬昬,使人昭昭者,求之人也。 i i 爲間不用,則茅塞之矣。今 唇唇, 山 能明明 闇也。 徑之蹊間,句。 德,則 脯 如面 以 施於天下國家, 施於天下國 尹氏曰: 牆, 己昭昭 物無所見,一 使 介然用 「家,其 人昭昭 **大** 尹 氏 有

茅塞子之心矣。」介,音戛。

亦可以 間,遂 也。 嘗不發見也。 固有、雖易發,而亦易窒,日用之間,才有所感其端,固 心,不可少有間斷 徑,小路也。蹊,人行處也。 頃也。用,由也。 可以成 茅塞,茅草生而 成德。 路。 若或少頃 此 正猶 亦如人於善端發處 Щ 路,大路也。 之間不能 也。 中之小徑,人能 塞之也。 輔氏曰:「理義之心,人所 由之,則茅草生而塞之 體察而力行之,則 介然, 倏然之 由之,則倏然之 爲間,少 言理義之 頃 未

學者於理義之心不可少有間斷也。」習所蔽,外爲物欲所誘,而遂窒之矣。孟子言此,蓋以見矣。亦如善端開發,若或不能體察而力充之,則内爲氣

尚,加尚也。豐氏曰:「言禹之樂,過於文○高子曰:「禹之聲,尚文王之聲。」

王之樂。」

豐氏曰:「追,鍾紐也。《周禮》所謂旋蟲是

之。 之樂也。」 邪,皆旋蟲之類也。 爲之,附著鍾 也。 而文王之鍾不然,是以 鍾在者,鍾 鍾之紐也 自漢以來,鍾旋之上以銅篆作蹲 愚案《考工記 ,其形如環,環則 偃於此,若盤 紐 如 蟲 蠡者,齧木蟲 鍾 齧 縣 有盤 旋,然於旋之上 而 謂之旋,旋蟲 知禹之樂過於文王 欲 旋之義。 絶,蓋用之者多, 熊及盤 也。 縣 謂之幹。」蓋懸 爲 鍾 龍 言禹 蟲 則 獸 形 假 名 以 物 時 辟 飾 以

與,平聲。 曰:「是奚足哉? 城門之軌,兩馬之力與?」

車轍 豐氏 之鍾,則未久而紐全,不可以此 多所致,非 容九軌,車可散行,故其轍迹淺, 禹在文王前千餘年,故鍾 車,車皆 迹也。兩馬,一車所駕也。 曰:「奚足,言此何足以知之也。 由之,故其 車兩馬之力能使之然也 轍 迹 久 深。 而 紐 而 蓋 城中之涂 城門惟容 絶; 議 日 文 王 優劣 久 車

DЦ 0

此,而 否也 也 豐氏 此章 差明 文 義 白,故今存之,亦未 本不 可 曉 舊 説 知 相 其 承 是 如

)齊饑。 陳臻 曰:「國人皆以夫子將復爲 發

屢快哉?」

復,扶又反。

棠,殆不可 先時 復 賑 l 勸王發棠,而又自言恐其不 貧 (窮。 齊國嘗饑,孟子勸王發棠邑之倉,以 復。 至此又饑,陳臻問言齊人望孟子 可 也。

莫之敢攖。 虎,卒爲善士。 孟 子曰:「是爲 衆皆悦之,其爲 望見馮婦,趨而迎之。 馮婦也。 則之野,有衆逐虎。 士者笑之。」 晉人有馮婦者,善搏 馮婦 虎負嵎, 攘 臂

手執 不能 也。 之,適也。 此 輔氏曰: 笑之,笑其 用 日 孟 搏。 子, 「齊人之所望於孟子者,利也。 負,依也。 卒爲 而 不 孟 善士,後能改行 知 子 止 亦 也。 Ш 將 曲 去矣,故 疑 曰 此 嵎 時 爲 其 而孟子之 齊 攖, 善 言 王 也。 觸 已 如

> 所以 主故常,惟義理 矣,故其義不當復 子所樂爲者,但 自守者,義 是時 也。 如 有 何 耳 所言耳。 齊 夫告君以發粟振民,是 王已不能 顧豈徇其常所爲者,以 君子之所爲 用 孟子,而 與 亦 孟子 時 美 事, 變化,不 取人之 亦 將 古 去 君

也,有命焉,君子不謂 於聲也,鼻之於臭也, ○孟子曰:「口之於味也,目之於色也,耳之 性 四肢之於安佚 也。 也,

不可 人性 制 不 便是解「不謂性」一句 説,固已盡之。 言,此命字乃合理與氣而言。」○輔氏曰: 有,而求必得之也。」《語録 皆如其願,則是命也。不 程子曰: 止爲 ,則是亦有 謂我分可以 ,然有命 貧賤。 「五者之欲,性也。 分。 其 得而必極其欲。 命也。 既 曰「不可謂我性之所 蓋 不 也。」愚案: 雖 可 謂 富貴之極,亦 《語 我 性 録》曰: 之所 ř 如貧賤 不 可 有 山此 Ti. 能 然有分, 謂 有而 不能 而 「程子不謂 皆如 性字指 我 必求 者之欲 有 求必 如願 性 品 得 其 得 氣 之所 不 節 之,又 ,此固 之一, 質而 固 性之 願 能 限 是

之意。 分也。 如武帝之千門萬户,却是不知限節。」 安之於理。 曰:「若謂貧賤、故五者不能 今人只説得一 若以其分言之,固無不可爲,但道理却恁地不得。 富貴之極,可以無所不爲,然亦 如紂之酒池肉林,却是富貴之極而不知限節 邊,不知合而言之,未嘗不 如 其所願 有限制裁節,又當 ,則只説得 同 也。」〇 邊。 輔 氏

有性焉,君子不謂命也。」 也,智之於賢者也,聖人之於天道也,命也, 仁之於父子也,義之於君臣也,禮之於賓主

則是身之,③禹則 分不同。❷ 而 所造之有淺有 數,然舜惟盡事親之道,期於底豫,此所謂 而言,此「性」字却指理而言。 盡 程子曰:「仁、義、禮、智、天道,在人則賦於 命者,所稟有厚薄清濁,然而 厚薄之稟,皆命也。 所造有淺深不同。文王之囚羑里,夫子之不得位,此 ,故不謂之命也。」《語録 且如聖人之於天道,如堯、舜則是性之,湯、武 深,所遇之有應有不應,❶皆 入聖域而不優,此是合下所稟有清濁, 以所稟言之,一 如舜 》曰:「此「命」字專指 遇 瞽 性 瞍, 由厚薄清濁之 以所值言之。 盡 一善可 固是所 性。 大凡清 學 遇 而 氣 氣

> 於君臣 偶然蔽於此,遂不識夫子。 此當作兩般看。」 愚案: 所 稟之命,則是嬰稟得智之淺者。 否也哲,聖人之於天道也,無不脗 稟者厚而 而不知仲尼。 貧富貴賤, 豈不是有厚薄。」 大抵天命流行,物各有得,不謂之命,不可 誠有兩般,由稟受有厚薄也,又不可謂稟受爲非命 『天之降才爲有殊』矣。 此,又有性焉,故當盡性。」〇又曰: 是合下所稟有 ·已焉。 也盡,禮之於賓主也恭,智之於賢 清,則 厚薄, 薄 是非命耶?」《語録》曰"「若作所 而 其仁之於父子也至,義之 而 濁 所 曰孟子言降才且 遇有 則 張子曰 反 應 若作命分之命,則是 是,是 有 「以厚 不應。 「晏嬰智矣 如 也。 皆 薄 此 但 言 説 合 所 命如 其 若 命 謂 而 人有 命則 則 雖 也 命 純 是 如

也。 亦不 《語録》曰: 「清而厚,則仁之於父子也至,若瞽瞍 Ź

0

遇」,原作「感」,今據《朱子語類》卷六十一改。

⁰ 由 」,原脱,今據《朱子語類》卷六十一

身」,原誤作「反」,今據《朱子語類》卷六十一改。

〇 四 二

此其 厚薄 則不謂之命 彼也。 干,則 之,以後五者爲命,一有不至,則 不齊上論,是說人之智愚賢否。」或曰「者」當作否, 之所受乎天者,其體則不過仁、義、禮、智之理 力,故孟子各就 條者,皆性之所有而 之之不同,是皆所謂命也。」○陳氏曰:「是就稟氣之清濁 於賢者之不能盡 於舜,則 人,以前五者爲性,雖 人」衍字,更詳之。 之所 不謂之性,而 雖 專爲貧賤愚不肖者言之耶? ?而賦於人之名也,不惟智愚賢否之所繫,雖貧富貴 食色意欲之私 薄於義矣。 值 薄於仁矣。 亦亦 或問:「所謂性命者,何不同?」曰: 無不 而 安於貧富貴賤之有命,於智愚賢否之殊 如其 於仁、 禮薄而至於賓主之失其歡,智薄而 由於是也。 , ●亦無不本於是也。 義之於君 其重 性,至於聖人之於天道,有性之反 義、禮 ○愚聞之師曰:「此 命於天者也。 一處言之,以 故君子 臣 智 有不得,而 也 之有 抑其通言之也?」曰: 盡,若桀、紂之於 於食色意欲之私 性 命,則因夫氣之 也。 伸 而已,其發 不 「性者,人 此 必 然世之 復 欲 而 「然則 致 求 逢 抑 至

常人之言也歟。」張子所謂『 之於味五者,此固性之所欲,然在人則有 則責成於己」,其言約 而君子則斷之以人。 在人,而君子則斷之以天,下是道心,人皆知委其 自做工夫,不可一委之天。 以性言,則人之於義理,其 雖所同 見道理。 性,則見血氣而不見道理,以下五者爲命,則見氣數而 説命處,却曰有性。」〇永嘉陳氏 節,人以爲性我所 當勉也。」○《語録》曰: 制度之節; 則亦無不通矣。 天,多委之而不脩。 孟子之意,似若專爲貧賤愚不肖者 有,却有品節限制,不可必得, 孟子於常人說 聖且賢者,雖所稟之已厚,而 蓋富且貴者,雖所求之必 有 所以孟子到人説性處,却曰有 此君子言知命盡性之學,所以異乎 須要必得。 「此章只要遏人慾、長天理。 性 氣稟雖有 處,却以 大要,上是人心,人皆知 而 「善則 盡 ☐ : 後一 矣。」《語 命 清濁 1而言 世 付 言 於常人說命 節,人以 亦未嘗不勉其 所賦之分,在 不齊,須 則人之所 者, 人以上五 命於天,道 得,而 録 脯 ₩ ⊟ : 爲 其 亦必 命 是 命; 院處,却 在天, 推 循 着 嗜 者 前 則 П 其 飲 爲 力 不 在 所

0 發」,原誤作「後」,據《四書或問》卷三十九改。 則

賤

則

[人。]○輔氏曰:「先儒多以可欲爲己之欲,如《書]

》所謂

是皆命也,然有性焉,是以君子不謂之命,而責成於己。於父子五者,在我則有厚薄之稟,在彼則有遇不遇之殊,則有不易之則,皆命也,是以不謂之性,付命於天。仁之

〇浩生不害問曰:「樂正子,何人也?」 孟子

須如此看,意思方圓,無欠闕處。」

曰:「善人也,信人也。」

「何謂善? 何謂信?」 趙氏曰:「浩生,姓,不害,名。齊人也。」

不害問也。

曰:「可欲之爲善,

無些憎嫌處。」〇又曰:「人之所同愛而自爲好人者,謂之可愛也。」〇又曰:「只是渾全一箇好人,都可愛可欲,更其爲人也,處心造事,行己接物,凡其所爲,一皆可欲而不可惡,則是可謂善人矣。」〇《語錄》曰:「可欲是説這人不可惡,則是可謂善人矣。」八次,其惡者必可惡。天下之理,其善者必可欲,其惡者必可惡。天下之理,其善者必可欲,其惡者必可惡。

欲。蓋若以爲己之欲,則説得太輕,且人之欲有善惡不了敬脩其可願」之意。獨《集註》不然,可欲是别人以爲可

有諸己之謂信。

同故也。」

善,誠善於身之謂信。」 善以該之,如惡惡臭,如好好色,則表裏誠實,無一 疆假托之意也。□○張子曰:「志仁無惡之謂 後可以謂之信人矣。」〇輔氏曰: 善之在己而不得不然,決定真實而無一 然而果然不失也。必其用力之久,一旦脱然有以 者,或其天質之美,❶或其知美而勉慕焉,未必其真以 色,是則可 凡所謂善,皆實有之,如惡惡臭, 謂信人矣。 或問 「善固多端、故言凡所 此 豪虚僞之意,然 節。 Ξ: 如 真 好好 善善 豪勉 知 謂 人 其 爲

充實之謂美。

而無待於外矣。或問此一節。曰:「信足以自信於力行其善,至於充滿而積實,則美在其中

❶「質」,原誤作「資」,今據《四書或問》卷三十九改。

淳懿 所待於外矣。 其善」。至於充滿其量 已是知至意誠之事,然又須見於履踐,方得,故云『力行 之,則其行必力,其守必 有之善,充足飽滿於其身,雖其 心 無待於外,都是裏面流出 而 Ë, 而無不善 未必 其 之雜,是則 行之充 ,蓄積成實,然後美在其中,而 足 固 飽 所謂美者也。」○《語 來。」○輔氏曰: 如是 滿 隱微曲 耐 而不自己焉, 無 歉 折之間,亦皆清 於身也。 「有諸 録 然 則 己,則 其 既 所 無 和 信

充實而有光輝之謂大。

或問此 几 人者也。」〇輔氏曰: 於四體; 布獲、洋溢四 見於外也。 和 [支,發於事業,則德業至盛而 順 積 節。 其在事也,則德盛仁熟而天下文明,是則所謂 (中,而英華發外,美在其中,而暢於 又如是 出,而 曰:「美足以充於其内而已,而未必其能發 不可 而 「大則形見於外矣,故以『德業至盛 不已焉,則其善之充於内者,彌滿 ·禦其在躬也,則醉面盎背,而 不 可加矣。 大 施

大而化之之謂聖。

不可加」言之。」②

大而能化,使其大者泯然無復可見之迹,

爲矣。 傳,無待於思惟 可 人之智力所能及矣。」張子曰: 以目見而指言。 吉凶矣。 然無迹,而與天地合德,日月合明,四 之熟者,日以益熟, 未能離乎方體形迹之間。 則不思不 爲 也,在熟之而已矣。」 或問 是則所謂聖人者也。」〇輔氏曰: 勉、 此 ,無假於勉彊 至於化,則無迹,不可以目見,不可以言 從 節。 則 容中 向之所謂 <u></u>: 必其德之盛者, 道, 「大而不化 ,從容自然,與道爲一,而 大者, 圃 「大可爲也,化不 非 時 且. , 則 * 人力之所 合序,鬼神合其 將 H 春 其 「太,則 以益盛;仁 融 所謂大 凍 猶 者 能 非 混 可

聖而不可知之之謂神。

可以有加矣。是其盛德至善之極,無聲無臭之妙,必有問此一節。曰:「至於聖,則造道入德之功至矣,盡矣,不能測。非聖人之上,又有一等神人也。」或程子曰:「聖不可知,謂聖之至妙,人所不

^{●「}加」,原誤作「知」,今據四庫本改。
●「自」,原作「可」,據《四書或問》卷三十九改。

非耳 之上,復有神人也。 目所 能 制,心思 所 能 測 者 是 則 所 謂 神 者, 而 非 聖人

樂正子,二之中,四之下 也。

致矣。 氏曰: 以 善未誠。 子曰:「士之所難者,在有諸 好 愐 子,二之中,是知好善而 中 蓋 ○輔氏曰:「意者,樂正子雖 歡、從子敖、先館 己者或未實也。或問:「樂正子以善名矣,而以 ·, 則 自不總 仁 己,則居之安,資之深,而美且大可 .與智,具體聖人,獨未至聖人之止耳。」輔 但爲善人信人而已; 在善信之間 有餘 矣。 「張子并顔子言之,以見學之不可已如此。」() 徒知可欲之善,而若存若亡而已, 使其誠有諸己,則於從子敖之事,當如惡惡臭 邇也。」張子曰:「顏淵、樂正子皆知 於善, 樂正子志仁無 舍後長者 而 `,觀其從於子敖,則其有諸 不足於信矣。」○《語録》曰: 未能有諸己,故有從子敖之失。」 ,何也?」曰: 能明善,而亦工夫未到,於 顔子 惡 而 三而 好學不倦,合 不 致於學,所 「言在二者 른 以 能 「樂正 馴 有 程 之 餔

> ○孟子曰:「逃墨必歸於楊,逃楊必歸於儒 所變,而終亦必亡之矣。」尹氏 且大可以循致。 明學者只要有諸己,有諸己則住不得,自 則 至於神,則 至於聖而不可知之神,上下一理,擴充之 理之説尤得其要。 能 不受變於俗 不可 不然, '得而名矣。」輔氏曰:「尹氏上下 惟其不可得而名,故謂之神也。」 者鮮 徒知其善而若存若亡,則 矣。」輔 曰:「自可欲之善 氏 然趲 日 將去,故 程 爲 子 流俗 又發 美

歸,斯受之而已矣。

爲我。 實。 近也。」歸 情,故有所彊。 若泛然而無差等,則反至於徇外。 悔悟之新也。 知有己而不知有人,則遂至於太簡。 反正之漸,大略 墨氏務外而不情,楊氏太簡 近實則反正爲易矣。 自其心而 斯受之者,閔其陷溺之久,而 有所彊 觀之,則 如 故故 此。 兼愛之失爲甚 自其外而觀之,則兼愛若勝 不情。 輔氏 太簡 爲 曰:「兼愛固仁之事 我固義之事,若 則略 徇 而 外則不能若 而 近 於外,故 爲 實,故其 我之失猶 取其 於 其 徒 近

而招之。」 今之與楊墨辯者,如追放豚,既入其苙,又從

之可 甚恕爲仁之至,其亦異乎楊、墨之所謂仁義者矣。」 既 註》發明聖賢待異端之道,以拒之甚嚴爲義之盡,以 故人知彼説之爲邪; 之甚嚴,而於其來歸,待之甚恕。 也 放 往之失也。 ,羇其足也。 豚,放逸之豕豚也。 反。 仁之至,義之盡 〇此 言彼既 章見聖賢之於異端 待之恕,故人知 來歸 苙,闌也。 也。 而又追咎 輔 氏 距之嚴 ⊟ : 招, 此 「《集 待之 距 道 其 胃

征。君子用其一,緩其二。用其二而民有〇孟子曰:「有布縷之征,粟米之征,力役之

殍,用其三而父子離。」

若并取之,則 限之法,亦此意 米取之於秋,力役取之於冬,當各以 征 賦之法,歲 民 有常數,然布 也。 力有 輔氏曰:「此乃孟子言之,以 所不堪 縷 矣。 取之於夏, 今兩 其時 税 粟

> 危矣。」 數,併 税,非 始收穀。 征之耳。 所據而云?」永嘉陳氏曰: 警夫取民 曰:「言 二、朱子乃有夏秋之辨。 粟米、力役之征、《周禮 司乃有預借之名,重催之弊,其不仁甚矣。」〇問 止 而 布縷粟米之征,乃是取大曆十 爲 《月令》: 布縷征之夏,粟米征之秋,乃古法。 無度者。 民 兩 税。 爲 孟夏,蠶畢而獻繭稅, 邦 名同 今兩 》皆取之,而孟子言用其一 本,取之無 實異,失 税三限之法, 夫夏秋之説始出 「緩非廢其征,但 孟子之意 其意 ·四 年 度, 孟秋,農乃 於唐 亦 應 矣。」尹 不作 則 如 若唐 完 此 不 其 而緩 布 賦 登 分兩 時 知 斂 而 氏 或 之 併 何 其 有

尹氏曰:「言寶得其寶者安,寶失其寶寶珠玉者,殃必及身。」□孟子曰:「諸侯之寶三:土地,人民,政事。

盆 見殺?」曰:「其爲人也小有才,未聞君子之 ○盆成括 成 括 見殺。 社於 齊。 門人 問問 孟子曰 日 :「夫子 「死矣盆 何 以 成 知 括 其 將

者危。」

大道也,則足以殺其軀而已矣。」

猶信 明,而駸駸然入於逆詐億不信矣。」 以是爲奇中 括 於顛覆,不已也。」徐 也。 大。 티 : 盆 語 成,姓 有 録》曰:「恃才妄作,謂不循理了,硬要胡做。」○輔 「才出於氣而有限,故曰小。 不顧義理而惟才是逞,則行險僥倖,無所不至,不至 況曰小才,則又才之小者也。 也。」輔氏曰:「孟子之言,但述其理之當然耳,不 死之道焉,設使幸 ;括,名也。 也。 學者不達,而以是爲 氏 曰:「君子 恃才妄作,所 而 道本於性而無方,故 獲 夫道者,義理之總 奇 免,孟子之言 道 則必以 其常 以 取 而 料 事爲 른 禍 名 E 氏 讀

○孟子之滕,館於上宮。有業屨於牖上,館

以是爲竊屨來與?」曰:「殆非也。夫子之設或問之曰:「若是乎從者之廋也?」曰:「子

受之而已矣。」從、爲、去聲。與、平聲。夫子、如字,舊科也,往者不追、來者不距。苟以是心至,斯

爲扶余者非

者矣。 義之所當然也,然教亦固在於中矣。 於孺悲之欲見 以學者之失而議 惟以爲問者之言,則可 言,則不惟露筋骨, 子自説。 故記之。輔氏曰:「先儒多讀夫子作扶予,而以爲孟 其往也。 不獨以「殆非也」下無 道之心而來,則受之耳,雖夫子亦 而來,但夫子設置科條 之從者,乃匿人之物如此 或問之者,問於 而或人自悟其失,因言此從者固不爲 苟以是 朱子獨以爲夫子而 門人取其言,有合於聖賢之指 心至,斯受之者,與人爲善之公心 則 先生長者 解以 且非 孟子 疾 「日」字而 取。 所 以 ,是其識 滕更之在門 愚 作問 也。 待學者, 心嘗謂 以 知其 者自 乎? 量 待學者,苟 廋, 近 然。 又不逮 世 將 悟其失而言者,蓋 若 則不見答,是又 好 使學者不 若以爲孟子之 孟子答之, 議 也。 於當 論者,往 不 也。 時 言子 能保 自 以 竊 織 屨 白 至 往 屨

仁也; 隱之事 ○真 爲 是 是則心得其職,情 教之以推 於其所不爲者,或 亦 則心失其正, 而 能,達之於所不能,則無非仁 物欲之蔽,則於他 忍不爲,此仁義之端也。然以氣質之偏 惻 孟子曰 此 即 心 有所不當發而反發,遂至於其所不忍者,或有 統於心,人之所固有者也。 隱 一節,言凡人皆有所不忍、有所不爲。 夫不忍者,惻 而 氏 義 人皆有所不爲 羞惡之心,人皆有之,故莫不有所不 也。 推之,雖 日 也 所不忍以達於所忍 「有所不忍、 不爲者,羞惡之事 「人皆有所不忍,達之於其 而 不 所忍者亦不忍,即仁也; 有時 得其正,而性之所以爲仁義者得 能 統 而爲, 夫性 有 事 ,達之於其所爲,義 所不爲者,此心之正 或有不能者。 與 而 但 也。 推所不爲以達於所爲,如 情。 性亦 爲氣稟所 是皆本於性,發於情 故 從而梏亡之矣。 有 義矣。 所當 雖所爲者亦 拘物物 發 但推 也 輔氏曰 欲 時 而 、所忍 而 也 不 所 矣。」 能 忍 發 蔽 今 所 不 如

能

充

無欲害人之心,而仁不可勝用也,人

能 人能充無受爾汝之實, 量。 量 ; 所虧缺,則 受之之實。 忍而甘受之者,然其 爾汝,人所輕賤 此 推所不忍,以達於其 心,即是所不爲也。 其本心之量。 爲,以達於所爲,則能 也。 充 充無穿踰之心,而義 無不義矣。 無欲害人之心,而無 申説上文「充無穿踰之心」之意 滿也。 推所不爲,以達於其所爲,然後能充滿其無穿踰之心 能充滿其心量 能推 所不忍,以 無欲害人之心,即是所不忍也。 穿,穿穴; 無適而非義矣。《語録》曰:「不欲人 輔氏曰 人能 則 是心也,其量甚大,其 所忍,然後能 之稱,人雖 以 其用: 即 此 此 中 無所往 有 不 踰,踰 達 不仁矣; 滿 而 常, 可 心 節 於所 推 其 而仁義 勝 因, 必 充 之, 無 牆 而 或 滿 用 有 前 忍, 穿踰之心,而 皆 其 説 不爲 能 有 不可勝 也 使 慚 無 (用有 而 所 則 其 推 忿 欲害 爲 教 勝 義 貪 常。 無穿 人以 其 充 也。蓋 能 盜 而 用矣。」 平, 也。 人之心 昧 滿 所 滿 不 之事 人能 充滿 踰 隱 無 肯 不 其 之

恕,亦必推所不受以達於所受,而 而 能 之不至,則不受之心雖 稱 氏 有 去其 以 其 達之於所受,不以 充滿其實心之量 日 未是處, 爾 八無可 汝之稱 事 此 雖 爾汝之行,是 則 微,然皆是 加 節,事 雖惡人以爾汝 諸 我, 愈微 前 事 是 其 有得 能 之微 義 悪 羞 而理愈密。 有 充其無受爾汝之實也。 爾 惡之實心。 時 於此,而或遂失於彼, 而 相 汝之名也。 而 不 稱, 不行 察,不以 無所滲漏 亦 夫人不肯受爾 自 矣。 存養之不 有所愧 然反之於身, 迹 唯 然後 之粗 能 矣。」〇 推 加 若我身 則 能 而 所 亦不 汝 姑 不 體 充 湛 受 察 之 白 而

士 不言,是以不言餂之也,是皆穿踰 未 可以 言而 言,是以 言銛 之也 ; 之 可 類 以 也。 言 而

義

其

無受爾汝實心之量,無所適

而不爲義也

餂,音忝

與 强 是 即 探否?」曰:「是鈎致之意。」」今人以 餂 説幾 他 亦 此 ,探取之也。 説 穿踰 意 句 ,却不 ,要去動人,要去說 也 之類 説 **須** 便 故 佞 語 爲 隱 語 隱 録 默,皆 録 難 Ĭ: 人,是以言餂之也。 日 要 問: 使 ī 有意 他 如 來問 本不 探 舌取 探 取 我 必 猶言 取 説 物 是 於 以 自 F 如 探 試試之 不 合 家 人, 餂 言 當 却

> 易,故 則是亦穿踰之類。 於此 故特舉 至悉處,亦不容有 足道,然一語一默之微,發於計較 者,故以士言之。 也。 之類否?」日 話之也。 亦精矣。」 特舉以見例,必推 輔氏曰: 而悉去之,然後爲 問: 以 見例。 政 此 固 使 夫不爲穿踰 不盡 是。 故 當當 節,事 **集** 明 言 無穿踰之心, 方 然 愐 必 註 始能 言 其 之微 》亦以 推 能 事 荷 無受爾汝,在 充其 無 致安排而· 而 有 充 隱 爲 理之密,又 穿踰之心 悦人之意,是亦 無穿踰 而達 其 微 其 事 無穿踰之 有 之於此 人所 隱 意 之心也 微, 1 探 有甚 則 取於人, 忽 人所 類 有 以 穿踰 至 所 於 心 達 勿 不 其 纖 前

存 施博者,善道 焉。 孟子曰: 施、去聲 「言近 也。 而指遠者,善言也; 君子之言也,不下 帶 守 而 約 道 而

遠 焉 至 古人 , 所以 近之處 故 測之而益深, 窮之而 視 不 為言 下 也 於 近 帶 舉 而 則 指 目 益遠 遠 前 帶之上 也。 是 之 君子教 近 輔 事 氏 乃 EI: 人之事。」 而 \exists 「言近而 至 前 理 常 存 見 指

君子之守,脩其身而天下平。

所 人病 以自任 故推之而無不準,動之而無不化,是君子治天下之事 此 舍其 所謂 者 田 守 輕。」舍,音捨 而芸人之田,所求於人者重,而 約 而 施 博 也。 輔 氏 日 : 守守 約 而 施 博,

此言不守約而務博施之病。

行,性 此 與聖人無 初 而 爲,此乃聖人之極致也。」反之者,脩爲以 故其所得之天理無所污壞。 之至也。 性者,得全於天,無所汙壞,不假脩爲,聖 孟子曰:「堯、舜,性者也;湯、武,反之也。 賴 氣稟不能 語,蓋 至於聖 人力脩爲克治,去其偏 也。 異矣。」程 自 無所 一人也。 輔氏曰: 有意利行 孟子發之。」吕氏曰 偏 子 故 輔氏曰: 「此言生 其所 日 得之天理亦不能 而至於無意,復性 而 既無所污壞, 而 性之、反之,古未 復其全。 「此謂學而 知之者也。 及其全也 則自然不 知之者也 無 復其 氣稟清 無 意 遮 而 蔽 則 ·假脩 性 明 處, 者 安 有 其 亦

> 功一 者。 其 其性,則是生而知之者 意、安行利行處説耳。 性下合添『之者』二字。」○輔氏曰: 也。 合下有此不同。 成 也。」 初雖不 功 堯、舜不 則 同 及其至於聖,則 也。」《語 吕氏 失其 則 復性則是 性, 又自 湯、 録 武 ₩ El 其 湯、 善 無不同矣,故曰『及其成 生知 反之者 反其性 武善 無 「前説是明 學 意 知之後, 也。 则 反 而 是學 安 其 堯、舜不失 生 行, 知學 性 有 而 性 及 意 知 知 之 無

信,非 爲 動 氏曰: 意 也。 矣。 中,則 細微 生者也; 容周旋中禮者,盛德之至也, 然而中,而 而 觀 以正 必 回,曲也。 曲 「三者又特舉聖人之庸行、 爲之也,皆聖人之事 《鄉黨》 有 折,無 勉强 行 經德 》所載孔子之事,則 非 也。 持守之意,力 有意於中 不中 不回, 中、爲、行,並 三者 . 禮 亦皆 非以干 乃 懈 也。 意 其盛 ·, 性 可 去聲 人所易曉者以例 自 弛 以 輔氏曰:「若有意於 禄 之之 然 當之矣。」經, 哭死 則 德之至。 也;言語 而 必 有 德 然,非 而哀, 所 不 其餘。 中 有 自 常 必 非 輔 者

以爲『皆聖人之事,性之之德也』。」 聖人之動,無不時也,豈有意而爲之者哉? 故《集註》斷

君子行法,以俟命而已矣。」

行吾之法,則雖夕死可矣。」吕 也。 命 夕 禮者,盛德之至。 正與董子之論合也。」〇程 也, 非 計,是則所謂 孝,爲父而慈,皆是也。 此意也。 M 法者,天理之當然者也。 īĖ 人性之,君子所以 由 死可矣』之意 禍 有 旧 蓋莫非天理之當然,如爲君 其 知 此 所 福 義 所謂 出 爲 有 不謀 輔氏曰:「法 而 所 行 俟命者也。 聖人也。 吾 爲 不 其利, 之法以俟天之命 矣。 計, 也。 行法以 君子行之,而 蓋雖未 雖未至 此反之之事,董 復其性 者,凡古聖賢之所制 明 行法 輔 子 其 氏 氏 曰 : 而仁,爲 グ道 於聖人自然,而 日 俟 以 曰 至於 君子行之, 也。 而 不計 命者,『朝 俟命,君子 : 聞 른 吉凶 動 臣 (自然, 道 法 容周 其功 此反之之事, 而敬,爲 禍 故 由 福 子 者,皆 能 此 不爲惡 有所不 聞 旋 行 所 而 而 也。 子 立 法 道 中 正 吉 謂 E 前 是 者

○孟子曰:「説大人,則藐之,勿視其巍巍

驅騁田 去聲。 何畏 丈,侍妾數 堂高數仞、榱題數尺、我得 1,皆我 動矣。 懷或不敢盡,柔弱者則必至於變其所欲言而 孟子云爾。1〇輔氏曰: 也。 世上有人把大人許多崇高 之,則志意舒展,言語 趙 氏 彼哉?」榱,楚 獵,後 巍 티 : 志氣一有所懾怯,則必 所 魏,富 不 百人,我得志弗爲 「大人, 爲 車 也; 千乘,我得 貴 危 高 當 「若不藐視之,則是爲其巍 在 反。 顯 時 富貴 我者,皆古之制 得盡 之 尊 般,音 不能 當 志弗爲 貌 貴 志 事,有 展 也。」《語 者 盤 也; 弗 盡 藐 也 爲 底 言 也; 樂,音 般樂飲 藴 焉 也。 不 反徇之矣。」 録》曰: 貌, 敢 剛 而 食前方 洛。 也,吾 出 在彼 彊 巍 不 輕 \Box 酒 者 者 「爲 畏 之 有 所 故

榱,桷 我 前者,方一 雖得志,有所不爲, 也。 丈 題,頭 也。 也。 此 皆其 食前 而 所守者皆古聖賢 所 方丈, 謂 巍 饌 巍 食 然者 列於

— Б.

欲,雖有不存焉者,寡矣;其爲人也多欲,雖 孟子曰: 泯然不見其大之迹,故不至如 象,在孔子則 區區之物欲耳,何足道哉!」○楊氏曰:「《孟子》 也,德盛仁熟,大而化之,則自然不至有此等氣象矣。」 嚴然之氣象,便是指此等處言也。 此章,以己之長,方人之短,猶有此等氣 之法,則彼之巍巍者,何足道哉! 「在我者,皆古之制,以理爲守也。 「養心莫善於寡欲。 無 此矣。」輔氏曰: 此。 若聖人,則大而化之, 然非聖人覺此而不爲 在彼之所恃者,不過 其爲 「孟子有泰 人也 輔氏 Ш 寡 巖

勢周張浩大而反勝夫道心。 爲主,有 淺深耳。 前 所當深戒也。 無,然多 欲,如口鼻耳目四支之欲。 面不謂性章所言。 以宰 此即所謂人心也,人雖不能無,然須是以道 而 制 不節,未有不失其本心者,學者 節 約 輔氏曰:「口、鼻、耳、目、四支之欲,即 之,方得。 要之,人之欲亦不過此五事,但 此學者所當深戒。」程子 不然,即 雖人之所不 轉 而 他 之,則 能 心 有

□等氣 ○曾皙嗜羊棗,而曾子不忍食羊棗。孟子》 治,若待其周張,則用力又難矣。」氏曰:「程子又極其微細言之,學者須是於欲有所向處克報氏曰: 曰:「所欲不必沈溺,只有所向便是欲。」輔

条而不食羊棗?」曰:「膾炙所同也,羊棗所口。 一。」「只是北邊小棗,如羊矢大者。」曾子以父嗜之, 公孫丑問曰:「膾炙與羊棗孰美?」孟子曰: 公孫丑問曰:「膾炙與羊棗孰美?」孟子曰: 公孫丑問曰:「膾炙與羊棗孰美?」孟子曰:

肉聶而切之爲膾。炙,炙肉也。獨也。諱名不諱姓,姓所同也,名所獨也。」

有存焉者,寡矣。」

取,謂求望高遠。不忘其初,謂不能改其盍,何不也。狂簡,謂志大而略於事。進

舊也。此語與《論語》小異。輔氏曰:「此語雖

乎三子之撰,則志大而略於事可知,直欲躐乎聖人之樂與《論語》異,然以曾皙言志之事觀之,則此語尤切。異

該括得下兩句。進取,即是志大。不忘其初,即是略於之喪而歌,不能改其舊可知。然《論語》狂簡二字,又却處,則期望高遠可知。終不肯做下學工夫,後至於臨人

事也。」

不欲中道哉? 不可必得,故思其次也。」環,乎! 狂者進取,獧者有所不爲也』。 孔子豈孟子曰:「孔子『不得中道而與之,必也狂獧

不得中道」,至「有所不爲」,據《論語》亦 孔子之言。然則「孔子」字下當有「曰」字。 引孔子之言以告之,而後方自言以釋之也。」《論語》 「道」作「行」,「獧」作「狷。」有所不爲者,知 「道」作「行」,「獧」作「狷。」有所不爲者,知 中道」以下,孟子言也。

「敢問何如斯可謂狂矣?」

萬章問。

曰:「如琴張、曾皙、牧皮者,孔子之所謂

狂矣。」

至於牧皮,則固無所考,而不可知矣。」 未必盡然,必有近似者。 有近似者。 喪而歌。事見《莊子》。 琴張,名牢,字子張。子桑户死,琴張臨 曰:「琴張止有《莊子》所載一事,故朱子以爲其他言行 子者之撰,事見《論語》。 倚其門而歌,事見《檀弓》。 又言志異乎三 曾皙見前篇。季武子死,曾皙 若曾皙二事,則盡備狂者之態 雖未 牧皮,未詳。 必 盡然,要必 輔氏 其

何以謂之狂也?」

萬章問。

其行而不掩焉者也。嘐,火交反。行,去聲。曰:「其志嘐嘐然,曰『古之人,古之人』,夷考

嘐嘐,志大言大也。重言古之人,見其動

行有不能掩其言者,則又自有不可誣者也,故 則與所謂 焉耳 也。 是堯、舜氣象者,是亦所謂「古之人古之人」之類也 程子之説以釋之。 於如此、然其不屑之於事爲、而直欲徑探乎聖人之樂處: 志 曰 輒 同 : 稱 ,此所謂 「曾皙言志,而 言平考其行,則不能覆其言也。 便是『堯、舜 『嘐嘐然曰古之人古之人』之意亦不相遠, 稱 狂 夫子與之者,是與其志大言大也。 也。 而 已也。 氣象』也。 夫子與之。 輔氏曰: 夷,平也。 「曾皙之志 特行 蓋 與 有 聖 集 固不 掩, 程子 註 不 人之 ,而其 東 掩 便 覆 止 斯

是獧也,是又其次也。狂者又不可得,欲得不屑不潔之士而與之,

中 得分數多,覆 者,是合下氣質貞 此等人既不可 此 氏日 與 因上文所引,遂 和 合德, 狂 知與 者則 者,是 得 故不得 行並 於行 固 合下氣 便自 進 上 解 一所得 已而與夫狂覆 ,然後爲貴,所 有所守者。 質 所 高 分數 以 明 思 多。 便 得獧者之意 自 狂 也。 謂 聖 者 有 三門學 中 則 所 道 然必先知, 於 見 者是 者 知 者 必 Ŀ. 也。 皆 獧 所

> 不善之人也。」 潔也。 其身。 與進於道。 有守者也。 而後能行,故環又爲狂之次。」狂,有 輔氏曰: 輔氏曰: 守之固,則行之力,故不至於失其身。」屑 有 丁其 「不屑不潔,即前 志者能進於道,有守者不失 所志大,則是 所 其所知之大也,故可 謂知 志者也 恥自 好 耐 不爲

其 孔子曰: 惟 可 鄉 謂之鄉原矣?」 原 『過我門而 乎 ! 鄉 原,德之賊也。]]曰: 不 入我室,我不憾 焉者 何 如

以原爲愿,且 善人,則不應遂以 曰:「先儒皆以原爲善,不惟無所據,又善字所包 以其不見親就 德,故以爲德之賊。 所謂愿人,謂之鄉 慤」,字皆讀作愿, 鄉 原,非有識者。 日 鄉人無知,其所謂愿人,謂之鄉原。 爲德之賊。 爲幸,深惡而 愿。 原,與 謂 過門 謹 故《集 孔 愿 愿 子以其 之人 不入而不恨 同。 註 痛 影 絶之也 也。 **^** 荀子 《荀 似 子 德 故)廣,既 $\stackrel{\cdot}{\approx}$ 爲 而 鄉 愿字 輔氏 之, 證 原 非 里 \Box

似 古 人性情之正也。」萬章又引孔子之言而問 德 淺 一狹,又 而 非 德 鄉 前 人以 遂 斥以 爲愿,則 爲德之賊,深惡而 亦 未爲 真愿者 痛絶之,是 也。 孔子 也。 亦 以 其

言,則 涼 ? 媚於世也者,是鄉 \Box :「「何以 生斯 日: 世也,爲 古之人,古之人。 是 嘐 嘐 原 斯世也,善斯 也? 也。」行,去聲。 言不顧 行 何 可 行,行 矣。」 爲 踽,其 踽 不 閹 踽 禹 反。 然 涼 顧

閹,音

媚,求 厚哉? 求 又譏 然 之志也。 厚 踽 人,使當世之人皆 行 親 於人也。 踽 "獨行 媚 狷 悦 不掩 於世 者曰 人既 於 閹, 人 不進之貌。 其 一是鄉 鄉原譏狂者曰: 生於 言, 也 如 何 奄 必 而徒 原之行 此 孟 以 人之 如 子言此 爲 世 此 每 涼涼 善則 奄 踽 則 也 事 踽 當 必 薄 何 閉 深 可矣,此 《語 涼 但 稱古 用 藏 自 也,不 涼 録 爲 如 之意 閉 \mathbb{H} 此 無 此 人 藏 鄉 見 世 所 耶 嘐 以以 鄉 也 原 之 嘐 親 親 ? 原

> 笑之。 刺。 理會自己所見所得 是不得中道,却 志力行、不爲不善。 人爲志,雖行之未至,而所知 務爲謹 既不肯做狂,又不肯做狷,一 區,不 其實所 欲忤 向 都自 則 俗 ,與夫理之是非。 是閹 是爲己,不爲他人。 以 者皆能 取 然媚於世 容, 亦甚遠 專 不顧 務 心只要得 而已。」〇 徇 流 矣。 彼狂者 俗 俗 欲 汙 狷者 彼 世 人説 輔 鄉 使 嘐 一之是 氏 **哆啰然以** 原 便只是 人 好 日 便 無 非 反 更 所 閹 非 雖 有 古 不 非

萬 人,孔子以 章曰: 原,亦謹厚之稱 爲德之賊 鄉皆 稱 而 原 ,何哉?」 孔子以 人焉 無 爲 所往 德之賊 而 不 故萬 爲 原

然媚於世,此是鄉原之隱情匿志。」

章疑之。

悦之,自以 合乎汙世 曰:「非之無舉 爲是,而 居之似忠信 也, 刺 不可 之 無 與 行之似 刺 入堯、舜之道,故 也 ; 廉 同 潔 乎. 流 俗 皆

舉,欲 吕 侍講 刺 日 之 : 則 言言 無 此 口 等 刺 之人,欲 也。」流 俗者 非 之 則 風 俗 無 頹 口

日

德之賊

也

自拔。 之,則 日: 俗 靡 非 而 不 諧 如如 忠 「鄉 世 知反,故不可與人堯、舜大中至正真實之道 無可 信 雖或勉 而 原既 水之下 已。 而 刺。 欲人以爲謹 似 惟 爲 同乎 其如 忠 忠信廉潔, 流, 信, 流 是,故衆皆悦之,自以 俗 衆 愿,故欲非之,則 非 而 莫不 而 不 廉 其 敢 潔 心則實不然,不 自異,合乎汙 然 而 也 似 無可 廉 爲是,則 汙 潔 世 舉; 也 濁 過 而 又迷 欲 不 欲 輔 也 徇 能 刺 氏

鄭聲,恐其 惡 孔 原,恐其亂德也。』惡,去聲。 佞,恐: 子 Ė 其 惡 、亂樂也; 亂 似 義 也; 而 非 惡紫,恐其 惡 者 利 惡莠,恐其 П 莠,音 恐 有 亂 其 朱 亂 也; 亂 信 也 苗 惡 也; 鄉 惡

斯

輔氏 言 則 語》所 孟 有不然者 説,故以 子又 似 也。」莠,似 日: 載,亦與 義 爲才智之稱。 「巧言之人,徒尚口 引孔 故 而 以 非 、此不同。 爲害義。」利 義 子之言以 苗之草 也。 惟 雖 其能 輔 有 也。 П 氏 詳略, 而 明 言 曰:「佞 多言 初 之。 則 佞,才智之稱 無誠實 然其惡是而 其説多似 者,有口 輔 而 氏 者,故以爲害 不 日 : 實 義 才, 非 者 而 一之意 據 i; 其 實 能 巾 論 則 辨

> 君子反經 信。 無邪慝矣。」 中 悦之,故人皆以爲善。 曰:「鄉原既譏 有似乎中 朱,正色 道而實 鄭 聲,淫 非。 而 也。 已矣。 道 此聖人所以恐其亂 狂者 樂也。 而 鄉 1,故不 實 原 經 而 非 不 不可 正 樂, 狂。 也,故 狂 則 與 又譏獧者,故不獧 不 正 入堯舜之道,故 庶 德而深惡之也 ·獧,人 樂 恐 民 也 其 興; 皆以 亂 紫, 庶 德 民 爲 間 有 衆皆 興, 輔 似 色。 氏

子 Ξ: 릲 邪 不 陳氏曰: 反, 無 並起,不可勝正,君子 取 悪, 庄 所 此 復也。 大夫狂 常道 一, 故 口 辨 如 經經 互. 異 人 鄉 既復; 八端、 · 雖 是 狷 經, 人 原 日 息邪説之大權也。」 者,蓋以狂者志 有 得 之 用常 常也,萬世不易之常 邪 則 爲 屬 行 民 慝 異 是 之理。」 不 興於善, 於此、 説 也。 以 足以 興, 濟 世 亦復其常 其 衰 興 而 尹 惑 大 私 道 起 之矣。 是 氏 而 非 微 於 日 可 而 明 善 道 與 道 大 邪 輔 也。 也 進 君 而 慝 經 H

素亶反

道,狷 於鄉原 人之深也 者有所不爲, 而 欲痛絶之者,爲 絶之之術無他焉,亦曰 而 可 與 其 有 似 爲 是而 也。 反經 非, 所 而 惑 惡

禹、臯陶,則見而知之;若湯,則聞而知之。〇孟子曰:「由堯、舜至於湯,五百有餘歲,若

由

氏曰:「天道固有常矣,然亦不能截然整齊,須有先後遲亦有遲速,不能正五百年,故言有餘也。」輔趙氏曰:「五百歲而聖人出,天道之常,然

見而知之,若文王,則聞而知之。由湯至於文王,五百有餘歲,若伊尹、萊朱則

速。」尹氏曰:「知,謂知其道也。」

也,爲湯左相。」 趙氏曰:「萊朱,湯賢臣。」或曰:「即仲虺

宜生,則見而知之,若孔子,則聞而知之。散,由文王至於孔子,五百有餘歲,若太公望、散

而無有乎爾,則亦無有乎爾。」

若此其未遠也,近聖人之居,若此其甚也,然

愚案: 者,而又以 此其近、然而無有見而知之、則今恐不能聞而知之耳。」 而知之? 乎?」輔氏曰:「若非前 五百 林氏曰:「孟子言孔子至今時未遠,鄒、 之下,必將有神會而心得之者耳。故於篇 後世遂失其傳,然乃所以自見其有不 相去又近,然 餘 此言,雖若不敢自謂已得其傳,而憂 歲 孟子去孔子之世如此 見夫天理 之後, 而已無有見 又豊 面人見而知得,後之人如 民 復 彝不可 其 而知之者矣; 有 未遠,近聖人之居 聞 泯 愐 滅 知 之 百世 得 何 者 則 辭 魯

端, 博題 學不傳,千載 深哉 之學於遺經, 理滅矣。先生生乎千四 儒,則天下貿貿焉莫知所之,人欲 明夫善治之道,以淑諸人,以傳諸後, 序之曰:「周公没,聖人之道不行 世遂失其傳,然乃所以自見其有不得辭者,而又以 死,聖人之學不傳。 宋元豐八年, 使 天理民彝不可泯滅,百世而下,必將有神會而 傳之有在,而 終,歷序群聖 言,則道統可 萬世之下,學者即夫在己之不可泯滅者以求夫聖賢之 闢 其 邪説,使聖人之道焕然復明於世。 墓 輔氏曰:「孟子雖不敢自謂已得其傳,而憂後 得 曰「明道先生」。 ?而傳。 無真 河 之統,而 又以 以 南程顥伯淳卒。 興 其仁天下後世,深且遠矣。」() 儒。 俟後聖於 起 道不行,百世 斯文爲己任 終之以 無善治、士猶得 百年之後,得 而其弟頤 無 此 窮也 所 潞公文彦 無 心得之者。 肆 ; 善 以 ,其 不 而 無 孟 正 明 治 見夫 傳 有 天 真 以 軻 叔 指 其

孟子卷第十四

後學 成德 校訂

《儒藏》精華編惠蒙善助,共襄斯文,謹列如左,用伸謝忱。

NE•TIGER 時裝有限公司董事長智海企業集團董事長 馮建新先生本焕法師

張志峰 先生

黄培瑩女士 付 剛先生 張貞書女士

拾 伍 壹 壹 壹 萬 拾 佰 佰 萬 元 萬 萬 元 元 元

北京大學《儒藏》編纂與研究中 :

本册責任編委 甘祥滿本 册審稿 人 劉尚榮

